

উদ্‌গনিমি

শ্রীহরেক্তনারায়ণ মুখোপাধ্যায়
সম্পাদিত

ভারতী প্রকাশন
৬, রমানাথ মল্লভদার ষ্ট্রীট, কলিকাতা-১

প্রকাশক :

ঐতিহ্যবোধক বারিক

৬, ইমানাথ মজুমদার হাট,

কলিকাতা—৯

প্রচ্ছদ—পৃথীখ মজুমদার

মুদ্রক :

ঐতিহ্যবোধক মজুমদার

কলিকাতা প্রেস (প্রাইভেট) লিমিটেড

৯, শিবনাথবাসী দাস লেন,

কলিকাতা—৯

উৎসর্গ

পুলকিত পিতৃব্য

ঐবুত ব্রহ্মপদ যুথোপাধ্যায়ের

করকমলে

ଅବସ୍ଥାୟୀ ବହେ :

ସୁସ୍ଥୁ ପୃଥିବୀ

ବିଶ୍ୱସ୍ତ

ଅବସ୍ଥାୟୀ

ଅବସ୍ଥାୟୀ

ଏଗାରୋହି କାନ୍ତନ

ଅବସ୍ଥାୟୀ

ଅବସ୍ଥାୟୀ

ଅବସ୍ଥାୟୀ

ଅବସ୍ଥାୟୀ

ଅବସ୍ଥାୟୀ

ଅବସ୍ଥାୟୀ

ଅବସ୍ଥାୟୀ

ଅବସ୍ଥାୟୀ

ଅବସ୍ଥାୟୀ

ଅବସ୍ଥାୟୀ

ଅବସ୍ଥାୟୀ

উজ্জলতীলমপি

অন্তর্যম

রূপগোষ্ঠামিকৃত উজ্জলনীলমণি বিশ্বসাহিত্যের এক অভিনব সম্পদ। পূর্বে ভরত প্রভৃতি মূনিগণ নাট্যসাহিত্যের রসবিচার ও চরিত্র বিশ্লেষণের জন্য যে অলঙ্কার শাস্ত্রের প্রবর্তন করেছিলেন, সেগুলিকে নাটকীয় চরিত্র-চিত্রণ ও রসবিশ্লেষণের বিশদ ব্যাকরণ বলা চলে। মধুরসে আধুত নরনারী বা নায়ক-নায়িকার মনঃসমীক্ষণ তার মূখ্য উদ্দেশ্য ছিল না। কিন্তু রূপগোষ্ঠামিকৃত উজ্জলনীলমণি শুধুমাত্র অলঙ্কার বা রসশাস্ত্রের অহুশীলন নয়। সৃষ্টির আদিকাল থেকে যে শৃঙ্গারমন্দির আনন্দধারার অনন্ত প্রবাহ জীবজগৎকে করেছে মধুর, লোকাভীত কল্ললোক যার মোহনস্পর্শে হয়ে উঠেছে স্বপ্নমধুর, সেই রতিরসাত্মক অমৃতধারার বিস্তৃত আলোচনাই রূপ পরিগ্রহ করেছে শ্রীকৃষ্ণের উজ্জলনীলমণিতে। এই উজ্জলস্বাভাষ্য মধুররসই তাঁর উজ্জলনীলমণি গ্রন্থের মূল বিষয়বস্তু। দিকে দিকে এই অফুরন্ত রূপরাশি যার অনন্ত রূপের বিকাশ, যিনি নিজেকে বিকশিত করেছেন পুরুষ ও প্রকৃতির সীমাহীন সমন্বয়ে, সেই মহান সত্তাই শ্রীকৃষ্ণ। শ্রীকৃষ্ণের বৃন্দাবনলীলাকে আশ্রয় ক'রে, শ্রীমতী ও গোপাঙ্গনাদের প্রেমলীলা প্রসঙ্গে তিনি উদ্ঘাটিত করেছেন নরনারীর অন্তরের নিগূঢ় রহস্য। পার্থিব জগতে নায়ক ও নায়িকার অন্তরের প্রতিটি গোপন অহুত্বূতি ধরা দিয়েছে তাঁর মর্মদর্শী অসামান্য দৃষ্টির আলোকে। শ্রীকৃষ্ণ ও গোপাঙ্গনারা হয়েছেন পার্থিব নরনারীর মূর্ত প্রতীক। পার্থিব জীবনে মাহুঘের যে ভালোবাসা, দাম্পত্য প্রেম ও প্রণয়, তাই প্রোজ্জল হয়ে উঠেছে শ্রীকৃষ্ণ ও গোপাঙ্গনাদের প্রণয়লীলা-রহস্যের ভিতর দিয়ে উজ্জলনীলমণির প্রতিটি স্লোকে ও ছন্দেছন্দে। শ্রীকৃষ্ণ ও গোপাঙ্গনাদের অপরূপ প্রেমলীলা অবলম্বন ক'রে বৈকব কবিগণ যে অপরিমেয় মাদুর্যরস পরিবেশন করেছেন, তা শুধু কবিকল্পনা নয়; নরনারীর প্রাণের স্বকুমার অহুত্বূতিই পরিব্যক্ত হয়েছে সেই অপার্থিব পরম সত্তা ও পরমা প্রকৃতিকে আশ্রয় করে। সে শুধু দেবতার প্রেম নয়, মাহুঘেরই মনের কথা। পার্থিব জীবনের দৈনন্দিন গতিপথে নরনারীর বুকে

প্রাণের বে চিরন্তন ষাতপ্রতিষাত চলেছে, তারই নিগূঢ় রহস্য রূপারিত হয়েছে
দেবতার উদ্দেশে গাঁথা ওই প্রেমের মন্ডার মালার।

কবিগুরু রবীন্দ্রনাথ বলেছেন :

‘এই প্রথম স্বপন

আবশের শরীরীতে কালিন্দীর কুলে,
চারিচক্রে চেয়ে দেখা কদম্বের মূলে
সরমে সন্মুখে—একি শুধু দেবতার ?
এ সঙ্গীত-রসধারা নহে মিটাবার
প্রতি রজনীর আর প্রতি দিবসের
তপ্ত প্রেমতৃষা ?

* * *

এই প্রেমপীতিহার

গাঁথা হয় নরনারী-মিলন-মেলায়,
কেহ দেয় তাঁরে, কেহ দেয় বঁধুর গলায়।

* * * আর পাশ কোথা ?

দেবতারে প্রিয় করি, প্রিয়েরে দেবতা।

দেবতার উদ্দেশে রচিত প্রেমকাব্যের এই খনিতে নুকিয়ে আছে মার্কণ্ডেয়ই
প্রাণের কথা, যেখানে দেবতার হৃদয়ে প্রিয় আর প্রিয়তমের সিংহাসনে দেবতা
শেয়েছেন হান।

বাঙলার নিজস্ব কাব্যচিন্তা পূর্ণতা লাভ করেছে বৈষ্ণবযুগে। কালিদাস,
ভারবী, ভবভূতি, মাঘ ও ঐহব প্রমুখ কবিগণের আবির্ভাবের পর কয়েক
শতাব্দী ভারতের কবিকুল নীরব ছিল। সেই নীরবতা ভঙ্গ ক’রে একে একে
আবির্ভূত হলেন জয়দেব, বিজ্ঞাপতি ও চণ্ডীদাস। তাঁদের অসোকসামান্য
প্রতিভার পঞ্চপ্রাণীকে কাব্যভারতীর মন্ডলারিত ক’রে গেলেন। বাঙলা, বিহার,
উড়িষ্যা—তথা সারা ভারতের কবিকুল মুগ্ধ হয়ে উঠলো হৃদয়র পীড়িতকদারে।
কিন্তু দেখতে দেখতে সে সঙ্গীত মুছ’নাও আবার নিখর হয়ে এলো। প্রায়
তিনশো-বৎসরকাল স্রবণ জাতি নিবজিত হয়ে রইল জড়জীবনের কুল
বান্ধবতার সংঘাত-ভরকে। মানসলোকে নেমে এলো নিষিদ্ধ অন্ধকার।
লহসা সেই নিজিরতার প্রাচীর ভেঙে অবতীর্ণ হলেন ঐগোরাধ। মহাপ্রভুর
আবির্ভাবে সারা ভারত প্রাণিত হয়ে গেল প্রেমের বস্তার। বদীরা, কৃষ্ণানন্দ,

ভূমিকা

গৌড়ীয় বৈষ্ণব দর্শনে রসতত্ত্বের ব্যাখ্যাতা শ্রীকৃষ্ণ গোস্বামী উজ্জলনীলমণি গ্রন্থের প্রণেতা। এই গ্রন্থে তিনি বৃন্দাবনলীলারসের নিগূঢ় ও মধুরতম রহস্য প্রকাশ করিয়াছেন। গোপীগণের সহিত শ্রীগোপীনাথের এই মধুর রস-লীলা গৌড়ীয় বৈষ্ণব সম্প্রদায়ের পরম ও চরম আশ্রয়। এই সম্প্রদায়ের ইহাই অনন্তসাধারণ বৈশিষ্ট্য।

রসতত্ত্বের আলোচনার ইতিহাসে প্রথমেই ভরতমুনির মাম উল্লেখ করিতে হয়। তিনি নাট্যশাস্ত্রে রসের নানাপ্রকার বিচার ও বিশ্লেষণ করিয়াছেন। পরবর্তী রসিক আচার্য্যগণ ভরতেরই অনুগামী। “বিভাবানুভাবব্যভিচারিসংযোগাদ্রসনিম্পত্তিঃ”। এই প্রসিদ্ধ ভরতমুজ্জই রসশাস্ত্রব্যাখ্যাত্ববর্ণের প্রধান উপজীব্য। এইরূপ মূজ্জকে দার্শনিক পরিভাষায় “গ্রহণবাক্য” বলা হয়। এই মূজ্জে রসের লক্ষণ, স্বরূপ ও কারণসমূহ বিবৃত হইয়াছে। এই মূজ্জের ব্যাখ্যায় নানাবিধ মতবাদ উপস্থিত হইয়া রসিকগণের নানা সম্প্রদায় সৃষ্টি করিয়াছে। ভরতমুনি আটটি কিংবা নয়টি রস স্বীকার করিয়াছেন এবং তাহাদের বিস্তৃত বিবরণ দিয়াছেন। ভরতমুনির উদ্ভাবিত বিচার-বিশ্লেষণ পদ্ধতি স্বীকার করিয়াও গৌড়ীয় বৈষ্ণব আচার্য্যগণ ঐ রসতত্ত্বকে স্বীকার করেন নাই। ঐ রস অনিত্য ও লৌকিক। স্বয়ং ভগবান্ শ্রীকৃষ্ণ ও তবীয় নিত্য প্রেমসীগণকে অবলম্বন করিয়া যে রসের প্রকাশ, সেই রসই গৌড়ীয় বৈষ্ণবের জীবাত্ম। সেই রসই গৌড়ীয় বৈষ্ণব রসশাস্ত্রের প্রতিপাদ্য। রৌদ্র ভরানক প্রভৃতি রস স্বীকৃত হইলেও শান্ত, দ্বন্দ্ব, সখ্য, বাৎসল্য ও মধুর এই পাঁচটি রসই রসিক বৈষ্ণবগণের প্রধানরূপে অনুমোদিত। ইহাদের মধ্যে পঞ্চম মধুর রসই সর্বাপেক্ষা প্রধান। শ্রীমদ্রূপগোস্বামী ভক্তিরসাস্বতসিদ্ধ গ্রন্থে শান্ত, দ্বন্দ্ব, সখ্য ও বাৎসল্য রসের বিস্তৃত বিশ্লেষণ করিয়াছেন। উজ্জলনীলমণি গ্রন্থে

মধুর রসের পূর্ণাঙ্গ বিশ্লেষণ ও বিচার করিয়াছেন। এই গ্রন্থে গ্রন্থকারের মনীষা, মননশীলতা ও বিচার-বিশ্লেষণ-নৈপুণ্য অভূতপূর্ব বলিয়া মনে হয়।

এই অলৌকিক মধুররস লৌকিক শৃঙ্গার রসেরই অল্পরূপ হইলেও ইহা মুম্বুর আশ্রয়। ভরতমুনিকথিত বিভাব অল্পভাব প্রভৃতি এই অলৌকিক রসে অপেক্ষিত হইলেও এই রসের আলম্বন স্বয়ং ভগবান্ শ্রীকৃষ্ণ এবং আশ্রয় তদীয় নিত্যকান্তা গোপীগণ। ইহারা নিত্যপ্রেমসী হইলেও একটলীলায় অন্তা ও পরোচা-রূপেই মধুররসের আশ্রয় হইয়াছেন। অন্তাগণ পতিভাবে ও পরোচাগণ উপপতিভাবে শ্রীকৃষ্ণে প্রেম নিবেদন করিয়াছেন। পরোচাগণের উপপতিভাবময় রসই অলৌকিক মধুর রস। ইহাই বৈষ্ণবরসশাস্ত্রে চরম উৎকর্ষ প্রাপ্ত হইয়াছে।

পরকীয়াভাবময় লীলার বর্ণনা শ্রীমদভাগবতে ও বিষ্ণুপুরাণ প্রভৃতিতে বর্ণিত আছে। এই লীলার স্বরূপ ও রহস্যের উপলব্ধি সকলের পক্ষে সম্ভব হয় না। ইহা অতিনিগূঢ় রহস্য-বস্তু। সাধারণজ্ঞ প্রকৃত রহস্য না বুঝিয়া এই লীলাতে লৌকিকভাবে আক্ষেপ করিয়া থাকেন। লৌকিক দৃষ্টিতে পরকীয়াভাবময় মিলন অতিনিমিত্ত। এই জগত্ই মহারাজ পরীক্ষিত ও লৌকিক দৃষ্টিতে আক্ষেপ করিয়াছেন। রাসলীলা জ্ঞাপন করিয়া, জ্যোতা পরীক্ষিত সন্দ্বিষ্টচিত্তে আক্ষেপ করিলেন যে, যিনি ধর্মহাপনের জন্ত ও অধর্মবিনাশের জন্ত অবতীর্ণ হইয়াছেন, সেই আপ্তকাম শ্রীভগবান্ পরোচা গোপীগণের সহিত রাস-রস আশ্বাসন করিলেন কেন? এই কার্য ত অতিভূঞ্জিত ও নিমিত্ত। তিনি ত আপ্তকাম, পূর্ণানন্দস্বরূপ। পরোচার প্রতি এইরূপ অল্পরাগ হওয়া তাঁহার পক্ষে অতিশয় দোষাবহ। বাহা এইরূপ নিমিত্ত ও দোষাবহ তাহা কখনই অলৌকিক রস হইতে পারে না।

গ্রীক দার্শনিক প্লেটো সিম্পোজিয়াম (Symposium) গ্রন্থে প্রেমভবের আলোচনা করিয়াছেন। একজন কবি বলিলেন যে, প্রেম দিব্যবস্তু। সকেটিস কিন্তু এই মত স্বীকার করিলেন না। তিনি বলিলেন, প্রেম কখনই দিব্য হইতে পারে না। অপ্রাপ্ত বস্তুর অভিলাষে যে প্রেমের উৎপত্তি, তাহার দিব্য হওয়ার সামর্থ্য নাই। দিব্য হইলে, তাহা নিত্য দিব্যবস্তুকেই অবলম্বন করিত। সকেটিসের মতেরই প্রতিধ্বনি করিয়া বার্গার্ড শ' বলিয়াছেন—ঐ পুরুষের প্রথমকে প্রেম নামে অভিহিত করা অসঙ্গত। উহা জৈব কর্মসমূহ। যৌবনের উৎপত্তির সহিত স্বাভাবিক এই প্রবৃত্তি নয়নারীকে

বংশরক্ষায় বলপূর্বক প্রবৃত্ত করে। ইহাতে প্রেমের গন্ধও নাই। কিন্তু দার্শনিকগণ বাহাই বলুন, পৃথিবীতে নানাদেশে অগণিত কবি নরনারীর ঐ স্বাভাবিক প্রবৃত্তিকে প্রেম বলিয়া স্বীকার করিয়াছেন এবং বহু কাব্য রচনা করিয়াছেন। এখনও সেই পরম্পরা অবাহত রহিয়াছে। নরনারীর স্বাভাবিক প্রবৃত্তিকে বাহারা প্রেম বলিয়া স্বীকার করিয়াছেন, তাঁহারাও কিন্তু অবৈধ প্রণয় অর্থাৎ পরোচা নারীর প্রতি তাদৃশ স্বাভাবিক প্রবৃত্তিকে প্রেম বলিয়া স্বীকার করেন নাই, বরং বিশেষভাবে নিন্দাই করিয়াছেন। এইরূপ অবস্থায় শ্রীকৃষ্ণ ও পরোচা গোপীগণের প্রণয় অলৌকিক প্রেমরস কিরূপে হইবে? শ্রীকৃষ্ণ স্বয়ং বলিয়াছেন “জুগুপ্সিতং সর্বত্র হোপপত্যং কুলস্নিগ্ধঃ”। অর্থাৎ এই উপপত্তিভাব সদগতিবিরোধী, অকীৰ্ত্তিকর, অসায়, ক্লেষকর, ভয়াবহ ও নিন্দিত। ইহা যেমন পরীক্ষিতের প্রশ্ন, তেমনই জনসাধারণেরও। এই রসের ব্যাখ্যাতা শ্রীকৃষ্ণগোস্বামীও এই প্রশ্ন উত্থাপিত করিয়াছেন। কিন্তু তিনি এই প্রশ্নের সমাধানও করিয়াছেন। তিনি বলিয়াছেন যে, উপপত্তি ভাবময় প্রণয় প্রাকৃত নরনারীকে অবলম্বন করিয়া প্রবৃত্ত হইলেই উক্ত দোষসমূহের সম্ভাবনা হয়। বৃন্দাবনলীলায় উপপত্তিভাবময় প্রণয়ের আলম্বন স্বয়ং ভগবান্ শ্রীকৃষ্ণ। তিনি প্রাকৃত মহুগ্ধ নহেন। বাহারা তাদৃশ ভাব নিবেদন করিয়াছিলেন, সেই নায়িকাগণও সাধারণ নারী নহেন। ইহাদের এই লীলার নিগূঢ় রহস্য বুঝিতে হইলে পূর্ববৃত্তান্তের সহিত পরিচয় হওয়া আবশ্যক। এই সকল গোপীদের মধ্যে অনেকেই শ্রীভগবানের স্বরূপশক্তি। কেহ কেহ দেবতা, কেহ কেহ ঋষি ও কেহ কেহ জ্ঞতি। কোন সময় দণ্ডকারণ্যবালী মুনিগণ রামচন্দ্রের মনোহর রূপলাবণ্যে মুগ্ধ হইয়া তাঁহার সহিত মধুর ভাবে বিহার করিতে উচ্ছা করিয়াছিলেন। সেই মুনিগণ গোকুলে গোপীরূপে জন্ম গ্রহণ করিয়াছিলেন। এই ভাবে শাস্ত্রের আলোচনায় জানা যাইবে যে, গোপীগণ পরোচা হইলেও তাহা ব্যবহারিকভাব মাত্র। রসের উৎকর্ষ ধ্যাপনের জন্য ষোড়শমায়ার দ্বারা এই পরোচাভাব কল্পিত হইয়াছে। পরকীয়াভাবে যে-রূপ রসের উজ্জ্বল হয়, সেইরূপ স্বকীয়াভাবে হয় না। বিবাহ-বন্ধনে আবদ্ধ নর-নারীর প্রণয় পরমউৎকর্ষলাভ করিতে পারে না। এইজন্য উহা সমস্তই রহিত নাহে পরিচিত। উহাতে লোকনিন্দার ভয় নাই। বাধাও নাই। উপপত্ত্য-বূলক প্রণয়ে লোকনিন্দার ভয় ও বাধার পরম্পরা উপস্থিত হয়। এই প্রণয় অতিদুর্গত এবং দুর্গত বলিয়াই উৎকৃষ্ট। এই সমর্থ্য রত্নের প্রণয় অতি প্রবল ও

দুর্বার। ইহা লোকশাস্ত্রসম্মত প্রণয়ে থাকে না। ঔপন্যাসিক না হইলে এই প্রণয় চরম উৎকর্ষ লাভ করিতে পারিত না। সেইজন্য যোগমায়া নিত্য প্রেমসীগণের তাদৃশভাব প্রকাশ করিয়া, মধুররসকে উন্নত পরাকাষ্ঠায় উপস্থাপিত করিয়াছেন। যুগা লজ্জা ভয় প্রভৃতি সকলভাব পৰিত্যাগ করিয়া প্রিয়তমমিলনপ্রত্যাশী না হইলে, তাহাতে পূর্ণতা আসিতেই পারে না। ঐরূপ পূর্ণতা না আসিলে তন্ময়ভাবময় প্রেমরস প্রকাশিতই হইবে না। এই অলৌকিক রসের অপূর্ব মাধুর্য আনন্দন করিতে হইলে, এই রসের আলম্বন ও আশ্রয়ভবের স্পষ্ট পরিচয় মনে রাখিতে হইবে। গোড়ীয় বৈষ্ণব মতে শ্রীরাধা ও গোপীগণ স্বয়ং ভগবান্ শ্রীকৃষ্ণের স্বরূপভূতা ক্লাদিনী শক্তি। তাঁহাদের পারস্পরিক সম্বন্ধ নিত্য। সেইজন্য এই লীলাও নিত্য। যখন শ্রীভগবানের স্বরূপমাধুর্য আনন্দন করাইবার ও প্রেমমাধুর্য আনন্দন করিবার বলবতী উৎকর্ষ উপস্থিত হয়, তখন যোগমায়ার সাহায্যে নিত্য স্বকীয়াভাব আবরণ করিয়া, তিনি নিজপ্রেমসীগণের পরকীয়াভাব প্রকাশ করেন। অপ্রকট লীলায় নিত্যস্বকীয়াভাব বিরাজিত থাকায় রসের অপূর্ব উৎকর্ষ থাকে না। সেইজন্য প্রকটলীলায় পরকীয়াভাবে অভিব্যক্তি। ইহা শ্রীজীব গোস্বামীর সিদ্ধান্ত। তিনি বলিয়াছেন যে, গোপীগণের বিবাহ মায়ী কর্তৃত্ব। বস্তুতঃ শ্রীকৃষ্ণের সহিতই তাঁহাদের বিবাহ হইয়াছিল। এই সিদ্ধান্ত তিনি গোপালচম্পু কৃষ্ণসন্দর্ভ প্রভৃতি গ্রন্থে প্রতিপাদন করিয়াছেন। এ বিষয়ে শ্রীবিষ্ণুনাথ চক্রবর্তী ভিন্নমত পোষণ করেন। নানা শাস্ত্রবাক্য উদ্ধৃত করিয়া তিনি দেখাইয়াছেন যে, প্রকটলীলাতে শ্রীকৃষ্ণ ও গোপীগণের যেমন পরকীয়া ভাব, নিত্যলীলাতেও তেমনই পরকীয়াভাবই রহিয়াছে। বাহাই হউক এই মধুর রসময়ীপ্রেমলীলায় স্বয়ং ভগবান্ আলম্বন ও তদীয় স্বরূপশক্তিগণ আশ্রয় হওয়ায় ইহা অতিপবিত্র ও অলৌকিক। শ্রীভগবানের স্বরূপশক্তি, দেব, ক্রতি ও ঋষিগণ সীমান্তিশায়ী কৃষ্ণরূপমাধুর্যে লালসাবিত হইয়াছিলেন। বাহ্যকল্পতরু শ্রীভগবান্ তাঁহাদের লালসারূপ লীলা করিয়াছিলেন, এই কথা মনে রাখিয়াই এই মধুরলীলা আনন্দন করিতে হইবে। তাহা হইলে অজ্ঞান বা সন্দেহ আসিবার সম্ভাবনাই থাকিবে না। শ্রীরূপগোস্বামী এই সকল তত্ত্ব-কথা অতি বিশদভাবে প্রতিপাদন করিয়াছেন। ইহা রসিকভক্তজনের

সহস্রমুখ্য

এই প্রসঙ্গে আর একটি বক্তব্যের অবতারণা করা আবশ্যক মনে করিতেছি।

শৈল্পী বৈকল্য ও দর্শনবিষয়ে সাধারণ শিক্ষিত জনগণের নানাবিধ কুসংস্কার ও ভ্রান্ত ধারণা বহুদূর হইয়া আছে।

শ্রীশ্রীধাকৃষ্ণের প্রেম একান্ত কামবাগনাশ্রয়ত একথাও অনেক বলেন। তাঁহারা প্রেম ও কামের স্বরূপ ভেদের তত্ত্ব অবগত নহেন। শ্রীচৈতন্য-চরিতামৃত্তে শ্রীলক্ষ্মীদাস কবিরাজ মহাশয় বলিয়াছেন—“আত্মেচ্ছিত্র প্রীতি বাহ্য তারে বলি কাম। কৃষ্ণেচ্ছিত্র প্রীতি ইচ্ছা ধরে প্রেমনাম।”

কাম আত্মকেন্দ্রিক, ইচ্ছিত্রত্বপূর্ণ হইয়া তাহার পর্য্যবসান। অতুলাগের আলম্বন বিভাব; নায়ক বা নায়িকা সেখানে ভোগের সাধন মাত্র, সাধ্য নহে। গোপীপ্রেম কিন্তু সম্পূর্ণ বিপরীত। গোপীপ্রেমে নিজের ভোগসিদ্ধির ইচ্ছা বিন্দুমাত্র নাই। কেবল শ্রীকৃষ্ণের আনন্দসম্পাদনই একমাত্র উদ্দেশ্য। এই ঐকান্তিক পরার্থপরতাই গোপীপ্রেমকে প্রাকৃত নায়কনায়িকার অতুলাগ হইতে পৃথক্ কোটিতে প্রতিষ্ঠিত করিয়াছে।

আর একটি কথা—কামের স্বরূপ কি, ইহা বিচারণীয় বিষয়। ক্রয়েত Sex বা জৈবকাম প্রযুক্তিকে আদিম-তত্ত্ব বলিয়া স্বীকার করেন এবং ইহা ধর্ম, অর্থ, মোক্ষ, দর্শন ও নন্দনতত্ত্ব প্রভৃতির আদিম ও অকৃত্রিম উৎস। তাঁহার মতে অস্ত্র সমস্ত প্রযুক্তি বাহ্য সভ্যজগতের মানবাচিন্তে উচ্চতর পুরুষার্থ বলিয়া স্বীকৃত, তাহা সমস্তই এই জৈবকামপ্রযুক্তি হইতে সাক্ষাৎ বা পরম্পরাক্রমে উদ্ভূত। প্রেম কামপ্রযুক্ত, কামই তাহার বীজ। কিন্তু বৈষ্ণব দার্শনিকগণ এবং বেদান্তসম্প্রদায় ইহার অন্তরূপ সমাধান করিয়াছেন। তাঁহাদের মতে আত্মার স্বরূপত্ব আনন্দেরই অভিব্যক্তির বিকৃত পরিণাম কামরূপে প্রকটিত হয়। ক্রমক্রমে ইহার রহস্য উদ্ভিন্ন হইয়াছে। “আনন্দচিন্ময়বাস্তবাত্মা মনঃহ, যঃ প্রাণিনাং প্রতিকলং স্মরতামুপেত্য। লীলারিতেন কুবনানি জরত্যাগশ্চ গোবিন্দমাদিপুরুষং তমহং ভজামি।”

এই শ্লোকে বলা হইয়াছে যে, ভগবানের আনন্দচিন্ময়স্বরূপ প্রাণিগণের চিন্তে প্রতিকলিত হইলে কামের উদ্ভব হয়, এবং এই কামের লীলাপ্রভাবে তিনি নিখিলকুবন অবিস্রাম গতিতে অভিভূত করিতেছেন। এই কার বহি না থাকিত, তাহা হইলে সৃষ্টি হইত কি প্রকারে? Race Preservation বা প্রাণিসংরক্ষণের অব্যাহত রহিয়াছে ইহারই কল্যাণে। কথেন্দ্রেম পুরুষস্বভেদে বেধি—“কামস্তবগ্রে সমবর্ততাধি।” ইহাই। সিন্ধুকা, ইহারই উপব্যাখ্যান উপনিষদে দৃষ্ট হয়—“একোহং বহুতাং প্রজায়ের।”

বৈধ কার সম্বন্ধে শাস্ত্রকারগণ অনেক বিধি ও অর্থবাদ বাক্যের উল্লেখ করিয়াছেন। ব্যাবহারিক জগৎ, কুলধর্ম, সমাজব্যবস্থা ও রাষ্ট্রীয় কলাগণ সমস্তই শাস্ত্রীয় বিধিব্যবহার নিয়ন্ত্রণাধীন এবং তাহার মূল স্তম্ভ গার্হস্থ্য-ধর্ম, অর্থাৎ পতি পত্নীর বৈধ মিলন।

বৈষ্ণবশাস্ত্রে বর্ণিত রাধাকৃষ্ণের লীলা অলৌকিক ও অপ্রাকৃত। ইহার মধ্যে সিংহকার প্রেরণা নাই। ইহা লোকোত্তর, নিত্য ও পারমার্থিক। ভগবান্ তাঁহার ক্লামিনীশক্তির সহিত নিত্যলীলার অন্তরঙ্গ। এই ভগবন্তীলারই প্রাকৃত জগতে প্রাণিগণের চিত্তে প্রতিবিম্বপাতে কামের উদ্ভব হয়। ভগবতী প্রতি বলিতেছেন—“এতশ্চেব মাত্ৰামুপজীবন্তি লোকে”। এই অনন্ত অপরিচ্ছিন্ন অপরিসীম ব্রহ্মানন্দেরই বিন্দুমাত্র উপজীবন করিয়া জীবজগৎ বিদ্যমান থাকে। জগতের উৎপত্তিও এই আনন্দ হইতে—“আনন্দস্যোব খণ্ডিমানি ভূতানি জায়ন্তে, আনন্দেন জাতানি জীবন্তি। আনন্দং প্রায়ন্ত্যভিসংবিশন্তি”। এই আনন্দেরই অভিব্যক্তি উপাধিবশতঃ সঙ্কুচিত হইয়া জীবজগতে অন্তর্ভূত হয়। ইহারই অভিব্যক্তি ভিন্ন ভিন্ন লোকে স্পষ্ট ও স্পষ্টতরভাবে প্রকটিত হয়। ইহার পূর্ণ অভিব্যক্তি বেদান্তমতে জীবের ব্রহ্মের সহিত অভেদপ্রাপ্তিতে এবং গৌড়ীয় বৈষ্ণবদর্শনে নিত্যলীলার সংঘটিত হয়।

অলঙ্কারশাস্ত্রে বিশেষ ব্যুৎপত্তি লাভ করিতে হইলে, এই উজ্জলনীলমণি গ্রন্থ অবশ্য অধ্যয়ন করা কর্তব্য। মধুরসের এত বিচিত্র বিশ্লেষণ, নায়কনায়িকার প্রকারভেদ, বিভাব, অঙ্কভাব প্রভৃতির বিপুল সত্তার অন্ত্রকোন অলঙ্কারগ্রন্থে দেখিতে পাওয়া যায় না। এই গ্রন্থ সংস্কৃতভাষায় রচিত হওয়ায় সংস্কৃত ভাষার অনভিজ্ঞ ব্যক্তিদের বোধগম্য হয় না। ইহারা সংস্কৃতভাষায় কিঞ্চিৎ জ্ঞান লাভ করিয়াছেন, তাঁহাদের পক্ষেও এই গ্রন্থ সহজবোধ্য হয় না। এই অতুলনীয় গ্রন্থের সরস সর্বজনবোধ্য স্থূললিত বঙ্গানুবাদের বিশেষ প্রয়োজন ছিল। শ্রীমান্ হীরেন্দ্রনারায়ণ ঐ প্রয়োজন পূর্ণ করিয়াছেন। শ্রীমানের এই সহজ সরল ও প্রাক্কল অনুবাদ বঙ্গভারতীয় একটি অমূল্য সম্পত্তি। ইহার দ্বারা শ্রীমানের খ্যাতি সুপ্রতিষ্ঠিত হইবে। এই অনুবাদ বঙ্গভাষারই কেবল শোভাবৃদ্ধি করিল না, অলৌকিকরসপিণাহ ভক্তরসিকজনের রসাবাদনের সুযোগকেও সহজ করিয়া দিল। শ্রীমানের এই অবদান শৌভাগ্যবশীল অতিসমাদরের বস্তু হইবে। “গৌড়জন বাহে আনন্দে করিবে পান স্বধা নিরবধি।”

(ছ)

আমি এই অভ্যুদয় দেখিয়া অতিশয়িত সন্তোষ লাভ করিয়াছি এবং স্বয়ং ভগবান্ শ্রীকৃষ্ণের নিকট শ্রীমান্ হীরেন্দ্রনাথের স্মরণীয় আশু ও অপ্রতিহত সারস্বত সাধনার উত্তরোত্তর শ্রীবৃদ্ধি কামনা করিতেছি। অলমধিকেন।

ডক্টর সাতকড়ি মুখোপাধ্যায় এম্. এ., পি.-এইচ-ডি.

দোলপূর্ণিমা, ১৩৭২

রাতমা, বীরভূম।

প্রাক্তন আচার্য নবনালা মহাবিহার ও ভূতপূৰ্ব অধ্যাপক

সংস্কৃত বিভাগ, কলিকাতা বিশ্ববিদ্যালয়।

সূচী

বিবরণ	পত্রাঙ্ক	বিবরণ	পত্রাঙ্ক
মঙ্গলচরণ	১	দৃতী	১৮
বিভাব	২	বয়ংদৃতী	১৮
আলম্বন	২	কটাক্ষ	১৮
উকীপন	৩	বংশীধ্বনি	১৮
নায়কভেদ	৪	আশুদৃতী	১৯
নায়কের গুণাবলি	৪	কৃষ্ণবল্লভা	২১
নায়কের প্রেমীভেদ	৪	স্বকীয়া	২১
পতি	৫	স্বামকাবিহার	২২
উপপতি	৬	লখী ও দাসী	২২
অমুকুল	৮	গাছর্ব ও অব্যক্ত বিবাহ	২৫
ধীরোদাত্ত-অমুকুল	৮	পরকীয়া	২৪
ধীরসলিত-অমুকুল	৯	কস্তা ও পরোঢ়া	২৪
ধীরশান্তা-অমুকুল	৯	কল্লকা	২৭
ধীরোদাত্ত-অমুকুল	৯	পরোঢ়া	২৮
হকিণ	১০	সাধনপরা	২৯
শঠ	১১	দেবী	৩০
ধৃষ্ট	১২	মিত্যপ্রিয়া	৩১
নায়কের প্রকৃতিভেদ	১২	রাধা প্রকরণ	৩৩
সহায়ভেদ	১৩	হৃৎকান্তার রূপ	৩৪
লখা	১৩	ষোড়শ শৃঙ্গার-বেশ	৩৪
সহায়কের গুণ	১৩	ষাটশ আভরণ	৩৫
চেট বা চেটক	১৩	ত্রিরাধার প্রধান গুণাবলী	৩৫
বিট	১১	মধুরা	৩৬
বিদূষক	১৫	নববয়স:	৩৭
পীঠমর্দ	১৬	চলোপাধা	৩৭
প্রিয় নর্যলখা	১৭	উজ্জলমিতা	৩৭

বিষয়	পত্রাঙ্ক	বিষয়	পত্রাঙ্ক	
চাকসৌভাগ্য-স্বৈখ্যা	৩৮	রতিবায়া ও সখীবসা	৫০	
পঙ্কোদ্যাদিতমাধবা	৩৮	সত্ৰীড়রতিপ্রবহা	৫১	
সকীতপ্রসারভিঞ্জা	৩৯	রৌষকৃতবাংশমোনা,	}	৫১
সম্যাবাক	৩৯	মানে বিমুখী ও মৃদী		
নর্মপাণ্ডিতা	৫২	অক্ষমা, মধ্যা,	}	৫২
বিনীতা	৪০	সমানলজ্জামদনা ও		
ককণাপূর্ণা	৪১	প্রত্যোভারুণ্যাশালিনী	}	৫৩
বিমৃদ্ধা	৪১	কিঞ্চিংপ্রগল্ভবচনা,		
পাটবাহিতা	৪১	মোহান্ত-স্বরতক্ষমা, মানে	}	৫৩
লজ্জাশীলা	৪১	কোমলা, মানে করুণা		
সুযমীনা	৪২	ধীরমধ্যা, অধীরমধ্যা		৫৪
ধৈৰ্ঘ্যশালিনী	৪২	ধীরাধীরমধ্যা		৫৫
গাভীৰ্ঘ্যশালিনী	৪৩	প্রগল্ভা		৫৫
সুবিলাসা	৪৩	পূর্ণভারুণ্যা, মদ্যাক্ষা,	}	৫৬
মহাভাবগরমোৎকর্ষতমিণী	৪৩	উরুরতোৎসুকা ও		
গোকুলপ্রেমবসতি	৪৪	তুরিভাবোদগম-অভিঞ্জা		
অপংজ্জৌলসদ্বন্দ্বা:	৪৪	রসাক্রান্তবল্লাভা		৫৭
সুধীপিত্তকরস্নেহা	৪৪	অতিপ্রোচোক্তি		৫৭
সখীপ্রণয়াধীন	৪৪	অতিপ্রোচ চেষ্টা		৫৮
ককপ্রিয়াবলীমুখ্যা	৪৫	মানে অত্যন্তকরুণা		৫৮
সন্ততান্বকেশবা	৪৫	ধীর-প্রগল্ভা		৬০
পঞ্চবিধ সখী—	৪৫	ধীরাধীর-প্রগল্ভা		৬১
সখী, নিত্যসখী, প্রাণসখী	}	জ্যোষ্ঠা ও কনিষ্ঠা		৬১
প্রিয়সখী ও পরমপ্রেমসখী		মধ্যার জ্যোষ্ঠা-কনিষ্ঠাভেদ		৬২
নারিকাত্তেদ	৪৭	প্রগল্ভা জ্যোষ্ঠা ও কনিষ্ঠা		৬২
নারিকার প্রকারভেদ	৪৮	পঞ্চদশবিধ নারিকা		৬৪
স্বকীয়া, পরকীয়া ও সামান্তা	}	নারিকার অষ্টাবহা		৬৪
সামান্তা নারিকা ও রসাতলাস		অভিসারিকা		৬৪
মৃদা, নববয়স, নবকামা	৪৯	অভিসারয়জী		৬৫

বিষয়	পত্রাঙ্ক	বিষয়	পত্রাঙ্ক
জ্যোৎস্নায় স্বরমভিসারিকা,	}	অর্থোৎস্নায় ব্যাক্যব্যাপদেশ	৮৬
তমোহভিসারিকা		পূরহ বিষয়	৮৬
বাসকসজ্জা	৬৬	শব্দোৎস্না ব্যাক	৮৬
উৎকৃষ্টতা	৬৬	অর্থোৎস্না ব্যাক, স্বরম্ভূতীপূরহ বিষয়	৮৭
খণ্ডিতা	৬৭	আদিক	৮৮
বিপ্রলজ্জা	৬৮	অজুলি-ফোটন, ব্যাক্সগল্পমে	}
কলহাস্তরিতা	৬৮	অঙ্গস্বরণ, চরণবারা ভুলেখন	
প্রোষিতভর্জক	৬৯	কর্ণকণ্ঠ্যন, তিলকক্রিয়া,	}
স্বাধীনভর্জক	৭০	বেশক্রিয়া ও প্রকল্পন	
মাধবী, হস্তা ও থিরা	৭০	সখী-আলিজন, সখীতান্ডন,	}
উত্তমা, মধ্যমা ও কনিষ্ঠা	৭১	অধর-বংশন, হার-গুন্দন,	
নায়িকার ৩৬০ প্রকারভেদ	৭২	অলকার-শিজন	}
শ্রীরাধা	৭২	বাচমূল প্রকাশ, নামাভিলেখন,	
যুগ্মস্বরী ভেদ	}	তরুণগাত্র জতাঙ্গান	২২
যুগ্মসখী, অধিকা, মধ্যা,		চাক্ষু ও কটাক	২৩
মুদ্রী ও লঘুজিক ইত্যাদি		আপ্তদূতী—	}
দ্বাদশ যুগ্মস্বরী		অমিতার্থা, নিশ্চটার্থা ও	
দূতীভেদ	৮০	পত্রহারী	}
স্বরম্ভূতী, বাচিক, আদিক ও	৮১	শিল্পকারী, দৈবজ্ঞা	
চাক্ষু	৮১	লিঙ্গিনী, পরিচারিকা, ধাত্তেয়ী	২৭
সাক্ষাৎ	৮১	বনদেবী, সখী	২৮
গর্ভাস্বক ও আক্ষেপার্থক	}	কৃষ্ণপ্রিয়ার বাচ্যদূত	২৯
শব্দব্যাক ও অর্থোৎস্না ব্যাক		কৃষ্ণপ্রিয়ার ব্যাক্যদূত	২৯
বাচ্য	৮০	কৃষ্ণের প্রতি বাচ্যদূত,	}
স্বার্থবাচ্য, শব্দোৎস্না-ব্যাক ও অর্থোৎস্না ব্যাক	}	ব্যাক ও সাক্ষাৎ ব্যাক	
পদার্থবাচ্য, শব্দোৎস্না ব্যাক		ব্যাপদেশ ব্যাক, পরোক্ষে সাক্ষাৎব্যাক	১০১
ঐ অর্থোৎস্না ব্যাক	৮৮	দূতীনিয়োগ	১০২
ব্যাপদেশ, শব্দোৎস্নাব্যাক্যব্যাপদেশ	৮৮	ক্রিয়ানামা, অজ্ঞতব ও সাদিক	১০১-৩
	৮৮	বাচিক, বাচ্য ও ব্যাক	১০৩

বিষয়	পাতাঙ্ক	বিষয়	পাতাঙ্ক
পঞ্চমূল, অর্থমূল ব্যাখ্যা	১০৪	সখী-ক্রিয়া	১২০
পতির প্রতি আবেশ ও		দ্বিবিধা সখী	১২১
সৌবিন্যের প্রশংসা		অসম্মেহা	১২১
কেশাদি বৈশিষ্ট্য	১০৫	সখী-স্নেহাধিকা	১২২
সখী প্রকরণ—		সম্মেহা	১২৩
সখীকে প্রকৃতিভেদ	১০৬	হরিষম্ভা প্রকরণ—	
বামা	১০৬	ব্রহ্মসুন্দরীদের প্রকারভেদ,	১২৪
দক্ষিণা, দূতা,	১০৭	স্বরূপক, ইষ্টসাধক ও	
নারিকা, দূতী ও সখী }		অনিষ্ট-সাধক	
নিত্যানারিকা, সম্বন্ধদূতা,	১০৮	তটস্থ, বিপক ও	১২৫
বাটিক দূতা		ইষ্ট-বিনষ্টকারিক	
পরোকদূতা ও ব্যপদেশ		অনিষ্টকারিত্ব ও বিপক-	১২৬
উপায়ন ব্যপদেশ,	১১২	পক্ষপাতিনী	
'নিজপ্রয়োজন' ব্যপদেশ		ছদ্ম বা ছল	১২৬
ও 'আত্মদর্শন' ব্যপদেশ }		ঈর্ষা, অশ্রুগত ঈর্ষা	১২৭
নারিকাপ্রায়াজিক	১১২	চাপলা, অশ্রু ও মৎসর	১২৮
অধিকপ্রথরা দূতা	১১২	অমর্ষ, গর্ব ও অহঙ্কার	১২৯
অধিকমধ্যা ও অধিকমুখী দূতা	১১৩	অভিমান	১৩০
বিলম্বাজিক	১১৩	দর্প ও উদ্ধিসিত	১৩১
সমপ্রথরা ও সমমধ্যা দূতা	১১৪	মদ, ওষুতা ও শ্লেষ	১৩২
সমমুখী দূতা, সখীপ্রায়াজিক	১১৫	ঐরাধার প্রেম	১৩৬
ও লঘুপ্রথরা দূতা }		উদ্বীপন প্রকরণ	১৩৭
লঘুমধ্যা ও লঘুমুখী দূতা	১১৬	গুণ—মানসিক, বাটিক, কারিক	১৩৭
নিত্যসখী, আত্যন্তিকী ও	১১৭	বয়স ও বয়ঃসন্ধি	১৩৮
আশেঙ্কিকী লঘু }		ঐক্যের বয়ঃসন্ধি ও মাদুর্ঘ	১৩৯
উক্ত সখীদের দূতা ও	১১৮	কৃকপ্রিয়াগণের বয়ঃসন্ধি	১৩৯
প্রার্থকের বিপর্যয় }		ও মাদুর্ঘ	
বৃহত্তার বিপর্যয়	১১৯	নব্যবয়স ও কৃকপ্রিয়াগণের	
সখী-ব্যবহার	১১৯	করোনাধিক	১৪০

বিষয়	পত্রাঙ্ক	বিষয়	পত্রাঙ্ক
বাক্যবয়ঃ বা যৌবন	১৪০	বিচ্ছিন্নি	১৬৩
পূর্ণ যৌবন ও পূর্ণবয়সোন্মাদুর্ধ্ব	১৪১	বিভ্রম	১৬৪
রূপ ও লাবণ্য	১৪২	কিলকিঞ্চিত	১৬৫
সৌন্দর্য ও অভিরূপতা	১৪৩	মোষ্টায়িত, কুটুমমিত	১৬৭
মাদুর্ধ্ব	১৪৪	বিকোচ	১৬৮
মাদ্রব (উত্তম, মধ্যম ও কনিষ্ঠ)	১৪৫	ললিত ও বিকৃত	১৬৯
নায়, চরিত, লীলা, মনোহর	১৪৬	লজ্জাজনিত ও মানহেতু বিকৃতি	১৭০
ক্রীড়া ও রাস		ঈর্ষাহেতু বিকৃতি ও মোক্ষা	১৭১
কন্দুকক্রীড়া, তাণ্ডব ও বেণবাদন	১৪৭	চকিত	১৭২
গো-দোহন, পর্বতোদ্ধার,	১৪৮	উদ্ভাস্বর প্রকরণ	১৭৩
গো-আহবান ও গমন		নীবিসংস্রন ও উত্তরীয়-সংস্রন	১৭৩
মণ্ডন, বসন ও ভূষণ	১৪৯	ধন্বিল-সংস্রন ও গাজমোটন	১৭৪
মালা-অমুলেপন, সযক্ষী ও লগ্ন	১৫০	জুতা	১৭৪
বঙ্গীয়ব, শূদ্রীয়ব ও গীত	১৫১	ব্রাণের প্রফুল্লতা,	১৭৫
সৌরভ ও ভূষণরূপ	১৫২	বাচিক ও আলাপ	
পদাঙ্ক, বিপক্ষীনিরূপণ, শিল্পকৌশল	১৫৩	বিলাপ ও সংলাপ	১৭৬
সম্মিহিত, নির্মালা, বর্হ ও গুজ্জা,	১৫৪	প্রলাপ	১৭৭
নৈচিকী ও তটস্থ উদ্দীপন		অহুলাপ, অপলাপ, সন্দেশ	১৭৮
অহুতাব প্রকরণ	১৫৬	অতিদেশ ও অপদেশ	১৭৯
অলঙ্কার	১৫৬	উপদেশ, নির্দেশ ও ব্যপদেশ	১৮০
অদ্বজ অলঙ্কার ও ভাব	১৫৭	সাম্বিক প্রকরণ	১৮২
হাব ও হেলা	১৫৮	সাম্বিকভাব, হর্বহেতু স্তম্ভ	১৮২
অবজ্ঞ অলঙ্কার, শোভা,	১৫৯	ভয়হেতু স্তম্ভ, আশ্চর্যহেতু স্তম্ভ	
কান্তি ও দীপ্তি		বিবাহহেতু ও ক্রোধহেতু স্তম্ভ	১৮৩
মাদুর্ধ্ব ও প্রগল্ভতা	১৬০	স্বেম—হর্বহেতু, ভয়হেতু	১৮৩
ঐর্ষ্য ও বৈর্ষ	১৬১	স্বেম—ক্রোধহেতু	১৮৪
স্বভাবজ অলঙ্কার, লীলা ও বিলাস	১৬২	রোমাঞ্চ—আশ্চর্য-দর্শনে	১৮৪
		ঐ হর্বহেতু	১৮৪

বিষয়	পত্রাঙ্ক	বিষয়	পত্রাঙ্ক
রোমাঞ্চ—ভয়হেতু	১৮৫	আবেগ	২০৪
স্বয়ংভেদ—বিবাদহেতু	১৮৫	উদ্ভাদ বা চিত্তবিভ্রম	২০৫
বিশ্বয়হেতু, কোপহেতু		অপস্মার, ব্যাধি, মোহ	২০৬
ঐ হর্ষহেতু, ভয়হেতু	১৮৬	হর্ষহেতু মোহ, বিশ্লেষ	২০৭
বেপথ—ত্রাসে, হর্ষে ও অমর্ষহেতু	১৮৭	বিবাদহেতু মোহ	২০৮
বৈবর্ণ্য—বিবাদ ও রোষহেতু		মূতি বা প্রাণত্যাগ	২০৮
ঐ ভয়হেতু	১৮৮	আলস্ত ও জ্ঞাতা	২০৯
অজ্ঞ—হর্ষহেতু রোষহেতু	১৮৮	ব্রীড়া—নবসঙ্গমে	২১০
বিবাদহেতু, প্রলয়	}	ঐ অকার্যহেতু, স্তবহেতু	২১১
স্বথে প্রলয়		ঐ অবজ্ঞা হেতু	২১২
হুঃগহেতু প্রলয়	১২০	অবহিখা ও জৈশ্ব্য	২১২
ধুমায়িতা	১২০	স্মৃতি—সাদৃশ্যদর্শনে ও	}
জলিতা, দীপ্তা, উদীপ্তা	১২১	দৃঢ়অভ্যাসহেতু	
ব্যভিচারিভাব	১২৩	বিতর্ক—দ্বিবিধ	২১৬
নির্বেদ	১২৪	চিন্তা	২১৭
পৌরাণিক, অসিদ্ধিহেতু ও	১২৬	মতি	২১৯
বিপত্তিহেতু বিবাদ		সমঙ্গসার উদাহরণ	২১৯
অপরাধহেতু বিবাদ	১২৭	মূতি ও হর্ষ	২২০
দৈন্ত—হুঃ ও ত্রাসহেতু	১২৭	ঔৎসুক্য	২২১
অপরাধহেতু দৈন্ত	১২৮	ঔদ্রা	২২২
মানি বা নির্বলতা—	}	অমর্ষ	২২৩
জন্মহেতু ও আধিহেতু		অনুয়া	২২৪
রতিহেতু মানি এবং জন্ম,	১২৯	চাপল্য—অভুরাগ ও ঘেঘহেতু	২২৫
পথজন্ম, নৃত্যজন্ম ও রতিজন্ম		নিদ্রা	২২৬
বদ এবং গর্বাধি	২০০	সুপ্তি ও স্বপ্ন	২২৭
শব্দ	২০২	বোধ বা নিদ্রানিবৃত্তি	২২৮
জ্ঞান	২০৩	সঙ্গীত প্রতি স্নেহ	২২৮
		দশাচতুষ্টয়, উৎপত্তি, সন্ধি	২২৯

বিষয়	পত্রাঙ্ক	বিষয়	পত্রাঙ্ক
শাবল্য	২৩১	রাগভেদ	২৬৬
শাস্তি বা ভাবের লয়	২৩১	অমুরাগ	২৬৯
স্থায়িতাব—মধুরা রতি	২৩২	বশীভাব ও প্রেমবৈচিত্র্য	২৭০
রতি আবির্ভাবের হেতু	২৩৩	ভাব ও মহাভাব	২৭১
অভিযোগ, স্বাভিযোগ		রূঢ়ভাব ও ঐ অমুরভাব	২৭২
পরকর্তৃক অভিযোগ, বিষয়		অধিরূঢ়ভাব	২৭৩
শব্দনিমিত্ত, স্পর্শহেতু	২৩৪	মোদনভাব	২৭৩
রূপহেতু, রসহেতু	২৩৫	কাঙ্ক্ষাগণের ক্ষোভকারিতা	২৭৪
গন্ধহেতু, সঙ্ঘ	২৩৬	প্রেমোন্মত্তসম্পদ্বতী বৃন্দাশয়িত	২৭৪
কুলাদির গৌরব, অভিমান	২৩৭	মোহনভাব ও ঐ অমুরভাব	২৭৫
পদচিহ্ন, গোষ্ঠ	২৩৮	দিব্যোন্মাদ ও অবস্থাত্তেদ	২৭৬
প্রিয়জন, উপমা	২৩৯	উদ্বর্ণা, চিত্রজল, প্রজল,	
স্বভাব, নিসর্গ	২৪০	পরিজল, বিজল, উজল,	
স্বরূপ—রূক্ষনিষ্ঠ	২৪১	সংজল, অবজল, অভিজল	
লসনানিষ্ঠ, উভয়নিষ্ঠ	২৪২	আজল, প্রতিজল ও স্তজল	২৮২
রতির তারতম্য—সাধারণী	২৪৩	মাদন	২৮৩
সমঞ্জসা ও সমর্থী	২৪৪	স্থায়িতাব উপসংহার, রতিবিপর্ষয়	২৮৫
মহাভাব, প্রেম, স্নেহ ইত্যাদি	২৪৫	ও রতিসীমা	
প্রেম	২৪৬	শৃঙ্গারভেদ—বিপ্রলভ	২৮৭
প্রেমভেদ	২৪৭	পূর্বরাগ—দর্শন, সাক্ষাৎ দর্শন	২৮৮
স্নেহ	২৪৮	চিত্রপট ও স্বপ্ন দর্শন	
মনোজব—প্রকারভেদ	২৪৯	জীবন	২৮৯
মৃতস্নেহ	২৫০	সঙ্কারিতাব, প্রোচ,	২৯২
গৌরব ও মধুস্নেহ	২৫১	দশদশা ও লালসা	
মান	২৫২	লালসার পরিপাক, উৎসেগ	২৯৩
উদাত্ত, দাক্ষিণ্য-উদাত্ত ও	২৫৩	আগর্ভা, তানব	২৯৪
বাম্যগন্ধ	২৫৪	জড়িয়া	২৯৫
ললিত, কোটিল্য ও নর্য	২৫৫	বৈয়গ্র্যা ও ব্যাধি	২৯৬
প্রণয়	২৫৬	উন্মাদ ও মোহ	২৯৭
মৈত্র্য, লখ্য	২৫৭	মৃত্যু	২৯৮
স্নেহ-প্রণয়-মান, স্নৈমিত্র্য, স্থলখ্য	২৫৮	সমঞ্জস—অভিলাষ	২৯৯
রাগ	২৫৯		

বিষয়	পত্রাঙ্ক	বিষয়	পত্রাঙ্ক
চিন্তা, বৃত্তি	৩০০	নায়কের সংক্ষিপ্ত সন্তোষ	} ৩৩৭
শুণকীৰ্ত্তন	৩০১	নায়িকা কর্তৃক „ „	
সাধারণ—অভিলাষ	৩০২	সংকীর্ণ সন্তোষ	
কামলেশ	৩০৩	সম্পন্ন সন্তোষ	৩৩৮
মালা অর্পণ	৩০৪	আগতি, প্রাতীর্ভাব	৩৩৯
মান	৩০৬	সমৃদ্ধিমান সন্তোষ	৩৪০
জীবন, অচ্যুতি	৩০৮	গৌণ সন্তোষ	৩৪২
ভোগাঙ্ক	৩০৯	অপ্নে সংক্ষিপ্ত-সন্তোষ	৩৪২
গোত্রাঙ্কন		অপ্নে সংকীর্ণ-সন্তোষ	
অপ্নর্শন		„ সম্পন্ন সন্তোষ	৩৪৩
দর্শন, নির্ভেদ্য মান	৩১১	„ সমৃদ্ধিমান সন্তোষ	
কাষণভাসজ্বলিত মান	৩১২	সন্দর্শন	৩৪৪
বৃগপৎ মান	৩১৪	জন্মনা, পরম্পর গোষ্ঠী	৩৪৫
সাম, ভেদ	৩১৬	বিতথোক্তি জল্প	৩৪৬
উপালম্ব প্রয়োগ	৩১৭	স্পর্শ, বস্তু রোধন	৩৪৭
হান, নতি, উপেক্ষা	৩১৮	রাসকীড়া, বৃন্দাবনলীলা, }	৩৪৭
রসান্তর, বাদ্যজিক ও বুদ্ধিপূর্বক	৩১৯	যমুনায় জলকেলি	} ৩৪৮
শেষবলে মানোপগমন		নৌকাবিহার	
কালবলে „		লীলাচৌর্ধ	৩৪৮
মুহুরীক্ষনিত্তে „		বংশীচৌর্ধ, বস্তুচৌর্ধ, পুষ্পচৌর্ধ	৩৪৯
নির্ভেদ্য মান	৩২২	ঘট্ট, কুঞ্জাদিলীনতা	৩৫০
শ্রেয়বৈচিত্র্য	৩২৩	মধুগান	৩৫১
প্রবাস ও প্রবাসভেদ	৩২৪	বধূবেশ ধারণ	৩৫১
প্রবাস—ভাবী, ভবন ও ভূত	৩২৫	কপট নিজা	৩৫২
অবুদ্ধিপূর্ব প্রবাস	৩২৬	দ্যুতকীড়া বা পাশাখেলা	৩৫২
চিন্তা, জাগর, উদ্বোধ	৩২৭	বস্তুকর্ষণ	৩৫৩
জানব, মলিনতা, প্রলাপ	৩২৮	চূষন, আলিঙ্গন, নথকত	৩৫৩
ব্যাধি, উন্মাদ	৩২৯	বিষাধরস্থাপান	৩৫৪
মোহ ও বৃত্তি—দশা	৩৩০	সম্প্রয়োগ	৩৫৪
দ্বিব্যোমার্হ ও মানসিক বিবর্ত	৩৩১	প্রমদমাগনে মজলাচরণ	৩৫৬
সংযোগ-বিয়োগ দ্বিতি	৩৩২	পরিশিষ্ট—	} ৩৫৭
সন্তোষ	৩৩৩	বিপ্রলভের প্রকারভেদ	
	৩৩৬	সন্তোষের প্রকারভেদ	
		রস-প্রবাহ	৩৫৭

মিথিলা, প্রয়াগ, নীলাচল ও সমগ্র দাক্ষিণাত্যে উঠলো সেই প্রেমের ভরস্ব।
 মানুষের জীবন ও মন ওতপ্রোতভাবে মিশে গেল এক অভিনব মিলনের
 ছন্দে। মানুষের প্রেমের বন্ধনে আবদ্ধ হলেন ভগবান—আলিঙ্গনবদ্ধ হলেন
 প্রেমিক-প্রেমিকার নিবিড় প্রণয়-বন্ধনে। সহজিয়া রীতির এক নবতম যুগ
 প্রবর্তিত হলো। গোড়ীয় বৈষ্ণব-প্রেমধর্ম-প্রবাহের সর্বাপেক্ষা গৌরবোজ্জ্বল যুগের
 সূচনা হলো এইখানে। মহাপ্রভুর পদাঙ্ক অনুসরণ করলেন বাঙলার মনীষীরা—
 রূপ, সনাতন, বৃন্দাবন দাস, শ্রীজীব, মুরারি গুপ্ত, কর্ণপুর ও কৃষ্ণদাস প্রভৃতি
 আরো অনেকে। তারপর একে একে আবির্ভূত হলেন প্রতিভাশীল কবিগণ।
 গোবিন্দদাস, জ্ঞানদাস, ঘনশ্যাম দাস, লোচনদাস, নরহরি, নরোত্তম দাস,
 শচীনন্দন প্রমুখ বৈষ্ণব কবিগণ রাধাকৃষ্ণ প্রেমলীলার অমৃতরসধারায় সিক্ত
 করলেন বাঙলার যুগ্তিকা; পুষ্ণিত হয়ে উঠলো বাণীকূজে স্বরভিন্নিক মল্লিকা-
 মালতী-কদম্ব-চম্পক। দিব্যজীবনের স্পর্শ লাগলো আকাশে-বাতাসে।

মহাপ্রভুর অন্তরঙ্গগণের মধ্যে শ্রীরূপ ও সনাতনের নাম সর্বাধিক উল্লেখ-
 যোগ্য। সনাতন ও রূপ উভয়েই ছিলেন অসামান্য পণ্ডিত। সনাতন
 ছিলেন ভাগবতশাস্ত্রে বিশেষ প্রাজ্ঞ, আর শ্রীরূপ ছিলেন স্বভাবকবি ও রসশাস্ত্রে
 সুপণ্ডিত। শ্রীরূপরচিত শ্লোকগুলি যেমন রসপ্লুত ও সুললিত ছিল, তাঁর
 হস্তাক্ষরও ছিল তেমনি অনবচ্ছন্দ সুন্দর। শ্রীরূপরচিত শ্লোকে মহাপ্রভু তাঁর
 আপন অন্তরের প্রতিধ্বনি খুঁজে পেয়েছিলেন; মুগ্ধ হয়ে স্বরূপ দামোদরকে
 বলেছিলেন—‘আমার অন্তরবার্তা রূপ জানিল কেমনে?’ তাঁর হস্তাক্ষর দেখেও
 অবতীর্ণ হইত হয়ে, তিনি বলেছিলেন—শ্রীরূপের হস্তাক্ষর যেন সূক্তাকলাপের
 মতো সুন্দর।

“শ্রীরূপের অক্ষর যেন মুকুতার পাতি।

শ্রীত হঞা করে প্রভু অক্ষরের স্তুতি।” চৈঃ চঃ ৩।১

জিকুবনে নিত্যকিশোর ভগবান শ্রীকৃষ্ণের রূপই সর্বশ্রেষ্ঠ রূপ, এবং সেই
 রূপই সর্বশ্রেষ্ঠ ধ্যানের বিষয়। ব্রজভূমে অবতীর্ণ হয়ে সেই ভুবনমনোমোহন
 পরমরূপময় মাধব অপ্রাকৃত মাধুর্যরসে নিত্যলীলা করলেন যমুনার কূলে কূলে
 প্রেমময়ী ব্রজাঙ্গনাদের সঙ্গে। স্বামের রূপই শ্রেষ্ঠরূপ, আর বৃন্দাবন ও যমুনা
 (যমুপুরী) তাঁর শ্রেষ্ঠ লীলাভূমি। তিনিই সর্বরসের আধার, সৃষ্টিমান

আনন্দস্বরূপ—‘রসো বৈ সঃ’। সেই রসের সারভূত নিগূঢ়তম আনন্দপ্রবাহ
শৃঙ্গার রস, এবং সেই শৃঙ্গার রসের শ্রেষ্ঠ লীলানিকেতন বৃন্দাবন।

‘জামমেব পরং রূপং পুরী মধুপুরী বর।

বরঃ কৈশোরকং ধোয়ম্ আত্ম এব পরো রসঃ ॥’

বৃন্দাবনে এই মধুরতম রস আশ্বাদনের জন্য শ্রীকৃষ্ণ আপন রূপরাশি
সজোগ ক’রে ফ্লাদিনী শক্তির তরকোচ্ছ্বাসে অবগাহন করলেন। মধুর রসের
ঘনতম পরিপাক পরকীয়া প্রেম। সেই রসোল্লাসের জন্য শ্রীকৃষ্ণের স্বকীয়
পরমাশক্তি, অঘটন-ঘটন-পটীয়সী মহাভাবস্বরূপিনী যোগমায়া শ্রীরাধা এবং
গোকুলবাসিনী পদ্মনয়না গোপাঙ্গনাগণ হলেন তাঁর পরকীয়া নায়িকা। এই
পরকীয়া প্রেমের রসোল্লাস ঘটই নিবিড় হোক, ব্রজভূমি ব্যতীত অঙ্কুর সে
প্রেমের বসতি নাই। শ্রীকৃষ্ণ এবং শ্রীরাধা ও ব্রজাঙ্গনাদের পক্ষেই সে প্রেম
প্রযোজ্য, ভগবান্ ও ভক্তের জন্য কল্পিত। সমাজ-জীবনে ওই পরকীয়া প্রেমের
আদর্শ সর্বথা পরিবর্তনীয়। বিষপান যেমন শরীরের পক্ষেই সম্ভব, মানবের পক্ষে
নয়, পরকীয়া প্রেমও তেমনি বৃন্দাবনলীলাতেই সম্ভব, বাস্তব জীবনে নয়।

‘পরকীয়াভাবে রতিরসের উল্লাস।

ব্রজ বিনা তাহার অঙ্কুর নাহি বাস ॥’ চৈঃ চঃ

কালধর্মে বৃন্দাবনলীলার সেই মার্ধব ও মাহাত্ম্য অবলুপ্তপ্রায় হয়ে এসেছিল।
মহাপ্রভু সেই অত্যাঙ্কল প্রেমভক্তিরহস্তের পুনরুদ্ধার ও প্রচারের জন্য
সনাতন ও শ্রীকৃষ্ণকে প্রেমভক্তিতত্ত্ব সম্পর্কে উপদেশ দিয়ে বৃন্দাবনে পাঠালেন।
জগদ্বিত ও পরমভাগবত সনাতন এবং প্রেমভক্তিরসপ্লুতহৃদয় স্বভাবকবি শ্রীকৃষ্ণ
ছিলেন তাঁর অতীব অন্তরঙ্গ। শ্রীকৃষ্ণের কবিপ্রতিভায় তিনি পূর্বেই মুগ্ধ
হয়েছিলেন। তাই প্রেমালাপ এবং গাঢ় আলিঙ্গনে তিনি শ্রীকৃষ্ণকে অভিষিক্ত
করেছিলেন। আপন হৃদয়ের অহুভূতি এবং প্রতিভাদীপ্ত অমেয় শক্তি শ্রীকৃষ্ণের
অন্তরে সঞ্চারিত ক’রে তিনি পরমমধুর প্রেমধর্মের বীজ অঙ্কুরিত করেছিলেন।

‘কালেন বৃন্দাবনকেলিবর্তা লুপ্তেতি তাং ধ্যাপয়িতুং বিশিষ্ট।

কৃপায়ভেনাভিষিবেচ দৈবস্তম্ভৈব রূপক সনাতনক ॥

প্রিয়স্বরূপে দয়িতস্বরূপে প্রেমস্বরূপে সহজাভিরূপে।

নিজাঙ্গরূপে প্রভুরেকরূপে ততান রূপে অবলাসরূপে ॥’

কবিকর্ণপুর—চৈতন্যচন্দ্রোদয়।

বৃন্দাবন ছিল মথুরারাজ্যের অন্তর্ভুক্ত। শ্রীকৃষ্ণের স্বকীয়া ও পরকীয়া প্রেমের লীলাক্ষেত্র এই ব্রজভূমি—মথুরা ও বৃন্দাবন। মথুরায় তিনি লীলা-বিলাস করলেন লোকধর্মমতে গৃহীতা পত্নীদের সঙ্গে, আর বৃন্দাবনে লোকাভীত মধুরস্বরের অপ্রাকৃত নিত্যলীলা করলেন মহাভাবস্বরূপিনী শ্রীরাধা ও প্রেমময়ী গোপাবিনায়কের সঙ্গে। মহাপ্রভু সেই নিত্যলীলার অবলম্বনপ্রায় মাধুর্য প্রচারের ভার দিলেন সনাতন ও রূপ গোষ্ঠীর উপর। অভিন্নরূপে শ্রীরূপকে বৃন্দাবনে পাঠাবার সময় তিনি অস্ত্রাশ্রয় বরণে ভক্তগণের নিকট তাঁর জন্ত আশীর্বাদ ভিক্ষা করলেন, যাতে শ্রীরূপের অন্তরে শক্তি সঞ্চারিত হয়।

‘অষ্টমত নিত্যানন্দপ্রভু এই দুইজনে।

প্রভু কহে রূপে রূপা কর কার্যমানে ॥

তোমা দোহার রূপাতে ইহার হয় ভৈছে শক্তি।

যাতে বিরচিত্তে পারে কৃষ্ণরসভক্তি ॥’

এই ঘটনা থেকে স্পষ্টই প্রতীয়মান হয় যে, শ্রীরূপ ও সনাতন ছিলেন তাঁর অত্যধিক প্রিয়। বৃন্দাবন রাজ্যকালে তিনি নিজের প্রাণদম শ্রীরূপকে ব’লে দিলেন যে, কৃষ্ণপ্রেমের পরকীয়া লীলা যেন বৃন্দাবনেই সীমাবদ্ধ থাকে : ব্রজভূমি ব্যতীত সে প্রেমলীলা যাতে অন্তর উদাহৃত না হয়, সেজন্য শ্রীরূপকে তিনি বিশেষভাবে সাবধান করে দিলেন।

‘কৃষ্ণকে বাহির নাহি কর ব্রজ হৈতে।

ব্রজ ছাড়ি কৃষ্ণ কতু না যায় কাঁহাতে ॥’

শ্রীরূপকে তিনি শুধু সাবধান করে দিলেন, তাই নয়। বৃন্দাবনের অনাবৃত প্রেমলীলার সকল তত্ত্ব তাঁকে বিশেষভাবে শিক্ষা দিলেন।

‘কৃষ্ণতত্ত্ব, ভক্তিতত্ত্ব-রসতত্ত্বপ্রাপ্ত। সব শিকাইল প্রভু ভাগবত সিদ্ধান্ত ॥

স্বামানন্দ পাশে বসত সিদ্ধান্ত শুনিল। রূপে রূপা করি তাহা সব সঞ্চারিল ॥’

প্রেম ও রসতত্ত্ব সম্বন্ধে মহাপ্রভুর শিক্ষা ও উপদেশ জ্বলন্ত ধারণা করে, শ্রীরূপ ও সনাতন বৃন্দাবনে গিয়ে শ্রীকৃষ্ণের বৃন্দাবনলীলা ও প্রেমধর্ম প্রচারে আত্মনিয়োগ করলেন। সেই সব উপদেশানুযায়িত কথার স্মরণ করে, শ্রীরূপ তাঁর গ্রন্থে শ্রীচৈতন্যদেবের চরণবন্দনা করে লিখেছেন—

‘হৃদি বস্তু প্রেরণয়া প্রবর্তিতোহং বরাকরূপোহপি।

তত্ত্ব হরেঃ পদকমলং বন্দে চৈতন্যদেবত ॥’ —ভক্তিরসানুভবসিদ্ধি।

শ্রীরূপ, সনাতন এবং শ্রীজীব ও অপর যে কয়েকজন কৃষ্ণপ্রেমাত্মরাগী ভক্ত বৃন্দাবনে গিয়ে বাস করলেন, তাঁদের সাধনা হলো ভগবৎ আরাধনায় আত্ম-নিবেদন এবং বৃন্দাবনের অপ্রাকৃত প্রেম-লীলামাধুর্যের অহুসরণে সাধন-ভজনের জন্ত সেই নিত্যলীলার পুনঃপ্রচার। মহাপ্রভুর প্রভাবে অবলুপ্তপ্রায় বৃন্দাবন-লীলার মাহাত্ম্য, বৈষ্ণবচেতনা ও প্রেমধর্ম পুনরুজ্জীবিত হলো। এই মহান কার্যে চৈতন্তদেবের নির্দেশে ত্রতী হলেন ছয় গোস্বামী, যারা বৃন্দাবনে গিয়ে বাস করলেন, এবং এই প্রেমধর্ম প্রচারের জন্ত জীবন উৎসর্গ করলেন।

‘শ্রীরূপ সনাতন ভট্টরঘুনাথ।

শ্রীজীব গোপালভট্ট দাস রঘুনাথ ॥

এই ছয় গোস্বামি যবে ব্রজে কৈল বাস।

রাধাকৃষ্ণ নিত্যলীলা হৈল পরকাশ ॥’

সে যুগে ভারতের প্রায় সর্বত্রই বৈধী উপাসনার রীতি প্রচলিত ছিল। কেবলমাত্র গোড় এবং দাক্ষিণাত্যের কাবেরীতীরে ও মহানন্দ-উপকূলে আলবার বা আরওয়ার সম্প্রদায়ের মধ্যে প্রচলিত ছিল রাগাহুগা প্রেমধর্মরীতি। বিষ্ণু-মন্ডলের শ্রীকৃষ্ণকর্ণামৃত এবং আরওয়ার সম্প্রদায়ের গীতাবলীতে রাগাহুগার পরাকাষ্ঠা দেখা যায়। কিন্তু বাঙলার কবি জয়দেব, বিজ্ঞাপতি ও চণ্ডীদাস প্রভৃতির পদাবলীতেও আমরা অপূর্ব মাধুর্যরসের ছবি পাই। এই বৈষ্ণবগণের মতে শ্রীকৃষ্ণই পরম আরাধ্য ভগবান্। নায়ক ও নায়িকার মতো প্রেমের অনির্বচনীয় সম্পর্কে যখন সেই ভগবান্ ও ভক্তের মধুরতম সংযোগ হয়, তখনই হৃদয়রস এক অপ্রাকৃত অভিরাম মধুররসের আন্বাদনে ভরপুর হয়ে ওঠে। হৃদয়ের উৎসমুখ খুলে গিয়ে মহাপ্রভুর অন্তরে এই অমৃতময় মধুররসের মন্ডাকিনীধারা প্রবাহিত হয়েছিল। তিনি ভাবে বিভোর হয়ে উঠেছিলেন। তারপর সার্ব-ভৌমের নিকট সন্ধান পেয়ে, তিনি দাক্ষিণাত্যের বিজ্ঞানগরে গিয়ে রামানন্দের সঙ্গে সাক্ষাৎ করলেন। অন্তরঙ্গ আলাপে রামানন্দের নিকট ‘কাস্তাপ্রেম’ প্রেমের নিগূঢ় রহস্যের কথা অবগত হয়ে, তাঁর অন্তরে প্রেমের প্রবল বন্তা বয়ে গেল। সেই প্রেমধর্মের বীজ তিনি শ্রীরূপের হৃদয়ে অঙ্কুরিত করলেন। মহাপ্রভুর কৃপায় শ্রীরূপ পেলেন প্রেমধর্মের গদোজীর সন্ধান।

‘কাস্তাপ্রেম সর্বসাধ্যসার’ এবং তদ্বাচ্যে ‘রাধাপ্রেম সাধ্যশিরোমণি’ এই ভক্ত রামানন্দের নিকট অবগত হলেও, মহাপ্রভু যে প্রেমধর্মের প্রাবন এসে

দিলেন, তা সম্পূর্ণ স্বতন্ত্রভাবে প্রবাহিত হলো। মহাপ্রভুপ্রবর্তিত প্রেমধর্ম গোড়ীয় বৈষ্ণব-রীতির সঙ্গে ওতপ্রোতভাবে মিশে, এক অভিনব সহজিয়া রীতির প্রাবল্য এনে দিল। অবশ্য দাক্ষিণাত্যের প্রেমধর্মের দ্বারা তিনি যে প্রভাবান্বিত হয়েছিলেন, সে কথা অস্বীকার করা যায় না। তবে সেই প্রেম-ধর্মের মূলধারার সঙ্গে তাঁর অমিয়রূপের অমৃতধারা মিশ্রিত হয়ে নববারি বর্ষণ করলো বৃন্দাবন-নীলাচল ও গোড়বঙ্গে।

জীবনের সারবস্তু বা চরমকাম্য (summum bonum) আনন্দ (delight)। ভগবান এই আনন্দের পরিপূর্ণ স্বরূপ। পাখিব জীবনে আমরা যে আনন্দের স্বাদ পাই, তার মধ্যে ভালবাসার আনন্দই সর্বাধিক (Love is the highest form of delight)। এই আনন্দই রস এবং রসই প্রেম। প্রেম ঘনীভূত হয়ে যখন প্রণয়ের উৎকর্ষহেতু রাগ সঞ্চার হয়, তখন অতিশয় দুঃখও চিন্তে স্থথাহুত্ব সঞ্চার করে।—রূপগোস্বামী।

ভালবাসার আবেশ ও ব্যাকুলতা (Sentiment and Emotion) জ্ঞান বা ভক্তির চেয়ে অনেক বেশী। জ্ঞান বা ভক্তি চিন্তকে সমাহিত করে, কিন্তু ভালবাসা মিলনগিয়ানী চিন্তকে উত্তরোল করে। বিরহের অগ্নিদাহ প্রেমিককে পাগল করে তোলে। জ্ঞান বা ভক্তির মধ্যে শ্রদ্ধা এবং কিছুটা ভালবাসা থাকে; কিন্তু সেই শ্রদ্ধা ও ভালবাসার মধ্যে থাকে ভয় এবং সম্মানবোধের ব্যবধান। প্রেমে এই ব্যবধানবোধ মুছে যায়। প্রেমের লক্ষণই হলো গাঢ় তৃষ্ণা। এই গাঢ় তৃষ্ণা নায়কনায়িকার হৃদয়কে উদ্বেলিত করে। বিরহের অগ্নিদাহে বা মিলনের মধু-উত্তাপে দুটি হৃদয় প্রবীভূত হয়ে একসঙ্গে মিশে যায়। বিচ্ছেদ এবং মিলনের ভেদাভেদ দূর হয়ে যায়।

‘হৃৎ কোড়ে হৃৎ কঁাদে বিচ্ছেদ ভাবিয়া।

তিল আধ না দেখিলে যায় যে মরিয়া ॥’

—চণ্ডীদাস

গোপালনাথের এই প্রেম সাধারণ কাম নয়। প্রণয়বিষ্ট অন্তরের আকৃতিই এখানে নিবিড়তম বন্ধনে ভক্ত ও ভগবানকে আবদ্ধ করেছে।

‘সহজে গোপীর প্রেম নহে প্রাকৃত কাম।

কামক্ৰীড়া সাম্যে তার কহি কাম নাম ॥’ চৈঃ চঃ মধ্য। ৮ম পরিচ্ছেদ।

সর্বসাধারণের এই প্রেমধর্মের দীক্ষা দিয়ে, মহাপ্রভু রূপগোবিন্দকে পাঠিয়ে-
ছিলেন ব্রজভূমে নিত্যপ্রেমের লীলাভিরাম প্রচারের জন্ত।

ব্রজবাসকরে বৃন্দাবন যাত্রার অনেক পূর্বেই শ্রীকৃষ্ণ গ্রন্থরচনায় মনোনিবেশ
করেছিলেন। হংসদূত কাব্য শেষ করে তিনি তাঁর বিখ্যাত বিদগ্ধমাধব ও
ললিতমাধব নাটক দুখানি রচনায় রত হয়েছিলেন। হংসদূত বিরহ
কাব্যের একখানি শ্রেষ্ঠ নিদর্শন। মহাকবি কালিদাস বিরহী যক্ষের মর্মস্বদ
বেদনার গানে এক অভিনব স্বপ্নলোক সৃষ্টি করেছিলেন মেঘদূতে। আর
অমরকবি রূপ বিরহিণী রাধা ও গোপাক্ষনাদের বিধুর চিত্তকুহুম চরিত্র করে
মানসলোকের এক অপরূপ ছায়াপথ সৃষ্টি করলেন হংসদূতে। কালিদাস করেছেন
বিরহী নায়কের মনোবিশ্লেষণ বেদনাময় মন্দাকিনীর বাতুলতায়; আর রূপ
এঁকেছেন বিরহিণী নায়িকার চিত্তচ্ছবি বিধুরা শিখরিণীর অনবদ্য ছন্দতুলিকায়।
নায়ক ও নায়িকা-চরিত্রের দুটি বিভিন্ন দিক পরিষ্কৃত হয়ে উঠেছে এই দুখানি
দূতকাব্যে। কয়েক বৎসর পূর্বে আমি হংসদূতের যে কাব্যানুবাদ প্রকাশ
করেছিলাম, সেখানি বাঙলার বিদগ্ধসমাজে যথেষ্ট সমাদর লাভ করেছে, এবং
এ যাবৎ তার ছয়টি সংস্করণ নিঃশেষিত হয়েছে। বাঙলার স্বাধীনগণের প্রতি
আমি সজ্ঞাত আন্তরিক কৃতজ্ঞতা জ্ঞাপন করছি।

বিদগ্ধমাধব নাটকে শ্রীকৃষ্ণ বৃন্দাবনলীলায় পরকীয়া প্রেমের পরাকাষ্ঠা, এবং
ললিতমাধবে শ্রীকৃষ্ণের পুরলীলা অর্থাৎ স্বকীয়া প্রেমের নিষ্ঠা ও মাধুর্য চিত্রিত
করেছেন। বিদগ্ধমাধব অবিমিশ্র মাধুর্যরূপে পরিপূর্ণ। চরিত্রচিত্রণ, সংলাপ ও
নাটকীয় বাতপ্রতিবাত সৃষ্টিতে কবির অসামান্য মনীষা দুখানি নাটকেই
প্রোজ্জ্বল হয়ে উঠেছে। তাঁর নাটকরচনার কৃতিত্ব সম্পর্কে উচ্ছ্বসিত হয়ে
চৈতন্যদেব বলেছেন—

“বধুর প্রসন্ন ইহার কাব্য সালঙ্কার।

এঁছে কবিত্ব বিনা নহে রসের প্রচার ॥”

যদিও বৃন্দাবনের অনাবৃত লীলাই শ্রেষ্ঠ প্রেমলীলা, তবুও স্বরকার পুরলীলা
যে সমভাবে অন্যান্য প্রেমমাধুর্যে পরিপূর্ণ, কবি তাঁর ললিতমাধব নাটকে সেই
কথাই প্রতিপন্ন করেছেন। তবে স্বকীয়া প্রেমের তুলনায় পরকীয়া প্রেম অনেক
বেশী বাধাবিরসম্বল। সামাজিক বিধিনিষেধের অহুশাসন ও লোকসজ্জার কঠিন
নিষেধে পরকীয়ার পক্ষেপদে বাধা। কিন্তু স্বকীয়া প্রেম অবাধ, নিরঙ্কুশ ও

লোকধর্মতঃ স্বীকৃত, কাজেই সে প্রেমের স্ফূর্তি ও নিত্যলীলায় কোথাও কোম বাধাবিপত্তির নিগড় নাই। সহস্র বাধাবিঘ্ন অতিক্রম করে পরকীয়া প্রেমের স্ফূর্তি ও মিলন হয় বলেই সে প্রেম স্বকীয়র চেয়ে অনেক বেশী রসধন ও মাধুর্যময়। ললিতমাধবে শ্রীরাধাকে তিনি স্বকীয়া নায়িকায় রূপান্তরিত করেছেন। কিন্তু সেই নায়িকার মুখ দিয়েই তিনি নাটকের সমাপ্তিতে বলেছেন—

‘যা তে লীলাপদপরিমলোদগারিবস্ত্রাপরীতা
ধস্তা ক্ষৌণী বিলম্বতি বৃতা মাধুরী মাধুরীভিঃ।
তত্রান্ধাভিশ্চটুলপশুগীভাবমুগ্ধাস্তরাভিঃ
সদ্বীতস্তং কলয় বদনোজ্জাসিবেহুবিহারম্।’

অর্থাৎ সকল মাধুরীর সারভূত মাধুর্যরসময় মহামাধুরীপূর্ণ লীলাবিহারের মৃণ্ময়গন্ধবিস্তারকারী বনসমূহে পরিব্যাপ্ত বৃন্দাবনে ভাবমুগ্ধ অন্তরে চটুলা গোপীগণ তোমার সঙ্গে যে নিঃসঙ্কোচ ক্রীড়া করে, তা অগ্ৰজ অসম্ভব। সেখানকার ধন্তভূমিতে গোপীভাবে মুগ্ধচিত্তা আমাদের দ্বারা পরিবেষ্টিত হয়ে, তুমি প্রফুল্লবদনে হুমধুর বেহুবিহার করো।

এই উক্তিতে বৃন্দাবনের অনাবৃত প্রেমলীলার গৌরব অধিক পরিষ্কৃত হয়ে উঠেছে। ভাবমুগ্ধ অন্তরে চটুলা গোপীজনগণ নিঃসঙ্কোচ ক্রীড়ার সঙ্গে যখন শ্রীকৃষ্ণকে ঘিরে দাঁড়ায়, তাঁর মুখকমল উজ্জসিত হয়ে ওঠে; তিনি আনন্দে বিভোর হয়ে বাঁশী বাজান।

নাটক দুখানির রচনা আরম্ভ হয় শ্রীকৃষ্ণের ব্রজবাসযাত্রার এক বৎসর পূর্বে। তিনি যখন নীলাচলে সিদ্ধবকুল মঠে ছিলেন, তখন এই নাটক রচনার রত ছিলেন। সেই সময় চৈতন্যদেব একদিন তাঁর নাটকের একটি পাতা হাতে নিয়ে, তাঁর রচিত শ্লোক পড়ে মুগ্ধ হয়েছিলেন। ১৪৩৮ শকাব্দে নাটক দুখানি তিনি লিখতে আরম্ভ করেন। ১৪৫৫ শকে অর্থাৎ ১৫৩৩ খ্রীষ্টাব্দে গোকুলে বিদগ্ধমাধব, এবং ১৪৫২ শকে অর্থাৎ ১৫৩৭ খ্রীষ্টাব্দে, জ্যৈষ্ঠমাসে চতুর্থী তিথিতে ভক্তবনে ললিতমাধব নাটক শেষ করেন। নাটক দুখানি সমাপ্ত হওয়ার পূর্বে পুরীধামে স্বরূপ দামোদর ও নাট্যকলাবিশারদ রায় রামানন্দ মিলিত হয়ে নিত্যানন্দ, গদাধর পণ্ডিত, হরিশাস ঠাকুর, অষ্টৈতাচার্য ও সার্বভৌম ভট্টাচার্য প্রমুখ পণ্ডিতদের সঙ্গে ব’সে বিশেষভাবে পরীক্ষা করেন। তাঁরা সকলেই শ্রীকৃষ্ণের কবিপ্রতিভা ও নাটকের রসমাধুর্যের উচ্চ প্রশংসা করেন। “অগম্য

বজ্রত" নাটকের রচয়িতা স্বৰ্ণোদয় সমালোচক রায় রামানন্দ নাটক দুখানির
স্থখ্যাতি ক'রে বলেছিলেন—

“কবিত্ব না হয় এই অমৃতের ধার ।

নাটক লক্ষণ সব সিদ্ধান্তের সার ॥

প্রেম পরিপাটি এই অদ্ভুত বর্ণন ।

স্তনি চিত্তকর্ণের হয় আনন্দ ঘূর্ণন ॥’

হংসদূত, বিদগ্ধমাদব এবং ললিতমাদব ছাড়াও শ্রীকৃষ্ণ আরো কয়েকখানি
মূল্যবান গ্রন্থ এবং বিবিধ স্তব রচনা করেছিলেন। তন্মধ্যে দানকেনিকৌমুদী বা
ভাগিকা, উদ্ধবসন্দেশ, লঘুভাগবতামৃত, ভক্তিরসামৃতসিদ্ধি, উজ্জলনীলমণি
প্রভৃতি গ্রন্থ এবং চাটুপুষ্পাঞ্জলি প্রভৃতি স্তব বিশেষভাবে উল্লেখযোগ্য।

পূর্বেই বলেছি, রূপগোস্বামিকৃত উজ্জলনীলমণি বিশ্বসাহিত্যের এক অভিনব
সম্পদ। শুধু অভিনব বললেই যথেষ্ট হয় না। মননশীলতার দিক থেকে
উজ্জলনীলমণির সমকক্ষ গ্রন্থ বিশ্বসাহিত্যে বিরল। আপাতদৃষ্টিতে মনে হয়,
এবং অনেকেরই ধারণা যে, উজ্জলনীলমণি অলঙ্কারশাস্ত্রের একখানি প্রাচীন
গ্রন্থ। কিন্তু বস্তুত: তা-ই নয়। প্রণয়্যাবিষ্ট নরনারীর মনঃসমীক্ষণের এক অপূর্ব
ধারাবাহিক আলোচনা করেছেন মহামনীষী রূপগোস্বামী তাঁর এই উজ্জলনীলমণি
গ্রন্থে। চুখক ও লোহের আকর্ষণের চেয়েও পার্থিব জীবনে নরনারীর
প্রণয়্যাকর্ষণ অনেক বেশী গভীর এবং দূরী়। এই আকর্ষণ জীবনকে করে মধুময়
এবং জীবনের পরপারে অতীন্দ্রিয় লোককে ভরে তোলে স্বপ্নময় মাদুর্যকল্পনায়।
নরনারীর এই প্রণয়্যাকর্ষণ কেমন ক'রে সঞ্চারিত হয়, কেমন ক'রে দুজনের
হৃৎকনকে ভাললাগে, এবং সেই ভাললাগা থেকে মুকুলিত হয় পূর্বরাগ, তারপর
সেই পূর্বরাগ পরিণত হয় অহুরাগে, প্রেম ও প্রণয়ে, তারই নিখুঁত চিত্র
এঁকেছেন কবি তাঁর এই বিশ্ববিস্তৃত গ্রন্থে। কবি বলেছেন, একটিমাত্র গ্রন্থি
থেকে যেমন অক্ষরোদগম হয়ে ইন্দ্রধনুের উদ্ভব হয়, এবং সেই ইন্দ্রধনুের বৃকে রস
সঞ্চারিত হয়ে, সেই রস থেকে হয় গুড়, খণ্ড ও শর্করা, তেমনি পূর্বরাগ থেকে
ধীরে ধীরে অহুরাগ, প্রেম ও প্রণয়ের সঞ্চার হয়। এই পূর্বরাগষ্ট প্রেমের
প্রথম অঙ্কুর।

‘রতিধা সঙ্গমাং পূর্বং বর্শন-প্রবণাধিজা।

ভরোরস্মীল্যতে প্রায়েঃ পূর্বরাগঃ স উচ্যতে ॥’

এই গ্রন্থের প্রধান উপজীব্য বিষয় বৃন্দাবনের নিত্যলীলা—শ্রীকৃষ্ণ, রাধা ও অন্যান্য ব্রজবাসিনীদের অকুরন্ত প্রণয়রহস্য। কিন্তু নায়ক-নায়িকারূপে কল্পিত ভগবান্ শ্রীকৃষ্ণ এবং রাধা ও ব্রজসুন্দরীরাই হয়ে উঠেছেন পার্থিব নরনারীর মূর্ত প্রতীক। তাঁদের প্রণয়লীলায় রূপান্তরিত হয়ে উঠেছে মাহুঘেরই প্রেম, মিলন ও বিরহের আনন্দবেদনা। নায়কের ভালো লাগে নায়িকাকে, নায়িকা মুগ্ধ হয় নায়কের গুণে। উন্নীলিত যৌবনের কুসুমাজলি নিয়ে, নায়িকা এগিয়ে যায় তার দয়িতের পায়ে দেহমন সমর্পণ করতে; স্তম্ভুর আত্মানে নায়ক অভিনন্দিত করে তার প্রেমাস্পদ নায়িকাকে, দুটি বাহু প্রসারিত করে আলিঙ্গন-পিয়াসে, নায়িকার দেহমন আসক্ত-উল্লাসে রোমাঞ্চিত হয়ে ওঠে। জীবনের শ্রেষ্ঠ আনন্দের তরঙ্গহিলোলে আত্মদিত হয় মহাজীবনের অমৃতরাশি। জীব-জীবনের এই অমৃতস্বাদই ব্রজস্বাদের প্রতিকল্প—‘ব্রজস্বাদসহোদরঃ’। কবি যেন অন্তরের অন্তস্তলভেদী দিব্যদৃষ্টিতে দেখেছেন প্রণয়মুগ্ধ সেই নরনারীর গোপন মনের প্রতিটি অহুভূতি, আশা ও আকাঙ্ক্ষা। বিদগ্ধগণ জীবনের এই আনন্দধারাকেই বলেছেন মধুররস। রূপগোষ্ঠামীর উজ্জলনীলমণি সেই উজ্জলাখ্য মধুররস বা শৃঙ্গাররসের পূর্ণাঙ্গ বিস্তৃত আলোচনা।

পাত্র-পাত্রীভেদে প্রেমের দুটি ধারা নির্ণীত হয়েছে। একটি স্বকীয়া, আর একটি পরকীয়া। পূর্বরাগ উভয়বিধ প্রেমেই হয়, তবে তার অহুক্রমে অল্পবিস্তর পার্থক্য থাকে। ধর্ম ও সামাজিক অহুশাসনমতে গৃহীতা নায়িকার সঙ্গে যে প্রেম, সে প্রেম স্বকীয়া; আর পরোচা বা অনুচা নায়িকার সঙ্গে যে প্রেম, তাকে বলে পরকীয়া। পরকীয়া প্রেম সমাজনীতির বহির্ভূত এবং নানা বাধাবিলম্বসঙ্কুল বলে, সেখানে মাধুর্যের ঘনত্ব স্বকীয়ার চেয়ে অনেক বেশী। রূপগোষ্ঠামী তাঁর উজ্জলনীলমণি গ্রন্থে অসামান্য নৈপুণ্য ও কৃতিত্বের সঙ্গে এই স্বকীয়া ও পরকীয়া প্রেমের নায়ক-নায়িকার মনঃসমীক্ষণ করেছেন; বিশেষতঃ নায়িকার প্রকৃতি ও গোপনমনের প্রতিটি অহুভূতি তিনি দিব্যদৃষ্টিতে উল্কাটিত করে, বিশদভাবে বিশ্লেষণ করেছেন। বিভাব, আলম্বন, উদ্বীপন, পূর্বরাগ, অহুরাগ, মান, বিরহ, অভিসার, কলহাস্তরিতা, বিপ্রলম্ব, প্রবাস, মানন, মোদন ও প্রেমবৈচিত্র্য প্রভৃতি বিচিত্র ভাব ও অবস্থাগুলি তিনি বিস্তৃতভাবে আলোচনা করেছেন। যদিও তাঁর মূখ্য উদ্দেশ্য ছিল প্রেমাহুগা কৃষ্ণভক্তির পথনির্দেশ করা, তবুও এ কথা অস্বীকার করা যায় না যে, মানবমনের চিররহস্যময় বে

মধুরা রতি, সেই রতিই ধরা দিয়েছে তাঁর প্রতিটি স্লোকে। প্রেমের যে সংজ্ঞার্থ (definition) তিনি নিরূপণ করেছেন, সংক্ষেপে তার চেয়ে যথাযথ নির্বচন আর হতে পারে না। তিনি বলেছেন—

‘সর্বথা ধ্বংসরহিতং সত্যপি ধ্বংসকারণে।

যন্তাববন্ধনং যুনোঃ স প্রেমা পরিকীৰ্ত্তিতঃ ॥’

নায়কনায়িকার যে ভাববন্ধন কোন অবস্থাতেই ধ্বংস হয় না, ধ্বংসের কারণ থাকা সত্ত্বেও যা অটুট থাকে, তাকেই প্রেম বলে। উজ্জলনীলমণি সেই প্রেমের নিগূঢ় মনস্তত্ত্ববিষয়ক একখানি মৌলিক গ্রন্থ (A Psychology of Love and Sentiments)।

মধুরা রতির রসবিশ্লেষণ প্রসঙ্গে রূপগোষামী তাঁর উজ্জলনীলমণি গ্রন্থে নায়ক-নায়িকার যে সূক্ষ্ম মনস্তত্ত্বের বিস্তৃত আলোচনা করেছেন, তা শুধু কবিকল্পনা নয়। বৈজ্ঞানিক দৃষ্টিভঙ্গীতে বিচার করলেও দেখা যায় যে, তাঁর নির্ণীত প্রতিটি তত্ত্ব নিখুঁত, এবং আধুনিক মনোবিজ্ঞানসম্মত। রূপগোষামী খ্রীষ্টীয় মোড়শ শতাব্দীর কবি। কিন্তু উজ্জলনীলমণিতে তিনি নায়িকা-মনের এমন অনেক গোপন রহস্য উদ্ঘাটন করেছেন, যা বর্তমান শতাব্দীর মনোবিজ্ঞানীদের পক্ষেও গবেষণার বিষয়। উজ্জলনীলমণিতে তিনি নরনারীর যৌন-মনস্তত্ত্বের যে বিস্তৃত আলোচনা ও সুগভীর মনঃসমীক্ষণ (Psycho-analysis) করেছেন, তার তুলনায় বিশ্ববিখ্যাত কামশাস্ত্রকার বাৎসায়ন, অধ্যাপক ফ্রয়েড, হাভলক্ এলিস, উইলিয়ম স্টেকেল, মেরি কারমাইকেল স্টোপস ও যুং প্রভৃতি মনীষিগণের কামতত্ত্বের আলোচনা অনেক বেশী স্থূল ও অকিকিৎসক। কেশবদাস তাঁর ‘অষ্টনায়িকা’ গ্রন্থে নায়িকাদের প্রকৃতি, বয়স ও গুণাভাসারে জ্যেষ্ঠভাগ করেছেন। কিন্তু প্রেম কেমন ক’রে সঞ্চারিত হয়, এবং কেমন ক’রে ধীরে ধীরে তা পূর্ণতা লাভ করে, সে সম্পর্কে কোন বিশদ আলোচনা তিনি করেন নি। প্রণয়বিষ্ট নায়ক-নায়িকার মনঃসমীক্ষণ রূপ গোষামী যেভাবে তাঁর উজ্জলনীলমণিতে করেছেন, তেমন বিস্তৃত পর্যালোচনা অন্তর্কোন গ্রন্থে আমরা পাই না। আনুমানিক ১৫৫১ খ্রীষ্টাব্দে উজ্জলনীলমণি গ্রন্থের রচনা সমাপ্ত হয়।

রূপ গোষামী বাঙালী ছিলেন। তাঁর বৃদ্ধপ্রপিতামহ রূপেশ্বর ছিলেন নৌড়ের প্রধানমন্ত্রী। ১৫৩৩ খ্রীষ্টাব্দে রূপেশ্বরের মৃত্যুর পর তাঁর পুত্র পদ্মনাভ

পিতৃপদে অধিষ্ঠিত হন। পদ্মনাভ ৫২ বৎসর বয়সে গোড়ের মন্দির থেকে অবসর গ্রহণ করে, বর্তমান কাটোয়া মহকুমার সন্নিকটবর্তী ঝামটপুর-নৈহাটি (নবহট্ট) গ্রামে গঙ্গাতীরে বসবাস স্থাপন করেন। পদ্মনাভের কনিষ্ঠ পুত্র ছিলেন মুকুন্দদেব। মুকুন্দদেবের পুত্র কুমারদেব ছিলেন রূপের পিতা, এবং তাঁর মাতার নাম ছিল রেবতী দেবী। রেবতী দেবীর গর্ভে কুমারদেবের চার পুত্র জন্মলাভ করেন। জ্যেষ্ঠপুত্রের নামের কোন উল্লেখ পাওয়া যায় না। শ্রীজীব গোস্বামী তাঁর লঘুবৈষ্ণবতোষণী গ্রন্থের শেষে যে বংশপরিচয় দিয়েছেন, তাতে এই জ্যেষ্ঠপুত্র সম্পর্কে তিনিও কোন কথা বলেন নি। তবে কুমারদেবের জ্যেষ্ঠপুত্র যে দুর্ধর্ষ প্রকৃতির লোক ছিলেন, সে কথার উল্লেখ চরিতামৃত্তে পাওয়া যায়। সনাতনকে বন্দী করবার সময় গোড়েশ্বর বলেছিলেন—

‘তোমার বড় ভাই করে দহ্য ব্যবহার ॥

জীব পশু মারি সব বাকলা কৈল খাস।

এথা তুমি কৈলে মাত্র সর্বকার্যে নাশ ॥’

এই উক্তি থেকে বোঝা যায় যে, সনাতনের অগ্রজ বাকলা মহাল খাস দখলে রেখেছিলেন এবং বাদশাহকে সেজ্ঞা কোন রাজস্ব দিতেন না। বাকলা চন্দ্রদ্বীপ তাঁদের পৈতৃক জমিদারি ছিল। কুমারদেব পূর্ববঙ্গে ওই জমিদারি স্থাপন করেন।

ভক্তিরত্নাকরে উল্লিখিত আছে যে, জাতিদের সঙ্গে বিরোধ হওয়ায় কুমারদেব তাঁর পত্নীপুত্রদের নিয়ে নৈহাটি ছেড়ে বাকলা-চন্দ্রদ্বীপ মহালে গিয়ে বসবাস স্থাপন করেছিলেন। এই মহাল বর্তমান বাখরগঞ্জ ও যশোর জেলার অন্তঃপাতী এলাকায় অবস্থিত ছিল। বাতায়াতের সুবিধার জ্ঞাত যশোহরের কতেয়াবাদ গ্রামে তিনি বাসগৃহ নির্মাণ করেছিলেন।

‘নিজগণসহ বঙ্গদেশে গীত গেল।

বাকলা-চন্দ্রদ্বীপ গ্রামেতে বাস কৈল ॥

যশোরে কতেয়াবাদ নামে গ্রাম হয়।

গতায়াতহেতু তথা করিল আলয় ॥’

১৪৮২ খ্রীষ্টাব্দে রূপ গোস্বামীর জন্ম হয়। রূপের অগ্রজ ছিলেন সনাতন, এবং বরুণ ছিলেন সর্বকনিষ্ঠ। এঁদের পিতৃদত্ত নাম ছিল অমর, সন্তোষ এবং অল্পম। মহাপ্রভু ১৫১৬ খ্রীষ্টাব্দে তাঁদের বৈষ্ণবধর্মে দীক্ষা দিয়ে নামকরণ

করেন সনাতন, রূপ ও বলভ। সনাতন ও রূপ অল্পবয়সেই সংস্কৃত ভাষায় অসাধারণ ব্যুৎপত্তি লাভ করেন, এবং কাব্য-ব্যাকরণ-সাংখ্য-বেদান্ত-শাস্ত্র ও মীমাংসা প্রভৃতি শাস্ত্রে অসামান্য পাণ্ডিত্য অর্জন করেন। সংস্কৃত শিক্ষা শেষ হলে, উভয়ে সপ্তগ্রামের বিখ্যাত ফার্সী পণ্ডিত ফকরুদ্দিন গাজীর নিকট রাজভাষা ফার্সী ও আরবি শিক্ষা করেন। সনাতন যেমন অসাধারণ পণ্ডিত ও প্রতিভাবান ছিলেন, তেমনি অসামান্য ছিল তাঁর তেজস্বিতা। গোড়েশ্বর তাঁর গুণপরিচয়ে মুগ্ধ হয়ে তাঁকে শ্রেষ্ঠজ্ঞানী বা ‘সাকর মল্লিক’ পদবীতে ভূষিত করে প্রধান উপদেষ্টা বা সচিব (Chief Adviser) পদে নিযুক্ত করেন। তারপর রূপ এবং অহুপম (বলভ) অগ্রজের অহুসরণ করে গোড়েশ্বরের অধীনে উচ্চপদ গ্রহণ করেন। ত্রীরূপ হুলেখক ছিলেন, এবং তাঁর হস্তাক্ষর অতিসুন্দর ছিল। মুন্সিয়ানা ও লিগিকুশলতার জন্য বাদশাহ তাঁকে ‘দবীরখাস’ বা পাসমুন্দা (Private Secretary) পদে নিযুক্ত করেন। মুকুন্দদেবের মৃত্যুর পর সনাতন ‘দবীরখাস’ পদে এবং ত্রীরূপ রাজস্ব বিভাগের প্রধান কর্মচারীর পদে নিযুক্ত হন। কনিষ্ঠ অহুপম রাজসরকারে টাকশালের অধ্যক্ষরূপে যোগদান করেন। সনাতন ও রূপ গোবর্দীর রাজপদবীকে নাম ভ্রম করে বগীয় ডক্টর দীনেশচন্দ্র সেন মহাশয় তাঁর Vaisnav Literature of Medieval Bengal গ্রন্থে এবং ডক্টর সর্বপল্লী রাধাকৃষ্ণ তাঁর Indian Philosophy গ্রন্থে (২য় খণ্ড, ৭৬১ পৃষ্ঠা) বলেছেন যে, বর্ধম ত্যাগ করে উভয় ভ্রাতা মুসলমানধর্ম গ্রহণ করেছিলেন। এই ভ্রমের কিছুটা কারণ হয়তো ঘটেছে চৈতন্যভাগবত ৬ চরিতামৃতের কয়েকটি উক্তি থেকে। চৈতন্যদেবের নিকট সনাতন নিজের সম্পর্কে বলেছেন—আমি ‘নীচেন্দ্রকুর্পার’ অর্থাৎ কুকীগত দাস; ‘শ্বেচ্ছ জাতি শ্বেচ্ছসঙ্গী করি শ্বেচ্ছ কর্ম। কুকর্মেতে সদা রত গোয়াঞিহু ধর্ম’। কিন্তু শ্বেচ্ছ শব্দের অর্থ মুসলমান নয়। বহু প্রাচীন গ্রন্থে অহিন্দু-আচারযুক্ত জাতি শবর-কিরাত প্রভৃতিকেও শ্বেচ্ছ বলে অভিহিত করা হয়েছে। মুসলমানধর্ম প্রবর্তিত হওয়ার বহুপূর্বে, অন্তত্বভাবে প্রয়োগের জন্য অনাচারী অহুসরদেরও শ্বেচ্ছ বলা হয়েছে। যে দেশে কৃকসার যুগ অবধি বিচরণ করে না, সে দেশকেও শ্বেচ্ছ দেশ বলা হতো। বা বজীর নর, তাও শ্বেচ্ছ বলে অভিহিত। সনাতন ও রূপ বাদশাহের দাসত্ব করতেন এবং হিন্দু-আচারভ্রষ্ট ছিলেন বলে নিজেদের শ্বেচ্ছ অর্থাৎ ভ্রাত্য বলেছেন। কিন্তু

সন্ন্যাস গ্রহণের পূর্বে, রাজপদে অধিষ্ঠিত থেকেও সনাতন শ্রীমন্তাগবতের চীকা প্রণয়ন করেছিলেন এবং রূপ গোস্বামী গোড়ে বসে 'হংসদূত' রচনা করেছিলেন। হুতরাং তাঁরা মুসলমানধর্ম গ্রহণ করেছিলেন, একথা মনে করবার কোন কারণ নাই। শ্রীজীব গোস্বামী তাঁর বংশপরিচয়ে তাঁদের ধর্মাস্ত্রগ্রহণ সম্পর্কে কোন কথা উল্লেখ করেন নি।

সন্ন্যাস গ্রহণের কিছুদিন পরে চৈতন্যদেব ১৫১৩-১৪ খ্রীষ্টাব্দে সনাতন ও রূপের সঙ্গে মিলিত হওয়ার উদ্দেশ্যে গোড়ের সন্নিকটস্থ রামকেলি গ্রামে উপস্থিত হন। মহাপ্রভুর সংস্পর্শে উভয় ভ্রাতার মনে বৈরাগ্যের উদয় হয়। মহাপ্রভু তাঁর নবধর্ম প্রচারের জন্ত উভয় ভ্রাতাকে পরমসুহৃদ্ ও সহায়রূপে গ্রহণ করেন এবং তাঁদের বৈষ্ণবপ্রেমধর্মে দীক্ষা দিয়ে, ১৫১৬ খ্রীষ্টাব্দে সনাতন ও রূপ নামে অভিহিত করেন।

‘আজি হৈতে দৌহার নাম রূপ সনাতন।’ চৈঃ চঃ

উচ্চরাজপদ ও সংসারধর্ম ত্যাগ ক’রে, মহাপ্রভুর নির্দেশে উভয় ভ্রাতা যখন প্রেমধর্ম প্রচারের জন্ত বৃন্দাবনে গেলেন, তখন সনাতন ও রূপের হাতে পূর্বাঙ্গিত বহু অর্থ ছিল। রাজকার্য পরিত্যাগকালে শ্রীরূপের হাতে প্রায় চল্লিশ হাজার স্বর্ণমুদ্রা ছিল। সেই অর্থের অধিকাংশ তিনি ব্রাহ্মণ-বৈষ্ণব ও দরিদ্র আত্মীয়-স্বজনের ভরণপোষণের জন্ত বিলিয়ে দিয়ে, অবশিষ্ট অর্থ দেবালয় ও দেবকীত্তির জন্ত এবং রাজরোষে নিজের দণ্ড বন্ধের জন্ত সঞ্চয় ক’রে বিখ্যাত বিপ্রহানে গচ্ছিত রেখেছিলেন।

‘ব্রাহ্মণ বৈষ্ণবে দিল তার অর্দ্ধধনে।

এক কোঠি ধন দিল কুটুম্ব ভরণে ॥

দণ্ড বন্ধ লাগি চৌটি সঞ্চয় করিল।

ভাল ভাল বিপ্রহানে হাশ্য রাখিল ॥’

চৈঃ চঃ ২। ১৩।

সনাতন ও রূপ শেষজীবন অতিবাহিত করলেন বৃন্দাবনে। সেখানে বাধুকরী করে তাঁরা জীবনধারণ করতেন এবং অবসর সময় অতিবাহিত করতেন মদনমোহনের আরাধনায় ও প্রেমধর্ম প্রচারের জন্ত গ্রন্থরচনায়। পূর্বাঙ্গিত অর্থের অবশিষ্ট যা ছিল, সে অর্থ ব্যয় করলেন মন্দির-প্রতিষ্ঠা ও স্তূপপ্রায় দেবালয়গুলির

সংস্কারে। সনাতন প্রতিষ্ঠিত করলেন যখনমোহনের নতুন মন্দির। শ্রীরূপ একের পর এক বৃন্দাবনের নিত্যলীলা সম্পর্কে নানা গ্রন্থ রচনা করলেন।

সনাতন ও রূপ বাড়ালী হলেও তাঁদের গ্রন্থগুলি সবই সংস্কৃত ভাষায় রচিত। সার্বভৌমত্বে অবাধ প্রচারের ভ্রমই হয়তো তাঁরা সংস্কৃতভাষায় গ্রন্থগুলি রচনা করেছিলেন। পূর্বেই বলেছি যে, রূপ গোস্বামী ছিলেন চৈতন্যযুগের অধিতীয় কবি। তাঁর সমসাময়িক ও পরবর্তী কবিগণ প্রায় সকলেই বাড়লা ভাষায় কাব্য ও পদাবলী রচনা করেছিলেন। প্রাক্চৈতন্যযুগের কবিগণের মধ্যে অবশ্য অনেকে সংস্কৃতভাষায় নাটক, কবিতা ও পদাবলী রচনা করেছিলেন। তাঁদের মধ্যে জয়দেব, উমাপতি ধর, শরৎ, ধোয়ী ও গোবর্ধনের নাম বিশেষভাবে উল্লেখযোগ্য। ১২৪৫-৬ খ্রিষ্টাব্দে শ্রীধরদাস তাঁর বিখ্যাত সহজিকর্ণামৃতনামক সুবৃহৎ গ্রন্থে দু'হাজার সাতশো সংস্কৃত পদাবলীর সংকলন করেছিলেন। সেই পদগুলির প্রায় সবই বৈষ্ণব-প্রেমধর্মবিষয়ক এবং তার মধ্যে প্রায় পাঁচশো পদ বাড়ালী কবিগণের রচিত। এই পদগুলির মধ্যে অধিকাংশই মধুররসাত্মক। শ্রীধরদাস পাঁচটি প্রবাহে পদগুলিকে বিভক্ত করেছেন। এই পাঁচটি প্রবাহ হলো—

(১) অমর প্রবাহ, (২) শৃঙ্গার প্রবাহ, (৩) চাটু-প্রবাহ, (৪) অপদেশ প্রবাহ, এবং (৫) উচ্চাষচ প্রবাহ।

অমর প্রবাহের বিষয়বস্তু অমর বা দেবতাগণের কথা; শৃঙ্গার প্রবাহে বর্ণিত হয়েছে বিবিধ প্রকৃতির নায়ক-নায়িকা, তাদের প্রেম, এবং বিরহ-মিলনের কথা। চাটুপ্রবাহে আছে নানাবিধ চাটু বা স্ততি। অপদেশ প্রবাহে দেবতা, পশুপক্ষী, ভ্রমর ও পদ্ম প্রভৃতির বিষয় আলোচিত হয়েছে; এবং উচ্চাষচ প্রবাহে বিবিধ প্রসঙ্গের অবতারণা করা হয়েছে।

পরবর্তীকালে রূপ গোস্বামী আরো বিস্তৃতভাবে এই প্রবাহগুলিকে রূপায়িত করেছিলেন এবং শৃঙ্গার বা মধুররসের অনেকগুলি সংস্কৃতপদের সংকলন করেছিলেন। তিনি নিজেও তাঁর গীতাবলী নামক গ্রন্থে একচল্লিশটি স্থলজিত সীতিপদ লিপিবদ্ধ করেছিলেন। এই পদগুলি সংস্কৃত ভাষায় রচিত হলেও, ঠিক বাড়লা ত্রিপুরী ছন্দে রচিত পদাবলীর মতোই সাবলীল ও মধুর। পদগুলির লালিত্য ও প্রসাধন অনবদ্য। শ্রীরূপের অনেক পদ এখনো কীর্তন-পালাগানের সঙ্গে গাওয়া হয়। যেমন—

গোপসুখতি মণ্ডল মতি
মোহন কলঙ্গিত।

মুক্তসকল কৃত্যবিকল
 ধৌবত পরিবীত ॥
 বিক্ষুব্ধিভ নায়কনিভ
 মঞ্জুল জলখেল ।
 চঞ্চলকর পুঙ্করবর
 কৃষ্ণমুয়তিচেল ॥
 রত্নভবন সন্নিভবন
 কৃষ্ণবিহিতরঙ্গ ।
 রাগবিরত ধৌবতরত
 চিরুহিলসদঙ্গ ॥

পদগুলি দেখে মনে হয় যেন বাঙলা ভাষাতেই রচিত। পরবর্তীকালে শ্রীজীবগোস্বামী শ্রীকৃপের এই পদগুলি স্ববমালায় সন্নিবিষ্ট করেছিলেন।

শ্রীকৃপের প্রিয়শিষ্য ও ভ্রাতুষ্পুত্র শ্রীজীব তাঁর নিকট শাস্ত্র ও ধর্ম শিক্ষা করেন। পরবর্তীযুগে তিনি ভারতের অপ্রতিদ্বন্দ্বী পণ্ডিত ও টীকাকার বলে খ্যাত হয়েছিলেন। তিনি শ্রীকৃপের সবগুলি গ্রন্থের এবং বৈষ্ণবধর্মের বহু প্রামাণ্য গ্রন্থের টীকা ও ব্যাখ্যা প্রণয়ন করেছিলেন। উজ্জলনীলমণির যে টীকা তিনি প্রণয়ন করেছিলেন, তা 'লোচনরোচনী' নামে খ্যাত। তাঁর সংকলিত 'ষট্‌সন্দর্ভ কারিকা' বৈষ্ণবধর্মের মহামূল্য গ্রন্থ।

রূপ একাধারে মধ্যযুগের অদ্বিতীয় কবি, সাধক এবং বৈষ্ণবধর্মের আদর্শ গুরু ছিলেন। তাঁর প্রচারিত রাগানুগা পদ্ধতি 'রূপানুগা' রীতি নামে খ্যাত। কেউ কেউ বলেন, মেবারের রাণী সুনামধন্য মীরাবাই রূপগোস্বামীর নিকট 'কান্তাপ্রেম সর্বসাধ্যসার'-বিষয়ে দীক্ষা ও উপদেশ গ্রহণ করেছিলেন। অবশ্য এই উক্তির কোন ঐতিহাসিক প্রমাণ পাওয়া যায় না। জীবনের অবশিষ্ট কয়েক বৎসর ব্রজবাসে অতিবাহিত করে, ১৫৬৩ খ্রীষ্টাব্দে বৃন্দাবনেই সাধক কবির দেহাবসান হয়।

উজ্জলনীলমণির বঙ্গানুবাদ, তাৎপর্য-বিশ্লেষণ ও মর্মমাহুরী আলোচনার শ্রীজীব গোস্বামীর 'লোচনরোচনী', শ্রীল বিখ্যাত চক্রবর্তীর 'আনন্দচক্রিকা', শচীনন্দন বিদ্যানিধির 'উজ্জলচক্রিকা' ও রামনারায়ণ বিদ্যারত্ন-সম্পাদিত সটীক উজ্জলনীলমণি গ্রন্থের সাহায্য গ্রহণ করেছি। মূলগ্রন্থের প্রত্যেকটি সূত্র-শ্লোকের

বঙ্গভূবাসসহ দেশগুলির মর্মার্থ তাৎপর্য আলোচনার চেষ্টা করেছি। কিন্তু যে সব লোকের দুই বা ততোধিক উদাহরণ আছে, গ্রন্থের কলেবর সংক্ষেপণের জন্য তার মধ্যে প্রয়োজনমতো একটি বা দুটি উদাহরণমাত্র লিপিবদ্ধ করেছি। মাঝে মাঝে লোকের মর্মভাষায়, প্রচলিত দু'চারটি কীর্তন ও গীতিপদ উদাহরণস্বরূপ উদ্ধৃত হয়েছে।

রূপ গোস্বামীর গ্রন্থগুলি সংস্কৃতভাষায় রচিত বলে বর্তমান যুগের সঙ্গে সেগুলি বিচ্ছিন্ন হয়ে পড়েছে। এই 'অনুবাদ ও মর্মমাধুরী' বঙ্গি রূপ গোস্বামীর সঙ্গে পাঠকসাধারণের পরিচয়স্থাপনে বিন্দুমাত্র সহায়তা করে, আমার পরিশ্রম সার্থক হবে; আমি কৃতার্থ হবো।

কলিকাতা

মাঘীপূর্ণিমা, ১৩৭২ বঙ্গাব্দ।

হীরেন্দ্রনাথারণ মুখোপাধ্যায়

নামাকৃষ্টরসজঃ শীলেনোদ্দীপয়ন্ সদানন্দং ।

নিজরূপোৎসবদায়ী সনাতনাত্মা প্রভূর্জয়তি ॥ ১ ॥

নিখিল বিশ্বে অনুক্ষণ চলেছে মিলনের মধু-মহোৎসব । চলেছে
দেহ ও মনের খেলা—রূপ ও আনন্দের তরঙ্গ হিল্লোল । উৎসব !
উৎসব চলেছে রাত্রিদিন দিকে দিকে রূপের আনন্দমেলায় নরনারীর
মনোবিনিময়ে, দেহমুনার তটে তটে ।

দিকে দিকে এই অফুরন্ত রূপরাশি যাঁর অনন্ত রূপের বিকাশ,
যাঁর স্বভাবধর্মের স্বতঃস্ফূর্ত আনন্দপ্রবাহে রাত্রিদিন বয়ে চলেছে
অবিরাম উদ্দীপনার স্রোত, সেই সদানন্দ চিরন্তন আত্মার বন্দনা
করি । আপনার নামে আপনি আকৃষ্ট সেই সনাতন রসজ্ঞ প্রভু
জয়যুক্ত হউন । ১ ।

জীবজগতের শ্রেষ্ঠ আনন্দ রতিরসাস্বাদনে—প্রিয়া ও দয়িতের
শৃঙ্গারমদির মিলনের মধু-মহোৎসবে । এই আনন্দের সঙ্গে পৃথিবীর
অন্য কোনো আনন্দের তুলনা হয় না । পার্থিব এ আনন্দ অসীম,
অপরিমেয় ও অনির্বচনীয় । রতিবিষয়ক এই গূঢ়তম মধুর রসের
আলোচনাই উজ্জলনীলমণি ।

বিভাব

এই মধুর রসাস্বাদনের মূল উপাদানকে 'বিভাব' বলে। বিভাবই রতিরসাস্বাদনের হেতু। এই বিভাবের সংযোগ পরিণত হয় প্রেমে; প্রেম পরিতৃপ্ত করে নায়ক-নায়িকার চিত্ত।

বিভাবের আশ্রয় দুটি। একটি 'আলম্বন', অর্থাৎ যাকে অবলম্বন করে চিত্তে আকর্ষণ সঞ্চারিত হয়। অপরটি 'উদ্দীপন'—অর্থাৎ হৃদয়াবেগ বা উদ্দীপনা যা মধুর রতিরসাস্বাদনে নায়ক বা নায়িকার চিত্তকে আকৃষ্ট করে। 'আলম্বন' নায়ক বা নায়িকা (Object of love)। 'উদ্দীপন' প্রণয়ের উৎস—হৃদয়ের নবরঞ্জন রাগ (Incitement)। এই উদ্দীপনা ধীরে ধীরে চিত্তকে নিয়ে যায় রতিরসাস্বাদনের সাগরতীরে।

বিভাব, অমুভাব, সাহচিক, সঞ্চারী বা ব্যভিচারী ও স্থায়ী ভাব প্রভৃতি যখন কার্যকারণ সম্পর্কে যুক্ত হয়, তখনই আস্থাদিত হয় মধুর রতিরস। এই মধুর রতিরসের পরিণতিকে মনোমিরা বলেন প্রেম। ২।

আলম্বন

উজ্জলের আলম্বন ব্রজেনন্দন।

আর কৃষ্ণপ্রিয়াগণ হয় আলম্বন ॥

উজ্জলনীলমণি এম্বে নায়ক রূপে কল্পিত হয়েছেন শ্রীকৃষ্ণ আর নায়িকা শ্রীরাধা ও অম্বাশ্র ব্রজাঙ্গনা, যারা কৃষ্ণপ্রিয়া। ৩।

পূর্বেই বলেছি, বিভাবের প্রথম বস্তু আলম্বন, দ্বিতীয় উদ্দীপন। নায়িকার চিত্ত প্রথম বিমোহিত হয় নায়কের রূপে বা গুণে। চোখে ভাল লাগে, মনকে স্পর্শ করে, তাই হৃদয়ে সঞ্চারিত হয় আবেগ, উদ্দীপনার তরঙ্গ উচ্ছ্বাস। অমুকূল দখিণা বাতাসে মুকুলিত হয়ে ওঠে নারীমন। এই মুকুলিত হৃদয়াবেগের নামই পূর্বরাগ। পূর্বরাগ পরিণত হয় অমুরাগে। অমুরাগ সঞ্চারিত হলে দেহমন মিলন-পিয়াসী হয়ে ওঠে। রতিরসাস্বাদনের কামনার উত্তরোল

হয়ে ওঠে নায়িকার সারা সজ্জা। এই পুষ্পিত চিন্তাবেগ যখন আনন্দঘন স্থায়িরসের সঞ্চার করে তখনই পরিণত হয় প্রেমে।

আলম্বনকে আশ্রয় করেই প্রেমের সূচনা হয়। তার পূর্ণতাও হয় সেই আলম্বনের বেদীতলে দেহমন পুষ্পাঞ্জলি দিয়ে। মধুরা রতির সঞ্চার ও সম্ভোগ অধিকতঃ নির্ভর করে আলম্বন বা নায়কের চরিত্র এবং প্রকৃতিগত বৈশিষ্ট্যের উপর। নারী স্বভাবতঃ আত্মসমর্পণ-শীলা। কিন্তু পুরুষ তা নয়। পুরুষের চরিত্রগত বৈশিষ্ট্যের উপর প্রেমের সার্থকতা বেশী নির্ভর করে। তাই রতিসম্ভোগের অনির্বচনীয় তথ্য অনুধাবন করতে হলে প্রথম জ্ঞানতে হবে নায়ককে, তার ব্যক্তিগত চরিত্রের বিবিধ বৈশিষ্ট্যকে। অবশ্য নায়িকার চরিত্রও উপেক্ষণীয় নয়। নারীমনের গতি পুরুষমনের চেয়েও বিচিত্র। স্বভাব ও মানসিক বৈশিষ্ট্য অনুযায়ী পুরুষের চরিত্রকে যতভাবে বিশ্লেষণ ও বিভক্ত করা যায়, নারীচরিত্রের বিভাগ তার চেয়ে অনেক বেশী। অবশ্য একথা অস্বীকার করা যায় না যে, রতি-বিলাসে পুরুষের অধিকার ও স্বেযোগ যত অবাধ, নারীর তত নয়। লোকভয়, সামাজিক অনুশাসন ও পারিপার্শ্বিক বাধা নারীর জীবনগতিকে পদে পদে শৃঙ্খলিত করে। ফলে, নায়িকাচরিত্র হয়ে ওঠে অধিক জটিল। অবস্থান্তরে তার চরিত্রগত বিভেদ নিতান্ত স্বাভাবিক। তাই নায়িকা বিচিত্ররূপিনী।

উদ্দীপন

যা করপদহ্যতি দরশনে নিগরব কোটি কোটি মনোমথ ভেল।

কুটিল দৃগঞ্চল বিদগধি বিহরলি ত্রিভুবন মন হরি নেল ॥

অভিনব জলধর স্তম্ভর আকৃতি স্তম্ভর হি পরম বিহার।

ত্রিভুগত মূবতীক ভাগিবর সাধন মূবতি সিদ্ধি অবতায় ॥

সো অব নন্দকিনন্দন নাগর তোহে কর আনন্দভোর।

ঐশচানন্দন ও নব হারি বরগি না পাওল ওর ॥

সুন্দর অভিনব নবজলধরকাস্তি, যিনি অপূর্ব জীলার নিষিস্বরূপ, যার পদত্যাতি নিখিল কন্দর্পের রূপগরিমা হরণ করে, কটাক্ষ নারীগণের চিত্ত বিমোহিত করে, যুবতীগণের ভাগ্যফলরূপী সেই অনির্বচনীয় পুরুষ তোমার হর্ষ বিধান করুন। ৪।

নায়কের এতাদৃশ রূপ নায়িকাচিত্তে উদ্দীপনার সঞ্চার করে। এই উদ্দীপনার আধার যদি বাঞ্ছিত বিবিধ গুণের অধিকারী হন তবেই তাঁকে বলা চলে নায়ক বা প্রেমাঙ্গদ।

নায়কভেদ

নায়কের গুণাবলী

সুন্দর, মধুর, সর্বশুলক্ষণাক্রান্ত, বলিষ্ঠ, নবযৌবনাস্থিত, সুবক্তা, প্রিয়ভাষী, বুদ্ধিমান, সুপণ্ডিত, প্রতিভাস্থিত, ধীর, বিদগ্ধ, চতুর, শ্রী, কৃতজ্ঞ, দক্ষিণ, প্রেমবশা, গম্ভীর, বরীয়ান, কীতিমান, নারীজন-মনোহারী, নিত্যানুতন, অতুল্য কেলিসৌন্দর্যবিশিষ্ট ও বংশীকণকারী বা সুমধুর সুরশিল্পী। ৫।

এই সকল মাধুর্যগুণের অধিকারীই সুযোগ্য নায়ক ও মধুর রসাস্বাদনের শ্রেষ্ঠ আধার বা আলম্বন। ৬।

নায়কের শ্রেণীভেদ

চরিত্রগত গুণানুযায়ী নায়ককে চারটি শ্রেণীতে বিভক্ত করা যায়। যথা—ধীরললিত, ধীরশাস্ত্র, ধীরোদাত্ত ও ধীরোদ্ধত।

বিদগ্ধ, নবযুবা, পরিহাসবিশারদ ও নিশ্চিন্ত প্রকৃতির নায়ককে ধীরললিত বলে। এঁরা প্রায়ই প্রেমসৌর প্রেমামুসারে বশবর্তী হন। যথা—কন্দর্প।

শাস্ত্রস্বভাব, ক্লেমসহিষ্ণু, বিবেচক, ধার্মিক ও বিনয়াদি গুণযুক্ত নায়ককে ধীরশাস্ত্র বলা হয়। যথা—যুধিষ্ঠির।

ধীরোদাত্ত নায়ক গম্ভীর, বিনয়ী, ক্রমাশীল, দয়ালু, সুদৃঢ়ত,

নিরহঙ্কার, গুঢ়গর্ব ও আত্মপ্রত্যয়বিশিষ্ট, সুসম্ভব বা বলবিশেষ-সম্পন্ন ও অপরাধেয়। যথা—শ্রীকৃষ্ণ, রঘুনাথ।

মৎসরী বা অশুভদেবী, অহঙ্কারী, মায়াবী, রোষণস্বভাব, চঞ্চল ও আত্মপ্রাণাকারী অথচ ধীর নায়ককে বলে ধীরোদ্ধত। যথা—ভীম সেন।

এই চতুর্বিধ নায়ককে আবার সম্বন্ধ এবং সংযোগানুযায়ী ছটি ভাগে বিভক্ত করা যায় : পতি ও উপপতি।

পতি

শাস্ত্রমতে বা বেদোক্ত বিধানানুযায়ী যিনি কন্যার পানিগ্রহণ করেন এবং লৌকিক সমাজবিধানে সেই কান্ত্যার ভর্তার আসনে অধিষ্ঠিত, তিনি পতি।

বিক্রমের দ্বারা ভীষ্মকরাজের পুত্র রুক্মিকে পরাজিত করে, শ্রীকৃষ্ণ রুক্মিনীকে দ্বারকায় এনে উৎসবোচ্ছলিত পৌরমণ্ডল সমক্ষে তার পানিগ্রহণ করলেন। বেদোক্ত বিধান অনুযায়ী এখানে নায়ক রুক্মিনীর পতি। ৭।

দ্বারকায় শ্রীকৃষ্ণ রুক্মিনীর সঙ্গে যুগলভাব অঙ্গীকার করে যজ্ঞভূমিতে দীক্ষা গ্রহণ করেন, দক্ষিণার্থ ধনদান করেন এবং নায়িকার সঙ্গে সমস্তোগশৃঙ্গারে রত হন। এই সহধর্মিনীসঙ্গবিহার ও ব্রত উদ্‌যাপন বিষয়ে তাই তিনি রুক্মিনীর পতি। ৮।

যে সব গোকুল-কুমারী শ্রীকৃষ্ণের প্রতি ঐকান্তিক অনুরাগ ভরে মহামায়ার কাছে প্রার্থনা জানিয়েছিলেন—হে কাত্যায়নি! নন্দমৃতকে যেন পতিরূপে পাই, এবং মনে মনে সেই সংকল্প গ্রহণ করেছিলেন, বিধিমতে নন্দতনয় তাঁদেরও পতি। ৯।

রুক্মিনীর পানিগ্রহণের পূর্বে যে ব্রজকুমারিকাদের সঙ্গে লীলাচ্ছলে মাধবের পরিণয়-উৎসব অনুষ্ঠিত হয়েছিল, ধর্মতঃ শ্রীকৃষ্ণ তাঁদেরও পতি। ১০।

এ বিধান অবশ্য শুধুমাত্র কুমারী নায়িকাদের ক্ষেত্রেই প্রযোজ্য।
লৌকিক বা সামাজিক অনুষ্ঠান সম্পাদিত না হয়েও, যদি লীলাচ্ছলে
কোন কুমারীর সঙ্গে নায়কের মাল্যদান, অঞ্চলবন্ধন বা দেহ
বিনিময় অনুষ্ঠিত হয়, তাহলে নায়ক সেখানেও ধর্মতঃ পতিরূপেই
পরিগণিত।

উপপত্তি

ইহলোক পরলোক না করি গণন।
নিজরাগে করে যেই ধর্মের লজ্জন ॥
পরকীয়া নারীসঙ্গে করয়ে বিহার।
সদা প্রেমবশ, 'উপপত্তি' নাম তার ॥

ইহলোক, পরলোক ও পাপপুণ্যের ভয় না রেখে, অনুরাগবশে
যে প্রেমিক পরকীয়া নারীর সঙ্গে বিহার করেন, তিনি উপপত্তি।
ওই রমণীর প্রেমই তাঁর সর্বস্ব। প্রেমের জগ্ন নায়ক লোকভয়,
ধর্মাধর্ম—সবকিছুই তুচ্ছ করেন।

রাইক মন্দির আসি কর নাগর সংকেত কোকিল বোল।
তুনি ধনি উঠত দ্বার বব খোলই হৈয়ল করণ বোল ॥
দেখ দেখ নাগর, আনন্দভোর।
করণধনি তুনি মনে অহমানই রাই মিলব যঝু কোর ॥
জটিল জাগরি তৈতখনে বোলত কো কর করণ নাদ।
তুনি ধনি চমকিত মন্দিরে হুতল নাগর গল প্রমাদ ॥
পুনঃ ধনি আসি মিলব যঝু সঙ্গতি ঐছন মনোরথ ভেল।
রাধা মন্দির কোণ বিটপিতলে জাগরি যামিনী গেল ॥

নিশিথ অভিসারে রাধার গৃহপ্রাক্ষণে শ্রীকৃষ্ণ যখন কোকিল
নিবাদের সংকেত করলেন, চুপিচুপি রাধা বেরিয়ে আসছিলেন দ্বার
খুলে। হঠাৎ তাঁর করণের শব্দ হল। শব্দ শুনে জটিল জেগে
উঠল—কে!—কে?

মিলনপিয়াসী নায়ক ও নায়িকার উদ্বেলিত হৃদয় বেদনার্ত হয়ে উঠল। রাধা শয়ন কক্ষে ফিরে গেলেন, শ্রীকৃষ্ণের অসহ রাত্রি কেটে গেল প্রাক্‌লণের কোণে বিটপিছায়ার অন্ধকারে পুনর্মিলনের অধীর প্রতীক্ষায়। ১২।

শৃঙ্গারের মাধুর্য অধিক ইহাতে। ১৩।

উপপতি রসশ্রেষ্ঠ ভরতের মতে ॥ ১৪ ॥

যে আনন্দের স্বাদলাভের জন্ম নানা বিধিনিষেধ ও বাধা-বিপত্তি লঙ্ঘন করতে হয়, যেখানে ইচ্ছামাত্র অবাধে রতিসন্তোগ সম্ভব নয়, লোকভয় ও সমাজভয় প্রতিনিয়ত প্রেমিক-প্রেমিকার চিত্তকে নিপীড়িত করে, সেখানেই মিলনের আনন্দ অপরিমেয়। তাই পরকীয়া প্রেমের উত্তাল তরঙ্গময় বিপদ ও বাধার সাগর পার হয়ে যে মিলন হয়, সেই মিলনে মন্থণের ‘পরমা রতি’ আত্মাদিত হয়। ১৫।

লোকশাস্ত্রে করে বাহা অনেক বারণ।

প্রচুর কামুক বাধে দুর্লভ মিলন ॥

তাহাতে পরমা রতি মন্থণের হয়।

মহামুনি নিজশাস্ত্রে এইমত কয় ॥

উপপতি সঙ্গবিহারের এই পরমা রতি লোকচক্ষে লঘু ও নিন্দিত হলেও, শৃঙ্গার রসের যে পরিতৃপ্তি এই মিলনে আত্মাদিত হয়, তা অতুলনীয়।

ইহাতে লঘুতা বেই কবিগণ কয়।

প্রাকৃত নায়কে সেহ, কৃষ্ণ প্রতি নয় ॥

রসের পরমাকাষ্ঠা রতি আত্মদান।

অবতার কৈল হরি ব্রহ্মেন্দ্রনন্দন ॥ ১৬ ॥

ত্রিভুবনের আশ্রয় শিখিপূচ্ছবিভূষণ শ্রীকৃষ্ণ শৃঙ্গাররসসর্বস্ব হয়ে নরদেহে এই শ্রেষ্ঠ রসসন্তোগকে আশ্রয় করলেন। ১৭।

উল্লিখিত পতি ও উপপতি প্রত্যেকের বৃত্তিভেদে নায়ক চরিত্রকে

অনুকূল, দক্ষিণ, শঠ ও ধৃষ্ট—এই চার শ্রেণীতে বিভক্ত করা হয়। ১৮।

অনুকূল

একনারী রত হয় অস্ত্র নারী ছাড়ি।

সীতার প্রতি রাম অনুকূল নামধারী ॥ ১৯॥

রাধায় অনুকূল হয় ব্রজেন্দ্রনন্দন।

অস্ত্র নারী ছাড়ি হৈল রাধার শরণ ॥ ২০ ॥

পত্নীপ্রেমানুরক্ত রামচন্দ্রের জীবনে সীতা ভিন্ন অন্য নারীর স্থান ছিল না, তাই তিনি সীতার অনুকূল পতি। পত্নী এবং অগ্ৰাণ্য নায়িকাসঙ্গ পরিত্যাগ করে শ্রীকৃষ্ণ একমাত্র রাধারাগীর প্রেমকেই সার করেছিলেন। তাই তিনি শ্রীরাধার প্রেমমুগ্ধ অনুকূল উপপতি। শ্রীমতীর প্রতি বৃন্দার উক্তি—

গোকুল নগরে চতুরা নাগরী কত না যুবতী নারী।

তা সনে বিহরে কখন কখন নন্দেব নন্দন হরি ॥

রাই তু'হঁ সে জানসি বস।

সকলের কাছে যেমন তেমন হরি সে তোমারি বশ ॥

কত শত বৃদ্ধিমতী, সুরসিকা, সৌন্দর্য-উজ্জ্বলা কামিনী এই গোকুলে আছে। কিন্তু হে চম্পকবর্ণা! তুমি পুণ্যবতী, তাই তোমার বিরহে অধীর হয়েও মুরারির চপল দৃষ্টি অত্মকোন রমণীর প্রতি আকৃষ্ট হয় না। ২১।

ধীরোদাস্ত-অনুকূল

যে নায়ক গস্তীরপ্রকৃতি, বিনয়াধিত, ক্ষমাগুণশালী, দৃঢ়ব্রত, করুণ, আত্মপ্রাণাশূণ্য এবং উদারচিত্ত, তাঁকেই ধীরোদাস্ত-অনুকূল নায়ক বলা যায়। ২২।

একদিন কৃষ্ণকে রাধার চিন্তায় তন্ময় দেখে, বালিতা দূর থেকে চিত্রাকে দেখিয়ে বলেছিলেন—ব্রজে নীলোৎপল নয়না যত রমণী আছে, তারা সকলেই কটাক্ষকৌশলে কন্দর্পকলা-নটীর প্রস্তাব

ডঙ্কলনীলমণি

বারবার জ্ঞাপন করেছে মাধবের কাছে। কিন্তু কৃষ্ণ এত দৃঢ়রত যে, ত্রীরাধার প্রেমব্রতে তাঁর কোন শৈথিল্য ঘটে না। ২৩।

ধীর-ললিতানুকূল

রসিক, নবযুবা, পরিহাসপটু, নিশ্চিন্ত, প্রেমসীর বশীভূত এবং প্রেমসীর প্রতি অনুকূল নায়ককে ধীর-ললিতানুকূল নায়ক বলে।

যথা, নান্দীমুখীর প্রতি পৌর্ণমাসীর উক্তি—

অনুদিন বিহরয়ে রাইক সজ। মানস নিমগন মনসিজ রজ ॥

যমুনা তীরতি সতত বিহারি, পুণবতী হৈহল ভাঙ্গকুমারী ॥

উপবন তরু দব কক্ক বিভাসিত। শ্যাম জলদ তাহে রাই তড়িত ॥ ২৪ ॥

ধীরশান্তানুকূল

শান্তস্বভাব, ক্লেশমহিকু, বিবেচক ও বিনয়াদিগুণযুক্ত নায়ক যখন প্রেমসী বা নায়িকার প্রতি প্রেমানুকূল ও একনিষ্ঠ হয়, তখন তাঁকে ধীরশান্তানুকূল নায়ক বলে।

ধীর, শান্ত, অনুকূল নায়ক অতি বিনয়ের সঙ্গে কৌশলে তাঁর প্রণয়ানুসঙ্গের সঙ্গে মিলিত হন। বিরুদ্ধ পরিবেশেও অচঞ্চল ধৈর্যের পরিচয় দিয়ে প্রিয়ার চিন্তাবিনোদনে কৃতকার্য হন।

শ্রীমতীকে সম্বোধন করে বিশাখা একদিন কানে কানে বলে—
ছিল—হে যুগাক্ষি! দেখ, সূর্যবন্দনার ছলে শ্রীকৃষ্ণ কেমন সূকৌশলে ব্রাহ্মণবেশ ধারণ করে তোমার সঙ্গে মিলিত হয়েছেন। দৃষ্টি ক্ষমাগুণে পরিপূর্ণ, বাক্য বিনয়ান্বিত, ধীরোজ্জ্বল মূর্তি যেন ধৈর্যগুণের आधार। এই শান্ত, উদার ও বিনয়ান্বিত মূর্তি দেখে জটিলার মনে সন্দেহের আর কোন অবসর রইল না। ২৫।

ধীরোদ্ধত-অনুকূল

যে ব্যক্তি মাৎসর্যযুক্ত, অহঙ্কারী, মায়াবী, রোধপরবশ, উদ্ধত এবং আত্মপ্রাণাকারী অথচ প্রেমে অবিচলিত মানস, ক্ষণকালের

জন্তুও প্রিয়তমা বাতীত অণু প্রমদাজনের কথা স্বপ্নেও কল্পনা করেন না, তিনি ধীরোদ্ধত-অনুকূল নায়ক ॥ ২৬ ॥

ললিতাকে শ্রীকৃষ্ণ বলেছিলেন —

ললিতে, শুন মঝু সত্য এ বাণী ।

রাইক পরিচরি আন যুবতীসহ স্বপনহি প্রেম নাহি জানি ॥

কেবল রাইত প্রেম হাম জানত রাই প্রাণধন মোর ।

কো কচ সদগুণ সাগর নাগর আন যুবতী রসভোর ॥

তুঁহ বর চতুরী সবহু মঝু জানিসি সধক কোপতরঙ্গ ।

মনমথ বিশিখে সতত তমু দাহই তুরিত দেহ রাই সঙ্গ ॥

দক্ষিণ

যে নায়ক পূর্বে এক নারীতে আসক্ত হয়ে, পরে অণু নারীর প্রতি অনুরাগী হন, কিন্তু পূর্বপ্রণয়িনীর গোরব, ভয় ও দাক্ষিণ্যাদি পরিত্যাগ করতে পারেন না, তাঁকে দক্ষিণ নায়ক বলা হয় ।

নান্দীমুখী বলেছিলেন—চন্দ্রাবলী, তোমার প্রেমে আজও তাঁর হৃদয় সিক্ত । এখনো তিনি তোমার ভয়ে ভীত । তুমি যেন অস্ত্রের কথায় প্রণয় ভঙ্গ করো না ।

কুন্তলেখরসুতা, পালী প্রভৃতি পুরস্কন্দরীদের কথা শুনে তিনি কিছুক্ষণ বিমূঢ় হয়ে বসেছিলেন । ২৭ ।

কিষ্ণা থাকে প্রেমসীর প্রেমেতে সমান !

দক্ষিণ শব্দের দ্বয় তাহাতে আখ্যান ॥

নান্দীমুখীকে কুন্দলতা বলেছিল—

দ্বারকাতে শ্রীকৃষ্ণ যখন সিংহাসনে বসেছিলেন এবং রুক্মিণীকে প্রসন্ন করে সুখে দিন যাপন করছিলেন, তখন একদিন এক দূত এসে সংবাদ দিয়েছিল যে,

পদ্মা করত হি নয়ন তরঙ্গ । কমলা ভৃঙ্গই মোড়ই অঙ্গ ॥

তারি বরণই ভুজ পরকাশি । ঐতিমূল কণ্ঠন করল সুকেশী ॥

শৈব্যা নীবি-উপর ধরু কর । বহুতর নারী করয়ে বসভর ॥

একই নাগর বহুতর নাগরী । কুণ্ঠিত মানস হৈয়ল মুরারি ॥

পদ্মার নয়নে তরঙ্গময় বিলোল দৃষ্টি । কমলা বারবার জ্বলন্ত
ও অঙ্গ মোড়ামুড়ি করে । তারা হুঁহাত তুলে আলিঙ্গন-সংকেত
ও কুচয়ুগ প্রদর্শন করে । সুকেশী গণ্ডদেশ কণ্ঠয়ন করে এবং শৈব্যা
নীবিবন্ধন উন্মোচনের সংকেত করে । এই সকল সংবাদ দূতমুখে
শুনে, শ্রীকৃষ্ণ পূর্ব-নায়িকাদের মানসিক অবস্থা বুঝে কুণ্ঠিত হলেন ।
পদ্মা, কমলা, তারা, সুকেশী ও শৈব্যা প্রমুখ নায়িকাগণ মিলনা-
কাছায় চঞ্চল ও অনঙ্গ যাতনাবিধুর হয়ে উঠেছে শুনে, তাঁর অন্তরে
দাক্ষিণ্য জেগে উঠল । ২৮ ।

যে নায়ক তাঁর বর্তমান নায়িকাদের সঙ্গে সন্তোষ-আনন্দে
রত থেকেও পূর্বনায়িকাদের প্রতি দাক্ষিণ্যহীন হতে পারেন না,
তাদের প্রতি তাঁর আকর্ষণ শিথিল হয় না, অন্তরে প্রেম ও
সমবেদনা সমভাবে বজায় থাকে, তাঁকে ‘দক্ষিণ’ নায়ক আখ্যা
দেওয়া হয় ।

শঠ

যে নায়ক সম্মুখে প্রিয়ভাষী কিন্তু পরোক্ষে অতি অপ্রিয় কাজ
করেন, প্রণয়িনীকে মিষ্ট কথায় তুষ্ট করেন, কিন্তু গোপনে অস্ত
নারীর সঙ্গে প্রেম করেন ও পূর্বপ্রণয়িনীকে হেয় করেন, তিনি শঠ বা
মিথ্যাচারী । ২৯ ।

শ্রামার কোন সখী নান্দীমুখীকে বলেছিল —

জাগরে বোলল তুঁই মনু প্রাণ, স্বপন হি তাকর বদনে তনি আন ।

পালি ! পালি ! বলি কহয়ে কতবার, দুখল তা সহ করয়ে বিহার ॥

শ্রামাসখী শুনল স্বপন কি ভাষ । ঘনঘন ছোড়ই দীঘল নিশাস ॥

এ মধু স্বাতি তিন বাম পরিমাণ, জাগরি হৈয়ল যুগ সমান ॥ ৩০ ॥

ধৃষ্ট

অন্য তরুণী সম্ভোগের লক্ষণ অঙ্গে সুস্পষ্ট তবুও নির্ভয়ে এগিয়ে আসেন প্রিয়ার কাছে, মিথ্যা বচনে অতিশয় দক্ষ; রতিচিহ্ন প্রকট থাকা সত্ত্বেও প্রণয়িনীর কাছে নানাভাবে সেগুলি গোপন করার চেষ্টা করেন, সে নায়ককে ধৃষ্ট বলা হয়। ৩১।

খণ্ডিতা রসে শ্যামার প্রতি শ্রীকৃষ্ণের উক্তি—

কাঁচা নখ-চিহ্ন চিনলি তুঁহ সুন্দরী, এ নব কুসুম রেহ।

কাজর ভরমে মরমে কাতে গঞ্জসি, মৃগমদ পদ পুন এহ ॥

গৈরিক হেরি কিয়ে কর মানসি, উরুপর যাবক ভানে।

ফাণ্ডক বিন্দু ইন্দুমুখি, নিন্দসি সিন্দুর করি অন্তমানে ॥

শ্যামা, বিপরীত ধারণা করছে। কেন? আমার অঙ্গের এই দাগ নখের বা সিঁদুরের নয়, ঘন-কুসুমের রেখা। আলতার রঙ কি তুমি চেনো না? এ রক্তরাগ আমারই গৈরিক বসনের। কস্তুরী চিহ্ন দেখে তোমার কাজল বলে ভ্রম হচ্ছে? কি আশ্চর্য! তুমি যুবতী, তাই তোমার মনে এই সব বিপরীত ধারণা হওয়া স্বাভাবিক।

নায়কের প্রকৃতিভেদ

প্রথমতঃ নায়ক চার প্রকার। যেমন,—ধীরোদাত্ত, ধীরললিত, ধীরোদ্ধত ও ধীরশাস্ত। এঁদের প্রত্যেকে আবার পূর্ণ, পূর্ণতর ও পূর্ণতম ভেদে বারো প্রকার। এই দ্বাদশ নায়ক আবার পতি ও উপপতি ভেদে চব্বিশ প্রকার হয়। তা ছাড়া, অমুকুল, দক্ষিণ, শঠ ও ধৃষ্ট এই চারটি পর্ষায়ে ভাগ করে প্রকৃতিভেদানুযায়ী নায়ককে মোট ছিয়ানব্বইটি শ্রেণীতে বিভক্ত করা যায়। ৩২।

অগ্ৰাণু রসশাস্ত্রে ‘ধৃষ্ট’ প্রভৃতি যেসব নায়কভেদ কথিত আছে, সেগুলি নাট্যশাস্ত্রকার মহামুনি ভরত কর্তৃক স্বীকৃত না হওয়ায়, উজ্জলনীলমণি গ্রন্থে গৃহীত হয়নি।

সহায়ভেদ

সখা

প্রণয় বিষয়ে নায়কের পঞ্চবিধ সহায় থাকে। এঁরা নায়ক বা নায়িকার সখা। বিভিন্ন অবস্থায় এঁদের সাহচর্য নায়কের উদ্দেশ্য-সাধনে সহায়তা করে। রসশাস্ত্রে এই পঞ্চবিধ সহায়ক চোটক, বিট, বিদূষক, পীঠমর্দ ও নর্মসখা নামে পরিচিত।

সহায়কের গুণ

নায়কের সহায় হতে হলে নিম্নলিখিত গুণাবলীর অধিকারী হওয়া একান্ত প্রয়োজন। যথা—পরিহাসবাক্যে নিপুণ, নায়কের প্রতি প্রগাঢ় অনুরাগযুক্ত। দেশকালপাত্র বিষয়ে বিশেষ অভিজ্ঞ। প্রণয়িনী রুষ্ট হলে, মধুর বাক্যে তাকে প্রসন্ন করে তার মানভঞ্জন করতে পটু ও গূঢ় মন্তব্যাদানে বিশারদ।

এইসব গুণ যাদের থাকে, তাঁরাই নায়কের প্রকৃত বন্ধু ও সহায়। তাঁদের সাহায্যে নায়কের প্রেমের পথ সুগম হয় এবং সহসা প্রণয়ভঙ্গ ঘটে না।

চেট বা চেটক

যে ব্যক্তি সঙ্কানী ও সূচত্বর, যার কার্যকলাপ সহজে কেউ জানতে পারে না, নিজেকে যিনি সর্বদাই রহস্তাবৃত করে রাখেন, সকল বিষয়ে গূঢ়রূপে কার্য সম্পন্ন করেন এবং আলাপে ও বাক্য-পটুতায় তীক্ষ্ণবুদ্ধির পরিচয় দেন, তাঁকে চেট-সখা বা চেটক বলা হয়।

কৃষ্ণসখা ভূজারকের উক্তি —

রাইক বচন কহনু বহু চাতুরি শুন শুন হৃন্দরী রাই।

এ হেন অপরূপ কহু নাহি হেরল পেখহ বাহিরে বাই ॥

উপনীত শরত সময় ইহ সুন্দর শারদ তরু বিকশিত ।
 অপরূপ অসময়ে কুমুদিত মাধবী কুঞ্জ কুহর বিভূষিত ॥
 এ মনু চাতুরী বচন শুনি সুন্দরী আশুল কুঞ্জকি পাশ ।
 অব তুঁহ যহি রাইসহ মিলহ, পুরিব মনসিঙ্গ আশ ॥

ভূঙ্গারক শ্রীমন্তীর কাছে কুঞ্জবনের অপ্রত্যাশিত শোভা ও
 শরৎকালীন মাধবী পুষ্পবিকাশের সৌন্দর্য বর্ণনা করে তাঁকে কুঞ্জ-
 দর্শনে পাঠিয়েছিলেন। তারপর শ্রীকৃষ্ণকে সংবাদ দিয়েছিলেন—
 সখা, কুঞ্জে যাও, তোমার মনোবাসনা পূর্ণ হবে। কৌশলে
 শ্রীরাধাকে আমি পাঠিয়েছি সেই কুঞ্জবিতানে।

বিট

বেশভূষার উপচার সম্পর্কে যিনি কুশল, ধূর্ত এবং তীক্ষ্ণবুদ্ধি-
 কৌশলযুক্ত, পরিবারবর্গ যাঁর আদেশ লঙ্ঘন করে না এবং যিনি
 কামতত্ত্বকলাবিদ অর্থাৎ বশীকরণতন্ত্র ও মন্ত্রৌষধি ইত্যাদি প্রয়োগে
 সুনিপুণ, তিনিই বিট নামে অভিহিত।

মানিনী শ্যামার প্রতি বিট সখার উক্তি —

এ ব্রজমণ্ডলে যত বহু নাগরী নিকর হাম সব জান ।
 সো বরনাগরী ইহ নাহি পেখতু যা মনু বাত করে আন ॥
 গোকুল ভূপতি নন্দনাগর তাকর হাম বর সঙ্গী ।
 সবিনয় ভাবে সোহ ইহ যাচই ছোড়ই কোপকি ভঙ্গী ॥
 যাকর মুরলী সকল ব্রজনারীক লাজ ধৈর্য হরি নেল ।
 সো হরি মানভরমে তুঁহ ভেজলি, ভাল যুক্তি নাহি ভেল ॥

ব্রজমণ্ডলে সকল মৃগনয়নাই আমায় জানেন, সকলেই আমার
 কথা মেনে চলেন। ব্রজেন্দ্রনন্দন আমার প্রিয়সঙ্গী। যাঁর মুরলীধ্বনি
 শুনে নিখিলসুবতীর ধৈর্যচ্যুতি ঘটে, তাঁকে সামান্যজ্ঞানে পরিত্যাগ
 করো না। আমার অনুরোধ রাখো ২।

বিদূষক

যে ব্যক্তি ভোজনে অতি লোলুপ, কলহপ্রিয় এবং অঙ্গভঙ্গিমা ও বাক্যবিকৃতিদ্বারা হাস্যরসের সৃষ্টি করেন, তাঁকে বিদূষক বলা হয়। যেমন বিদগ্ধমাধবে মধুমঞ্জল, গোপগণের মধ্যে বসন্ত প্রমুখ ব্যক্তিগণ। ৩৩।

বিদূষক ব্যক্তি নায়কের সখা হলে প্রণয়বিষয়ে সহায় হন ও আনন্দ বর্ধন করেন এবং নায়ক-নায়িকার মিলন-সংঘটনে সর্বদাই সাহায্য করেন।

শ্রীমতীর প্রতি বিদূষক বসন্তের উক্তি —

তুঁহ ষারে আদরে নিতিনিতি পূজসি দেওসি কত উপচার।
সো অব দিনকর আদরে দেওল মুখে পঙ্কজ উপহার ॥
মানিনি, পঙ্কজে হাম নাহি নেল।
না করি সিনান আনি মুখে দেওল ইথে লাগি ঘূরে ফেলি দেল ॥
সো পরিচারণ তাহে ঘুচারহু, বোথে ডরল তহু জোর।
সো অব হাম তোহে কত সাধই, বচন না মানসি মোর ॥

দেবি! তোমার অভীষ্টদেব সূর্য প্রভাতে প্রস্ফুটিত পদ্ম আমায় উপহার দিয়েছিলেন, কিন্তু আমি ক্রোধভরে সে বিকশিত পদ্ম অবজ্ঞা করেছি, ছুঁড়ে ফেলে দিয়েছি মাটিতে। তোমার অভীষ্টদেব আমার উপাসনা করেন, আর তুমি আমার কথা শুনবে না!

হে স্থিত-অধরা! আমি তোমায় অভ্যর্থনা জানাই। প্রসন্ন হয়ে তোমার হাসির পুষ্প ছড়িয়ে দাও। হে মানিনি! অভিমান ত্যাগ কর। আমি যে গোকুলচন্দ্রের বিমান, তাঁরই ইচ্ছাবাহী মনোরথ। রাজা রথারূঢ় হলে আনন্দে পুষ্পবৃষ্টি করতে হয়। হে রূপগবিনী, রূপগর্বে কি তুমিও মৎসরী হলে? তাই, সহর্ষে কুসুম বর্ষণ করে আমার অভীষ্ট পূর্ণ করছো না!

পীঠমর্দ

যে ব্যক্তি নায়কতুল্য গুণবান হয়েও নায়কেরই অনুবৃত্তিকারী হন, তাঁকে পীঠমর্দ বলে। যেমন, কৃষ্ণসখা শ্রীদাম। নিজে অশেষ গুণরাশির অধিকারী হয়েও তিনি ব্রজলীলায় শ্রীকৃষ্ণের অতিবড় সহায় ছিলেন। ৪।

শ্রীকৃষ্ণের কার্যকলাপে সন্দিহান ও অসম্ভুত হয়ে গোবর্ধনমল্ল তাঁর স্ত্রী চন্দ্রাবলীকে সাবধান করেছিলেন, নিষেধ করেছিলেন যমুনা-পুলিনে যেতে।

সে কথা শুনে, কৃষ্ণসখা শ্রীদাম গোবর্ধনমল্লকে বলেছিলেন —

শুন্দর কালিন্দীতীরে মুকুন্দ বিহার করে, শুনি সব ব্রজনারীগণ
বিশ্বাস করিয়া তার, সে লীলা দেখিতে ধার, কৃষ্ণলীলা বড় বিস্মাপন ॥
সকলেই ষাষ তাহে, একা চন্দ্রাবলী নহে, সত্য জ্ঞান আমার বচন।
তার প্রিয় সখা মোরা, নিতান্ত নিবুন্ধি তোরা, তেই কহি এ হিত বচন ॥
গোবর্ধন, তুমি না করিহ অগমন।
গিরি গোবর্ধন ধরি রক্ষা কৈল ব্রজপুত্রী, তুমি না ঘাটাও হেন জন ॥ ৫ ॥

গোবর্ধনের মাতা ভারুণাকেও শ্রীদাম বলেছিলেন—তোমরা আপনজন। তাই বলি যে, চন্দ্রাবলীকে বাধা দিও না। অবশ্য সে যমুনাপুলিনে যাক বা না-যাক তাতে আমার কিছু যায় আসে না। তবে ব্রজের সকল বরাঙ্গনা যে সৌভাগ্যে আজ ভাগ্যবতী, সে সৌভাগ্য থেকে তোমার পুত্রবধূ চন্দ্রাবলী বঞ্চিতা রইল।

শ্রীদামের কথা শুনে মল্লজননী ভারুণা বলেছিলেন —

তোমার বচন শুনিয়া এখন মনেতে বিশ্বাস হয়।
নন্দের নন্দন সে বড় স্বজন তাহাতে নাহিক ভয় ॥
কুঙ্কুম চন্দন বনফুলমালা লইয়া আপন করে।
কুলবধূ সবে গহনে চলয়ে মহামায়া পূজিবারে ॥
দেখি ষলজন কতক বলয়ে কলহ করয়ে কুলে।
বধূ যেহা কক ভবানী পূজন কি করিতে পারে বলে ॥

সমতুল গুণবান সখা শ্রীদাম এইভাবে নায়কের প্রণয় বিষয়ে সহায় হয়ে, তাঁদের মিলনের পথ সুগম করতেন। সর্ব অবস্থায় নিজের মর্যাদা অক্ষুণ্ণ রেখে, উদ্দেশ্য সাধন করতেন। পীঠমর্দ সহায়ের এইটিই বৈশিষ্ট্য।

প্রিয় নর্মসখা

অতিশয় রহস্যভ্রম, সখীভাবাপ্রাপ্ত লীলাসহচর ও সখাদের মধ্যে যিনি অতিপ্রিয় তাঁকে প্রিয় নর্মসখা বলা হয়। নায়কের প্রণয়-জীবনে এঁরা সহায়ক এবং এঁদের সাহচর্যে রতিরস সম্ভোগের পথ সুগম ও মধুরতর হয়। গোকুলে সুবল এবং দ্বারকায় অজুঁন ছিলেন শ্রীকৃষ্ণের প্রিয় নর্মসখা। ৭।

সুবলের প্রতি অনুরক্তা কোন এক সখীকে সম্বোধন করে রূপমঞ্জরী বলেছিলেন—সুবল কৃষ্ণের কোন্ সেবার অধিকার না পেয়েছে! কৃষ্ণের সঙ্গে লীলা করতে করতে কৃষ্ণপ্রিয়ারা যদি কেউ কলহ করে, যদি অভিমান ভরে পালিয়ে যায়, সুবল গিয়ে নানা বিনয়বাক্যে তাকে প্রসন্ন করে ফিরিয়ে আনে, কুঞ্জগৃহে অপূর্ব কন্দর্পলীলার উপযোগী পুষ্পশয্যা রচনা করে দেয়। অরসমরে ক্রান্ত হয়ে মাধব যখন প্রেয়সীর বুকের উপর অবসন্ন দেহে চলে পড়েন, সুবল তখন চামর ব্যঞ্জন করে। ৮।

যো ব্রজনাগরী কুটিল দৃগঞ্জে হরি মাধুরী করু পান ।
ভূষ যুগে বেড়ি হৃদয়ে কুচ ধারই করই আলিঙ্গন দান ॥
আপহি আসি গরবে হরিমুখবিধু অধর স্থধা করে পান ।
মাধব আদরে সাধ করি তোষঞ বিনয় বচন বহমান ॥
ঐছন ভাগী অব গোপিকা হৈয়ল বৃক্সতে সংশয় ভেল ।
কাহে এত ধন্য পুণ্য করি হৈয়ল কোন গহনে তপ কেল ॥

ব্রজানারী কি সৌভাগ্যবতী! কুটিল কটাক্ষে কংসারিকে আলেহন করে, কুচোপমর্দনের সঙ্গে হৃদয়ে হৃদয় স্থাপন করে

ভুজবল্লরী দ্বারা বেঁটন করে নিবিড় আলিঙ্গনপাশে বদ্ধ হয় ও অধর মুখা আশ্বাদনে আনন্দবিভোর হয়ে ওঠে। তারা যে কি সুমহান তপস্বী করেছে, তা কি তুমি জানো না? বলে দাও, আমি কেমন করে এ মৌভাগ্যের অধিকারিণী হবো?

পূর্বোক্ত চতুর্বিধ সহায় বা সখার মধ্যে চোটক অধিক গুণশ্রদ্ধা-কারী ও সেবাপরায়ণ। কামতন্ত্র-কলাভূষায়ী সে নায়কের বেশ রচনা করে। তার সেবার সার্থকতা দেখে, কিঙ্করও তার প্রতি ঈর্ষান্বিত হয়ে ওঠে। আর পীঠমর্দ বীররসের সহায়ক; রণক্ষেত্রে ও শৌর্যপ্রকাশে সে নায়ককে সাহায্য করে। শৃঙ্গারসখ্য ও রৌদ্ররসে সুদাম ছিলেন মুকুলের সবচেয়ে বড় সহায়।

হরিপ্রিয়া প্রকরণে যে দূতীর কথা আলোচিত হবে, সেই দূতী যে প্রণয়বিষয়ে কত সহায়ক, সে কথা রসবিদগণ বিশেষ ভাবে জানেন। ৯।

দূতী

দূতী দুই প্রকার। স্বয়ংদূতী ও আপ্তদূতী।

প্রথম স্বয়ংদূতী ‘কটাক্ষ’। ১০।

কটাক্ষের দ্বারা নায়ক বা নায়িকার মনোগত ভাব প্রথম প্রকাশিত হয়।

বিশাখা শ্রীমতীকে বলেছিলেন—

তনু সখি মাধব নয়ন তরঙ্গ আগহি করতহি দূতিকা রঙ্গ।

যাকর উপর আসি পহু মিলে তবহি বজ্র পরে তাকর কুলে।

আন রহ দূর, তুহু ধীর বরনারী চঞ্চল হৈয়ল চরিত তোহারি।

মাধবের দৃষ্টি দূতীকর্মে অতি পটু। আশ্চর্য তার নৈপুণ্য! সেই দৃষ্টিতে এমন অসাধারণ বশীকরণের শক্তি আছে যে, অতি শুদ্ধচরিত্রা হয়েও তুমি সেই ভুবনমোহন কটাক্ষে তাঁর প্রণয়বদ্ধ হয়েছ। ১১।

আর দ্বিতীয় স্বয়ংদূতী ‘বংশীধ্বনি’ বা সংকেত।

গার্গা বলেছিলেন—

শ্রীকৃষ্ণের বংশীধ্বনির কি অলৌকিক শক্তি ! তাঁর ওই সুমধুর বংশীধ্বনি স্বয়ং দূতী হয়ে আহ্বান জানায় । সে বংশীধ্বনির আকর্ষণে কুলকামিনীদের লজ্জা উচ্ছিন্ন হয় । সেই মোহনমুরলীর কলকাকলি শুনে, ঘর ছেড়ে শ্রীরাধা ছুটে যান বনে—মাধবের পাশে ।
! ললিত মাধব ।

আগুদূতী

বীরা ও বৃন্দা প্রভৃতি ব্রজাঙ্গনাগণ শ্রীকৃষ্ণের আগুদূতী । বীরার প্রভাতপন্নমতি, নিত্যানতুন প্রস্তাব রচনার শক্তি শ্রীকৃষ্ণের প্রণয় বিষয়ে অতিশয় সহায়ক । বৃন্দার মনোজ্ঞ চাটুবচন নায়িকাদের মনে আনন্দ সঞ্চার করে ও শ্রীকৃষ্ণের প্রতি তাদের অমুরাগ বর্ধন করে । বীরা প্রগল্ভ-বচনা, বৃন্দা চাটুকুশলা । ১২ ।

শ্রীমতীকে সম্বোধান করে বীরা বলেছিলেন—হে গরবিনি ! আমার কথা শোন, মাধবের প্রতি পরাঙ্গুখ হয়ো না । পূর্বে তিনি গিরিগোবর্ধন ধারণ করে তোমায় রক্ষা করেছিলেন । এখন তাঁর নবীন বয়স, অফুরন্ত যৌবন ! যুড়ে, ভুল করো না, অমুরাগিনী হয়ে অভিসারে যাও । ১২ ।

তাৎপর্য : শ্রীকৃষ্ণের নবীন বয়স । রতি-রসাস্বাদনের উপযুক্ত নায়ক তিনি । গর্বভরে তুমি দূরে সরে গেলে, অতঃ কোন নায়িকার প্রতি তাঁর প্রণয়সক্তি হওয়া অস্বাভাবিক নয় । তাছাড়া, গিরিগোবর্ধন ধারণে যিনি সক্ষম হয়েছিলেন, তিনি যে অতিশয় বলশালী সে বিষয়ে কোন সন্দেহ নাই । রসশাস্ত্রমতে, বলবান পুরুষের সঙ্গ-লাভেই নারী অধিক পরিতৃপ্ত হয় । সুতরাং তুমি প্রণয় ভঙ্গ করে নিবৃদ্ধিতা করো না ।

বীরা শ্রীকৃষ্ণের আগুদূতী—প্রগল্ভা ও প্রেমসহায়িকা । তাই তিনি কোঁশলে নায়িকার মনে রতিরসাস্বাদনের আগ্রহ জাগিয়ে

দিচ্ছেন এবং অশ্রু নাড়িকার প্রতি নায়কের প্রেমসঞ্চারের সম্ভাবনা ইঙ্গিত করে তাঁকে অভিসারে উৎসাহী ও আগ্রহশীল করে তুলছেন। প্রেমের দোত্যক্রিয়ায় এই শ্রেণীর বান্ধবী নায়কের পক্ষে সহায়িকা।। ১৩।

বৃন্দার উক্তি—

হে সুন্দরি ! হে খঞ্জননয়না ! আমি বৃন্দা, তোমায় প্রণাম করি ।
আমার প্রশ্নের উত্তর দাও ।

তোমার ভ্রভুজঙ্গীর দংশনে কালীয়দমন স্বয়ং আজ তীব্রজালায় অধীর হয়ে বনে বনে ঘুরে বেড়াচ্ছেন । আজ পর্যন্ত ব্রজে প্রবেশ করতে পারছেন না । হে চঞ্চল-মঞ্জুল-নয়না ! বলতে পারো, এ ভ্র-ভুজঙ্গী কে ?

মহাকাল কালীয় সর্প ঝাঁর নিকট পরাজিত, সেই শ্রীকৃষ্ণ তোমার ভ্রূপী ভুজঙ্গিনীর দংশনে কাতর হয়ে, তীব্র জালায় আজ বনে বনে ঘুরে বেড়াচ্ছেন । হে সুনয়না, সর্পবিষে জর্জরিত ব্যক্তি পুনরায় সর্পদংশনে নিরাময় হয় । সুতরাং তুমি আর বিলম্ব করো না ; পুনরায় তোমার ভ্রভুজঙ্গী ও কটাক্ষ দ্বারা মুকুন্দকে দংশন করে তাঁকে বিবমুক্ত কর । তোমার প্রিয়তমকে পরিতৃপ্ত করে সুস্থ কর । ১৪ ।

বীরা ও বৃন্দা প্রভৃতি যে সব অসাধারণী দূতী শ্রীকৃষ্ণের সহায় ছিলেন, তাঁদের প্রকৃতি ও কার্যকলাপ সম্পর্কে বলা হলো । পরে শিল্পকারিণী, দৈবজ্ঞা ও লিঙ্গিনী প্রভৃতি সাধারণী দূতীদের কথা আলোচিত হবে । ১৫ ।

কৃষ্ণবল্লভা

সাধারণ গুণাবলী বাহাতে আছয় ।

শ্রেষ্ঠ প্রেম সুমধুর্য সম্পদ আশ্রয় ॥

কৃষ্ণপ্রিয়া সবাকারে করি নমস্কার ।

অপূর্ব মাধুরী যার সৌন্দর্যের সার ॥

যাঁদের কৃষ্ণের মত সুরমা অঙ্গ, যাঁরা সর্বমূলক্ষণাযিতা এবং গুণসম্পন্না, যাঁরা সুবিস্তূর্ণ প্রেম এবং শ্রেষ্ঠ মাধুর্যসম্পদ আশ্রয় করেছেন, তাঁরাই কৃষ্ণবল্লভা বা কৃষ্ণের সুযোগ্যা নায়িকা । ১ ।

যাঁরা যৌবনগুরুর কাছে স্নরকেলিকৌশল অধ্যয়ন করেছেন, যাঁরা পরম মাধুর্যময়ী এবং পুণ্যবতী রমণী-শিরোমণি, যাঁদের অঙ্গ অতি সুমধুর এবং রতিরসাস্বাদন কর্মে অধিকতর আনন্দদানের কৌশল যাঁদের আয়ত্ত, তাঁরা প্রণম্যা । সেই সকল নায়িকাকে সাধারণতঃ দুই শ্রেণীতে বিভক্ত করা যায়—স্বকীয়া ও পরকীয়া । ২ ।

স্বকীয়া ও পরকীয়া দুই ভেদ হয় ।

পরকীয়া বসশ্রেষ্ঠ বশিশাস্ত্রে কয় ॥

শাস্ত্রমতে পাণিগ্রহণের বিধি অনুসারে পত্নীরূপে প্রাপ্তা, পতির আজ্ঞানুবর্তিনী পতিব্রতা ও পতিপ্রেমে অবিচলিতা যে নারী, তাকে স্বকীয়া নায়িকা বলা হয় । ৩ ।

যথা—

চিরাচরিত পাতিব্রত্য ধর্মের পথে থেকে যাঁরা গুরুজনের প্রতি শ্রদ্ধাশীলা ও পরিজনবর্গের প্রতি স্নেহশীলা হয়ে, গৃহিণীরূপে গৃহে অবস্থান করেন, এবং নিয়ত স্বামীসেবায় রত থাকেন, তাঁরাই আনন্দদায়িনী স্বকীয়া রমণী বা নায়িকা । ৪ ।

রুঙ্গিণীর প্রতি শ্রীকৃষ্ণের উক্তি—

হে মানিনি, তোমার মত প্রণয়িনী ও সুগৃহিণী আমি আর কোনো গৃহে দেখিনি। বিবাহকালে যে-সব নৃপতি সমাগত হয়ে-
ছিলেন, তাঁদের নগণ্য মনে করে, তুমি শুধুমাত্র আমার গুণকীর্তির
কথা শুনে, নির্জনে আমার কাছে দূত পাঠিয়েছিলে। তুমি আমার
অমুরক্তা প্রেমময়ী পত্নী।

দ্বারকাবিহার

স্বকীয়া নারীতে কৃষ্ণের দ্বারকা বিহার।

অষ্টোত্তরশত স্ত্রীয়া বোডন হাজার ॥

সখী ও দাসী

তাহাদের সখী দাসী অসংখ্য রূপসী।

তুল্য রূপগুণ সখী ন্যূন হয় দাসী ॥

দ্বারকায় যত্নপতির স্বকীয়া মহিষী ষোল হাজার একশো আট ;
এঁদের সকলের আবার অসংখ্য সখী ও দাসী আছে। যারা রূপে
ও গুণে মহিষীদের তুল্য তারা সখী ; আর যারা রূপে ও গুণে
তাঁদের চেয়ে অগ্নিয়সী, তারা দাসী। মহিষীগণের মধ্যে মুখ্যা বা
প্রধানা আটজন। যথা—

রুঙ্গিণী, মালী ও সত্যা আর আব্বতী।

কালিন্দী, কোশল্যা, ভদ্রা, শৈব্যা রূপবতী ॥

এই আটজন প্রধান মহিষীর মধ্যে রুঙ্গিণী ও সত্যাভামা সকলের
চেয়ে বরণীয়া। রুঙ্গিণী ঐশ্বর্যে শ্রেষ্ঠ, আর সত্যাভামা সকলের চেয়ে
সৌভাগ্যশালিনী।

তথা হরিবংশে—

বিদর্ভরাজ ভীষ্মকের আশ্রয়ী রুঙ্গিণী কুটুম্বদিগের অধীশ্বরী
ছিলেন। আশ্রয় স্বজন ও অতিথি অভ্যাগত ধারা গৃহে আসতেন,

তাদের আদরযত্ন-পরিচর্যা বিষয়ে রুস্বিনী ছিলেন খুব যত্নশীল। সত্যভামা ছিলেন মহিষীদের মধ্যে উত্তমা এবং প্রেম ও প্রীতিতে পরম সৌভাগ্যবতী।

রুস্বিনীর প্রতি শ্রীকৃষ্ণের উক্তি—

হে দেবি, কোনো সুরূপা আমার কাছে তোমার চেয়ে অধিক প্রিয় নয়। তুমি প্রিয়তমা! এই ষোড়শ সহস্র প্রিয়ার মধ্যে আমার প্রাণসমা।

এই সব মহিষীদের সখী ও দাসী সর্বাপেক্ষা গুণবতী। তাদের সংখ্যাও অনেক। উৎকৃষ্ট সখী ও দাসী প্রিয়ার সদৃশ্যের পরিচয় দেয়।

যে সকল স্ত্রী শাস্ত্রসম্মত বিধিমতে পরিগৃহীতা হয়, তাঁরাই স্বকীয়া। কিন্তু বৃন্দাবনে যে সব ব্রজবালা মনে মনে শ্রীকৃষ্ণকে পতিত্বে বরণ করেছিলেন, স্বজাতীয়া না হলেও, আপন আপন ধর্মনিষ্ঠা বা পতিপ্রেমে একনিষ্ঠতার জন্য তাঁরাও স্বকীয়া নায়িকা পর্যায়ভুক্ত হওয়ার যোগ্য।

ব্রজ কুমারীর উক্তি—

যশোমতী রাণী-পর্যায়সমান করিয়া আমারে জানে।

সখিগণ বত মোর অন্তর্যন্ত প্রাণের অধিক জানে ॥

বৈকুণ্ঠ জিনিয়া এ নব কানন মুনীর মানস হয়ে।

এ রূপবোঁদন দেখিতে স্তন্দর এ সবে কি কাজ করে ॥

সকলি বিফল হইল কেবল কি হবে আমার গতি।

উমাত্রত কলে যদি না হইল নন্দ্য নন্দন পতি ॥

আর্য্য যশোমতী আমার প্রতি বাৎসল্য-স্নেহপরায়ণা, সখীগণ প্রাণ অপেক্ষা আমার ভালবাসে, বৃন্দাবন বৈকুণ্ঠের চেয়েও মনোরম, আমার এত রূপ, এমন যৌবন! কিন্তু তাতে কি লাভ? যদি উমাত্রতের ফলরূপ শ্রীকৃষ্ণ আমার সঙ্গে পতিরযোগ্য লীলা না করেন, তাহলে আমার সবই বিফল।

গান্ধর্ব ও অব্যক্ত বিবাহ

গান্ধর্ব বিবাহ হেতু স্বকীয়া কহিল।

অব্যক্ত বিবাহে কাম প্রচ্ছন্ন রহিল ॥

গান্ধর্বরীতিতে যে ব্রজকুমারীগণের সঙ্গে শ্রীকৃষ্ণের বিবাহ স্বীকৃত, তাঁরা স্বকীয়া। তা ছাড়া, যাঁদের সঙ্গে শ্রীকৃষ্ণের শুধুমাত্র মনো-বিনিময় হয়ে অব্যক্ত সম্পর্ক স্থাপিত হলো, এবং কাম প্রচ্ছন্ন রয়ে গেল, বস্তুতঃ তাঁরাও স্বকীয়া নায়িকা। ৫।

পরকীয়া

যে সব নায়িকা ইহকাল-পরকালের ভয় না রেখে গভীর অনুরাগে দয়িতের নিকট আত্মসমর্পণ করেন, ধর্মমতে বা সামাজিক অধিকারে পত্নীরূপে স্বীকৃতি না হলেও, প্রেমের অধিকারে তাঁরা সুপ্রতিষ্ঠিতা। নায়িকা হিসাবে তাঁরাই পরকীয়া। ৬।

রাগে আত্ম সমর্পণে দুই লোক ছাডি।

ধর্মেতে গৃহীতা নহে পরকীয়া নারী ॥

অনুরাগের উল্লাসে কোন্ ব্রজাঙ্গনা ধর্মের মর্যাদা লঙ্ঘন করেন নি? অথচ অরুদ্ধতী প্রভৃতি মহাসতীরা অতিশয় শ্রদ্ধার সঙ্গে তাঁদের অভিসার লীলার প্রশংসা করেছেন। তা ছাড়া, বনচারিণী হলেও তাঁদের মাধুর্যপরিমল লক্ষ্মীর সৌন্দর্যকেও স্নান করে। ত্রিভুবন বিজয়িনী সেই সব কৃষ্ণপ্রিয়াগণ পরম আনন্দদায়িনী। শ্রীকৃষ্ণকে তাঁরা সখ্যসুখ দান করেন। ৭।

কন্যা ও পরোঢ়া

পরকীয়া নায়িকা দ্বিবিধ—কন্যা ও পরোঢ়া। যে সব অবিবাহিতা বা কুমারী ব্রজবালা শ্রীকৃষ্ণের সঙ্গে প্রেমলীলায় রত হন, তাঁরা কন্যা পরকীয়া। যাঁরা লৌকিক ধর্মে অন্তের বিবাহিতা স্ত্রী, কিন্তু গোপনে কৃষ্ণপ্রেমে অনুরক্তা ও পরম মাধুর্যরসে আনন্দদায়িনী

তারা পরোঢ়া পরকীয়া । এঁদের কামক্রীড়া প্রচ্ছন্ন । প্রচ্ছন্নকামতা
দ্বারা এঁরা গোকুলচন্দ্রের সহিত সখ্য সাধন করেন । ৮ ।

পরকীয়া সঙ্গে কৃষ্ণের অধিক আনন্দ ।

ইহাতে প্রচ্ছন্ন ক্রীড়া করয়ে গোবিন্দ ॥

সকলের শ্রেষ্ঠা হয় পরকীয়া নারী ।

আপনি মহিমা তার কহেন শ্রীহরি ॥

পরকীয়া নায়িকার সঙ্গে রতিসম্ভোগে যে আনন্দ ও মাধুর্যরস
আস্বাদিত হয়, তার তুলনা হয় না । বিধিনিষেধের সকল বাধা
লঙ্ঘন করে, আকুল আগ্রহ ও অসীম ধৈর্যের সঙ্গে অগ্রসর হয়ে
পরকীয়া রতি আস্বাদন করতে হয়, তাই পরকীয়ার রসোৎকর্ষ
অন্য সকল রসানুভূতির তুলনায় শ্রেষ্ঠ ।

যে মৃগাক্ষীদের লাভ করতে হলে অধিক নিষেধ ও হর্লভতার
গুণী পার হতে হয়, এবং নানা বাধাবিপত্তি অতিক্রম করতে হয়,
তাদের প্রতি নায়কের হৃদয় সব চেয়ে বেশী আকৃষ্ট হয় । ৯ ।

তবে এই প্রেম সাধারণের জ্ঞান নয় ; শুধু মাত্র রতিরসস্বাদনের
শ্রেষ্ঠতা ও আনন্দঘন মধুর রসের অনুভূতি বিশ্লেষণের জ্ঞান উল্লিখিত
হয়েছে । এই পরকীয়া প্রেমে শ্রীকৃষ্ণকে নায়ক রূপে কল্পনা করে
তাঁর ব্রজনারীসঙ্গ প্রসঙ্গে রতিরস আলোচিত হয়েছে । উদাহরণের
জ্ঞানই এই পরকীয়া প্রেমের আলোচনা ; আচরণের জ্ঞান নয় । কেন
না, পরকীয়া প্রেমের আচরণ সাধারণ মানুষের পক্ষে মারাত্মক ।
তাতে সমাজকল্যাণ ধ্বংসের পথে অগ্রসর হয় । পরকীয়া প্রেমের
যে রসোৎকর্ষ, সেই রসোৎকর্ষ সঞ্চারিত হলে শ্রেষ্ঠ ভগবৎ-প্রেম চিন্তে
সজ্জাত হয় । সকল বাধা বিপত্তি অতিক্রম করে, সংসারধর্মে রত
থেকেও, নায়িকার মনে যেমন উপপত্তির প্রতি গভীরতম গোপন
আকর্ষণ প্রবল হয়ে ওঠে, ঠিক তেমনি আকর্ষণ যখন শ্রীকৃষ্ণের
প্রতি উপজ্জিত হয়, তখনই হয় শ্রেষ্ঠ ভগবৎ-প্রেমের সঞ্চার ।
পরকীয়ার রসানুভূতি সকল প্রেমের চেয়ে নিবিড়, আকর্ষণ সকল

আকর্ষণের চেয়ে প্রবল। সেই তাৎপর্যে পরকীয়া প্রেমের বিষয় উল্লিখিত হয়েছে। ১১—১৩।

শ্রীমদ্ভাগবত দশম স্কন্ধে শুকদেবের উক্তি—

মহারাজ পরীক্ষিৎ ! রাসলালা শুনে আপনি চঞ্চল হবেন না। দেহপরতন্ত্র সাধারণ মানুষের পক্ষে মনের দ্বারাও এ আচরণ উচিত নয়। বিষপান শঙ্করের পক্ষেই সম্ভব। সাধারণ মানুষ যদি সে কাজ করে, তার বিনাশ অবশ্যস্বাভাবী। পরকীয়া প্রেমের লীলামাধুর্য শুধু উদাহরণের বস্তু। ভগবান শ্রীকৃষ্ণ নরদেহ ধারণ করে কেবল মাত্র ভক্তের প্রতি এই অমুগ্রহ বিতরণ করেছেন প্রেমের উৎকর্ষ প্রদর্শনের জন্ত। অনীশ্বর দেহমানে মানুষ আত্মদান করেছে সেই শ্রেষ্ঠ প্রেমের মধুরতম রস। ১৪—১৫।

সেই সকল গোপীগণের প্রেমের মাহাত্ম্য ভগবান স্বয়ং স্বীকার করেছেন। ১৬।

গোপীগণের প্রেম অনবত্ত ও অতুলনীয়। যে প্রেমের দুর্বীর আকর্ষণে লজ্জা ভয় গৃহস্থস্থ সর্বকিছুতে জলাঞ্জলি দিয়ে, নায়িকাগণ আত্মসমর্পণ করেছেন দয়িতের কাছে, সে প্রেম নিকষিত কাঞ্চনের মতই অনাবিল, শুদ্ধ ও সুন্দর—নির্মল ও গরীয়ান।

দয়িতকে আনন্দ দান করবার জন্ত নায়িকা যখন সকল দুঃখ তুচ্ছ করেন, আত্মস্থখের দিকে দৃকপাতও করেন না, তখনই তাঁর প্রেম হয় সার্থক। অনাবিল প্রেমে আত্মস্থখের কামনা থাকে না, দয়িতকে পরিতৃপ্ত করবার জন্ত নায়িকা নিজেই নিঃশেষে সমর্পণ করেন।

আত্মেন্দ্রিয় প্রীতি ইচ্ছা তাবে বলি কাম।

কৃষ্ণেন্দ্রিয় প্রীতি ইচ্ছা প্রেম তার নাম ॥

শ্রীমদ্ভাগবত দশম স্কন্ধে শ্রীকৃষ্ণের উক্তি—

হে সুন্দরীবন্দ ! আমার সঙ্গে তোমাদের এই সংযোগ, এই অচ্ছেদ্য অনুরাগ ও প্রেম নিরবত্ত—অনিন্দনীয়। যদি আমার জীবন

অশেষ হয়, দেবতার পরমায়ু নিয়ে পৃথিবীতে বেঁচে থাকি, তবুও কোনদিন তোমাদের প্রতি আমার কর্তব্যের শেষ হবে না। আমি পায়বো না তোমাদের এই প্রেমের পূর্ণ প্রতিদান দিতে। তোমরা দুর্জয় গৃহশৃঙ্খল ছেদন করে, আত্মদান করেছ আমার কাছে; করেছ আমার ভজনা। তুচ্ছ করেছ সকল বাধা ও বিঘ্ন। তাই প্রেম হয়েছে গরীয়ান। সেই অসামান্য প্রেমে তোমরা হয়েছে মহীয়সী। বিনিময়ের প্রত্যাশা করোনি; আপনার প্রেমে আপনি হয়েছে ধন্য। সার্থক হয়েছে তোমাদের ভালবাসা। কিন্তু আমি রইলাম তোমাদের কাছে চিরঞ্চী। ১৭।

পরম ভাগবত উদ্ধব ব্রজাঙ্গনাদের মৌভাগ্যের কথা কীর্তন করে বলেছেন, আমি যদি বৃন্দাবনের বনপথে লতাগুল্ম হয়ে জন্মাতাম, কৃষ্ণপ্রিয়াদের চরণস্পর্শে আমার জীবন ধন্য হতো। কি অতুলনীয় প্রেমসম্পদের অধিকারিণী তাঁরা! কুল, মান, স্বজন, সমাজ ও ধর্ম সব কিছু বিসর্জন দিয়ে, তাঁরা অনুগমন করেছেন মাধবের। ১৮।

যদিও গোপীগণ পরোঢ়া ছিলেন, তবুও তাঁরা স্বচ্ছন্দে করেছেন অভিসার। মায়ামুগ্ধ গোপগণ গৃহে আপন পত্নীর অনুপস্থিতি অনুভব করতে পারেন নি; তাই কৃষ্ণের প্রতি তাঁদের মনে কোন কোপানল প্রজ্জ্বলিত হয় নি। ১৯।

মায়াতে ছায়ায় নারী পেয়ে গোপগণ,
কৃষ্ণ প্রতি নহে তারা কোপযুক্ত মন।
ব্রজদেবী সঙ্গে খেলে নন্দের নন্দন,
নিজপতি সঙ্গে রতি না করে কখন। ২০।

কল্যক্য

যে অবিবাহিতা লজ্জাশীলা বালিকারা পিতৃগৃহে থেকে সর্বদাই সখীদের সঙ্গে খেলা করবার জন্য উৎসুক, অথচ তাদের অন্তরে জেগেছে নায়কের প্রতি বিমুগ্ধতা, মন আকৃষ্ট হয় তরুণের প্রতি, যুগ্ম

নায়িকার গুণ তাদের প্রাণে সঞ্চারিত হয়েছে পরকীয়া প্রেমে
তারা'ই কন্যা বা কন্যকা নায়িকা। ২১।

এই কন্যাদের মধ্যে যে সব ব্রজকুমারী কৃষ্ণকে পতিভাবে কল্পনা
করে কাত্যায়নীর অর্চনা করেছিলেন এবং শ্রীকৃষ্ণ খাঁদের অভীষ্ট
পূরণ করেছিলেন, তাঁরা ধন্যা নায়িকা। উজ্জলনীলমণির নায়িকা
প্রকরণে তাঁদের বল্লভা বা কৃষ্ণবল্লভা বলা হয়েছে।

ধন্যা আদি কন্যা ব্রজে করে দুর্গার্চন।

তাহাদের কৈল হরি অভীষ্ট পূরণ ॥ ২২ ॥

যে সব কুমারী এই ভাবে শ্রীকৃষ্ণের অঙ্গসঙ্গ লাভ করেছেন,
তাঁদের পরিহাস করে জ্যোষ্ঠভ্রাতৃজায়া বলেছেন—

সখীর সহিত ধূলির উপরে খেলহ যমুনাকূলে।

হৃদয়ে বসন না দিলে কখন অলপ বয়স বলে ॥

অলপ বয়স জানিয়া জনক না খুঁজে তোমার বর।

বিষম চরিত দেখিয়া এখন মনেতে লাগিল ডর ॥

কান্ন বনমাঝে মুরলী পুরই মধুর মধুর তানে।

তু'হু সে কাঁপিয়া চপল নয়নে চাহিছ গহন পানে ॥

খেলাধুলাতেই তোমার বেশী মনোযোগ। এখনও বুকে কাপড়
দাও না, তাই পিতা বরের অন্বেষণ করেন না। কিন্তু ভিতরে
ভিতরে শিখিপিজ্জমৌলির মুরলীধ্বনি শুনে, তুমি উৎকম্পিত হৃদয়ে,
উদ্ভ্রান্ত দৃষ্টিতে এদিক ওদিক চেয়ে বৃন্দাবনের বনে বনে ঘুরে
বেড়াও দয়িতের সন্ধানে। বাইরে প্রকাশ না পেলোও, কুমারী
মনের গোপন অন্তরালে জেগেছে সঙ্গলিপ্সা, সঞ্চারিত হয়েছে
প্রেম। দয়িতের অঙ্গসঙ্গ লাভের স্বাদ পেয়েছ কিনা, তাই!। ২৩।

পরোঢ়া

বিবাহিতা যে-সব গোপবধূর স্বামী আছে, তবুও তাঁরা সর্বদা
সন্তোষ লালসায় কৃষ্ণের প্রতি অনুরক্তা, তাঁরা'ই পরোঢ়া
নায়িকা। ২৪।

চন্দ্রাবলীকে পদ্মা বলেছিলেন—সখি, তুমি কাভ্যায়নীর অর্চনার জন্তু পুষ্পচয়ন করতে গহন বনের মধ্যে কেন গিয়েছিলে? কুঞ্জবনে কত কাঁটাগাছ! সেই সব কাঁটার আঘাতে তোমার বক্ষস্থল ক্ষত বিক্ষত হয়েছে। কিন্তু ননদিনীরা তো তা বুঝবেন না। ওই দেখ, স্তনযুগে কণ্টকের সত্তা আঘাত দেখে, ননদিনী সন্দিগ্ধ দৃষ্টিতে বারবার তোমার দিকে চাইছেন।

এইসব পারাঢ়া নায়িকা সৌন্দর্য, সদ্গুণ ও বিভাবে অতিশয় শ্রেয়; সকলের চেয়ে সৌভাগ্যশালিনী। প্রেমমাধুর্যে এঁরা মাধবের বক্ষলগ্না কমলার চেয়েও অধিক। ২৫।

রাস উৎসবে যাদের কর্ণে বাহু বেষ্টন করে শ্রীকৃষ্ণ আলিঙ্গন করেছিলেন, তারা কল্যাণময়ী ও সৌভাগ্যবতী। তাদের প্রতি তাঁর যে অশেষ করুণা প্রকাশ পেয়েছিল, এমন কি বক্ষস্থিতা একান্ত অল্পবক্তা কমলার প্রতিও তাঁর তেমন শ্রীতি কোনদিন প্রকাশ পায় নি। যে সব নারীর অঙ্গে পদ্মের সৌরভ, যাদের কাস্তি মনোহর, সেই সব স্তন্যরীরাই যখন এ-হেন সৌভাগ্য থেকে বঞ্চিতা, তখন আর অত্যাগত স্ত্রীগণের কথা কি? তাদের পক্ষে এ সৌভাগ্যলাভের আশা সুদূরপর্যন্ত। ২৬—২৭।

উল্লিখিত পরোঢ়া নায়িকা তিন প্রকার :

সাধনপরী, দেবী ও নিত্যপ্রিয়া।

সাধনপরী নায়িকাদের আবার দুটি শ্রেণীতে ভাগ করা যায়। যথা—যৌথিকী আর অযৌথিকী।

যারা আপনজনের সঙ্গে সাধনরতা তাঁরা যৌথিকী। পুরাণ ও উপনিষদের মতভেদে যৌথিকী দুই প্রকার। ২৮।

পদ্মপুরাণে কথিত আছে যে, যে-সব দণ্ডকারণ্যবাসী গোপাল-দেবের উপাসনা করতেন এবং রামের সৌন্দর্যদর্শনে মুগ্ধ হয়েছিলেন, কিন্তু অভীষ্ট লাভ করতে পারেন নি, তাঁরা রতিভাবে উদ্ধুদ্ধ হয়ে

বৃন্দাবনে গোপীরূপে জন্ম লাভ করেছিলেন ও কৃষ্ণপ্রেমের রাগানুগা রতিরস আশ্বাদন করেছিলেন । ২২ ।

বৃহৎবামনপুরাণে বিব্রত আছে যে, রাস উৎসবের প্রারম্ভে কোনকোন গোপী শ্রীকৃষ্ণ-সন্তোগযোগ্য দেহ প্রাপ্ত হয়েছিলেন । কেউ বা পতিদ্বারা গৃহে অবরুদ্ধা হয়ে সে আনন্দসন্তোগ থেকে বঞ্চিত হয়েছিলেন । রতिसন্তোগে বঞ্চিতা হলেও প্রেমের রসাস্বাদন থেকে তাঁদের চিত্ত বঞ্চিত হয় নি ।

উপনিষদ্ মতে—

গোপীভাগ্য দেখি সূক্ষ্মবুদ্ধি অতিগণ

তপস্যা করিল কৃষ্ণপ্রাপ্তির কারণ ।

তপঃ করি অতিসব ব্রজে জন্ম নিল ।

গোপিনী হৈয়া ব্রজে কৃষ্ণপ্রিয়া হল ॥ ৩০ ॥

এঁরাই বল্লবী নামে অভিহিতা ।

গোপীভাবের প্রতি অনুরাগী হয়ে ঘাঁরা সাধনে প্রবৃত্ত হন এবং আগ্রহ ও উৎকর্ষা বশতঃ যাঁদের রাগানুগা ভজনে গোপীভাব সিদ্ধ হয়, তাঁরাই অর্যোথিকী । সময় সময় এই অর্যোথিকী নায়িকারা একাকিনী বা যুথবদ্ধা হয়ে ব্রজে জন্মগ্রহণ করেছিলেন ।

এই অর্যোথিকী নায়িকাদের আবার দুই শ্রেণীতে ভাগ করা যায় । যথা, প্রাচীনা ও নবীনা ।

প্রাচীনা অর্যোথিকীরা সুদীর্ঘকাল সান্নিধ্য লাভ করে নিত্য-প্রিয়াদের পর্যায়ভুক্ত হয়ে প্রেমরসাস্বাদনের সুযোগ পেয়েছেন । নবীনাগণ দেবতা, মনুষ্য বা গন্ধর্ব্ব রূপে জন্মগ্রহণ করে ব্রজলীলার রসাস্বাদন করেছেন । ৩১ ।

দেবী

শ্রীকৃষ্ণ যখন দেবযোনিতে জন্মগ্রহণ করেন তখন তাঁর সন্তোষ বিধানের জন্তু নিত্যপ্রিয়ারাও দেবী রূপে বৃন্দাবনে জন্মগ্রহণ

করেছিলেন। যে সব প্রিয়াগণ বৃন্দাবনে গোপকন্যারূপে জন্মেছিলেন তাঁরাই নিত্যপ্রিয়াদের প্রাণতুল্যা সখী হয়েছিলেন এবং ব্রজলীলায় অংশ গ্রহণের সৌভাগ্য লাভ করেছিলেন। ৩২।

নিত্যপ্রিয়া

বৃন্দাবনের মধ্যে শ্রীরাধা এবং চন্দ্রাবলী এই দু'জন ছিলেন শ্রীকৃষ্ণের নিত্যপ্রিয়া। এঁদের সৌন্দর্য এবং বৈদম্ব্যাদি গুণ অর্থাৎ রূপ ও রসানুভূতির যোগ্যতা ছিল শ্রীকৃষ্ণের সমতুল্য। ৩৩।

যিনি আপনার অসীম আনন্দ ও চিৎস্বরসঘন শক্তিতে পরিপূর্ণ হয়ে গোলোকে অবস্থান করেন, সকল আনন্দের ও রসানুভূতির আধার সেই অখিলাত্মা আদি পুরুষ গোবিন্দের ভজনা করি। নিখিল-বিশ্বে আপন রূপরাশি বিস্তৃত করে কেলিকলা সম্ভোগরত সেই মহান্ পুরুষ চিন্ময় রসপ্রবাহে প্রতিভাবিত। ব্রহ্মসংহিতা। ৩৪।

শাস্ত্রপ্রসিদ্ধা নিত্যপ্রিয়াগণের মধ্যে রাধা, চন্দ্রাবলী, বিশাখা, ললিতা, শ্যামা, পদ্মা, শৈব্যা, ভদ্রা, তারা, বিচিত্রা, গোপালী, ধনিষ্ঠা এবং পালিকা প্রভৃতি প্রধানা নায়িকা। ৩৫।

চন্দ্রাবলীর অন্ত নাম সোমভা। শ্রীরাধার নাম গান্ধবী এবং ললিতার অপর নাম অনুরাধা। এই নিমিত্ত সোমভা, গান্ধবী ও অনুরাধা সম্পর্কে পৃথকরূপে উল্লেখ করা হয় নি।

খঞ্জনাঙ্কী, মনোরমা, মঙ্গলা, বিমলা, লীলা, কৃষ্ণা, শারী, বিশারদা, তারাবলী, চকোরাঙ্কী, শঙ্করী ও কুঙ্কমা প্রভৃতিও লোক-প্রসিদ্ধা নিত্যপ্রিয়াগণ মধ্যে পরিগণিতা। ৩৬।

এইসব ব্রজশূন্দরীদের শত শত যুথ আছে এবং এক-একটি যুথে লক্ষ লক্ষ বরাজনা আছেন। শুধুমাত্র বিশাখা, ললিতা, পদ্মা এবং শৈব্যা—এই চার সখী ব্যতীত, রাধা থেকে কুঙ্কমা পর্যন্ত সকলেই যুথেশ্বরী। কিন্তু পরম সৌভাগ্যবতী রাধা প্রভৃতি অষ্ট যুথেশ্বরী সখী প্রধানা নায়িকা রূপে পরিগণিতা। ৩৭।

যদিও ললিতা প্রভৃতি সখীগণ যুথেশ্বরীর যোগ্যা, তবুও তাঁদের অন্তরে শ্রীরাধার ছায় অভিষার ও সঙ্গলাভের লালসা ছিল, সেই হেতু তাঁরা যুথেশ্বরী পদবাচ্যা হতে পারেন নি। তাঁদের সখ্যরূটিই স্থায়ী হয়েছিল। ৩৮।

এই শ্রেণীর সখীরা স্বভাবতঃ মধুরা, এবং নায়ক ও নায়িকা উভয়েরই প্রিয়বান্ধবী। শ্রীকৃষ্ণের সঙ্গলাভের আকাঙ্ক্ষা অন্তরে বিद्यমান থাকায়, এঁদেরও হরিপ্রিয়া, কৃষ্ণপ্রণয়াভিলাষিনী বা কৃষ্ণবল্লভা পর্যায়ভুক্ত করা চলে।

রাধা প্রকরণ

উল্লিখিত অষ্ট যুথেশ্বরীর মধ্যে রাধা ও চন্দ্রাবলীই সর্ববিষয়ে প্রধানা। এঁদের প্রত্যেকের যুথে অমুগামিনী কুরঙ্গিনীর মত অসংখ্য গোপিনী আছেন। শ্রীকৃষ্ণ যখন যমুনাপুলিনে রাসলীলা করেন, এই সব গোপিনীরা যোগদান করেন সেই নৃত্য-উৎসবে। নৃত্যের তরঙ্গহিল্লোল বয়ে যায় আকুলিতা প্রমদা গোপাঙ্গনাদের অঙ্গে অঙ্গে। আনন্দঘন চিন্ময় রস প্রতিভাবিত হয়। ১।

রাধা ও চন্দ্রাবলী—এই দুই প্রধানা নায়িকার মধ্যে সর্ববিষয়ে শ্রীরাধাই শ্রেয়সী। শ্রীরাধা মহাভাব-স্বরূপিনী। তাই আনন্দঘন রতিরসাস্বাদনের আধাররূপা চন্দ্রাবলীর চেয়েও শ্রীরাধা বরীয়সা। গুণগরিমায় রাধা অতুলনীয়। প্রেমধর্মের আধাররূপে যে সকল গুণাবলী নায়িকাকে পরিপূর্ণ করে তোলে, শ্রীরাধা তার সম্পূর্ণ অধিকারিণী। তাই বৃন্দাবনলীলায় শ্রীরাধার সমকক্ষ নায়িকা আর নাই। কৃষ্ণপ্রেমের বিকশিত শতদল শ্রীরাধা বিশ্বের মানসলোকে এক অলোকসামান্য নায়িকা। ২।

অথর্ব বেদের অন্তর্গত গোপালতাপনী উপনিষদের উত্তর বিভাগে থাকে গান্ধর্বী বলে উল্লেখ করা হয়েছে, তিনিই শ্রীরাধা। মাধবের সঙ্গে শ্রীরাধার সামঞ্জস্য ও গুণপ্রাধান্য ঋক্ পরিশিষ্টে কীর্তিত হয়েছে। দেবর্ষি নারদও পদ্মপুরাণে শ্রীরাধার মহাশ্রী কীর্তন করেছেন :

শ্রীরাধা বিষ্ণুর অতিশয় প্রিয়সী। রাধাকৃষ্ণ ও তাঁর তেমনি প্রিয়। গোপিনীদের মধ্যে একমাত্র শ্রীরাধাই সকলের চেয়ে প্রিয়। তিনিই বিষ্ণুর অত্যন্তবল্লভা—শ্রেষ্ঠা নায়িকা। ৩।

বৃহৎ গৌতমীয় প্রভৃতি তন্ত্রের মতে, যে হ্লাদিনী মহাশক্তি থেকে দিকেদিকে আনন্দধারা উৎসারিত, যার চেয়ে শ্রেয় শক্তি

আর নাই, সেই মহাশক্তির সারস্বরূপা হলেন প্রীরাধা। তাই কৃষ্ণ-
প্রেমসিগণের মধ্যে প্রীরাধাই সর্বশ্রেষ্ঠা। ৪।

এই বৃষভানুন্দিনী সুষ্ঠু কাস্তা ও অপরূপ রূপলাবণ্যময়ী। ইনি
ষোড়শ প্রকার শৃঙ্গার সজ্জা ও দ্বাদশবিধ আভরণ অঙ্গে ধারণ
করেন।

সুষ্ঠু কাস্তার রূপ :

কুঞ্চিত কুন্তল দীঘল নয়ান।
ও মুখ স্বন্দর চাঁদ সমান ॥
জ্বনয়ুগ কঠিন কটি অতি ক্ষীণ।
নত স্বন্দর তুঁহ বয়স নবীন ॥
নখবিধুরাজিত মৃণালভূজপাণি।
তুয়া রূপ ত্রিভুগত গুণই জানি ॥

হে রাধিকা, ত্রিভুগতে উৎসারিত তোমার রূপের উৎস। তুমি
অনুপমা। এমন অতুলীয় যার রূপ, তার অলঙ্কারের কি প্রয়োজন?
সুকুঞ্চিত কেশদাম, বদনকমল চঞ্চল অথচ দীর্ঘায়ত নয়নে শোভিত।
কঠিন কুচযুগে বক্ষঃস্থল সুরমা, কটিদেশ অতিক্ষীণ, স্বক্লহুটি নিম্ন,
করপল্লব নখরস্নেহে অলঙ্কৃত। ৬।

ষোড়শ শৃঙ্গারবেশ :

সায়ংকালে প্রীকৃষ্ণ যখন ব্রজের পথে চলেছেন, উজ্জলমুখো
প্রীরাধাকে দেখে, সুবল তাঁর দৃষ্টি আকর্ষণ করে বললেন—সখা,
বৃষভানুন্দিনীর অঙ্গশোভা দর্শন কর—

সস্ত্রঃস্নাতা, নাসাগ্রে মণিখচিত রত্নালঙ্কার, পরিধানে নীল
বসন, কটিভাঙে নীবিবন্ধ, শিরে বেণী, কর্ণে উত্তংশ, সর্বাঙ্গে
চন্দন-লেখা, চিকুরদামে স্তরে স্তরে শোভিত পুষ্পগুচ্ছ, কর্ণে
রত্নহার, পদ্মহস্তে লীলাপদ্ম, মুখকমলে তামূল, চিবুকে কস্তুরীবিন্দু,
উজ্জল নয়নযুগলে কাজলের রেখা, গণ্ডস্থল মকরীপত্র রঞ্জিত,
চরণে অলঙ্কররাগ, ললাটে চন্দন-ভিলক। সূচিত্রা রাধা ষোড়শ

শৃঙ্গারবেশে সজ্জিতা হয়ে আজ অসামান্য রূপলাবণ্যে উদ্ভাসিতা হয়ে উঠেছেন। ৭।

দ্বাদশ আভরণ :

চুড়ায় রত্ন, কর্ণে সুবর্ণ কুণ্ডল, নিতম্বে কাঞ্চী, গলদেশে স্বর্ণ পদক, কর্ণের উপরে—বেণীমূলে স্বর্ণশলাকা, প্রেকোষ্ঠে বলয়, কণ্ঠে রত্নহার, অঙ্গুলিতে অঙ্গুরীয়, বক্ষোদেশে নক্ষত্রতুলা মণিমালা, ভুজে অঙ্গদ, চরণে রত্ননূপুর, পদাঙ্গুলিতে উত্তুঙ্গ অঙ্গুরীয়।

ষোড়শবিধ শৃঙ্গার-সজ্জার সঙ্গে এই দ্বাদশ আভরণ মিলিত হয়ে শ্রীমতীকে আজ সমুদ্ভাসিত করেছে। নয়নমনোমুগ্ধকর আশ্চর্য শোভা বিস্তার করে শ্রীরাধা অভিসার বেশে সজ্জিতা হয়েছেন সখা, সেই নয়নমনোহর রূপরাশি দর্শন কর। ৮।

বৃন্দাবনেরস্বরী শ্রীরাধার প্রধান গুণাবলী :

মধুরা, নববয়াঃ, সচল-নয়না, উজ্জল-হাস্তময়ী, স্নলক্ষণা, অঙ্গগন্ধে নায়ককে উন্মাদিত করেন, সঙ্গীত-পটিয়সী, মধুরভাষিনী, নর্মকুশলা, বিনীতা, করুণাময়ী, বিদগ্ধা, পটু, লজ্জাশীলা, সুমধাদাসম্পন্ন, ধৈর্যশালিনী, সুবিলাসিনী, মহাভাবের উৎকর্ষসাধিকা, কৃষ্ণবিষয়ে অতিতৃষাবতী, গোকুল-প্রেমাধার—বৃন্দাবনের সর্বজনের প্রিয়া, জগদ্ব্যাপী যশের অধিকারিণী, গুরুজনের স্নেহের পাত্রী, সখীগণের প্রণয়বশীভূতা, কৃষ্ণপ্রিয়াগণের মধ্যে সর্বশ্রেষ্ঠা, কেশব যার মধ্বাক্যের বশীভূত। এইসব অতুলনীয় গুণরাশিতে রাধা শ্রীকৃষ্ণের সমকক্ষা। ৯।

শ্রীরাধার গুণাবলীকে চারটি ভাগে বিভক্ত করা হয়েছে।
যথা—

দেহ সম্বন্ধীয়—মধুরা, নববয়াঃ, চলাপাঙ্গা, উজ্জলশ্রিতা, চাক্র-
সৌভাগ্যরেখাশ্রিতা, গন্ধোন্মাদিতমাধবা।—এই
ছয়টি শ্রীমতীর আঙ্গিক গুণ।

বাক্য সম্বন্ধীয়—সঙ্গীতকুশলা, রম্যবাক, নরমপটিয়সী।—এই

তিনটি তাঁর বাচনিক গুণ।

মনঃ সম্বন্ধীয়—বিনীতা, করুণাপূর্ণা, বিদম্বা, পটিয়সী, লজ্জাশীলা, মর্যাদাসম্পন্ন, ধৈর্যশালিনী, গান্ধীর্থময়ী, সুবিলাসিনী মহাভাব-পরমোৎকর্ষতর্ষিণী বা কৃষ্ণপ্রেমে অবিচলিততৃষাবতী।—এই দশটি মানসিক গুণ।

পরসম্বন্ধীয়—গোকুলজনের প্রেমপাত্রী, জগদ্ব্যাপী যশের অধিকারিণী, গুরুজনের স্নেহের আধার, সখীগণের প্রণয়-বশীভূতা, কৃষ্ণপ্রিয়াগণের মধ্যে সর্বশ্রেষ্ঠা, ব্রজেন্দ্রনন্দন তাঁর কথার বশীভূত।—এই ছয়টি ব্যবহারিক গুণ।

এই পঞ্চবিংশতি গুণের সমন্বয়ে রাধিকার চরিত্র নায়িকাগণের মধ্যে অসামান্য ও অতুলনীয় হয়ে উঠেছে। ১০।

মাধুর্য বলতে বুঝায় চারুতা বা মনোরমত্ব; মধ্যবয়ঃ অর্থে মধ্য-কৈশোর বা সন্তোষিত্ত যৌবন; সৌভাগ্যরেখা অর্থে হস্তপদাদিস্থিত চন্দ্ররেখা প্রভৃতি শূলকণ। সাধুমার্গ থেকে অবিচলিত থাকার নাম মর্যাদা; আভিজাত্য ও শালীনতাবোধ হেতু সম্ভ্রমকে বলে লজ্জা, হৃৎক্লেশ ও ক্লেশ সহিষ্ণুতার নাম ধৈর্য।

অগ্ৰাগ্র গুণগুলির অর্থ সুস্পষ্ট। তাই পৃথকভাবে সেগুলির লক্ষণ বিশ্লেষণ করা অনাবশ্যক।

মধুরা

শ্রীরাধার মাধুর্যবর্ণনাচ্ছলে বিদম্বমাধবে পৌর্ণমাসী বলেছেন—
কি অপরূপ রূপমাধুরী! নয়নছটির শোভা যেন সন্তঃপ্রফুটিত নীলোৎপলকে নিম্প্রভ করে, বদনকমল প্রফুল্ল কমলবনকে পরাজিত করে ও অঙ্গরূচি স্বর্ণকাস্তিকে ম্লান করে। এমন নয়নাভিরাম রূপরাশি আর কার আছে! ১১।

নববয়ঃ :

নববয়ঃ অর্থে নবীনা বা নবযৌবনসম্পন্ন।

দূতী শ্রীরাধাকে বলছিল—

হে কৃশোদরি ! তোমার শ্রোগীদেশ যেন রথ ; কুচক্ষু চক্র,
ক্রলতা ধনু, নেত্রদ্বয় বাণ । বিজয়গর্বে গবিত শ্রীকৃষ্ণকে জয় করবার
জ্ঞা কামদেব যেন তাঁর রাজ্যভার তোমার হাতে তুলে দিয়ে
তোমায় সেনাপতি পদে নিযুক্ত করেছেন । অস্ত্রক্ষেপণে তুমি
বিলম্ব করো না । ১২ ।

চলাপাঙ্গা

শ্রীমতীকে সম্বোধন করে শ্রীকৃষ্ণ বলেছিলেন—

হে বিধুমুখি ! আকাশের ওই চলচঞ্চল বিদ্যা কি তোমার
নয়নের কাছে গতিবিদ্যা শিক্ষা করেছে ? না, তোমার নয়ন
সে বিদ্যা শিক্ষা করেছে ওই তড়িতের কাছে ! তা নয়, তোমার
অপাঙ্গই এ বিদ্যার প্রধান অধ্যাপক । তাই আমার এই অদম্য
গতিশীল মনও তোমার নয়নের কাছে পরাজিত । ১৩ ।

উজ্জলস্মিতা

কৃষ্ণ-সন্দর্শনে একদিন শ্রীমতীর মুখে হাসি ফুটে উঠেছিল ।
কিন্তু কৃষ্ণের সান্নিধ্যে সখীদের দেখে, তিনি বারবার সে হাসি
সংগোপন করবার চেষ্টা করেছিলেন । তবুও সে হাসি নিবৃত্ত হয়
নি । স্মিতহাস্তে শ্রীরাধার বদনচন্দ্রিমা উদ্ভাসিত হয়ে উঠেছিল ।
সে অবস্থা দেখে বিশাখা বলেছিলেন—প্রিয় সখি, তোমার অধর
হাস্তমুখায় পরিপূর্ণ দেখে, চকোররাজ আর অপেক্ষা করতে
পারছেন না ! ওই দেখ, সখীদের সঙ্গ ত্যাগ করে, মদিরাচঞ্চল মনে
তিনি তোমার দিকে এগিয়ে আসছেন । অতএব এখন আমাদের
এস্থান ত্যাগ করাই ভাল । ১৪ ।

চারু-সৌভাগ্য-রেখাত্যা

শ্রীমতী কুঞ্জমধ্যে আত্মগোপন করলে মধুমঙ্গল বলেছিলেন—

হে মাধব, তুষ্ট হও। শ্রীরাধা কুঞ্জের ভিতরেই আত্মগোপন করেছেন। ওই দেখ, ইতস্ততঃ তাঁর চরণ-চিহ্ন আঁকা। চন্দ্ররেখা, বলয়, পুষ্প, বল্লী ও কুণ্ডল প্রভৃতি যে সব সৌভাগ্যরেখা তাঁর চরণ-তলে আছে, তিনি লুকায়িত হলেও, সেই সৌভাগ্যরেখায়ুক্ত চরণচিহ্ন তাঁর গোপন উপস্থিতি প্রকাশ করে দেয়। ১৫।

যেমন চরণতলে তেমনি তাঁর করপদ্মে সকল প্রকার সৌভাগ্য-রেখা অঙ্কিত আছে। তাই শ্রীরাধা সর্বমূলক্ষণা ও সৌভাগ্যবতী। বাম চরণ-তলে যব, চক্র, ছত্র, বলয়, অর্ধচন্দ্ররেখা, কুশুমবল্লিকা, কমল, কমলতলে পতাকাযুক্ত ধ্বজ, উর্ধ্বরেখা, পুষ্প এবং অঙ্কুশ—এই একাদশটি সৌভাগ্যরেখা আছে। দক্ষিণ চরণে আছে শঙ্খ, বেদী, কুণ্ডল, পর্বত, মংস্ত্র, রথ, শক্তি ও গদা প্রভৃতি অষ্টবিধ মূলক্ষণ চিহ্ন। বামহস্তে সুদীর্ঘ আয়ুরেখা এবং কুঞ্জর, অশ্ব, যূপ, বাণ, তোমর, মালা প্রভৃতি অষ্টাদশ চিহ্ন; আর দক্ষিণ করতলে পঞ্চশঙ্খ, চামর, অঙ্কুশ, মঠ, দুন্দুভি, বজ্র, শকট, ধনু, খড়্গ, ভূঙ্গার প্রভৃতি সপ্তদশ সৌভাগ্য রেখা আছে। শ্রীমতীর উভয় হস্ত ও পদতলে মোট পঞ্চাশটি চারু-সৌভাগ্যরেখা আছে।

গন্ধোন্মাদিত-মাধবা

তুঙ্গবিদ্যা শ্রীমতীকে সম্বোধন করে বলেছিলেন—

হে মাধবি, তুমি লতামণ্ডপে পত্রপল্লবের অন্তরালে আত্মগোপনের প্রয়াস করো না। অগ্নি বৃন্দাবনচক্রবর্তিনি! তুমি যে-ভাবে যেখানেই আত্মগোপন কর, তোমার অঙ্গগন্ধে উন্মাদিত হয়ে ভ্রমরাবিশ ধূর্ত শ্রীকৃষ্ণ নিশ্চয়ই তোমার অনুধাবন করবেন। অনুসন্ধানে ইতস্ততঃ জাম্যমান মাধব তোমার অঙ্গপরিমলে উন্মাদিত হয়ে উঠলে, তাঁর আর স্থান-অস্থান সময় বা অসময় বিবেচনা থাকবে না; নিশ্চয়ই তিনি বলপূর্বক তোমাকে কল্পিত করে মধু পান করবেন। ১৬।

সঙ্গীত প্রসারান্তিভা

বৃন্দার উক্তি—

হে রাধিকা, তোমার কোকিলতুল্য পঞ্চম স্বরের সঙ্গীতলহরী শ্রীকৃষ্ণকে চঞ্চল করে। সেই সঙ্গীত-মাধুর্যে আকৃষ্ট হয়ে হয়তো তিনি তোমার পশ্চাৎ-ধাবন করবেন। সে অবস্থা দেখলে, তোমার কোপনস্বভাব পতি রোষাগ্নিত হয়ে অনুধাবন করবেন। অতএব ঐ সঙ্গীত বন্ধ কর।

রম্যবাক্

শ্রীকৃষ্ণ রাধাকে সম্বোধন করে বলেছিলেন—

হে সুবদনি ! তোমার সুললিত দম্ভরাজিশোভিত মুখে কি অপূর্ণ শব্দমাধুরী ধ্বনিত হয় ! সে মধুর ধ্বনিতে কোকিলকুলই আকুল হয় ; অধিক আর কি বলবো ! সে অমৃতময় বাণীর মাধুর্য সুধার স্বাদকেও পরাজিত করে। ১৭।

নম'পশ্চিভা

অর্থাৎ লীলাকৌতুক ও হাস্যপরিহাসপটয়সী।

কৌতুকচ্ছলে রাধা শ্রীকৃষ্ণকে বলেছিলেন—হে বংশীধারি, ওই বাঁশী তোমার গুরু, না তুমি ওই বাঁশীর গুরু ? কুলকামিনীদের ধৈর্যহরণ করা ভিন্ন কি তোমার আর অন্যকোন কাজ নাই !

অথবা

শ্রীমতী নর্মচ্ছলে শ্রীকৃষ্ণকে বলেছিলেন—

হে পুণ্ড্রবান ধর্মবর্ধন ! তুমি প্রসন্ন হও। তোমার কীর্তিকলাপ অতি পবিত্র ! সাধ্বীগণের স্তনরূপী শিবের অর্চনা করে তুমি নিত্য-পুত। অতএব তোমায় বিনয় করি, এখন আমায় স্পর্শ করো না। আমি সূর্যপূজার জন্ত সত্ত্ব স্নান করেছি। কাজেই তোমার ওই হস্ত এখন আমার অঙ্গে দিও না। ১৮।

এই সকল গুণ ছাড়াও রাধা বহুগুণের অধিকারিণী : বিনীতা করুণাপূর্ণা, বিদম্বা, লজ্জাশীলা ও স্তম্ভাদাসম্পন্ন। তাই নাগিকা হিসাবে শ্রীরাধা অতুলনীয় ও অমূপমা।

পূর্বরাগ অবস্থায় একদিন ক্ষীণকায়া তব্বী শ্রীরাধাকে দেখে নান্দীমুখী নর্মম্ভলে বলেছিলেন—সখি, এত চেষ্টাতেও শ্রীকৃষ্ণের সঙ্গে তোমার মিলন ঘটাতে পারলাম না। সুতরাং সে আশা পরিত্যাগ করে তুমি উপায়ান্তর চিন্তা কর।

একথা শুনে রাধা বলেছিলেন—প্রিয় বাঙ্কবী ! রাধা চাতকিনী, বরং জলপান না করে সে পিপাসায় শুষ্ককণ্ঠ হয়ে প্রাণত্যাগ করবে সেও ভাল, তবুও সে ঘনকৃষ্ণ মেঘের অমৃত বর্ষণধারা ব্যতীত অথকোন জল পান করবে না।

নর্মপ্রসঙ্গে হলেও এ উক্তি রাধার স্তম্ভাদার লক্ষণ।

বিনীতা

গোকুলমধ্যে শ্রীরাধা প্রসিদ্ধা। তবুও তাঁর মত বিনীতা নারী দেখা যায় না। গুরুজনেরা বারম্বার ভ্রভঙ্গি দ্বারা তাঁকে নিষেধ করেন। তবুও তিনি দূর থেকে ভদ্রাকে দেখে, বিনয়ের সঙ্গে আসন পরিত্যাগ করে তাঁকে অভর্থনা করেন।

বিনয়াদি গুণে মধুররস পরিপুষ্ট হয়। —আনন্দ চন্দ্রিকা।

বিদম্বমাধবে বর্ণিত আছে যে,

কলহাস্তুরিতা অবস্থায় শ্রীরাধা সখীকে সম্বোধন করে বললেন, হে কৃশোদরি ! আমি লীলাকলহে মাধবকে প্রত্যাখ্যান করে বারবার অপরাধ করি। তবুও সর্গোরবে আমি আবার অঙ্গীকৃত হই। তার প্রধান ও একমাত্র কারণ এই যে, তোমরা আমার প্রতি করুণা বিস্তার করে আমোদ-প্রমোদে আমাকে উৎসন্ন কর।

শ্রীরাধার এই বিনয় সখীদের চিত্তে আনন্দ সঞ্চার করে। ১২।

করুণাপূর্ণা

বৃন্দা বললেন, পোর্ণমাসি ! শ্রীরাধার মত করুণাময়ী নারী দেখা যায় না। কাস্তুর প্রিয় দুগ্ধবতী খেতুর সত্বোজ্জাত বৎসটির মুখে তৃণাকুর বিদ্ধ দেখে, তাঁর চোখ অশ্রুসজল হয়ে উঠেছিল। তিনি দুঃখে কাতর হয়ে সেই বৎসের ক্ষতস্থানগুলিতে কুঙ্কম লেপন করেছিলেন। ২০।

বিদম্বা

কুন্দলতা গার্গীকে বললেন—দেবি ! শ্রীমতীর বিদম্বাগুলোর কথা কি আর বলবো ! খাতুচিত্রে তিনি সকলের গুরুস্থানীয়া, বিবিধ রন্ধনকার্যে অতিকুশলা, বিরচন-সুচতুরা, চারুচিত্রা, বাক্পটুতায় শ্রেষ্ঠবাগ্মী শ্রীকৃষ্ণকেও মুগ্ধ করেন, মাল্যরচনায় সুনিপুণা, পাঠে শুকশারীর স্থায় পড়িয়সী। দ্যুতক্রীড়ায় অজিতকেও জয় করেন, বিদ্যায় তীক্ষ্ণবুদ্ধির অধিকারিণী, রতিকলাশালিনী ও সুরসিকা। ২১।

পাটবাগ্নিতা বা চাতুর্ঘণাঙ্গিনী

যথা বিদম্বাধবে—

শ্রীকৃষ্ণ মধুমঙ্গলকে বলেছিলেন—রাধা পাটবাগ্নিতা বা বিশেষ চতুরা। একদিন গুরুজনদের সম্মুখে যখন তিনি বসে ছিলেন, আমায় দেখেও আমার প্রতি দৃষ্টি নিক্ষেপ করবার কোন সুযোগ তাঁর ছিল না। হঠাৎ তিনি চাতুর্ঘের সঙ্গে কণ্ঠের মণিহার ছিন্ন করে ফেলেছিলেন এবং ভূপতিত মুক্তাগুলি কুড়িয়ে নেবার ছলে, মুখখানি ফিরিয়ে প্রণয়ভরে মুগ্ধদৃষ্টিতে আমার দিকে চেয়েছিলেন। ২২।

লজ্জানীলমণি

শ্রীমতী লজ্জাকে সম্বোধন করে বলেছিলেন—

ব্রজরাজনতনয় নির্জনে এসেছেন। তাঁর দর্শন অতি দুর্লভ। তাঁকে দেখবার আকাঙ্ক্ষায় আমার চিত্ত উদ্বেলিত হয়ে উঠেছে।

তে লজ্জা, তুমি ক্ষণকালের জগ্ন নিবৃত্ত হও, আমি একবার আবার
উন্মোচন করে অপাক্ষ নিক্ষেপ করি। ২৩।

সুমর্যাদা

সুমর্যাদা তিন প্রকার। যেমন—স্বাভাবিক, শিষ্টাচারগত এবং
স্বকল্পিত। ২৪।

স্বাভাবিক সুমর্যাদা

তৃষ্ণায় প্রাণ গেলেও, যেমন চাতকী মেঘবারি ভিন্ন অন্তবারি
পান করতে পারে না, তেমনি শ্রীকৃষ্ণ বিহনে প্রাণ গেলেও শ্রীরাধার
পক্ষে অন্তনাগর কল্পনা করা সম্ভব নয়। উত্তমা নায়িকার এই
মর্যাদাবোধ স্বাভাবিক। ২৫।

শিষ্টাচারগত সুমর্যাদা

বুন্দা শ্রীরাধাকে অভিসারের জগ্ন অনুরোধ করলে, শ্রীরাধা
বলেছিলেন, সখি! ব্রজেশ্বরী আমায় আহ্বান করেছেন। গুরুজনের
আজ্ঞা অবহেলা করে, অভিসারে যাওয়া আমার উচিত নয়।
তাতে মঙ্গল হবে না।

স্বকল্পিত সুমর্যাদা

‘আজ শ্রাবণী পূর্ণিমা। এই পূর্ণা তিথিতে যুকুন্দ নিখিলমাধুর্যের
উৎসেক বিস্তার করে, শ্রীরাধাকেই কামনা করছেন। আজ সকল
কামনা সিদ্ধ হবে। অতএব সখি, তুমি অভিসারে যাও।’

শ্রীকৃষ্ণের প্রেরিত কোন দূতী রাধাকে এই কথা জানালে, রাধা
নিজে না গিয়ে কুমারী চিত্রাকে প্রেরণ করেছিলেন। দূতী ফিরে
এসে শ্রীরাধার সেই সুচিন্তিত মর্যাদাবোধের কথা শ্রীকৃষ্ণকে
জানিয়েছিল। শ্রীকৃষ্ণ মুগ্ধ হয়েছিলেন। ২৬।

ধৈর্যশালিনী

পদ্মার ছলবাক্যে ক্লষ্ট হয়ে, বিরুদ্ধমনোভাবাপন্ন গৃহস্থানী তর্জন
গর্জন করেছিলেন; ননদিনী কুটীলা তার শিক্ষিত বানরের দ্বারা

শ্রীমতীর কৃষ্ণ-প্রদত্ত হার অপহরণ করিয়েছিল, শৈব্যা তার ছাগী দ্বারা শ্রীকৃষ্ণের প্রিয় মল্লীলতার (বেলফুলের) পল্লবগুলি খাইয়েছিল। রাধা সে সব দেখেও, ধৈর্যের সঙ্গে তুষ্টোভাব অবলম্বন করেছিলেন ; বিচলিতা হন নি।

গান্ধীর্ষশালিনী

রূপমঞ্জরী তাঁর সখীকে বললেন—সখি ! দেখ, শ্রীরাধার কি আশ্চর্য গান্ধীর্ষ ! কলহাস্তুরিতা অবস্থায় যখন তাঁর মন শাস্ত, তখনো বাইরের রূপ দেখে মনে হয় যে, তিনি যেন ‘মান’ করেই আছেন। গান্ধীর্ষের জগৎ শ্রীমতীর অন্তরের প্রকৃত অবস্থা তাঁর মুখ দেখে অনুমান করা যায় না। ২৮।

অবিলাসা

শ্রীরাধার কোন সখী বলেছিলেন—দেখ, শ্রীমতীর চঞ্চল দৃষ্টি কেমন তির্যকভাবে নিক্ষিপ্ত হয়েছে ! ক্রলতা উল্লাসভরে নৃত্য করে, কুন্দপুষ্পের মত শুভ্র হাসিতে মুখচন্দ্রিমা অতিশয় উজ্জল, গণ্ডযুগে কুণ্ডল দোলে ! বিধুবদনে এমন সুমধুর বাক্য যে, কন্দর্প সম্বন্ধীয় যাবতীয় সিদ্ধমন্ত্র যেন আভাসে প্রকাশ পায়। বন্ধঃস্থলে মনোরম রত্নহার ! শ্রীমতীর এই অসামান্য রূপ ও বিলাসতরঙ্গে শ্রীকৃষ্ণের হৃদয় নিঃশেষে অপহৃত হয়। ২৯।

মহাতাবপরমোৎকর্ষভার্ষণী

শ্রীরাধার কলহাস্তুরিতা অবস্থা উপস্থিত দেখে, কোন সখী শ্রীকৃষ্ণকে বলেছিলেন—

হে মাধব ! তোমার অদর্শনে শ্রীমতীর নয়নে নেমেছে অবিরল অশ্রুনির্ঝর। সে অশ্রুপ্রবাহে যমুনার স্রোত দ্বিগুণ হয়েছে। দেহ যেন চন্দ্রকাস্তমণির মত স্বেদসিক্ত হয়ে, পাণ্ডুবর্ণ ধারণ করেছে। অফুটস্থরে বারবার কৃষ্ণনাম উচ্চারণ করে, তাঁর কণ্ঠস্থর অবরুদ্ধ

হয়েছে। পুলকশিহরণে কদম্বপুষ্পের মত বরতনু রোমাক্তি
হয়েছে। কখনো বা কৃষ্ণপ্রেম-বক্ষায় প্রকম্পিত কদলীবৃক্ষের মত
ধরাশায়িনী হয়ে পড়েছেন। ৩০।

গোকুল-প্রেমবসতি

একদিন প্রাতঃকালে শ্রীরাধাকে দেখে ব্রজেশ্বরী বললেন—

সখি, বিধাতা কি প্রেমের যাবতীয় উপকরণ একত্র করে বুধভানু
নন্দিনীর অঙ্গসমূহ গঠন করেছেন? কেন না, তাকে দেখলে
আমাদের সকলের এবং অত্যাশ্রিত বন্দাবনবাসীর মন নিবিড় স্নেহরসে
আপ্লুত হয়। ৩১।

জগৎশ্রেণীলসদনশাঃ

পৌর্ণমাসী বললেন—

শ্রীমতীর যশোরাশি সারা জগৎ পরিব্যাপ্ত। সে যশঃকৌমুদী
যেন ত্রিভুবনের কুবলয়সমূহকে উৎফুল্ল করে, ইন্দ্রপত্নী শচীর কর্ণে
শোভিত এই শুভ্র কন্দপুষ্পেরও বিভ্রম জন্মায়, ব্রহ্মপত্নী সাধিত্রীকে
হর্ষরোমাক্তি করে। হে ভদ্রাঙ্গি! তোমার এই যশঃচন্দ্রিমা দ্বারা
কর্ণভূষণের চন্দ্রকাস্তমণি দ্রবীভূত হয় দেখে, বৈকুণ্ঠবাসিনী লক্ষ্মীও
যেন চকিতা হয়ে ওঠেন। ৩২।

গুরুপিত গুরুস্নেহা

শ্রীরাধা গুরুজনের অতিশয় স্নেহের পাত্রী। যশোদার সম্মুখে
একদিন যখন শ্রীমতী লজ্জাবনতমুখী হয়ে দাঁড়িয়েছিলেন, তিনি
স্নেহে বলেছিলেন—তুমি তো কীর্তিদার কন্যা নও, আমারই কন্যা।
শ্রীকৃষ্ণের মুখবমল দর্শন করে আমার নয়ন যেমন তৃপ্ত হয়, তোমার
মুখচন্দ্রিমা দেখেও যেন তেমনি পরিতৃপ্ত হচ্ছে। ৩৩।

সঙ্গীপ্রণয়াধীনা

শ্রীমতী বলেছিলেন, হে সখিবৃন্দ! তোমরা গিয়ে ব্রজরাজতনয়কে
বল যে—আমি সকল সখীদের অধীনা, আমায় যেন তিনি বৃথা

বেদনা না দেন। মানিনীদের মন্দির থেকে তাঁকে সরে যেতে বল। নইলে, আশঙ্কা আছে। তিনি কি ললিতার পরাক্রম জানেন না! সে দেখলেই যে-কোন ছলে তাঁকে আক্রমণ করবে। ৩৪।

কৃষ্ণপ্রিয়াবলীমুখ্য

কৃষ্ণপ্রিয়াগণের মধ্যে শ্রীমতী অতিশয় প্রধান। তাই মাধব বলেছিলেন—হে খঞ্জন-নয়না, নিরন্তর ঘূর্ণায়মান নয়ন ও নানা অপাঙ্গভঙ্গিযুক্তা লালাময়ী সুন্দর-ব্র-বিশিষ্টা নারী অনেকেই আছেন, কিন্তু খরতর রবিকরতাপিত জ্যৈষ্ঠ মাসের আকাশ যেমন তারা পরিবৃত্ত হলেও চন্দ্রকিরণ ভিন্ন মনকে স্নিগ্ধ করতে পারে না, তেমনি তোমা ব্যতিরেকে ওই অসংখ্য সুন্দরীগণ কণকালের নিমিত্তও আমার মনকে প্রসন্ন করতে পারে না। ৩৫।

সন্ততাশ্রবকেশব

অর্থাৎ কেশব সর্বদা যার আজ্ঞাধীন।

শ্রীমতী বলেছিলেন—হে মাধব! তোমার ওই নবপল্লবরচিত চড়া তেমন সুদৃশ্য হয় নি। ভ্রমরের অভূক্ত কুসুমদাম ও ময়ূর-পুচ্ছ সংগ্রহ করে নিয়ে এসো, আমি স্বহস্তে তোমার মোহন-বেশ রচনা করে দিই। শ্রীরাধার কথামত মাধব তন্মহুর্তেই সেইসব জিনিস আহরণ করে এনে, বলেছিলেন—বলো প্রিয়তমে, বশস্বদজনের প্রীতি আর কি আজ্ঞা?

শ্রীরাধার সর্বোত্তম যুথমধ্যে আর যে-সব সদগুণমণ্ডিতা সুন্দরী আছেন, তাঁরাও ছলকলায় সর্বতোভাবে মাধবকে আকর্ষণ করেন। এই সকল সখী পাঁচ প্রকার হয়, যথা—সখী, নিত্যসখী, প্রাণসখী, প্রিয়সখী ও পরমপ্রেষ্ঠসখী। তন্মধ্যে কুসুমিকা, বিক্যা ও ধনিষ্ঠা প্রভৃতি সখীরূপে পরিগণিত। ৩৬।

কতুরিকা ও মণিমঞ্জরিকা প্রভৃতি কয়েকটি গোপীকে নিত্যসখী বলা হয়। শশিমুখী, বাসন্তী, লাসিকা প্রভৃতি প্রাণসখী। ঐরা

প্রায়ই শ্রীরাধাস্বরূপিনী। কুরঙ্গাকী, সুমধ্যা, মদনালসা, কমলা, মাধুরী, মঞ্জুকেশী, কন্দর্পসুন্দরী, মাধবী, মালতী, কামলতা ও শশিকলা প্রভৃতি প্রিয়সখীমধ্যে গণ্য। আর পরমপ্রেষ্ঠসখীগণের মধ্যে ললিতা, বিশাখা, চিত্রা, চম্পকলতা, তুঙ্গবিজ্ঞা, ইন্দুলেখা, রঙ্গদেবী ও সুদেবী—এই আটজন সর্বগুণভূষিতা।

এই ললিতাদি অষ্টসখী রাধাকৃষ্ণ-প্রেমের পরাকাষ্ঠা বশতঃ কখনো কখনো শ্রীকৃষ্ণের প্রতি অতিশয় শ্রীতিমতী হন, কখনো বা শ্রীরাধার প্রতি অতিশয় শ্রীতি প্রকাশ করে থাকেন। খণ্ডিত অবস্থায় শ্রীরাধা যখন ব্যথিত অন্তরে থাকেন, তখন তাঁরা শ্রীমতীরা প্রতি সমবেদনা জ্ঞাপন করে, মাধবের সম্পর্কে দোষারোপ করেন। আবার মান অবস্থায়, শ্রীরাধা যখন কৃষ্ণকে অনাদর করেন, তখন তাঁরা কৃষ্ণের প্রতি অনুরাগ প্রকাশ করে, শ্রীমতীকে দোষারোপ করেন। ৩৭।

নারীকা ভেদ

উল্লিখিত যুগ্মমধ্যে যেমন সখী, নিত্যসখী ও প্রিয়সখী প্রভৃতি নানাবিধ ‘সখীগণ’ আছেন, তেমনি তাঁদের বিভিন্ন দলের মধ্যে আবার প্রকৃতি এবং বিবিধ গুণের পর্যায়-ইত্যাদিক্রমে নানা গণভেদ (group) আছে । ১ ।

নাট্য ও শৃঙ্গার রসে পরোঢ়া নায়িকা নিষিদ্ধা । কিন্তু এই নিষেধ শুধু প্রাকৃত বা বাস্তব জীবনের ক্ষেত্রে প্রযোজ্য । গোপীগণের যে প্রেম লোকাচারের অতীত, সে ক্ষেত্রে এই পরকীয়া প্রেম নিন্দনীয় নয় । সেখানে প্রেমের পরকাষ্ঠাই একমাত্র লক্ষণীয় বস্তু । ২ ।

মুখ্যরসে কবিগণ পরকীয়া রমণী অবাস্তিত মনে করেছেন । কিন্তু ব্রজদেবীগণের বিষয়ে তার অন্যথা হয়েছে, কারণ এই বিশেষ রসের আশ্বাদনের জন্য ভগবান শ্রীকৃষ্ণ নিজে ওই সকল পদ্যলোচনা নারীর অবির্ভাব করিয়েছিলেন । ৩ ।

শ্রীকৃষ্ণের প্রতি ব্রজদেবীগণের যে অনির্বচনীয় ভাবনিষ্ঠা, সেই ভাবের পরাকাষ্ঠারহস্ত ভক্তজনেরাও সম্যক্ ভাবে হৃদয়ঙ্গম করতে পারেন নি । এই দুর্গম ভাবরহস্ত একমাত্র বৈকুণ্ঠনাথ ব্যতীত অন্তের অধিগম্য নয় । ৪ ।

গোকুলের যে-সব নারী নন্দনন্দনের প্রতি আকৃষ্ট হয়েছিলেন, তাঁদের মধ্যে শ্রীরাধার প্রেমই সর্বাধিক । একদিন পরিহাসসুজ্জলে শ্রীকৃষ্ণ চতুর্ভুজ মূর্তি ধারণ করেছিলেন । কিন্তু শ্রীরাধার প্রেম আপন শক্তিতে তাঁকে দ্বিভুজ করেছিল । প্রণয়-সহচর স্বাভাবিক মানব মূর্তিতে তিনি ধরা না দিয়ে পারেন নি । ৫ ।

গোপেন্দ্রনন্দনের নারায়ণমূর্তি দেখে গোপবালাগণ প্রার্থনা করেছিলেন—‘ভগবান্, যাতে আমরা গোপিকারমণের দর্শন পাই সেই অনুগ্রহ কর ।’ তাঁদের কামনা সকল হয় নি । কিন্তু আশ্চর্য !

গোপবালাগণ দূরে সরে গেলে, যখনই ত্রীরাধা এসে উপস্থিত হলেন, তাঁর প্রেমের সুগভীর আকর্ষণে ত্রীকৃষ্ণ আর পারলেন না চতুর্ভূজ মূর্তি ধারণ করে থাকতে। তাঁকে দ্বিভূজ মূর্তি ধারণ করতে হলো। ৬।

নায়িকার প্রকারভেদ

কবিগণের মতে নায়িকা তিন প্রকার—স্বকীয়া, পরকীয়া, ও সাধারণী বা সামান্যা।

সামান্যা নায়িকা ও রসভাস

সামান্যা নায়িকার স্বভাব বহুনায়কনিষ্ঠ হয়, সেইজন্য রসভাসের প্রসঙ্গ আসে। রসভাস বলতে বুঝায় নীচ বা নিম্নস্তরের রস অর্থাৎ যে রস শিষ্টজনের অযোগ্য। কিন্তু সৈরিন্দ্রী বা কুজা সাধারণী নায়িকা হলেও, অন্য নায়কের প্রতি তার প্রীতির সঞ্চার হয় নি। ত্রীকৃষ্ণের সঙ্গে চন্দন লেপন করতে গিয়ে, কুজার অন্তরে প্রীতি সঞ্চারিত হয়। সেইজন্য কৃষ্ণের উত্তরীয় বসন আকর্ষণ করে সে রতি প্রার্থনা করে। তাই সামান্যা বা সাধারণী হলেও কুজা পরকীয়া নায়িকা রূপে পরিগণিত। ৭।

সামান্যা নায়িকাকে বেখ্যা বলা চলে। নিগূণ নায়কের প্রতি যেমন তার কোন অনাদর নাই, গুণবান্ নায়কের প্রতিও তেমনি কোন অহুরাগ নাই। সামান্যা নায়িকা শুধুমাত্র বিনিময়ের প্রত্যাশা করে—জবা বা অর্থ। তাই, এরূপ ক্ষেত্রে শুধু শৃঙ্গারভাস মাত্র হয়, প্রকৃত শৃঙ্গাররসের পুষ্টি হয় না।

পূর্বে যে স্বকীয়া এবং পরকীয়া—এই দুই প্রকার নায়িকার কথা উল্লিখিত হয়েছে, তাদের প্রত্যেককে আবার তিনটি শ্রেণীতে বিভক্ত করা যায়; যেমন—মুগ্ধা, মধ্যা ও প্রগল্ভা। ৮।

কোন-কোন বিবন্ধজনের মতে, স্বকীয়া নায়িকাদের তিনটি প্রকার ভেদ হয়। কিন্তু পরকীয়া নায়িকাদের এই তিনটি শ্রেণী বিভাগ সর্বজন স্বীকৃত নয়। ৯।

কোন-কোন কবি অবশ্য ওই দ্বিবিধ নায়িকারই তিনটি করে প্রকারভেদ স্বীকার করেছেন। ১০।

মুগ্ধা

নবীন বয়স, অল্পমাত্র কাম, রতিবিষয়ে অনাগ্রহশীলা, সখীদের অনুগতা, রতিচেষ্টায় অতিশয় লজ্জা বোধ করে—অথচ গোপনে প্রেমাঙ্গদের প্রতি অত্যন্ত যত্নশীলা, প্রিয়তম অপরাধী হলে, তাঁর প্রতি সজল নয়নে চেয়ে থাকে, প্রিয় বা অপ্রিয় বচন বলতে পারে না, মান বিষয়ে সর্বদাই বিমুখী, কথায়-কথায় রাগ বা অভিমান করে না। এই প্রকার নায়িকাকে মুগ্ধা নায়িকা বলে।

নববয়সঃ

দূর থেকে অভিসারিকা বিশাখাকে দেখে শ্রীকৃষ্ণ বলেছিলেন—
বিশাখার মধুর যৌবন-বসন্তের আবির্ভাব হলো; তার শৈশব শিশিরের অবমান হয়েছে। তাই লোচনপদ্মে বিকশিত হয়েছে অপরূপ মৌন্দর্য! অধরচন্দ্রিমায় লাবণ্যরাশি বিস্মুরিত। ১১।

একদিন পরিহাসচ্ছলে শ্যামলা বলেছিল—

শ্রীরাধার তনুদ্বীপ হতে বাল্যরূপী অন্ধকার অপসৃত হয়ে, এখন তারুণ্যতপনের বিজয় আরম্ভ হওয়ার সময় হলো। ওই দেখ, কুম্ভবর্ণ গগনমণ্ডলে ভাস্করের প্রকাশ! নয়নতারা চঞ্চল হলো, বক্ষে উদয়গিরির শোভা বর্ধিত হয়েছে, বদনকমলে প্রফুল্লতা সূচিত হয়েছে, মুখান্বজে স্নিতহাসি ফুটে উঠেছে। কাজেই, হে বাল্য! এ-অঙ্গে এখন আর তোমার স্থান নাই। ১২।

নবকামা

নান্দীমুখী ধন্যাকে বলেছিলেন—অগ্নি বালা। প্রোঢ়া আভীর-বধুগণ ছল করে কৃষ্ণের সঙ্গে তোমার কন্দর্প-উৎসব-রসের কথা প্রস্তাব করলে, তুমি মধুর লজ্জায় অবনতমুখী হয়ে, হুই কানে হাত

চাপা দাও ; ছল করে, উল্লাসভরে বনমালা গাঁথতে মনোযোগিনী হও। প্রিয়তমে ! বলো দেখি, তোমার হৃদয়মধ্যে এ কি নবতম রক্ত আবির্ভূত হলো ? । ১৩।

রতিবামা বা রতিবিসময়ে পরাধ্বনী

দানঘাটে শ্রীকৃষ্ণ যখন পথ অবরোধ করে ধন্তার গতিরোধ করেছিলেন তখন ধন্তা বলেছিল—

হে শিখিপিজ্জুচূড় ! পথ ছাড়ে, আমি নববালিকা, আমার সঙ্গে এ ধরণের কৌতুক করো না। ওই দেখ, তোমার আচরণ দেখে, যমুনাতীরে বিচরণশীলা স্ননয়না সুন্দরীরা সকলে আঁখি নত করেছেন। ১৪।

শ্রীকৃষ্ণ সুবলকে বলেছিলেন—সখা ! একদিন যমুনাপুলিনে আমায় দেখে শ্রীরাধা পলায়ন-উত্ততা হয়েছিলেন। আমি গিয়ে তাঁর হাত ধরলে, ঈষৎ হাস্যসহকারে তিনি অতিশয় চঞ্চলনেত্রা হয়ে পদগদগদকণ্ঠে বলেছিলেন—‘গোকুলনাথ, আমার হাত ছাড়ে।’ আমি খঞ্জনলোচনার সেই মধুর রতিবামা মূর্তি সর্বদাই স্মরণ করি।

সঙ্গীবশ্য।

অভিসারিকা শ্রীরাধাকে বাহুপাশে আবদ্ধ করবার জ্ঞাত উৎসুক হয়ে, শ্রীকৃষ্ণ যখন হস্ত প্রসারিত করেছিলেন, তাঁর কঠিন করদ্বয় দেখে ললিতা বলেছিলেন—কোন কুশল ব্যক্তি হস্তীর করাল কবলে কোমল পদমুণ্ডাল সমর্পণ করে ? হে ব্রজরাজ, তোমার কর্কশ হস্তে স্নকুমারী রাধাকে আমি অর্পণ করবো না।

ধন্তার উক্তি—

সখি ! এই যে কৃষ্ণের দেওয়া কুন্দমালা দেখছো, এ-মালা আমি স্বীকার করে নিই নি। তুমি রোষভরে আমার প্রতি অমন বিকট ভ্রুকূটি করো না। বিপক্ষ-পক্ষপাতিনী চটুলা বৃন্দা আমার বসন-পেটিকায় এ মালা ছুঁড়ে দিয়েছে। আমি কি করবো, বলো ? এতে আমার কোন অপরাধ নাই।

সত্রীড়রতি-প্রশস্তা

কুঞ্জকি নিকটে আসি পদ দুইচারি নাগর মিলন আসে,
কল্লিত অঙ্গ রঙ্গ করি কিয়ল ধৈর্য লাগবিলাসে ।
সখিগণ সাধি সেজগর নেওল নাগর আসি করু কোর ।
রাধা মাধব কুঞ্জভবন মাঝে হুঁহ রহ আনন্দভোর ॥

রতিবিষয়ে আগ্রহশীলা, কিন্তু লজ্জা এসে বাধা দেয় । এই
ব্রীড়ারতপ্রযত্না মধুরা নায়িকার প্রণয়ে মুগ্ধ হয়ে শ্রীকৃষ্ণ সুবলকে
বলেছিলেন—সখে, সেই হরিণাক্ষী শ্যামলার লজ্জাকড়িত রতিপ্রয়াস
আমার চিত্ত হরণ করেছে । ১৫ ।

রোষ-রূতবাস্পমোনা

হে কদম্ববনভূজঙ্গ ! তুমি অদক্ষিণ । তোমার অপরাধ সপ্রমাণ
হয়েছে, তাই প্রিয়সখী রোষবশে বাস্পমোনা হয়ে আছেন । তিনি
তোমার সঙ্গে আর কথা বলবেন না । বসনে মুখ ঢেকে তিনি
কাঁদছেন ; তাঁকে কাঁদতে দাও । আর বিড়ম্বিত করো না ।

মাধব মানস চঞ্চল তোমার । তোমার নাহি বাণী কবহ সখী মোর ॥
না কর বিড়ম্বন ছাড় অভিলাষে । রোদন কর ধনী মুখকাঁপি বাসে ॥

মানের বিমুখী

মানেন্তে বিমুখ হয় দুইত প্রকার ।
কেহ নাহি সহ মান, কেহ যুগ্ম আর ॥

মুদ্রী

মুদ্রী বা মুদ্রাস্বভাবা নায়িকা প্রিয়তমের প্রতি অভিমানিনী হলেও
নিষ্ঠুর হতে পারেন না । কঠিন বাক্য উচ্চারণ করতে গিয়ে তাঁর
জিহ্বা মিষ্টবাক্যই বলে ; ক্রকুটি করতে গিয়ে, নয়ন মুগ্ধ-দৃষ্টিতেই
চেনে থাকে । দূরে সরে যেতে গেলে, চরণ ওঠে না । ১৬ ।

অক্ষমা

কোন এক কৃষ্ণবল্লভা আক্ষেপ করে বললেন—

উঃ! পদ্যলোচনা আভীরললনাগণ কি সাহসিকা! কেশবের প্রতি তারা ক্ষণকালের জ্ঞাতও মান করতে পারে? কি আশ্চর্য! ‘মান’ এই অক্ষর দুটি যদি একবার আমার কর্ণে প্রবেশ করে, আমার অন্তরাত্মা কেঁপে ওঠে। মান করতে আমি অক্ষমা।

মধ্যা

যে নায়িকার লজ্জা ও রতিলিপ্সা দুই সমান, অথচ তারুণ্য-শালিনী ও কিঞ্চিং প্রগল্ভবচনা; যতক্ষণ মুচ্ছিতা না হয়, ততক্ষণ পর্যন্ত শ্রুত-সংশ্রুত সঙ্কমা এবং মানবিষয়ে কখনো খুব মূঢ়, কখনো বা কঠিন, তাকেই মধ্যা বলে।

সমানলজ্জামদনা

শ্রীকৃষ্ণ যখন সতৃষ্ণ নেত্রপদ্ম নিক্ষেপ করেন, রাধা ঈষৎ হাস্ত সংবরণ করে বদন অবনত করেন; আবার শ্রীকৃষ্ণ অগ্রদিকে দৃষ্টি-নিক্ষেপ করলে, শ্রীরাধা প্রীতনয়নে কৃষ্ণের দিকে চেয়ে থাকেন। এইভাবে সরসিজনয়না শ্রীমতী তাঁর নায়কের আনন্দ বর্ধন করেন। এখানে নায়িকার এই আচরণে মান, লজ্জা ও মদন-লিম্পার সমন্বয় ঘটে।

প্রদ্যোত্তারুণ্যশালিনী

শ্রীমতীর প্রতি কৃষ্ণের উক্তি—

তোমার ভ্রভঙ্গি মীনধ্বজ কামদেবের ধনুকেও পরাজিত করে, তোমার উরুযুগলের সৌন্দর্য কদলীবৃক্ষের শোভাকেও মলিন করে, তোমার কুচযুগ যেন রূপের চকা-চকী! হে তরুণি-মণি-চূড়ামণি, বর-উরু-বিশিষ্টা বরাজনা! সকল সুন্দরীর শিরোমণি তুমি। ১৭।

কিন্তু প্রগল্ভবচনা বা প্রত্যুৎপন্নমতি

গৃহসমীপবর্তী উত্থানে শ্রীকৃষ্ণকে দেখে, গুরুজনসন্নিহিতা শ্রীমতীর সংকেতান্তি—

ও হে কৃষ্ণভ্রমর ! মুখপদ্মের মধুপানে তৃষার্ত হয়ে কেন পতি-
সেবার বিদ্র ঘটাচ্ছে ? যদি তৃষায় অধীর হয়ে থাকো, পাণ্ডুবর্ণ
পুন্নাগকুঞ্জে গিয়ে অসংখ্য পুষ্পের মধুপান করো । ১৮ ।

মোহান্ত-সুরতক্ষমা

শ্রমজল নিবিড় পুবল সব অঙ্গ । তৈখন বিরমল নহন তরঙ্গ ॥
বিগলিত চিকুর, বাত নহে বশ । রতি শয়নে ধনি হোয়ল অলস ॥
রতিশ্রমে রাধার অঙ্গপ্রত্যঙ্গ শ্বেদসিক্ত, নয়নদ্বয় নিমীলিত,
কেশপাশ আলুলায়িত ও বাহুলতা বিবশ হয়েছিল । তবুও তাঁর মনে
আনন্দের পূর্ণতা সঞ্চারিত হয় নি । সেই মোহান্ত-সুরতক্ষমা
নায়িকা শ্রীরাধার রতিশয়নের কথা শ্রীকৃষ্ণ বিস্মৃত হতে পারেন
না । সেই রতিক্রিষ্টা অথচ সঙ্গলিপ্সাতুরা রাধার মূর্তি সর্বদাই তাঁর
মনে পড়ে । ১৯ ।

মানেন কোমল্য

তোরে লুকাইতে কিছু নাহি মোর তুমি সে আমার প্রাণ ।
নাগরের সনে অনেক বতনে রাখিতে নারিব মান ॥
এস এস যাঞ কালিন্দীর কূলে কুঞ্জগহন মাঝে ।
কুসুম আনিতে ছলেতে যাইঞা ভেটিগা নাগর বাজে ॥
মানবশে নায়িকা শ্রীকৃষ্ণের প্রতি বিমুগ্ধ হয়ে থাকতে পারলেন
না । তাই দয়িত-সন্দর্শনের আকাঙ্ক্ষায় অধীর হয়ে, পুষ্পচয়নের
ছলে যমুনাতীরে যাবার জন্ত অধীর হয়ে উঠলেন ।

মানেন কর্কশ

হে কঠিনে !

মিচাই মান করি অঙ্গ মলিন ভেল কাহে কোপহ মঝু বচনে ।
নাগর কান্তর পতিত অব অকূলে কিয়ি চাহ চকল নয়নে ॥

মানময়ী নায়িকা তিন প্রকার। যথা—ধীরা, অধীরা এবং ধীরাধীরা। তাদের আবার মধ্যার্গোণাদি প্রকারভেদ আছে।

যে অভিমানিনী নায়িকা অপরাধী প্রিয়কে উপহাসের সঙ্গে বক্রোক্তি করে, তাকে ধীরা বলা হয়! ২০।

ধীর-মধ্যা

যথা—শ্রীকৃষ্ণের প্রতি খণ্ডিতা রাধা :

লাগল অঙ্গন ধাবক রঙ্গ। অব তুঁই নীললোহিত ভেল অঙ্গ ॥

সমুচিত চন্দক ধাবনি দেহে। ইহ এক অসুচিত লাগল মোহে ॥

চন্দ্রাবালীর কুঞ্জে নিশিযাপন করে, প্রভাতে যখন শ্রীকৃষ্ণ রাধার সম্মুখে এসে দাঁড়ালেন, শ্রীমতী সবিস্ময়ে দেখলেন যে—তঁার অঙ্গে কজ্জলচিহ্ন, তান্বুলরাগ, দ্রবীভূত অলক্তরেখা ও নখক্ষত অঙ্কিত। অভিমানিনী রাধা রুঢ় আচরণ করলেন না, শুধু পরিহাসের সঙ্গে বক্রোক্তি করে বললেন—আহা! এ যে দেখছি নীললোহিত রুজ্জ-মূর্তি! স্বামিন! উৎকৃষ্ট বেশ হয়েছে। কিন্তু হে পশুপতি, দেহার্থে তোমার দয়িতা রুজ্জাণীকে বহন করে আনলে না কেন?

‘নয়ানের কাজর বয়ানে লেগেছে, কালর উপরে কাল।

প্রভাতে উঠিয়া ওমুখ দেখিহু দিন যাবে আজ ভাল ॥’

‘অধরের তান্বুল অধরে লেগেছে ঘুমে চুলুচুলু আঁখি!

আমা পানে চাপ, ফিহিয়া দাঁড়াও, নয়ন ভরিয়া দেখি ॥’

‘সিন্দুরের দাগ আছে সর্বগায়, মোরা হলে মরি লাজে।’

—চণ্ডীদাস

অধীরমধ্যা

যে নায়িকা রোষপরবশ হয়ে নিষ্ঠুরবাক্য-প্রয়োগে দয়িতকে প্রত্যাখ্যান করে, তাকে অধীরা বা অধীরমধ্যা নায়িকা বলে। ২১।

যথা—‘ওহে কংসারি! তুমি আর মিথ্যা কথার ঝংকার তুলে ঘণ্টাধ্বনি করো না। ধৃত আভীরবধূরা তোমায় বুদ্ধিভ্রষ্ট করেছে।

াদের উচ্চকুচযুগের সহচর মণিহার তোমার গলায় দোহুল্যমান। রজনী-বিলাসের আর কি প্রমাণ প্রয়োজন! যাও, এস্থান তোমার উপযুক্ত নয়।’

ধীরাধীরমধ্যা

যে অভিমামিনী নায়িকা অশ্রুবিমোচন করে প্রিয়তমের প্রতি বক্রোক্তি করে, তাকে ধীরাধীরমধ্যা বলা হয়। ২২।

শ্রীরাধার উক্তি—

ওহে গোপেন্দ্রনন্দন! যাও যাও, এখানে থেকে আর আমায় কাদিও না। তুমি যদি এখানে অধিকক্ষণ থাকো, তাহলে তোমার হৃদয়াদিষ্ঠাত্রী দেবী রুগ্ন হবেন। তোমার শিরোভূষণ মাল্যের দ্বারা তাঁর চরণপদ্মের অলঙ্কর-রাগ অপহৃত হয়েছে, সেই মাল্যদ্বারা আজ তাঁর চরণপদ্ম আবার বিভূষিত করো।

মধ্যা নায়িকা সকল রসেরই উৎকর্ষ-ক্ষেত্র ও উপযুক্ত। কেন না, মধ্যা নায়িকার চরিত্রে মুগ্ধা এবং প্রগল্ভা—এই দুইটিরই সংমিশ্রণ আছে। ২৩।

মধ্যাহ্ন ও ধীরাধীরাহ্ন—এই দুই-ই শ্রীরাধার স্বাভাবিক ধর্ম। কেউ কেউ বলেন—তিনটিই শ্রীরাধার স্বাভাবিক ধর্ম। মানের তারতম্য বশতঃ এক-এক সময় এক-একটি ভাব প্রকাশ পায়। যথা—

যাহি মাধব, যাহি কেশব, মা বদ কৈতববাদন।

—গীতগোবিন্দ।

এখানে শ্রীমতীর অধীরা ভাব অধিক প্রকাশিত হয়েছে।

প্রগল্ভা

পূর্ণযৌবনা, মদাস্কা, বিপরীত রতি-সম্মোহে উৎসুক, বিবিধ ভাবোদগমে অভিজ্ঞা, প্রেমান্বক রসের দ্বারা বল্লভকে আক্রমণ করে, প্রোচা নায়িকার মত পটিয়সী, বচনকুশলা, প্রেমকৌশলে অতিশয় যত্নবতী, কিন্তু মানবিষয়ে অত্যন্ত কঠিনা—এই শ্রেণীর নায়িকাকে প্রগল্ভা বলে। ২৪। তদ্ব্যতী—

(ক) পূর্ণতারুণ্য

স্তনযুগ জিতল করিবর কুস্তা । গুরুতর উরুযুগ জিতল রস্তা ॥
কটিতট জিতল ননীতট শোভা । লোচন করই সফরী জয়লোভা ॥
এ চন্দ্রাবলী তরুণিম রঙ্গে । আভরণ দিনহি বালক সব অঙ্গে ॥

অতএব হে চন্দ্রাবলি ! অঙ্গে অঙ্গে তোমার পূর্ণ তারুণ্যের
অমৃত সম্পদ সমাধিক উৎসারিত হয়ে উঠেছে ।

(খ) মদাফা

কুঞ্জবিলাসের কথা জিজ্ঞেস করলে, চন্দ্রাবলী তাঁর সখীকে
বলেছিলেন—গৌরি ! রতিকুঞ্জ হতে সখীরা সকলে চলে গেলে,
অচ্যুত আমায় শয্যায় শায়িত করে, রিরংসা পরবশ হয়ে এমন দীর্ঘ
দৃষ্টি নিক্ষেপ করেছিলেন যে, নিমেষে আমি আত্মবিস্মৃত হয়েছিলাম ;
উত্তাল প্রমোদলহরী মুহূর্তে আমাকে অভিভূত করেছিল ! তারপর
সেখানে যে কি ঘটেছিল, তা আমি জানি না । ২৫ ।

(গ) উন্নরতোৎসুক্য

যে রতিক্রীড়ায় অতিশয় উৎসুক হয়ে, নায়িকা কখনো কখনো
নায়কের ভাব ধারণ করে ; কখনো বা নায়কের মনে উদ্গত হয়
নায়িকাভাব ; যাতে নায়িকার করদ্বয় হতে বলয় ভ্রষ্ট হয়, এবং
উভয়েরই গাত্রে নখক্ষত চিহ্নিত হয় ; রতিরণে ময়ূরপুচ্ছ ও অঙ্গাভরণ
স্থলিত হয় ; সখি ! আমার মন সেই অনঙ্গ-ক্রীড়ারই অন্বেষণ
করছে ।

(ঘ) ভূরিভাবোদগম-অভিজ্ঞা

প্রেমাস্পন্দকে দেখে নায়িকার চিত্তে যখন একসঙ্গে বিবিধ
ভাবের উদ্গম হয়, তখন তাকে ভূরিভাবোদগম-অভিজ্ঞা বলে ।

শ্যামলার প্রতি বকুলমালার উক্তি ।—হে নমিতাক্ষি ! তোমার
অপাঙ্গের শৃঙ্খল যে শিথিল হয়েছে ! ঈষৎ বক্র ভ্রূণতা বিস্তারিত ;
বদনে অভিলাষযুক্ত হাস্যকলিকা ; তনু রোমাঞ্চিত । বীণাবিনিদিত

কণ্ঠস্বর ! ভ্রমরগুঞ্জিত কুঞ্জে বহুক্ষণ যাবৎ বিরাজ করছো। কারণ কি ? আমার আশঙ্কা হয়, অগ্নি বন্ধুর-গাত্রি ! তুমি কৃষ্ণহরিণকে আকর্ষণ করতে চাও। ২৭।

(ঙ) রসাক্রান্তবল্লভা

অপরূপ কুসুম আনন্দের ইহ গহনে। বনফুল কর যমু অঙ্গকি ভূষণে ॥

মাধব তুহু যদি মানসি বচনে। আনি কুসুম কুরু ভূষণ রচনে ॥

হাম ভূষা প্রেমসী গোকুল নগরে। ইহ যণ ঘোষিবে কাষ্মিনী নিকরে ॥

এখানে নায়িকা নায়ককে আদেশ করছেন যে, রম্য কানন থেকে সুন্দর সুন্দর পুষ্প চয়ন করে এনে, তুমি আমায় সুসজ্জিতা করো। আমার প্রতি তোমার ভালবাসা দেখে, গোকুলের সুন্দরীরা বিস্মিত হোক। এই উদাহরণে রসাক্রান্তবল্লভা, সন্তুতাত্মবকেশবা ও স্বাধীনভর্তৃকা—এই ত্রিবিধ নায়িকাকেই বুঝায়।

নায়ক যদি সর্বদা নায়িকার নির্দেশানুযায়ী চলতে আগ্রহাশ্রিত হন, তাহলে সেই নায়িকাকে ‘সন্তুতাত্মবকেশবা’ বলে। নায়িকা যদি সব সময়ই নায়ককে নিজের আজ্ঞানুবর্তী করে রাখতে আগ্রহাশ্রিতা হন, তাহলে সেই নায়িকাকে ‘রসাক্রান্ত-বল্লভা’ বলে। আর স্থান-কাল-অবস্থাবিশেষে নায়ক যদি নিজেই কোন নায়িকার নির্দেশানুবর্তী হন, তাহলে সেই নায়িকাকে ‘স্বাধীনভর্তৃকা’ বলে। অর্থাৎ নায়িকাই সেখানে স্বাধীন। ২৮।

(চ) অতিপ্রোঢ়োক্তি

প্রোঢ়া অভিভাবিকার স্থায় নায়িকা যে ভীতি প্রদর্শন করেন এবং নায়কের প্রতি শাসনবাক্য প্রয়োগ করেন, তাকেই বলে অতি-প্রোঢ়োক্তি।

শ্রীকৃষ্ণ এসে শ্যামলার গৃহকোণে লুকিয়ে আছেন দেখে, সে অত্যন্ত শ্রীতমনা হয়েছে। তবুও বলে—

ধীরে ধীরে আসি গৃহকোণে বসি অঙ্গ ঢাকিয়া তুণে।

বিনয় করিয়া কি আর কহিছ, কে তোমার কথা শুনে ॥

কোথা গেল আজি সে সব চাতুরি । সেদিন যমুনা ভীরে

ভাঙ্গা তরী পাঞা গোপীগণ লঞা যে দুখ দিয়াছ মোরে ॥

বৃথা আর মিনতি কেন ? সেদিন তুমি ভীতচিন্তা আত্মীরবধূদের
জীর্ণ তরীতে তুলে, ইতস্তত চালনা করে, বিড়াস্বত করেছিলে ।
তোমার সেই চাতুরি আজ কোথায় ?

(ছ) অতিপ্রোচ-চেষ্টা

চন্দ্রাবলীর সমক্ষে পদ্মা এসে উপস্থিত হলে, শ্রীকৃষ্ণ পদ্মাকে
বলেছিলেন—

পদ্মা, আজ অনন্যোৎসবে তোমার এই সখীর উচ্চ-কুচোপরি
অবস্থিত মুক্তাহার যেন নৃত্য করছিল । সেই হারের মধ্যস্থিত মণিটি
চঞ্চল হয়ে, আমার বক্ষস্থিত কৌন্তভমণিকে বারবার প্রহার
করেছে ।

এই ধরনের প্রচেষ্টাকে অতিকুশল প্রচেষ্টাও বলা চলে । এখানে
এক প্রিয়তমা নায়িকার সমক্ষে অণু-এক প্রিয়তমা নায়িকার প্রতি
এই উক্তি ! অভিজ্ঞ প্রেমিক নায়কের পক্ষে অতিকুশল প্রচেষ্টা ।
এই উক্তির মুখ্য উদ্দেশ্য—চন্দ্রাবলীকে পদ্মার সম্মুখে লজ্জা দেওয়া,
এবং পদ্মার অন্তরে সন্তোষলিপ্সা জাগিয়ে তোলা । এতে নায়িকার
মনে প্রণয়-প্রতিদ্বন্দ্বিতাও সঞ্চারিত হয় ।

(জ) মানে অত্যন্ত-কর্কশা

উদ্ধবসন্দেশে শ্যামলার প্রতি বকুলমালার উক্তি—

তুষা শ্রিয় মালতী ধরণীপর লুটই স্বারহি নাগর কান ।

সখীগণ কোই, কোই নিশি বঞ্চল, তড় নাতি ছোডলি মান ॥

তোমার প্রিয় মালতীলতা অনাদরে ভুলুপ্তিতা ও স্নানপুষ্পা ।
পদ্মনাভ শ্রীকৃষ্ণ তোমার দ্বারে বিমনা হয়ে খেদোক্তি করছেন ।
তোমার চোখেও রাতে ঘুম নাই । অকারণ নিজে ব্যর্থরাত্রি যাপন
করে, সখীদের কাঁদাচ্ছে । তোমার এই মানের নবমাধুর্য তো কিছু
দেখি না । ২৯ ।

মান হৈতে প্রগল্ভা হয় তিন প্রকার ।

পূৰ্ব্বমত জানিবে ধীরাদি ভেদ তার ॥ ৩০ ॥

মান অবস্থায় প্রগল্ভা নায়িকাও তিন প্রকার হয়—ধীর প্রগল্ভা, ধীরাধীরপ্রগল্ভা এবং অধীরপ্রগল্ভা ।

ধীরপ্রগল্ভা

ধীরপ্রগল্ভা মানিনী নায়িকা সুরতসম্ভোগে উদাসীনা হন । আদরাধিতা হলেও, তিনি প্রেমাস্বক আকার-ইঙ্গিত সংগোপন করে চলে, এবং নায়কের অনুরোধ এড়িয়ে যাবার চেষ্টা করেন ।

ভদ্রা মানিনী হলে, শ্রীকৃষ্ণ তাঁকে সম্বোধন করে বলেছিলেন—
ভদ্রে ! আজ তামূল আশ্বাদন কর নি কেন ?

বিনয়ের সঙ্গে ভদ্রা বলেছিলেন—গোকুলনাথ, আমার এখনো দেবী-অর্চনা হয় নি ।

শ্রীকৃষ্ণ বলেছিলেন—প্রিয়তমে ! আমি মালা গাঁথে এনেছি, তুমি পরো ।

ভদ্রা বলেছিলেন—কৃষ্ণ ! তোমার শিল্প-পরিচয় পেয়ে আমার গৃহপতি পরিতাপযুক্ত হন । অতএব তোমার গাঁথা এই মালা আমি অঙ্গীকার করতে পারি না ।

শ্রীকৃষ্ণ পুনরায় বললেন—কিছুক্ষণ স্থির হয়ে তুমি আমার কথা শোন ।

ভদ্রা বললেন—ব্রজেশ্বরী আমায় আহ্বান করেছেন । আমায় এখনই যেতে হবে । তোমার কথা শুনবার অবকাশ আমার এখন নাই ।

এই প্রকার বিনয়ের দ্বারা ভদ্রা তাঁর মানকেই প্রমাণিত করেছিলেন । প্রগল্ভা হলেও, তাঁর বৈধব্যচ্যুতি ঘটে নি । ৩১ ।

শ্রীকৃষ্ণের প্রতি পালীর উক্তি ।

এ বনমাল কণ্ঠে নাহি ধারব বরত-নিয়ম হয় নাশ ।

বিভগণ কঠিন যৌন বৃক্ষে দেওল তহিলাগি বচন নিরাশ ॥

গুরুজন পুনপুন মুখে কত ডাকই তুলে লাগি করনু পয়াণ ।

ঐছন চাতুরী বচন শুনি মাধব বুঝল তাকর মান ॥

এ বনমালা কণ্ঠে ধারণ করলে, আমার ত্রুতের কঠিন নিয়ম নষ্ট হবে। ব্রাহ্মণেরা আমায় কঠিন মৌনব্রত অবলম্বন করতে বলেছেন, তাই কথা বলা নিষেধ। হে মধুভাষি! তোমার সান্নিধ্য পরিত্যাগ করতে কার ইচ্ছা করে! খলস্বভাবা শাশুড়ী আমায় এক্ষুণি ডেকেছেন। তাই আর আমি নির্বিঘ্নে অপেক্ষা করতে পারলাম না। ৩২।

চন্দ্রাবলীর প্রতি শ্রীকৃষ্ণ—

সব হাম কুচতটে দেয়ন্ত হাত । করে নাহি তৈললি না কহলি বাত ॥

পুন পুন চুষনে মুখ রহু ধীর । নিবিড় আলিঙ্গনে ততু রহু থির ॥

কিয়ে চন্দ্রাবলী মানতবদ্ধ । ঐছন নাচি দেখি মানকি রহু ॥

এখানেও নায়িকার নিষ্ক্রিয়তা এবং মৌন মান ধীর-প্রগল্ভতা (silent arrogance) সূচক।

অধীর প্রগল্ভতা

যে কাস্তা ক্রোধভরে নায়ককে নিষ্ঠুরভাবে তাড়না ও তিরস্কার করেন, তাঁকে অধীর-প্রগল্ভতা বলে।

মনোবেদনায় অধীরা হয়ে গৌরী বলেছিলেন— হে কংসারি! আমরা মুক্তা নারী, তাই তোমার উচিত প্রতিবিধান করতে জানি না। প্রিয়সখী শ্যামলার চরণ বন্দনা করি; সে প্রকৃত নীতি জানে, তাই মধুকরগুঞ্জিত মল্লিকাদামে তোমার কণ্ঠদেশ বন্ধন করে, সে উপযুক্ত তিরস্কার করেছিল এবং কর্ণোৎপলদ্বারা বারবার তোমায় প্রহার করেছিল।

উত্তমা স্ত্রী অপরাধী কাস্তের প্রতি অভিমানিনী হয়ে, মন ও বাক্যের দ্বারা তাঁকে আঘাত করতে পারে। কিন্তু তাঁর অঙ্গে

আঘাত করতে পারে না। তবুও উদ্ধারণ দিয়ে সে বুঝিয়ে দেয় যে, সেই শাস্তি ধারা দিয়ে থাকেন, তাঁরা নমস্কা।

ধীরাধীর-প্রগল্ভা

ধীরাধীরা নায়িকার যে সকল গুণ থাকে, ধীরাধীর-প্রগল্ভা নায়িকারও সেই সকল গুণ বিদ্যমান থাকে। ৩৩।

মঙ্গলা শ্রীকৃষ্ণকে বলেছিল—আমার চিত্তে ক্রোধের গন্ধও নাই। ব্রত উপলক্ষ্যে আমি মৌন অবলম্বন করেছি। তবুও শ্রীতি বশতঃ তোমায় বলছি যে, নিজেকে নিরপরাধ প্রমাণ করবার চেষ্টা পরিত্যাগ করে, শীঘ্র পলায়ন করো। সখীরা তোমায় মাল্যরঞ্জু দিয়ে বেঁধে রাখতে চায়; শেষে আপন প্রিয়তমাকে আর দেখতে পাবে না। ৩৪।

মাধব যখন অপরাধী হয়ে মঙ্গলার স্তুতি আরম্ভ করেছিলেন, মঙ্গলা ভ্রলতা কুণ্ঠিত করে কর্ণভূষণ পদ্যটি হাতে নিয়েছিল। সেই পদ্য দিয়ে তাঁকে সে প্রহার করে নি, তবে ‘এখানে কেন, যাও যাও’ বলে মুখ ফিরিয়ে প্রত্যাখ্যান করেছিল।

এই ‘যাও যাও’ বলা পর্যন্ত নায়িকার অধীর ভাব প্রকাশ পায়। কিন্তু মুখ ফিরিয়ে নেওয়াটুকু তার ধীর ভাবই প্রতিপন্ন করে। ৩৫।

জ্যোষ্ঠা ও কনিষ্ঠা

কিশোরীদের আকৃতি ও প্রকৃতির ভিতর একটা প্রগল্ভ চঞ্চলতা থাকে, কিন্তু একটু বয়স বাড়লেই কারো কারো প্রগল্ভতা প্রকাশ পায়।

নায়িকাগণের জ্যোষ্ঠা ও কনিষ্ঠা ভেদে মধ্যা এবং প্রগল্ভা—এই দুই প্রকারভেদ হয়। যেমন, জ্যোষ্ঠা-মধ্যা ও কনিষ্ঠা-মধ্যা এবং জ্যোষ্ঠা-প্রগল্ভা ও কনিষ্ঠা-প্রগল্ভা।

নায়কের দিক থেকে প্রণয়ের আধিক্য ও অল্পতা হেতু নায়িকাগণের ভিতর ওই প্রকার জ্যেষ্ঠা ও কনিষ্ঠা ভেদ হয়। যার প্রতি নায়কের প্রীতি বেশী—সে জ্যেষ্ঠা, এবং যার প্রতি তার চেয়েও কম প্রীতি, সে কনিষ্ঠা। ৩৬।

‘মধ্যা প্রগল্ভা হয় দুইত প্রকার।

কেহ কৃষ্ণপ্রেমে জ্যেষ্ঠা, কনিষ্ঠা কেহ আর ॥’

মধ্যান জ্যেষ্ঠা ও কনিষ্ঠা-ভেদ

বৃন্দা দেবী নান্দীমুখীকে বললেন—

দেখ, বৃঞ্জগৃহে লীলা ও তারা দুজনে মুখোমুখি ঘুমিয়ে আছে। দুজনেই কৃষ্ণের প্রিয় নায়িকা। তবুও শ্রীকৃষ্ণ লীলার নয়ন-পল্লবে পুষ্পরেণু ছড়িয়ে দিয়ে, তার ঘুম ভাঙ্গাবার চেষ্টা করছেন; আর শীতল তালবৃন্তের ব্যঙ্গনী দিয়ে বাতাস করে, তারার নিজাকে গভীরতর করবার চেষ্টা করছেন।

লীলা ও তারা—দুজনেই কৃষ্ণপ্রিয়া। কিন্তু লীলার প্রতি প্রণয়ের আতিশয্য হেতু শ্রীকৃষ্ণ তারার নিজাকে গাঢ়তর করে, লীলার ঘুম ভাঙ্গিয়ে তার সঙ্গে অবাধ সম্ভোগলীলায় রত হতে চান। দুজনেই জেগে উঠলে, সেই সম্ভোগের সুযোগ বিস্মিত হবে। তাই, যে অধিকপ্রিয়া তার নিজা ভঙ্গ করে, শ্রীকৃষ্ণ অণু নায়িকার নিজা গভীরতর করবার চেষ্টা করলেন। এখানে লীলা জ্যেষ্ঠামধ্যা ও তারা কনিষ্ঠামধ্যা নায়িকা রূপে পরিগণিতা। ৩৭।

প্রগল্ভা জ্যেষ্ঠা ও কনিষ্ঠা

পৌর্ণমাসীর প্রতি বৃন্দার উক্তি—

দেবি! গৌরী ও শ্যামলা দুজনে কৌতুকচ্ছলে পাশা-খেলায় বসেছিল। উভয়েরই পণ এই যে, পাশা খেলায় যে পরাজিত হবে, সে তিনদিন কৃষ্ণের সঙ্গলাভে বঞ্চিত হবে। খেলা আরম্ভ হতেই কৃষ্ণ এসে মধ্যস্থ হলেন। শ্রীকৃষ্ণের ভঙ্গি দেখে, তাঁর মনোভাব নির্ণয়

করা কঠিন। তিনি ইমারায় গৌরীকে অক্ষচালনার উপদেশ দিতে লাগলেন। গৌরীর জয়লাভ আসন্ন হয়ে উঠলো। কিন্তু অক্ষচালনায় শ্রীকৃষ্ণের নৈপুণ্য এত অসামান্য যে, শেষের কয়েকটি সংকেতে গৌরীর পরাজয় ঘটলো। শ্যামলা হলো সেই খেলায় বিজয়িনী।

দুজনেই কৃষ্ণপ্রিয়া। তবু একজনকে অক্ষচালনার উপদেশ দিয়ে খুসী করলেন, অণ্ডকে সুখী করলেন বিজয়িনী করে। বাহ্যতঃ গৌরীকে সমর্থন করলেও, বস্তুতঃ প্রেমতাৎপর্যে এখানে শ্যামলা হলো জ্যেষ্ঠা, গৌরী হলো কনিষ্ঠা। অবশ্য এই দুইটি প্রকার-ভেদ বিশেষ উল্লেখযোগ্য নয়। ৩৮।

পঞ্চদশবিধ নায়িকা

কন্যার প্রকারভেদ

কন্যা সর্বদাই মুগ্ধা হয়, তার কোন অবস্থান্তর নাই। কিন্তু ওই মুগ্ধাকে স্বীয়া ও পরোঢ়া এই দুই শ্রেণীতে ভাগ করা যায়। মুগ্ধা, মধ্যা এবং প্রগল্ভা—এই তিনটি আবার স্বীয়া ও পরোঢ়া ভেদে ছয় প্রকার হয়। মধ্যা ও প্রগল্ভা ধীরাদি তিনটি শ্রেণীভেদে ছয় প্রকার হয়। তা ছাড়া, কন্যা, স্বীয়া ও পরোঢ়া ভেদে মুগ্ধা তিন প্রকার। পর্যায়ক্রমে নায়িকার মোট সংখ্যা পঞ্চদশ। কন্যা-মুগ্ধা এক, এবং স্বীয়া ও পরোঢ়া উভয়েই সাতটি বিভিন্ন পর্ধ্যায়ে বিভক্ত হয়ে মোট চতুর্দশ। যথা—

স্বীয়া

পরোঢ়া

মুগ্ধা, ধীরমধ্যা, অধীরমধ্যা, মুগ্ধা, ধীরমধ্যা, অধীরমধ্যা,
ধীরাধীরমধ্যা, ধীরপ্রগল্ভা, ধীরাধীরমধ্যা, ধীরপ্রগল্ভা,
অধীরপ্রগল্ভা, ধীরাধীর অধীরপ্রগল্ভা ধীরাধীর,
প্রগল্ভা প্রগল্ভা

এবং
কন্যামুগ্ধা

নায়িকার অর্চাবস্থা

অভিসারিকা বাসকসজ্জা আর উৎকৃষ্টতা,
খণ্ডিতা, বিপ্রলঙ্কা ও কলহাস্তরিতা,
প্রোষিতভর্তৃকা আর স্বাধীনভর্তৃকা।
এই অষ্ট অবস্থাতে রহয়ে নায়িকা ॥

অভিসারিকা

যে নায়িকা প্রেমাস্পদকে অভিসার করায়, অথবা নিজে অভিসার করে, তাকে অভিসারিকা বলে। অভিসারিকা নায়িকা জ্যোৎস্না বা অঙ্ককার রাতে শুক্ল বা কৃষ্ণ বর্ণের বসনে অঙ্গ আবৃত

করে অভিসারে যায়। শুক্লপক্ষে শুভ্রবাসপরিহিতা নায়িকাকে বলে জ্যোৎস্নাভিসারিকা আর কৃষ্ণপক্ষে কৃষ্ণবসনে আবৃত্তা অভিসারিকাকে বলে তমোহভিসারিকা। লজ্জায় অঙ্গে অঙ্গ আবৃত্ত করে, অবগুষ্ঠিতা নায়িকা নিঃশব্দে প্রিয়তমের নিকটে যায়; সঙ্গে থাকে স্নিগ্ধা একটি সখী। ৩৯।

অভিসারমিত্রী

অর্থাৎ কাস্তকে যে অভিসার করায়।

শ্রীরাধা বিশাখাকে বললেন—সখি! তুমি সহর কৃষ্ণের নিকটে যাও। তিনি যেন আমার মনের সন্তোষ-লিপ্সা জানতে না পারেন। তুমি স্নেহ-কৌশলে এমন ভাবে প্রার্থনা ক'রো যাতে আমার প্রতি প্রীতিমান হয়ে তিনি নিজে অভিসার করেন। কৃষ্ণা চতুর্থীর অঙ্ককার রাত্রি, আমার প্রাণহরণকারী চাঁদ পূর্বাকাশ চূষন করবার পূর্বেই যেন তিনি এসে মিলিত হন। ৪০।

জ্যোৎস্নায় স্নেহমভিসারিকা

বিশাখা শ্রীরাধাকে বললেন—সুন্দরি! চল আজ বৃন্দারণ্যে নিবিড় জ্যোৎস্নারশি ছড়িয়েছে। তাই দেখে, ব্রজরাজনন্দন উজ্জান-বৌথিকা পানে চেয়ে আছেন। তুমি চন্দনচর্চিতা হয়ে, শুভ্র পট্টবাস পরিধান করে, কেন সেই পথে তোমার চরণাবিন্দ পরিচালনা করছো না!

তমোহভিসারিকা

সখি! পূণ্যবতীরা তিমির-কৃষ্ণ বসনে অঙ্গ আবৃত্ত করে কদম্ব বনে চলেছে কৃষ্ণ-অভিসারে। কিন্তু হয়। তুমি যে নিজেই নিজের বৈরী হয়েছ। তোমার অঙ্গের বিদ্যুৎ-বর্ণছাতি নীলবসনে ঢাকা পড়ে না। এই তামসী নিশার ঘন অঙ্ককার ভেদ করে, সে বর্ণচ্ছটা আত্মপ্রকাশ করছে। ৪১।

বাসক সজ্জা*

কাস্তুর আগমন প্রতীক্ষায়, তাঁর অভিলাষ অনুসারে কুঞ্জভবনে থেকে, নিজদেহ ও বাসগৃহ সুসজ্জিত করে রাখা, হলো বাসকসজ্জা। আর এইভাবে যে নায়িকা স্নরক্ৰীড়া-সংকল্প করে প্রিয়তমের পথপানে চেয়ে থাকে, এবং সখীদের সঙ্গে মধুর আলাপনে রত হয়, ও মুহূর্তঃ দূতীর পানে চায়, সেই নায়িকাকে বলে বাসকসজ্জিকা। যথা—

শ্রীমতীকে দেখে রূপমঞ্জরীর উক্তি—

মদন কুঞ্জপর বৈঠল হৃন্দরী নাগর মিলব আশে ।

নবনব কিসলয়ে সেজ বিছাঙল কুহুমনিকর চারুপাশে ॥

হৃন্দরী সাজল বাসক সাজ ।

প্রেম জলধিজল নিগমন ভাবই আশব নাগর বাজ ॥

কত কত আভরণ নেওল অঙ্গহি বদনে হৃদাসম হাস ।

দেখ দূতী নাগর কতদূর আয়ত ঘন কহে এইচন ভাষ ॥

সুন্দরি! ওই দেখ, শ্রীরাধা রতিক্রীড়ার যোগ্য কুঞ্জগৃহ, পুষ্প-শয্যার উজ্জল রুচি, এবং অলঙ্কারভূষিত নিজদেহ সন্দর্শন করে, হাস্য করছেন। বার বার তিনি চিন্তা করছেন, কি প্রকারে সঙ্গমবিধির সমুদ্বিসাধন করবেন। বাসকসজ্জিকা শ্রীমতী আজ মদনমদে উন্মত্তা হয়ে আছেন। ৪২।

উৎকণ্ঠিতা

বহুকণ যাবৎ প্রিয়তম না এলে, বিরহে যে নায়িকার চিত্ত অত্যন্ত উৎকণ্ঠ হয় এবং সেইজন্য তার হৃদয়ের উত্তাপ বৃদ্ধি পায়, অঙ্গ বেপথুমান হয়, সে অকারণ বিতর্ক করে, চোখের জল মোছে ও আপনার অবস্থা অত্যাঁকে বলতে চায়, সেই নায়িকাকে বলে উৎকণ্ঠিতা। ৪৩।

*সেই বাসকসজ্জা হয় অট্টভেদ। অঙ্গই সম্বন্ধে কই এ বিভেদ ॥

যোহিনী, জাগ্রতী আর হর ত রোচিত। অযোগ্যকি, অশ্রুতিকা, প্রগল্ভা, বিনীতা ॥

হরপা উদ্দেশ্য—এই অট্টভেদ। লোক পদগীতে হর ইহার বিস্তার ॥ —রসমঞ্জরী,

যথা—চন্দ্রাবলী পদ্মাকে বললেন, সখি ! ব্রজেন্দ্রনন্দন কি আজ ত্রীরাধার কটাক্ষ বাণে বিদ্ধ হলেন ! না অম্বরগণের সঙ্গে যুদ্ধ বাধলো ? আমি যে কিছুই অনুমান করতে পারছি না । আজ কৃষ্ণাষ্টমী, ওই দেখ. পূর্ব গগনে নিশানাথ উদ্ভিত হয়েছে । কিন্তু প্রাণনাথ যে এখনো আমায় স্মরণ করলেন না ! কারণ কি ? ৪৪ ।

বাসকসজ্জা অবস্থায় দয়িতের সঙ্গে মিলন না হলে, নায়িকার অন্তরে মান বা অভিমান সঞ্চারিত হয় । তারপর সেই মানের বিরতি হলেও, যদি নায়কের পারতন্ত্র্য বা পরাধীনতার জ্ঞান পূর্ণ মিলনের পথে বাধার সৃষ্টি হয়, তখন জাগে ‘উৎকণ্ঠা’ ।

নাগর গমনে পড়ল বুঝি বাধা । নিজগুণে বাক্তি রাখল বুঝি বাধা ॥
কি এ ব্রজমণ্ডলে আঙল সুনারী, তা সনে সঙ্গম করয়ে মুরারি ॥
দেখ শশী হোওল এ আধ রাত্রি । গহনক ঘেরল হিমকর ভাতি ॥
বিরহ সেননে অব মল্ল প্রাণ যায় । অবহি না আঙল নাগর যায় ॥

খণ্ডিতা

সময় পার হয়ে গেলেও নায়কের দর্শন মেলে না । কিন্তু সেই নায়ক অণু নায়িকার সঙ্গে রাত্রিয়াপন করে, সন্তোষ-চিহ্ন অঙ্গে ধারণ করে, যদি পরদিন প্রভাতে এসে উপস্থিত হন, তাহলে প্রেমসীর খণ্ডিতা অবস্থা হয় । এই অবস্থায় নায়িকার রোষ, দীর্ঘনিশ্বাস ও তৃষ্ণাভাবাদি সঞ্চারিত হয় । ৪৫ ।

যথা কৃষ্ণের অবস্থা দর্শনে বকুলমালার প্রতি শ্রামলা—

যাবক রঙ্গে রঞ্জায়লি নিজশির ভূজে বহু বন্ধ চিণ ।
কুচতট-কুঙ্কম-রঞ্জিত-হৃদিতট বনফুলমাল মলিন ॥
ঘৃণিত-লোচন ব্রজপতিনন্দন আঙল নিশি পরভাতে ।
শ্যামলার বদনে রহল তব মুনিগুণ রঙল কদম্ব চিতে ॥

অণু নায়িকার সঙ্গে রতিসন্তোষের চিহ্ন দয়িতের অঙ্গে দেখে, মুখখীর মুখ নীরব হলো, কিন্তু অন্তর দগ্ধ হলো রুদ্ররোষে । ৪৬ ।

* উৎকণ্ঠিতা অষ্টবিধ—উদ্ভাস্তা, বিকলা, স্তম্ভা, চকিতা, অচেতনা, হৃথোৎকণ্ঠিতা, প্রণলতা ও বিবদা ।

পীতাম্বরের রসমঞ্জরী মতে খণ্ডিতা বিবিধ রকমের । যথা—ধীরা, অধীরা, সমা, বিদম্বিকা, নিন্দয়া, ক্রোধ-প্রগল্ভা, মধ্যা, মুগ্ধা, রোদিতা, প্রেমমত্তা ইত্যাদি ।

বিপ্রলক্ষা

সংকেত করা সম্বন্ধে যদি নির্দিষ্টস্থানে প্রাণনাথ না আসেন, ও হলে যে নায়িকার অন্তর অত্যন্ত বেদনার্ত হয়, মনোবিগণ তাকে বিপ্রলক্ষা বলেন । এ অবস্থায় বৈরাগ্য (নির্বেদ), চিন্তা, খেদ, অশ্রু, মূৰ্ছা ও দীর্ঘনিশ্বাস প্রভৃতি লক্ষণ প্রকাশ পায় ।

যথা, বিশাখার প্রতি শ্রীমতী—

চান্দ উদয় ভেল অম্বর মাঝ । অবহ না আওল নাগরাজ ॥

সো বর নাগর বঞ্চল মোহে । কোন যুবতী রসে বান্ধল তাহে ॥

বিরহ দহনে অব মনু প্রাণ যায় । কি করব সখি, কহ না উপায় ॥

এই বলে মৃগাকী রাধা তৎক্ষণাৎ মূছিতা হয়ে পড়লেন । ৪৭ ।

কলহাস্তুরিতা

‘যা সখীনাং পুরঃ পাদপতিতং বল্লভং কৃষা নিরস্ত পশ্যন্তপতি কলহাস্তুরিতা হি সা ॥’

সখীদের সমক্ষে পাদপতিত বল্লভকে রোষভরে প্রত্যাখ্যা করে, পরে যে নায়িকা পরিতাপ করে, তাকে কলহাস্তুরিতা বলে

প্রলাপ, সন্তাপ, শ্লানি ও ঘন ঘন দীর্ঘনিশ্বাস ত্যাগ প্রভৃতি কলহাস্তুরিতা নায়িকার প্রয়াস বা লক্ষণ । কলহাস্তুরিতার বিবর অষ্টবিধ । যথা—আগ্রহাঘ্নিতা, ধীরা, বিকলা, অধীরা, কোপবর্তী, সখ্যক্তিকা, সমাদরা ও মুগ্ধা ।

যথা, শ্রীমতী সখীদের বললেন—

করিয়া আদর সে বর নাগর আনি দিল মোহে মালা ।

মানের ডয়মে দূরেতে ফেলিলু করিয়া পরম হেলা ॥

* বিপ্রলক্ষা অষ্টবিধ হয়—নির্বন্ধা, প্রেমমত্তা, ক্রোধা, বিবীত্য়া, নিন্দয়া, প্রথরা, দৃষ্টাদরী চর্চিতা । —রসমঞ্জরী ।

কৃষ্ণ নিজে পুষ্পমালা এনে আমায় উপহার দিয়েছিলেন। কিন্তু আমি অবজ্ঞাভরে সে মালা দূরে ছুঁড়ে ফেলে দিয়েছি। তিনি মধুর গানে আমায় তুষ্ট করতে চেয়েছিলেন, কিন্তু আমি তাঁর কথায় কর্ণপাত করি নি। তিনি আমার চরণোপাস্তে শিখিচূড়া বিলুপ্তিত করেছিলেন, কিন্তু আমি একবারও দৃকপাত করি নি। তাই আজ আমার অন্তর পুটপাকের ভিতরে গলিত ধাতুর মত ফুটেছে। ৪৮।

প্রোষিতভর্তৃকা

কান্ত দূরদেশে গেলে যে নায়িকা বিধুরা হয়ে পথ চেয়ে থাকে, তাকে প্রোষিতভর্তৃকা বলে।

প্রিয়তমের গুণকীর্তন, আপন অন্তরের দীনতা, দেহের কৃশতা, হস্তি-জাগরণ, স্নানচিন্তে অবস্থান, জড়তা, চিন্তামগ্নতা প্রভৃতি প্রোষিতভর্তৃকা নায়িকার অবস্থা।

প্রোষিতভর্তৃকা তিন পর্যায়ের হতে পারে। যেমন—ভাবী পতি প্রবাসে যাবেন), ভবন (প্রবাসে যাচ্ছেন), আর ভূত পতি বিদেশে গিয়েছেন)। এই তিন ক্ষেত্রেই নায়িকার দশ অবস্থা হতে পারে। নিম্নপ্রয়োজনবোধে, তার পৃথক পৃথক উদাহরণ দেওয়া হলো না। ভাবী, ভবন ও ভূত এই তিন অবস্থাতেই বিরহ দগ্ধ হইয়া থাকে।

যথা (উজ্জ্বলে) ললিতার প্রতি শ্রীমতীর উক্তি—

সখি! মধুরিপু স্বচ্ছন্দে বিলাসপরতন্ত্র হয়ে মথুরায় বাস করতে লাগলেন। এখন আমি কি উপায় করি, বল! আমি যে আর সন্তের সন্তাপ সন্ত করতে পারছি না; আমায় সকল দিক দিয়ে পদেপদে যাতনা দিচ্ছে। জানি ছুরাশা! তবুও মনে হয়, যদি তিনি আসেন! তাই মরণের সঙ্কল্প করেও আমি মরতে পারি না। এ অবস্থায় আমি কার আশ্রয় গ্রহণ করি, বল?

ভানুদত্তের রসমঞ্জরীতে ‘প্রোষিতভর্তৃকা’ নামে নবম নায়িকার বর্ণনা আছে। বার পতি অচিরে প্রবাসে যাবেন, তারও মিনতি-

কাতর দৃষ্টি, খেদ, দার্বণ্যাস এবং মূর্ছা ইত্যাদি লক্ষণ প্রকাশ পায় । তবে এগুলি ভাবী বিরহেরই অন্তর্গত ।

স্বাধীনভর্তৃকা

দয়িত যার অধীন হয়ে সর্বদাই আয়ত্তে থাকেন, সে নায়িকাকে বলে স্বাধীনভর্তৃকা । সলিলে এবং অরণ্যে, নায়ক প্রিয়তমার সঙ্গে নানা ক্রীড়া করেন ও বিবিধ পুষ্প চয়ন করে তার অঙ্গভূষণ রচনা করেন । ৪৯ ।

যথা (উজ্জয়িনী) পৌর্ণমাসী বৃন্দাকে বললেন—

শ্রীমতীর প্রেমাধীন হয়ে, কেশিদমন তার পীন-কুচবুগে অনুপম পত্রাঙ্কুর স্থাপন করছেন, ছুটি কর্ণে মধুপচিত্তলোভা নীলপদ্ম পরিয়ে দিয়ে, লীলাভরে শ্মশিল (ঝুঁটি) বা কবরীতে শুভ্র কমল সংস্থাপন করছেন এবং অবাধ রতিসন্তোগে রত হচ্ছেন ।

যথা বা—শ্রীমতী কৃষ্ণকে আদেশ করলেন :

‘রচয় কুচরোঃ পত্রং চিত্রং

...পদে কুঙ্ক নুপুরাবিতি ।’

—গীতগোবিন্দ

শ্রীরাধার আজ্ঞায় শ্রীকৃষ্ণ তাঁর কুচদ্বয়ে কস্তুরীপত্র, জঘনে কাঞ্চি, কবরীতে পুষ্পমালা, করযুগে বলয় ও চরণে নুপুর পরিয়ে দিলেন ।

মাধবী

প্রেমবশ হয়ে দয়িত যদি কোন নায়িকাকে ক্ষণকালের জন্তও পরিত্যাগ করতে না পারেন, তাহলে সেই স্বাধীনভর্তৃকা নায়িকাকে ‘মাধবী’ বলা হয় ।

ফল্গু ও শিখা

অষ্টবিধ নায়িকার মধ্যে স্বাধীনভর্তৃকা, বাসকসজ্জিকা ও অভিসারিকা—এই তিন প্রকার নায়িকা সত্তত স্টেচিভা ও ভূষণাদি

স্বাধীন ভর্তৃকা লক্ষণানুযায়ী অষ্টবিধ । যথা—কোপনা, মালিনী, বধ্যা, মুখা, উজ্জ্বলা, উল্লাস, অমৃকলা ও অভিশেকা ।

বসনভূষণ : পীতবর্ণ

মণ্ডিতা হয় ; এরা হুঁই নায়িকা । আর বিপ্রলক্ষা, খণ্ডিতা, উৎকণ্ঠিতা, প্রোষিতভর্তৃকা ও কলহাস্তরিতা—এই পাঁচপ্রকার খিল্লা নায়িকার অঙ্গ ভূষণশূণ্য হয় । তারা বামগণ্ডে হাত দিয়ে, ম্লানমুখে বসে থাকে ও খেদ করে । তাদের অন্তর চিন্তা সমুপ্ত হয় । ৫০ ।

উত্তমা, মধ্যমা ও কনিষ্ঠা

ব্রহ্মেন্দ্রনন্দনের প্রেমের তারতম্য অনুযায়ী পূর্বোক্ত নায়িকাদের তিন শ্রেণীতে বিভক্ত করা হয় । যেমন—উত্তমা, মধ্যমা ও কনিষ্ঠা ।

উত্তমা প্রভৃতি নায়িকাদের মধ্যে শ্রীকৃষ্ণের প্রতি যার যেমন ভাব, সেই নায়িকার প্রতি শ্রীকৃষ্ণেরও তেমনি প্রীতি ।

উত্তমা

যথা—

শ্রীকৃষ্ণ সুবলকে বললেন, আমার প্রতি শ্রীরাধার কি আশ্চর্য প্রীতি ! যদি ক্লণকালের জ্ঞাতও আমার সুখবিধান করতে নিজের সর্বস্ব বিসর্জন দিতে হয়, তাও সে করে । আমি যদি খেদের কারণ হই, তবুও তার অন্তরে দ্বেষ জন্মায় না । যদি তার সামনে কেউ ছল করেও আমার কিকিৎ-মাত্র পীড়ার কথা বলে, তার হৃদয় বিদীর্ণ হতে থাকে । এইসব গুণের জ্ঞাতই শ্রীরাধা সুন্দরীগণের মধ্যে শীর্ষ স্থানীয়া হয়ে আছে । ৫১ ।

মধ্যমা

ছরপনেয় মান যার অন্তরে অত্যন্ত প্রবল হয়, এবং দয়িতের আর্তি সবেও যে দূরে সরে যায়, সে মধ্যমা নায়িকা । যথা—

রঙ্গ নাম্নি যুথেশ্বরীর প্রতি তার সখীর উক্তি :

রঙ্গে ! মান ভরে তোমার অঙ্গপ্রত্যঙ্গ তরঙ্গায়িত হচ্ছে ; কৃষ্ণের হৃদয় পীড়িত জেনেও, তুমি চলে যাচ্ছ ? ছষ্ট মানকেই তুমি এত সম্মান দিচ্ছ ? কি আশ্চর্য ! এই কি বরাক্ষনার অনুরাগ চিহ্ন ! এ তো অনুরাগের মূর্ত্তা নয় । ৫২ ।

কনিষ্ঠা

অভিসার-মহুরা কোন গোপাঙ্গনার প্রতি বৃন্দার উক্তি—

কি গো, গোপাঙ্গনা ! পূর্বে যখন অভিসারের জগু প্রস্তুত হতে, তখন কামনা করতে ঘনবর্ষণ ; যাতে পথে লোক চলাচল বন্ধ হয় । বর্ষা দেখে তুষ্ট হতে । আর এখন আকাশে একটুখানি মেঘ দেখলেই জ্জ্বল কর, কুঞ্জের পথে যেতে পরাঙ্গুখী হও । কেন ? এ-তো তোমার প্রেমের লক্ষণ নয় । ৫৩ ।

মিলন বিষয়ে এই মহুরতা দ্বারা নায়িকার কৃষ্ণ-প্ৰীতির অল্পতা সূচিত হয় । তাই এই শ্রেণীর নায়িকাকে ‘কনিষ্ঠা’ বলে ।

উদাহরণ :—

ববহি বরিষ নহে তবহি কহলি তুঁহ বরিষে উচিত অভিসার ।
ঘন বরিষণে জন বাহির ন হোয়ই অব তাহে ঘন আন্ধিয়ার ॥
অবহি জলদঘন আন্ধিয়ার ষামিনী বরিষণ দরশন দেল ।
দ্রুত অভিসার ছোড়ি ধনী কুতুবিনী কাহে তুঁহ মহুর ভেল ॥

নায়িকার প্রকারভেদ

পূর্বে যে পঞ্চদশবিধ নায়িকার কথা বর্ণিত হয়েছে, তারা আবার প্রত্যেকে অভিসারাদি আটটি অবস্থা ভেদে, মোট একশো কুড়িটি শ্রেণীতে বিভক্ত হতে পারে । এই সব নায়িকা আবার উত্তমা, মধ্যমা ও কনিষ্ঠা ভেদে, মোট তিন শো ষাট রকম হয় । ৫৪ ।

শ্রীরাধা

নিখিল নায়কের যাবতীয় অবস্থা বা গুণ যেমন মাধবে বিদ্যমান, তেমনি শ্রীরাধাতেও কনিষ্ঠা নায়িকা ব্যতীত অচাণ্ড সকল প্রকার নায়িকার সর্ববিধ অবস্থাই বিদ্যমান । সেই জগুই শ্রীরাধা নিখিল নায়িকাগণের মধ্যে সর্বশ্রেষ্ঠা নায়িকারূপে পরিগণিতা এবং শ্রীকৃষ্ণের যোগ্যতমা লীলাসঙ্গিনী ।

যুথেশ্বরী ভেদ

যুথ সখী

সদগুণযুক্তা ও সুন্দরভাবিশিষ্টা যে-সব বরনারী রাধার দলভুক্তা ও অনুগামিনী, যারা রূপে ও গুণ-গরিমার বিভ্রমের দ্বারা শ্রীকৃষ্ণকে সর্বোত্তোভাবে আকর্ষণ করেন, তাঁরাই শ্রীরাধার যুথসখী। এই যুথসখীদের পাঁচটি শ্রেণীতে বিভক্ত করা যায়। যথা—সখী, নিত্য-সখী, প্রাণসখী, প্রিয়সখী ও পরমপ্রেষ্ঠসখী।

কুসুমিকা, বিদ্যা এবং ধনিষ্ঠা প্রভৃতি সখী মধ্যে পরিগণিত।

উল্লিখিত যুথেশ্বরীদের বিশেষ বর্ণনা পূর্বে দেওয়া হলেও, পুনরায় তাদের সুহৃদাদি ব্যবহার—অর্থাৎ তটস্থ, বিপক্ষ ও স্বপক্ষ ভেদ স্পষ্টরূপে বর্ণিত হলো। ১।

যুথেশ্বরীদের সৌভাগ্যাঙ্গী ক্রমে, অর্থাৎ নায়কের প্রেম ও রূপগুণ ইত্যাদির আধিক্য, সাম্য এবং লঘুতা অনুযায়ী, অধিকা, সমা ও লঘী—এই তিনটি প্রকার-ভেদ হয়। ২।

তা ছাড়া, প্রত্যেকের প্রখরা, মধ্যা ও মূর্ধ্বী—এই তিনটি স্তরভেদ আছে। তার মধ্যে যে নায়িকা প্রগল্ভ বাক্য বলে, বা দস্তোক্তি করে, এবং যার বাক্য কেউ খণ্ডন করতে পারে না, তাকে প্রখরা বলে। বাক্য ও আচরণে সমতায়ুক্তা হলে মধ্যা, এবং তার চেয়ে মৃদু বা কম হলে মূর্ধ্বী বলে সে নায়িকাকে অভিহিত করা হয়।

অধিকা

অধিকা দ্বিবিধ—আত্যন্তিকী ও আপেক্ষিকী। ৩।

সর্বোত্তোভাবে যার সমান বা যার চেয়ে অধিক আর কেউ নাই, তাকে আত্যন্তিকী অধিকা বা আত্যন্তিকাধিকা বলে। ৪।

কৃষ্ণপ্রিয়াগণের মধ্যে একমাত্র শ্রীরাধাই আত্যন্তিকী-অধিকা এবং তিনিই মধ্যা; কারণ, ব্রজে তাঁর সদৃশ বা সমকক্ষ অণুকোন

গোপাঙ্গনা নাই। তাই নায়িকাগণের মধ্যে শ্রীরাধাই সর্বশ্রেষ্ঠা এবং প্রধান। ৫।

ভদ্রা চট্টলা, পালী প্রফুল্লা, বিমলা শালীনতা রক্ষা করতে পারে না, শ্যামলা অহঙ্কার প্রকাশ করে, চন্দ্রাবলী শির উন্নত করে চলে। কিন্তু কতক্ষণ? যতক্ষণ কর্ণে রাধা নামের মন্ত্রটি প্রবেশ না করে। শ্রীরাধার নাম উচ্চারিত হলে, সকলেই অধোবদন হয়। ৬।

উদাহরণ—

ভদ্রা তদবধি হরি সনে কহতহি চঞ্চল বাত।

পালী তদবধি কত রস বিতরই বিবলা দোলই হাত ॥

শ্যামা তদবধি গরব করি চলতহি চন্দ্রাবলী করু সাধা।

বদবধি কেশব শ্রুতি নাহি পৈঠল অমৃত আখর রাধা ॥

যুথেশ্বরীগণের মধ্যে তুলনামূলকভাবে যে নায়িকা অগ্রতমার চেয়ে অধিকা হয়, তাকে আপেক্ষিকী অধিকা বলে। ৭।

অধিক প্রথরা

কোন এক যুথেশ্বরী অগ্র যুথেশ্বরীকে বলেছিলেন—সুন্দরি! ওই দেখ, পর্বত হতে কৃষ্ণভূজঙ্গরাজ এগিয়ে আসছেন। তুমি মন্ত্র জানো না, ভীকু সখীদের নিয়ে পালাও। আমি বেদেনী, ভোগী রমণীসুন্দের বৃন্দাটবীতে ঘুরে বেড়াই; সাপের চিকিৎসা ভাল জানি। ভূজঙ্গ বশীকরণের মন্ত্রপ্রয়োগেও আমার বিলক্ষণ পটুতা আছে। হে কামিনি! আমি মন্ত্রদ্বারা ওই কৃষ্ণভূজঙ্গকে বশীভূত করেছি। আমার সে কি করবে?

এখানে যুথেশ্বরী নায়িকা তাঁর সৌভাগ্যের আধিক্য প্রকাশ করতে গিয়ে, হৃদ্রব বা অধিক প্রথরা হয়ে উঠেছেন। ৮।

অধিক মধ্যা

কোন এক যুথেশ্বরী অগ্র একজনকে বললেন—আমি তোমায় চিনতে পেরেছি। আত্মগোপনের চেষ্টার অত পটুতা দেখিয়ে আর

কি হবে ? হে ধূর্তে ! পূর্ণিমার সন্ধ্যায়, আমি গোপীদের নিয়ে জোর করে, আমার গৃহে তোমার পরিজনসহ তোমায় অবরুদ্ধ করে রাখবো। কুঞ্জরাজ শ্রীকৃষ্ণ তোমার পথপানে চেয়ে, প্রহর গণনা করে, রাত্রি জাগরণ অভ্যাস করুন।

এই উক্তি দ্বারা অপরা নায়িকার সৌভাগ্যের আধিক্য প্রকাশ পায়। কিন্তু আকার-ইঙ্গিত গোপনের প্রচেষ্টা সংকোচের সূচনা করে। সেই হেতু এখানে প্রখরতার অভাব পরিলক্ষিত হয়। পটুতার কথা উল্লিখিত হওয়ায়, মৃদুত্বেরও অভাব ঘটে। সেই জন্তু এখানে নায়িকার ‘মধ্যাহ্ন’ প্রতিপ্রস্ন হচ্ছে। আর যে যুথেশ্বরী রোষবশে অন্ত নায়িকাকে তাঁর গৃহে পরিজনবর্গসহ ধরে রাখবেন বলছেন, নায়কের উপর তাঁর প্রাধান্য এবং সৌভাগ্য—এই দুটিরই অভাব ঘটেছে এবং অন্ত নায়িকার প্রতি প্রণয়বিদ্বেষ (Jealousy) প্রকাশ পাচ্ছে। সেই হেতু ইনি ‘লঘু’ ও ‘হৃদয়’।

অধিক মৃদু

কোন এক যুথেশ্বরী তাঁর সখীকে বললেন—

প্রিয়সখি ! দূর থেকে আমায় দেয়ে, মুখ নীচু করে সঙ্গীদের নিয়ে পালিয়ে যাচ্ছ কেন ? তুমি তো আমারও প্রেমপাত্রী ; অমন গোপনে চলে যেও না। তুমি তোমার কবরীতে ওই যে ফুলের মালা জড়িয়েছ, সে তো আমারই গাঁথা। আমি কৃষ্ণের সঙ্গে পাশা খেলায় ওই মালা পণ রেখেছিলাম। তিনি আমায় জয় করে, ওই মালা পেয়েছিলেন এবং তাই তোমায় দিয়েছেন। আমার কলা-কৌশল তো তোমার পরিচিত।

অঙ্গ সংগোপন করে যে নায়িকা চলে যেতে চান, তিনি সৌভাগ্যবতী এবং ‘অধিক মৃদু’। যিনি তাঁকে সম্বোধন করে অঙ্গ-সংগোপনের কথা বললেন, তিনি ‘লঘুমধ্যা’ মৃদুত্ব।

সমাত্রিকা বা সমা

দুই অধিকা এবং দুই লঘুর মধ্যে পারস্পরিক সমতা আছে।
তাই তাদের সমাত্রিকা বা সমা বলা হয়। ৯।

সমপ্রথরা

কৃষ্ণের উত্তানে পুষ্পচয়নরতা এক গোপাঙ্গনাকে দেখে, কোন যুথেশ্বরী বলেছিলেন—যদিও তোমার পাশে অণু কোন সখী নাই, তবুও ভয় কি? হৃৎকম্প পরিত্যাগ কর। কৃষ্ণ তোমার কি করবেন? প্রিয়সখি! আমি অতি চতুরা, তোমার পথের সামনে হস্তর বাহুদ্বয় প্রসারিত করে দাঁড়িয়ে আছি। এই বাহনদৌ সস্তরণ না করে, কৃষ্ণ তোমার সমীপবর্তী হতে পারবেন না। ১০।

এখানে যুথেশ্বরীর উক্তি থেকে স্পষ্টই প্রতীয়মান হয় যে, উভয় সখীর মধ্যে একটা সাম্য বা সমাত্রিক ভাব আছে। যিনি কথাগুলি বললেন, তিনি সমা এবং প্রথরা সূক্ষ্ম।

সমমধ্যা

দুই সখীর মধ্যে উক্তি ও প্রতীতি—

প্রথমা—অগ্নি লোলে! আমায় স্পর্শ করো না। তোমার ললাটে ধাতুগৈরিক রঙ লেগে আছে। অতএব তুমি অস্পৃশ্যা, কৃষ্ণকর্তৃক উচ্ছিষ্টা।

দ্বিতীয়া—তুমিও তো ভুজঙ্গরমণী, অভিসার করেছিলে। তাই তোমায় দূর থেকে বর্জন করলাম।

প্রথমা—হে সমুজ্জ্বলা, তুমি যে স্বয়ং কুহকপ্রিয়া (কামরূপী নাগের প্রেয়সী)। নিজের দোষ না দেখে, কেন বাঁকা কথা বলছো? ওই দেখ, তোমার অঙ্গ থেকে কাঁচুলি খুলে পড়েছে; কাম-সর্পিণীর খোলস ছেড়েছে। তোমায় ধিক্।

প্রথমার সৌভাগ্য অনুমিত; দ্বিতীয়ার অঙ্গে ভোগচিহ্ন সুস্পষ্ট হওয়ায়, তার অধিক সৌভাগ্য পরিলক্ষিত হচ্ছে। এরা কেউ প্রথরা

নয়, নিতান্ত যুত্বস্বভাবা বা যুদ্বীও নয়। কাজেই এই ছুই নায়িকা ‘সমযুদ্বী’ ১১।

সমযুদ্বী

তারা যখন মান করেছিল, তখন শ্রীকৃষ্ণ তার প্রিয়বান্ধবী লীলাবতীকে পাঠিয়েছিলেন মানভঞ্জনের জন্ত।

তারা বলেছিল—কল্যাণি, আমি ধর্মের নামে শপথ করে বলছি, তুমি আমার প্রাণসমা। আমি বলছি, তুমি মান পরিত্যাগ করো। আমি জানি যে, আমার কথা তুমি প্রত্যাখ্যান করতে পারবে না। তবে কৃতাজ্জলিপূর্বক আমি একটি প্রার্থনা তোমার কাছে করছি। তুমি তোমার বল্লভকে এমন শিক্ষা দাও যে, তিনি যেন জীবনে আর কোনো সরলার প্রতি ছলনা না করেন।

মানভঞ্জনের জন্ত কৃষ্ণ লীলাবতীকে তারার নিকট পাঠিয়েছিলেন, এতে তারার সৌভাগ্যাধিক্য সূচিত হচ্ছে। আর—আপন কাম্যকে শিক্ষা দাও, এই উক্তিদ্বারা লীলাবতীরও সৌভাগ্যের আতিশয্য প্রকাশিত হলো। কিন্তু চরিত্রগত লক্ষণে তারার ‘যুত্বতা’, এবং কৃষ্ণকে শাসন করবার কথা উল্লেখ করায়, লীলাবতীর কিছুটা ‘প্রখরতা’ প্রকাশ পায়। তবে চরিত্রগতভাবে উভয়েই ‘সমযুদ্বী’। ১২।

সমজলম্বী

কোন প্রখরা সখীর সখীর উক্তি—

সুন্দারি! গুরুজনের মর্ষাদা রক্ষা না করে, তুমি সন্ধ্যাবেলায় প্রকাশ্যভাবে বনের পথে চলেছ। তোমার কি ভয় নাই?

উত্তরে অভিসারিণী বললেন—কঠিনে, এত বিভীষিকার আড়ম্বর করছো কেন? যদি ইচ্ছা হয়, বান্ধবীদের পাঠিয়ে যেমন করে পার আমার স্বাশুভীর মন বিগড়ে দাও। তাতে আমার কোন ক্ষতি নাই। গুরুজনেরা আমায় প্রদোষ কালে বনে গিয়ে শিবা-

ভোজন করাবার আশ্রয় করেছেন। তাই সখীর সঙ্গে যমুনার তীরে যাচ্ছি। তুমি অন্য কোন আশঙ্কা করো না।

এই উক্তিতে মৌভাগ্যানুচক কোন বিষয়ের উল্লেখ না থাকায় উভয়েরই লঘুত্বের সমতা প্রকাশ পাচ্ছে।

লঘুত্বিক

আপেক্ষিক ও আত্যন্তিক ভেদে লঘু দু প্রকার। আপেক্ষিক লঘু ও আত্যন্তিক লঘু।

আপেক্ষিক লঘু

যদি যুগ্মশ্রীদেব মধ্য তুলনায় একজনের চেয়ে অগ্রজনের লঘুতা কম হয়, তা হলে তাকে আপেক্ষিক লঘু বলে।

লঘু প্রথরা

কোন মানিনী যুগ্মশ্রী তার বান্ধবীকে বলেছিল—

প্রিয়সখি! তুমি মিথ্যা গুণকীর্তন করে, বন্দাবনতন্ত্রর শ্রীকৃষ্ণের প্রতি আমার আকর্ষণ বৃদ্ধি করে সন্তোষ লাভ করেছিলে। কিন্তু এখন যে তুমি নিজেও তটন্তা হয়ে উঠেছ। হে চট্টলে! সেই বনচোর জোর করে আমার লজ্জা ও ধৈর্য সম্পদ হরণ করে নিয়ে, আত্মসাৎ করেছেন। হায়! আমার মত দুঃখিজন যার দ্বারা বঞ্চিত হয়েও আবার বঞ্চিত হচ্ছে, তাঁর গুণকীর্তন করা কি তোমার উচিত?

লজ্জা, ধৈর্য—সবকিছু শ্রীকৃষ্ণ হরণ করেছেন, এই উক্তি দ্বারা প্রেমের আধিক্য বুঝায়। আবার বঞ্চিতজন পুনরায় বঞ্চিত হচ্ছে, এই কথায় নাট্যিকার লঘুত্বের অভাব সূচিত হয়। কিন্তু ‘মিথ্যা গুণকীর্তন’ ও ‘চট্টলা’ শব্দের প্রয়োগদ্বারা তার প্রথরতা ও লঘুত্ব দুই প্রকাশ পাচ্ছে।

লঘুমধ্য

কোন প্রিয়বান্ধবীর উক্তি—

দেবী চন্দ্রাবলি! যদিও গোষ্ঠরাজতনয় শ্রীকৃষ্ণ নবনব প্রেমসী-প্রিয়, তবুও রাধার বশীকরণ মন্ত্রের শক্তি আছে। কারণ, যে পর্যন্ত

শ্রীরাধা তাঁর নয়নগোচর না হন, সেই পর্যন্তই তোমার প্রতি তাঁর দাক্ষিণ্য বজায় থাকে। আমার কথা আর কেন জিজ্ঞেস করো ? আমার অদৃষ্ট মন্দ, তাই আমি শুধু ক্লেশই ভোগ করি। ১৩।

লঘুমুদ্রী

যদিও আমরা শ্রীকৃষ্ণের রূপ দেখতে চাই, তবুও চলো আমরা এখন এখান থেকে সরে যায়। ওই দেখ মাধবের সাহচর্য কামনায়, আপন গৌরদীপ্তিতে যমুনাতটে শোভাবিস্তার করে, চন্দ্রাবলী একাকিনী পর্যটন করছেন।

গোপাঙ্গনার এই উক্তিতে তার লঘু এবং মৃদুস্বভাব ছ-ই প্রকাশ পাচ্ছে। এখানে নায়িকা লঘুমুদ্রী।

আত্যন্তিকী লঘু

অন্যান্য নায়িকাগণ যার চেয়ে নূন নয়, অর্থাৎ তুলনায় যে সকলের চেয়ে লঘু, সে-ই আত্যন্তিকী-লঘু। এর অধিকাদি তিনটি প্রকারভেদ হলেও, মৃদুতাই বিশেষ লক্ষণ। ১৪।

কোন এক যুথেশ্বরী বললেন—গোষ্ঠদেবীগণ ! আজ আমার জন্মতিথি উৎসবে আমার পিতামাতা মাধবকে নিমন্ত্রণ করেছিলেন, আমিও আমার সখীদের আগ্রহে, সন্ধ্যাবেলায় তাঁকে কুঞ্জগৃহে আমন্ত্রণ করেছি। তাই তোমাদের কাছে আমার প্রার্থনা, তোমরা করুণা-পরবশ হয়ে, দ্রুতকাল অপেক্ষা করে আমার কুঞ্জ গৃহের শোভা সম্পাদন কর ; নইলে আমি অত্যন্ত লজ্জা পাবো।

এখানে, সখীদের আগ্রহে মাধবকে আমন্ত্রণ করেছি—এই উক্তিতে নায়িকার আপন অযোগ্যতা প্রকাশ পাচ্ছে। আর প্রত্যেক যুথেশ্বরীর কাছে সখীপাঠিয়ে তাদের নিমন্ত্রণ না করে, বিনয়ের সঙ্গে তাদের উপস্থিতির জগু অন্নয়ন করায়, নিজের অত্যন্ত লঘুতা প্রমাণিত হচ্ছে। অযোগ্যতার অর্থাৎ ব্যক্তিত্বের অভাব (want

of personality), এবং অত্যন্ত লঘুতা (light nature) বশত: নায়িকার মর্যাদাবোধ (sense of dignity) ক্ষুণ্ণ করেছে।

পর্যায়ক্রমে আত্মা বা প্রথম শ্রেণীর নায়িকা হলো আত্মাস্তিকী অধিকা। এরা মর্যাদা ও শালীনতাবোধ-সম্পন্ন (dignified) হয়। সমা ও লঘু প্রকৃতির নায়িকা যেমন আত্মা বা প্রথম শ্রেণীর হয় না, তেমনি ‘অধিকা’ পর্যায়ভুক্ত নায়িকাও কখনো অস্তিম শ্রেণীর (lowest grade-এর) হয় না। আবার অধিকা, সমা ও লঘু—এই ত্রিবিধ নায়িকাদেরও তিনটি শ্রেণীতে বিভক্ত করা যায়। ১৫।

‘আত্মাস্তিকী অধিকা’ ব্যতীত সকল নায়িকার মধ্যেই লঘু থাকা সম্ভব। এবং ‘আত্মাস্তিকী লঘু’ ভিন্ন অল্প সকল প্রকার নায়িকার মধ্যেই ‘অধিকার’ গুণ বিद्यমান থাকা সম্ভব। ১৬।

‘আত্মাস্তিকী-অধিকা’ নায়িকার একটি মাত্র সংজ্ঞাই হয়, তার বিবিধ প্রকারভেদ হয় না। ‘আত্মাস্তিক লঘু’র মধ্যে ‘অধিকার’ কোন গুণ থাকে না। এ ছাড়া, ‘সমা-লঘু’ চরিত্রের নায়িকাও হয়। অধিকা, সমা ও লঘু প্রকৃতির নায়িকাদের (যুথেশ্বরী) প্রথরাদি তিনটি পর্যায়ভেদে নয়টি শ্রেণীতে বিভক্ত করা যায়। এই ভাবে যুথেশ্বরী নায়িকাদের মোট বারোভাগে বিভক্ত করা যায়। ১৭।

যথা—

আত্মাস্তিকী-অধিকা	অধিক-প্রথরা	অধিক-মৃদ্বী
আত্মাস্তিকী-লঘু	সম-প্রথরা	সম-মৃদ্বী
সমা-লঘু	লঘু-প্রথরা	লঘু-মৃদ্বী
অধিক-মধ্যা		
সম-মধ্যা		
লঘু-মধ্যা		

দূতাত্ত্ব

পূর্বরাগাদি অবস্থায় কৃষ্ণের সঙ্গে নায়িকাদের মিলন বিষয়ে প্রস্তাব বা বক্তব্য উপস্থাপনে যে সহায়তা করে, সে দূতী। দূতী দ্বিবিধ—স্বয়ংদূতী ও আপ্তদূতী। ১।

স্বয়ংদূতী

ওৎসুক্য বশতঃ যাদের লজ্জা-সরম থাকে না, এবং অনুরাগে অতিশয় বিমোহিতা হয়ে নিজেই দয়িতের কাছে প্রস্তাব, অভিযোগ বা বক্তব্য উপস্থাপন (propose) করে, তারাই স্বয়ংদূতী।

প্রস্তাব বা অভিযোগ তিন প্রকার—বাচিক, আঙ্গিক ও চাক্ষুষ। ২।

বাচিকের অণু নাম ব্যঙ্গ। ব্যঙ্গ শব্দের গূঢ় তাৎপর্য অর্থভেদে ছ'রকম হয়। অর্থাৎ শব্দব্যঙ্গ ও অর্থব্যঙ্গ। শব্দব্যঙ্গ বলতে বুঝায় ব্যঙ্গাত্মক শব্দ প্রয়োগ বা উচ্চারণ। আর অর্থব্যঙ্গ বলতে বুঝায়—এমন কথা বলা, যার গূঢ় তাৎপর্যে ব্যঙ্গ নিহিত থাকে। ব্যঙ্গনা বৃদ্ধি ও অভিধাবৃদ্ধি, এই উভয়বিধ ব্যঙ্গের দ্বারা ই সন্তোষতৃষ্ণা ব্যক্ত হয়।

এই দুই ব্যঙ্গ আবার ছ'রকমের হয়। একটি সাক্ষাৎ, আর একটি ব্যপদেশ। একটি direct, আর একটি indirect ব্যঙ্গ। সাক্ষাৎ ব্যঙ্গে কৃষ্ণ বিষয়ক কথা কৃষ্ণকেই বলা হয়, আর দ্বিতীয়টিতে কৃষ্ণের 'পুরস্হ' অর্থাৎ সম্মুখস্থ কোন ব্যক্তি বা বস্তুকে সম্বোধন করে, ব্যপদেশে (in pretext) বা ছল করে, প্রকারান্তরে কৃষ্ণকে বলা হয়।

সাক্ষাৎ

সাক্ষাৎ অভিযোগ বিবিধ রকমের হয়; যথা—গর্ব, আক্ষেপ, যাক্ষা। ৩।

গর্বাঙ্ক শব্দব্যঙ্গ

মাধব ! আমি সাধী রমণীদের গীর্ধস্থানীয়া, ললিত-লাবণ্যে
বা ললিতার সঙ্গ হেতু গর্বিতা। তাই তোমায় ভাল কথা
বলছি যে, পথের মাঝখানে আমার সঙ্গে ভুজঙ্গতা (কামুকতা)
করো না। ৪।

গর্বাঙ্ক অর্থোথ ব্যঙ্গ

তমালশ্যামাঙ্গ শ্রীকৃষ্ণকে উদ্দেশ করে শ্যামা বলেছিল—

হেদে হে কালীয় কান্ন এ ঘোর গহনে।

বারে বারে চাও কেন কুটিল নয়নে।

আমি শ্যামা নামে নারী সতীর প্রধান।

বনমাঝে না করিহ মোর অপমান ॥

আমায় ছুঁখ দিলে বনহরিণীরা কুপিত হয়ে তোমায় তাড়ন
করবে। ৫।

আক্ষেপার্থক অর্থোথ ব্যঙ্গ

যথা—

হে কদম্ববনবিহারি !

আমার আঁচলে মল্লিকা ফুল কেমনে দেখিলে তুমি।

নিকটে আসিয়া কাড়িয়া লইলে কি করিতে পারি আমি ॥

যে দেখি তোমার বিপরীত রীত কাছে আসি কোন ছলে।

আমার গলার মুকুতার হার কাড়িয়া লইবে বলে ॥

গহন কাননে নাহি কোন জন অতিদূরে মোর ঘর।

কংহার শব্দ লইব এখন জ্বরে লাগিছে ডর ॥ —শচীনন্দন।

এখানে আক্ষেপোক্তির দ্বারা (by suggestions) নায়িকা
প্রকারান্তরে এই কথাই বুঝাতে চান যে, এই নির্জন বনে আমি
একাকিনী। আঁচলের ভিতর থেকে মল্লিকা ফুল বা গলা থেকে
মুকুতার কেড়ে নিলেও, আমার কিছু করবার নাই। আমার
বাড়ী দূরে, স্ততরাং হঠাৎ কেউ এসে পড়বার সম্ভাবনাও নাই। এ
অবস্থায় আমার নিয়ে তুমি যা খুসী তাই করতে পারো।

“ আক্ষেপার্থক শব্দোথ ব্যঙ্গ

কোন এক যুথেশ্বরীর উক্তি—

ওহে ব্রজধূর্ত ! তুমি আমার পথরোধ করো না। ওই অশ্বরের দিকে চেয়ে দেখ ! সম্মুখে উদ্ভিত নিবিড় মেঘ। আর চাঁদ দেখা যাচ্ছে না ; মেঘে তার সৌন্দর্য ঢাকা পড়েছে। এখনই বৃষ্টি নামবে। আমি লাল সূক্ষ্মবস্ত্রের কাঁচুলি পরেছি। হে কুটিল, তুমি দূরে সরে দাঁড়াও। আমার নতুন কাঁচুলি-পরা উজ্জল তনুশ্রী যতক্ষণ সিক্ত হয়ে বিবর্ণ না হয়, ততক্ষণ কি তুমি পথ ছাড়বে না !। ৬।

এখানে শব্দোথ ব্যঙ্গ এই যে, আমার বসনান্তে উন্নত পয়োধরের দিকে চেয়ে দেখ। তুমি কি আমার অঙ্গবাস সিক্ত না করে ছাড়বে না !

যাক্সা

- যাক্সা ছুরকমের হয়। এক, স্বার্থে অর্থাৎ নিজের জন্ত। আর এক, পরার্থে অর্থাৎ অন্যের জন্ত। ৭।

স্বার্থ যাক্সা--শব্দোথ ব্যঙ্গ

শ্রীরাধার উক্তি—

আমি পুষ্পের সন্ধানে এখানে এসেছি। কিন্তু তোমার মঞ্জুলতা আমার পথ রোধ করছে। তুমি অনুমতি কর, আমি তোমার মঞ্জুলতায় বিকশিত কুসুমচয় চয়ন করি।

নিগূঢ় অর্থ—হে কৃষ্ণ ! তোমার মঞ্জুলতা (সৌন্দর্য) আমার পুষ্পচয়নের পথে বাধা দিচ্ছে। তুমি ওই সৌন্দর্য সন্তোষের সুযোগ দিয়ে, আমার নিরুদ্ধ গতি অবোধ কর।

যাক্সা--অর্থোথ ব্যঙ্গ

এই বৃন্দাবনের গহীন অরণ্যে ভূজঙ্গেরা আমায় আক্রমণ করেছে ; সেইজন্য আমি ভীত হয়ে উঠেছি। তুমি কালীয় নাগের দ্বিত কণা অবলীলাক্রমে জয় করেছ। তাই আমি প্রহ্মানন্দ হৃদয়ে

তোমার শরণাপন্ন হলাম। তুমি এই নির্জন প্রদেশে একান্তে এমন একটি বিষহরী মন্ত্র আমায় দাও, যাতে আমার সর্পভয় দূর হয় নইলে আজ কাত্যায়নীর জন্ত আমার পুষ্পচয়ন করা হবে না।

নিগূঢ় তাৎপর্য—এই নির্জন বনে আমি কাম-ভুজঙ্গের আক্রমণে জর্জরিত। হে দয়িত, তুমি বিষহরণকারী মন্ত্র দিয়ে আমায় সেই কন্দর্প সর্পের দংশন থেকে রক্ষা কর। ৮।

বধা বা

শ্রীমতী বললেন—

হে যত্নাথ! লোকে তোমায় শ্রেষ্ঠ কীর্তিমান বলে গণ্য করে। সকলের সংরক্ষণের জন্ত তুমি এই নিবিড় অরণ্যে ঘুরে বেড়াও। আমি অবলা বধু, পথভুলে এই গভীর বনে প্রবেশ করেছি। তুমি দয়া করে পথ দেখিয়ে দাও, যাতে এই বধুজন নির্বিঘ্নে ব্রজে পৌঁছতে পারে। ৯।

তাৎপর্য—নির্জন বনে এককিনা শ্রীমতী ‘পথ দেখিয়ে দাও’ বলে, শ্রীকৃষ্ণের সঙ্গ ও সাহচর্য যাক্সা করছেন। আপন সম্ভ্রম রক্ষা করে, দয়িতের সঙ্গ-লিপ্সা প্রকাশ করছেন। এখানে যাক্সা তাঁর আপন স্বার্থে সাধিত হলো। এই ধরণের প্রস্তাবকেও ছল বা অছিলা বলা চলে।

পরার্থ যাক্সা—শব্দোৎপত্তি ব্যঙ্গ

কোন সখীর উক্তি—

হে কংসারি! আমার প্রিয়সখী তোমার বংশীধ্বনির নবমুখ্য কর্ণাঞ্জলি ভরে পান করে বিভ্রান্ত হয়ে উঠেছে। লঘুচিন্তা লোকের ভেত্তেজনায়ে সে আরো উত্তাল হয়ে উঠেছে। অনঙ্গ-জ্বালায় তার রূপলাবণ্য অত্যন্ত বিবর্ণ হয়েছে। এ বিষয়ে তুমি ধন্যস্তরি, এ কথা নিশ্চিত, তাই তোমার কাছে এলাম। তুমি তার এই বিষম ব্যাধির মহৌষধি দাও।

এখানে নায়িকা দূতী হয়ে পরের জন্ত ঔষধি প্রার্থনা করছে। কিন্তু ওই কন্দর্পদাহ রোগের ঔষধ লভাশূন্য নয়। সে ঔষধ আঙ্গিক, সূতরাং সেই অনঙ্গদাহনাশক ঔষধ প্রলেপ দূতীর অঙ্গেই দিতে হয়।

পরার্থ যাত্রা - অর্থোথ ব্যঙ্গ

কোন যুথেশ্বরীর উক্তি—

হে মাধব! আমি অস্বর্ষস্পৃশ্যা, কখনো ঘরের বাইরে আগি না। প্রিয়সখীর প্রণয়বশতঃ আজ দূতীর কাজে নিযুক্ত হয়ে তোমার কাছে এসেছি। কিন্তু এখানে আমার বেশীক্ষণ থাকা চলবে না; কারণ, রাত্রি হলে শশিকলাভ্রমে কোন ছুঁই চকোর এসে আমার মুখচন্দ্রিমার জ্যোৎস্নাসুধা পান করবে। ১০।

পরের জন্ত দূতী কাজে এসে, আপন রূপগরিমা প্রকাশ করে নায়িকা প্রকারান্তরে জানাতে চায় যে, সে সুন্দরী এবং শ্রীকৃষ্ণের সম্ভোগযোগ্যা।

ব্যপদেশ

অন্য উদ্দেশ্য নিয়ে, ছল করে কোন কথা বলার নাম ব্যপদেশ। অর্থাৎ নিজের উদ্দেশ্য বা অভিলাষ জানানোর জন্ত, অন্য কোন বর্ণনা বা ঘটনার অবতারণা করা। ১১।

শব্দোচ্চৈব ব্যঙ্গব্যপদেশ

কোন এক যুথেশ্বরী বিপক্ষীয়া অন্য-এক সখীর কথা বলবার ব্যপদেশে নিজের উৎকর্ষ প্রকাশ করে শ্রীকৃষ্ণকে বললেন—

হে মদমস্ত করীবর! তোমার সামনে ঘনরসপ্রিয় উল্লাসিনী সুরতরঙ্গিনী বিরাজিত। যেখানে প্রফুল্ল কুবলয় (নীলপদ্ম) সকল শোভা পাচ্ছে ও মস্ত হংসদল মধুর কলনিবাদ করছে। হায়! তুমি সেই সুরতরঙ্গিনী (গঙ্গা) পরিত্যাগ করে পঙ্কিল সলিলা কর্মনাশা নদীতে ক্রীড়া বা অবগাহন করছো কেন?

এখানে নায়িকা স্বয়ং দূতী হয়ে, অগ্র নায়িকার সঙ্গে নিজের তুলনা করে, নিজেকে স্বচ্ছতোয়া কুবলয়-শোভিতা সুরভরঙ্গিণী বলে অভিহিত করছেন, এবং বিপক্ষা নায়িকাকে বিদগ্ধ রসসম্ভোগের অযোগ্যা বলে উল্লেখ করছেন। এখানে প্রসঙ্গ-ব্যপদেশে নায়িকা এই কথাই বুঝাতে চান যে, বিদগ্ধ রস সম্ভোগের জ্ঞাত তিনিই সর্বোত্তমা নায়িকা। সুতরাং দায়িত্ব অগ্র নায়িকাকে পরিত্যাগ করে, তাঁকে নিয়েই সম্ভোগে রত হোন। অগ্র নায়িকা গুণহীন এবং কর্মনাশা।

অর্থোৎপন্ন ব্যঙ্গব্যপদেশ

হে কোকিল, তুমি মধুপগণের অনাব্রাত মধুময় অম্রমুকুল ত্যাগ করে, কেন বৃন্দাবনের চতুর্দিকে কাকলিমগ্ন হয়ে ঘুরে বেড়াচ্ছ!

ব্যপদেশে বক্তব্য, ইতস্তত পরিভ্রমণ না করে, এই অনাব্রাত চূতমঞ্জরীর মধুপানে রত হও। অর্থাৎ আমার সঙ্গে রসসম্ভোগে লিপ্ত হও। অগ্র কেউ আমার অঙ্গ স্পর্শ করে নি। আমি রসপূর্ণ উত্তমা নায়িকা।

লুব্ধ মধুপ বার নার্হ পায় গন্ধ। ফলফুলে বিকসিত সেইত মাকন্দ।

হেদে হে কোকিলবর ইহ রস ছাড়ি। কেন বা ফিরিছ তুহ এ কানন বেড়ি।

—শচীনন্দন।

পুরুষ বিষয়

কৃষ্ণ শুনেছেন, তবুও তিনি যেন শোনে ন, এমনি ভাব নিয়ে নায়িকা যখন তাঁকে শুনিতে সামনের কোন বস্তু বা জীবজন্তুর প্রতি কোন কথা বলে, বা প্রসঙ্গতঃ ব্যাজস্তুতি করে, তখন তাকে 'পুরুষ বিষয়' বলে। ১২।

শব্দোৎপন্ন ব্যঙ্গ

শ্রীকৃষ্ণ সম্মুখে আছেন দেখে, কোন স্বয়ং-দূতী যুথেশ্বরী নায়িকা মালভীলতাকে সম্বোধন করে বললেন—হে মালতি! অলিপ্তজনে

আমায় আহ্বান জানিয়েছ, তোমার পুষ্প চয়ন করবার জ্ঞাত। কিন্তু আমি যে প্রমত্ত চিন্তে কমনা করছি সম্মুখের ওই আমোদপূর্ণ কুসুমিত নাগকেশর (পুন্নাগ)।

এই উদাহরণের তাৎপর্য এই যে, নায়িকা মালতী বা মাধবী পুষ্পের জ্ঞাত আগ্রহাঘিতা নন। তিনি সম্মুখে অবস্থিত ওই নাগকেশর বা কুসুমিত পুরুষশ্রেষ্ঠ শ্রীকৃষ্ণের অভিলাষিণী।

অর্থোৎ ব্যঙ্গ—স্বয়ংদূতী পুরস্ক বিষয়

যথা-

কোন এক যুথেশ্বরী সম্মুখবর্তী শ্রীকৃষ্ণকে দেখে, ছল করে গিরি গোবর্ধনের উদ্দেশে বললেন—তোমার লতাগুলির পুষ্প চয়ন করা হয়নি, তাই সেগুলি মনোহর শোভা ধারণ করেছে। নিখিল বিহঙ্গ নিঃশব্দচিন্তে সেখানে বাসা বেঁধেছে। তাই আমার অভিলাষ হয়, কিছুক্ষণ তোমার অঙ্কে বিচরণ করি। তুমি এমন কোন উপায় কর, যাতে আমার মনোরথ পূর্ণ হয়।

এখানে অর্থোৎপন্ন ব্যঙ্গ এই যে, গিরিগোবর্ধনকে উপলক্ষ্য করে নায়িকা শ্রীকৃষ্ণের গোচরে স্বয়ংদূতী হয়ে, রতি প্রার্থনা করলেন। শ্রীকৃষ্ণও লতাপুষ্প-সুশোভিত গিরিকন্দরে গিয়ে গোবর্ধন দেবের উপাসনা করবার জ্ঞাত নায়িকাকে উপদেশ দিলেন। বললেন, তিনিই অভিলাষ পূর্ণ করবেন; অর্থাৎ সেই সুরম্য নির্জন গিরিকন্দরে গেলে, শ্রীকৃষ্ণ সেখানে মিলিত হয়ে, নায়িকার মনোবাসনা পূর্ণ করবেন।

অথবা—পুরস্ক বিষয়ে

কোন যুথেশ্বরী তাঁর সখীকে বললেন—

ব্রজপতিতনয় শ্রীকৃষ্ণ সাধ্বীগণের সতীত্ব-ব্রত হরণে প্রসিদ্ধ। তুমি অতি মুছলা, মুখের কথা বলেও তাঁকে বাধা দিতে পারবে না। সামনের বন অতি ভয়ঙ্কর, শতশত গ্রন্থিল (জটিল গ্রন্থিবৃক্ষ) লতায়

সমাচ্ছন্ন, পথ অতি দুর্গম (সহসা কোন ব্যক্তির পক্ষে সে বনে প্রবেশ করা সম্ভব নয়)। হায়! আমি মূঢ়, তাই এই লতাসকুল পথের শত বাধা অতিক্রম করে এসে, শ্রান্ত হয়ে পড়েছি। এখন আর বাড়ী ফিরতে পারবো না। কি করি? এখানে যে তাঁরই সম্মুখে ঘুরে বেড়াতে হবে!

অর্ধোন্মত্ত ব্যক্তি এই যে, নায়িকাকে তার সখীর সঙ্গে এই ধরনের কথা বলতে দেখে, শ্রীকৃষ্ণ তাকে অভয় দিয়ে বলবেন—তোমার কোনো ভয় নেই। কুঞ্জের ভিতরে এসে কিছুক্ষণ পুষ্প-শয্যায় বিশ্রাম কর। আমি অঙ্গসেবা করে তোমার শ্রান্তি দূর করে দিই।

শ্রীকৃষ্ণের সম্মুখে সখীকে উদ্দেশ্য করে, নায়িকা যে কথাগুলি বলেছেন, তাতে পুরুষ বিষয় অবলম্বন করে নিজের সন্তোষলিপ্সার প্রতি নায়কের দৃষ্টি আকর্ষণ করাই মুখ্য উদ্দেশ্যরূপে প্রতীত হয়েছে।

আঙ্গিক

নায়কের (শ্রীকৃষ্ণের) সম্মুখে নায়িকার কতকগুলি অঙ্গ সজ্জিত, ইঙ্গিত বা ব্যবহারিক লক্ষণ প্রকাশ, যা মিলনের অভিলাষ প্রকাশ করে, তাকে আঙ্গিক বলে।

আঙুল ফোটানো, কৃত্রিম সন্ত্রমে সঙ্কুচিত হওয়া, বা হরিত গতিতে চলে যাওয়া, শঙ্কা বা লজ্জাবশতঃ বারবাব গাত্র-আবরণ বিছলিত করা, পায়ের আঙুল দিয়ে মাটিতে লেখা বা দাগ কাটা, কর্ণ-কণ্ঠ্যন, ললাটে তিলক আঁকা, বেশ বা কেশরচনা বিষয়ে সজাগ দৃষ্টি রাখা, বৃকের বসন যথাযথ ভাবে থাকা সত্ত্বেও বারবার সংস্থাপন করা, বা কবরীতে হাত দিয়ে বারবার সেটি সুবিছলিত রাখবার চেষ্টা, ভ্রুভঙ্গি, সখীকে আলিঙ্গন পাশে বন্ধ করা, অধর দংশন, কণ্ঠহার ওষ্ঠের উপর তুলে গুঁড়ু রচনা করা, অলঙ্কার শিঞ্জন, বাহ্যমূল অনাবৃত করা, দয়িতের নাম লেখা, কোন

বুকের গায়ে লতা জড়িয়ে দেওয়া, ইত্যাদি কাজ যদি দয়িতের সামনে বা তাঁর গোচরে করা হয়, তাহলে সেগুলিকে প্রেম নিবেদনের আঙ্গিক বলে।

অঙ্গুলি ফোটান

সুবলের প্রতি শ্রীকৃষ্ণের উক্তি :

সখা এই সতীপ্রবরা সুনেন্দ্রা বিশাখার সামনে দাঁড়িয়ে আমি তাঁর অঙ্গসঙ্গলাভের লোলুপতায় ক্লান্ত হয়ে উঠেছিলাম। কিন্তু আমায় দেখে, সে হাতের আঙুলগুলি ফোটাতে লাগলো ; সেই সঙ্গে আমার সম্ভোগলিপ্সার ব্যসনগুলিতেও যেন সে মোচড় দিচ্ছিল।

আঙুলের ফাঁকে আঙুল দিয়ে, নায়িকা যখন নায়কের সামনে তাঁর বরাঙ্গুলিগুলি ফোটান, তখন নায়কের চিত্তে অনঙ্গনিবেদন সঞ্চারিত হয়। নায়ক মিলনপিয়াসী হয়ে ওঠেন।

ব্যঙ্গসঙ্গ্রহাদিবশত : অঙ্গসম্বরণ

ব্রজহরিণাক্ষী আমায় সামনে দেখে, তাঁর বস্ত্রাবৃত বুকের উপর আবার বসন টেনে দিয়ে আচ্ছাদন করছেন ; অবগুষ্ঠিত মুখে আবার অবগুষ্ঠন টেনে দিচ্ছেন। এই ভাব দেখে মনে হয়, অনঙ্গশরে পরাভূত হয়ে তাঁর চিত্ত বিকল হয়েছে। ১৩।

চরণদ্বারা ভুলেখন

সুবলের প্রতি শ্রীকৃষ্ণের উক্তি :

বন্ধু, আমার নয়ন যখন নতুন করে ব্রজসুন্দরীর কাছে অতিথি হলো, তখন দেখলাম যে আমার দেখে তিনি নম্রমুখী হয়ে কমনীয় ভঙ্গীতে পায়ের অঙ্গুষ্ঠ দিয়ে মাটিতে কি লিখছেন ! সে লিখন সামান্য নয়। মনে হলো, অনঙ্গনির্দেশে তাঁর দেহের উপর আমায় অধিকার দিয়ে, তিনি পাট্টা লিখে দিচ্ছেন। আমার চিত্তকে তাঁর

কুচশৈলতটের সন্ধিস্থলে নিক্ষেপ করে, তিনি যেন কীলকের দ্বারা
অবরুদ্ধ করলেন।

কর্ণকণ্ঠয়ন

রত্নাঙ্গুলীর অগ্রভাগ কর্ণবিবরে স্থাপন করে, শ্রীমতী কর্ণকণ্ঠয়ন
করছিলেন। কঙ্কনের শিঞ্জনধ্বনিতে যেন কামদেবের তূর্য্যনাদ
উঠছিল; উচ্চলিত কনককুণ্ডলে অপূরুপ সৌন্দর্য লীলায়িত হচ্ছিল।
সেই কথাই বারবার আমার মনে হচ্ছে।

নায়কের সামনে নায়িকার কর্ণকণ্ঠয়ন অনঙ্গ নিবেদনের একটি
অর্থপূর্ণ ইঙ্গিত।

তিলকক্রিয়া

কুন্দবল্লীর উক্তি :

হে শিখণ্ডশেখর ! তোমায় দেখে, গান্ধর্বিকা তাঁর শরদিন্দুনিভ
সুন্দর মুখখানি সিন্দূরবিন্দুতে উজ্জ্বল করছেন। ঐষং বক্র
করে, বারবার তোমার দিকে দৃষ্টি নিক্ষেপ করছেন। দোহুল্যমান
কুণ্ডলহুতি গুণ্যুগে নিপতিত হচ্ছে; মনে হয়, তাঁর চিন্তে অনুরাগ-
অঙ্কুর নিহিত আছে। সেই অনুরাগের রেখাই যেন ফুটে উঠছে ওই
সিন্দূর তিলকে।

বেশক্রিয়া

দয়িতকে দেখে, হুটুচিন্তা কমলনয়না পালী কর্ণে মধুশ্রাবী
লবঙ্গপুষ্পস্তবক ধারণ করছে এবং বেশবিজ্ঞাসে মনোযোগিনী
হচ্ছে। নায়িকার এই প্রকার বেশক্রিয়া অনঙ্গ-নিবেদনের
দ্যোতক। ১৫।

দ্রাক্ষম্পন

নায়ককে দেখে, নায়িকা যখন তার অনঙ্গধনু সদৃশ দ্রাক্ষমণ্ডল
বশ্পিত করে বা নাচায়, তখন নায়কের চিন্তে মদনবাণ নিক্ষিপ্ত
হয়। নায়কের মস্ত হস্তীর মত হৃদয় চিন্তা নায়িকার মুখচন্দ্রিমায়
আবদ্ধ হয়।

সখীআলিঙ্গন

রতিমঞ্জরীর প্রতি রূপমঞ্জরীর উক্তি—

দেখ, চিত্রার নয়নপথে মাধব নূতন অতিথি হয়েছেন। চিত্রা অপাঙ্গ বিস্তার করে, তার কঠোরকূচযুগশালী বক্ষে সখীকে আলিঙ্গন পাশে আবদ্ধ করছে। আলিঙ্গনকালে, তার হাতের কঙ্কণ রিনিঝিনি শব্দে শ্রীকৃষ্ণের চিত্তে সম্ভোগ লিপ্সা বৃদ্ধি করছে।

সখীতাড়ন

সুবলের উক্তি—

সখা, বিশাখার প্রতি আর বশীকরণ প্রয়োগের উপায় খুঁজতে হবে না। উনি তোমায় আত্মমন সমর্পণ করেছেন। কারণ, তোমার পাদপদ্মের প্রান্তে তড়িৎ অপেক্ষাও চঞ্চল দৃষ্টি নিক্ষেপ করে, তিনি পুষ্পের আঘাতে আপন সখীকে তাড়না করছেন।

অধরদংশন

নায়ক যখন নায়িকার দৃষ্টিপথে পতিত হন, এবং নায়িকা নায়ককে দেখে কৃত্রিম কোপে অধর দংশন করে, তখন সুস্পষ্ট সম্ভোগ-নিবেদন সূচিত হয়। ১৬।

হারগুঞ্জন

যার সুন্দর নেত্রপদ্ম শরৎ-পদ্মকেও হার মানায়, গ্রীবা বক্র করে সেই নায়িকা যখন দয়িতের প্রতি বিলোল দৃষ্টি নিক্ষেপ করে এবং আপন কণ্ঠহার তুলে ওষ্ঠের উপর রাখে, নায়কের চিত্ত অনঙ্গ উত্তাপে দ্রবীভূত হয়।

অলঙ্কার শিঞ্জন

নায়িকা যখন নায়ককে দেখে নিজের কঙ্কণ প্রভৃতি শিঞ্জিত করে, তখন নায়কের মনে মনোভবের বা কামদেবের শাসন ডঙ্কা মুহূর্হু বেজে ওঠে।

শ্রীকৃষ্ণ সুবলকে বললেন—শ্যামলা আজ দূর থেকে আমায় দেখে তার মণিকঙ্কণের ঝংকার তুলতে লাগলো। সেই ঘনঘন অলঙ্কার শিঞ্জনের ডমরু-নিনাদে আমি অনঙ্গরাজের শাসনে শঙ্কিত হয়ে উঠলাম। ১৭।

বাহুমূল প্রকাশ

বৃন্দাবনের বনে বনে যেসব ফলযুক্ত লতা মনোহর শোভা বিস্তার করে কোকিলদের আনন্দ বর্ধন করছে, কল্যাণি শ্যামা, তুমি তার চেয়েও অধিক সৌন্দর্য বিকাশ করছো তোমার বলয়শোভিত বাহুলতাছুটি উর্ধ্বে তুলে। সেই উদগ্র বাহুমূলে শোভিত ফল ছুটি কৃষ্ণ কোকিলের আনন্দিত চিত্তকে ব্যাকুল করে তুলছে।

নায়কের সামনে নায়িকা যখন অকারণ বারবার খোঁপায় হাত দেয়, বা অথ কোন অছিলায় বাহুমূল প্রদর্শন করে, তখন নায়কের চিত্ত নায়িকার প্রতি আকৃষ্ট হয়। নায়িকার এরূপ কার্যকলাপও অনঙ্গনিবেদনের একটি বিশেষ আঙ্গিক। ১৮।

নামান্তিলেখন

খাক বৃন্দে! এখানে আর তোমার দৌত্যের প্রয়োজন নেই। কারণ, তোমার ওই ইন্দুমুখী প্রিয়সখী আমায় দেখে তার গণ্ডুলকে কুঙ্কুম দিয়ে আমার নাম লিখছেন। ১৯।

নায়ক বা নায়িকার চিত্ত যখন রতিনিবেদনে উৎশুক হয়, তখন আনমনে নায়ক দয়িতার বা দয়িতা নায়কের নাম আপন অঙ্গে লেখে। কখনো দেউল-গাত্রে, প্রস্তর ফলকে, বৃক্ষকাণ্ডে, গিরি-কন্দরে বা এখানে-ওখানে প্রেমাস্পদের নাম বা উভয়ের নাম পাশাপাশি লেখে।

তরুগাত্রে স্তম্ভস্থাপন

হে গোপসখা অর্জুন! ব্রজপদ্মিনীর রূপ দেখে আমি যখন আর্ত হয়ে উঠেছিলাম, তখন তিনি আমায় দেখে, তমাল তরুতে যুঁইলতা জড়িয়ে দিচ্ছিলেন।

নায়িকা যখন এইভাবে দয়িতের সামনে বৃক্ষের গায়ে কোন লতা জড়িয়ে দেয়, দয়িতের অঙ্গসংলগ্ন হয়ে সন্তোগলিঙ্গা মিটাবার পর্যাপ্ত ইঙ্গিত প্রকাশ পায়।

ঠিক এই ধরনের আঙ্গিক প্রকাশ পায়, আবার নায়িকা যখন নায়ককে দেখে, বা তার সম্মুখীন হয়ে, শাড়ীর আঁচল থেকে সূতা টেনে নিয়ে আনমনে আঙুলে জড়ায়। কখনো বা চুলের গুচ্ছ নিয়েও নায়িকা আঙুলে গ্রাসি বাঁধে।

তরুণাত্রে লতাস্থাপন, আঙুলে শাড়ীর আঁচলের সূতা জড়ানো বা চুলের ফাঁস দেওয়া প্রভৃতি কাজগুলি যখন নায়িকা করে, তখন তার চোখের দৃষ্টি অধিকতঃ নায়কের দিকেই থাকে। এরূপ কাজের দ্বারা নায়িকার নিভৃত মনের অনঙ্গনিবেদন সূচিত হয়।

চাক্ষুষ

চোখের হাসি, চোখের অর্ধমুদ্রা, নেত্র ঘূর্ণয়ন, নেত্রকোণ সঙ্কুচিত করা, বক্রদৃষ্টি নিক্ষেপ, বামচক্ষে নায়কের দিকে দৃষ্টিপাত করা, এবং কটাক্ষ ইত্যাদির নাম চাক্ষুষ।

নায়িকার চোখের দৃষ্টি তার মনোভাবের একটি বৃহত্তম মাধ্যম। বিবিধ দৃষ্টিভঙ্গিতে নায়িকার প্রেমনিবেদনের ইঙ্গিত ফুটে ওঠে। সন্তোগলিঙ্গা প্রকাশে চোখের এই দৃত্যক্রিয়া শুধু নায়িকার পক্ষেই প্রযোজ্য নয়, নায়কের ক্ষেত্রেও একই ভাবে প্রযোজ্য। এই চাক্ষুষ ভাব নিবেদনকেই ‘কটাক্ষ’ বলা হয়। ২০—২৪।

পৃথিবীর সর্বদেশে সর্বকালে চোখের নীরব ভাষা (Speechless message) প্রেমনিবেদনের শ্রেষ্ঠ দৃত্যক্রিয়া করে এসেছে।

কটাক্ষ

চোখের তারার যে গতি লক্ষ্যস্থল পর্যন্ত গিয়ে, আবার ফিরে আসে, এবং ক্ষিপ্ত যাতায়াতের মধ্যে অল্পক্ষণ লক্ষ্য সংলগ্ন হয়ে,

মাধুর্য, বৈচিত্র্য বা চমৎকারিত্ব সৃষ্টি করে, সেই দৃষ্টি-বিবর্তনকে রসজ্ঞ ব্যক্তির কটাক্ষ বলেন। ২৫।

সখা

শ্রীরাধার প্রতি কৃষ্ণের উক্তি :

হে গোঁরি ! তোমার আখিতারকার কি বিচিত্র গতি ! কালো ভ্রমরীর মত আমার কর্ণোৎপল পর্যন্ত এসে, আবার ফিরে যাচ্ছে। তার শক্তি সবকিছুকেই পরাভূত করেছে। তার অপক্লপ গতি লীলায় আমার চিত্ত আকুলিত হচ্ছে। হে গান্ধর্বিকে ! তোমার ওই কটাক্ষের চমৎকারিত্বে আমি নিজেই আত্মবিস্মৃত হয়েছি। চন্দ্রাবলীর কথা কি ! তাকে তো ভুলতেই পারি।

স্বয়ংদূতীর যে লক্ষণগুলির কথা বলা হলো, অসংখ্য লক্ষণের মধ্যে সেগুলি দিগ্‌দর্শন মাত্র। এই লক্ষণগুলি যথোচিতভাবে প্রণিধান করলে দেখা যাবে যে, স্বয়ংদূতীর মত শ্রীকৃষ্ণ নিজেও কখনো কখনো অভীষ্ট প্রার্থনা করেছেন। এখানে শ্রীমতীর আখি তারকাকে ভ্রমর বলে অভিহিত করে, মাধব প্রকারান্তরে তাঁর প্রণয়বশতা স্বীকার করেছেন। ২৬।

উল্লিখিত বাচিক, আঙ্গিক ও চাক্ষুষ ইত্যাদি স্বয়ংদূতাক্রিয়া যদি নায়িকার চেষ্টিত বা বুদ্ধি প্রয়োগে সাধিত হয়, তাহলে সেগুলিকে ‘স্বাভিযোগ’ বলা হয়। আর উক্ত প্রণয়নিবেদনের ইঙ্গিত বা লক্ষণগুলি যদি স্বাভাবিক বা স্বতঃস্ফূর্ত (spontaneous) হয়, তা হলে রসজ্ঞগণ সেগুলিকে ‘অনুভাব’ বলে অভিহিত করেন। ২৭।

অনুভাব বলতে সাধারণতঃ মনোভাব-প্রকাশক ভঙ্গীকে বুঝায়। অর্থাৎ, রতিভাবের অনুগামী ভাবস্ফূর্তি, যার ভিতর দিয়ে মনের বাসনা প্রতিকলিত হয় (symbolic expression of desires)।

‘অনুভাব’ অধ্যায়ে এ বিষয়ে বিস্তৃত আলোচনা দ্রষ্টব্য।

আপ্তদূতী

যে দূতী প্রাণান্তেও বিশ্বাস ভঙ্গ করে না, এবং স্নিগ্ধা ও বাগিনী অর্থাৎ স্নেহশীলা ও বাক্যানিপুণা, সেই দূতীকে গোপসুন্দরীদের আপ্তদূতী বলে।

নায়ক ও নায়িকার মিলন বিষয়ে নিঃস্বার্থভাবে ঘটকালি করাই আপ্তদূতীর লক্ষণ।

আপ্তদূতী তিন প্রকার—অমিতার্থী, নিস্বার্থী এবং পত্রহারী।

অমিতার্থী

নায়ক বা নায়িকার মধ্যে যে-কোন একজনের ইচ্ছিতের দ্বারা তার মনোভাব জেনে, যে দূতী দুজনকে মিলিত করবার উপায় উদ্ভাবন করে, তাকে অমিতার্থী বলে। ২৮।

নিস্বার্থী

নায়ক বা নায়িকার যে-কোন একজন কর্তৃক নিয়োজিত হয়ে বা তার কাছ থেকে কার্যভার পেয়ে, যে দূতী আপন যুক্তি-প্রয়োগের দ্বারা উভয়ের মিলন ঘটায়, তাকে নিস্বার্থী বলে। ২৯।

যথা—

মাধব ইহ বৃন্দাবনবাসী গুণবর্তী এক আছয়ে মণিরাশি।

ভূহ যে কঠিন মণি, কি বলিব তোম্ব। ইহ সব আওলু ধিক বহু মোম্ব ॥

পত্রহারী

যে দূতী নায়ক বা নায়িকার পত্র কিংবা সংবাদ বহন করে মিলনের যোগাযোগ ঘটায়, তাকে পত্রহারী বা পত্রহারিকা বলে।

যথা—

শুন শুন ওহে রসিক নাগর বড়ই রসিক তুমি।

তোমার নিকটে রাখার সন্দেশ কহিতে আইছ আমি ॥

রাই অচেতনে ঘুমাঞা সদনে চরিব হইয়া মনে।

কপট করিয়া তুমি সেথা যেয়া তায়ে ছব দেও কেনে ॥

হে সুকুন্দ ! ব্রজসরোজাক্ষী শ্রীরাধা আমার নিভূতে ডেকে এই কথা তোমার কর্ণগোচর করবার নির্দেশ দিলেন যে, তিনি গভীর নিদ্রায় মগ্ন ছিলেন, কিন্তু তুমি হঠাৎ স্বপ্নাবেশে তাঁর অন্তরে প্রবেশ করে তাঁকে লাক্ষিতা করলে কেন ! এ কাজ কি তোমার উপযুক্ত হয়েছে ?

উল্লিখিত আপুদূতীদের আবার বিবিধ শ্রেণীতে বিভক্ত করা যায়। যথা—শিল্পকারী, দৈবজ্ঞা, লিঙ্গিনী, পরিচারিকা, ধাত্রী, বনদেবী এবং সখী। ৩০।

শিল্পকারী

কোন এক দূতী এসে শ্রীকৃষ্ণকে বললেন—

হে গোপীনাথ, চিত্রা আমার রূপের প্রশংসা করে আমার বলেছিল—তুমি তো শিল্পী, এমন একটি রূপ চিত্রিত কর যা লোকোত্তর, যার তুলনা এ জগতে আর নেই।

চিত্রার আগ্রহে, আমি একটি ফলকে সেই চিত্র আঁকতে গিয়ে তোমারই রূপ অঙ্কিত করে, তাকে দেখিয়েছিলাম। তারপর চিত্রা তোমার সেই চিত্রিত রূপ দেখে, এমন বিচিত্রদশা প্রাপ্ত হলো যে, সহচরীদের চোখে সে নিজেই যেন এক চিত্র হয়ে উঠলো। ৩১।

তাহার বচনে পটের উপরে তোমারে লেখিলু আমি,
সে রূপ দেখিয়া অখির হইল, আসি দেখসিরা তুমি।

দৈবজ্ঞা

শ্রীরাধার প্রেরিত কোন দৈবজ্ঞা বা গণংকারিণী দূতী এসে শ্রীকৃষ্ণকে বললেন—

মাধব ! বৃষরাশি এবং শুভ রোহিণী নক্ষত্রে তোমার জন্ম। আমি গণনা করে দেখলাম, তোমার আজ সুখসমৃদ্ধি লাভের দিন। তাই তোমার কাছে এলাম। তুমি আমার সঙ্গে এসো, পরম-সুন্দরজ্যোতিষী বিধুমুখী বিদ্যাংলতা আজ তোমার অঙ্গসংলগ্ন হয়ে ক্ষুর্ভ হবে।

লিজিনী

বুলাবনে তাপসী-বেশধারিণী পৌর্ণমাসীর মত আশুদূতীকে লিজিনী বলে। যথা—

পৌর্ণমাসী শ্রীরাধাকে বললেন—

চিন্তা না করিহ মনে মিলাইব তব মনে আজি আমি ব্রজেন্দ্রনন্দন।

আমি হই তপস্বিনী, কোন মন্ত নাহি জানি, দূতী হঞা করিল গমন।

শ্রীকৃষ্ণের সঙ্গলাভের জন্ত রাধিকা যখন উদ্গ্রীবচিন্তা ও অবসাদিনী হয়ে উঠেছিলেন, পৌর্ণমাসী তাঁকে আশ্বাস দিয়ে বললেন—‘বৎসে সরলা! তুমি কোনো চিন্তা করো না। আমি নিশ্চয়ই ব্রজরাজতনয়কে বশীভূত করে আনবো। আমি চতুরা ও প্রবীণা সন্ন্যাসিনী—মন্তসিদ্ধা। আমি দূতী হয়ে সে কাজের ভার নিলাম। যেমন করে হোক, মাধবের সঙ্গে আজ আমি তোমার মিলন ঘটিয়ে দেবো।

পরিচারিকা

লবঙ্গমঞ্জরী ও ভানুমতী প্রভৃতি সখীরা শ্রীরাধার পরিচারিকা দূতী রূপে পরিগণিতা। এঁরা সেবাপরায়ণা এবং শ্রীমতীর প্রতি অপরিসীম শ্রীতিসম্পন্ন। ৩২।

যথা—শ্রীমতীর প্রতি লবঙ্গমঞ্জরীর উক্তি—

দেবি! সহচরগণের পরিষদ থেকে আকর্ষণ করে, তোমার গুণের মণিমালা গলায় পরিয়ে, এই দেখ, মধুরিপুকে এনেছি তোমার নয়ন সম্মুখে। এখন বলো, এ কিছরী আর কি করবে?

ধাত্রেয়ী

যে ধাত্রীকণ্ঠা নায়িকার দূতীর কাজ করে, তাকে ধাত্রেয়ী বলে।

শ্রীকৃষ্ণের প্রতি ধাত্রেয়ী দূতীর উক্তি :

মধুনন্দন! আমি শ্রীরাধার ধাত্রীকণ্ঠা। তোমায় একটি অদ্ভুত কথা বলবার জন্ত এসেছি। হিরণ্যগৌরী রাধা কৃষ্ণগতচিন্তা হয়ে

চাঁদের কলার মত পাণ্ডুর বর্ণ ধারণ করেছে। তুমি তার চিত্তালা দূর কর।

‘রাধার ধাত্রেয়ী আমি শুন বনমালী। আমার নিকটে আইস কিছু বাক্য বলি।
যদ্যপি রাধা মোর কৃষ্ণে রুচি কৈল। সেই হৈতে সোনার বর্ণ মলিন হৈল ॥’

বনদেবী

শ্রীমতীর প্রতি কৃষ্ণ-প্রেরিতা বহুরূপা দূতীর উক্তি—

আমি জ্ঞাতিতে বনদেবী। শ্রীতিতে কখনো তোমার ভগিনী,
কখনো বা হিতোপদেশ দানে তোমার মাতামহী, কখনো প্রিয়সখী
কখনো বা ননদিনী। আমার কথা শোন, একবার প্রসন্নভাবে আমার
দিকে চাও, ক্রভঙ্জিতে ইঙ্গিত কর, যাতে তোমার বল্লভকুঞ্জর মাধব
এসে ওই হৃদয়জাত কুস্তহটিকে নিবিড় আলিঙ্গনে নিপীড়িত করতে
পারেন।

সখী

বান্ধবীকে যারা নিজের চেয়েও বেশী ভালবাসে, কখনো কোন
ছল করে না; পরস্পরের বিশ্বাসভাজন, সমান বয়সী এবং
বেশকুসুমিতে সমতুল—তারা ই পরস্পর সখী।

নায়িকার প্রতি সখী অতিশয় শ্রীতি ও সহানুভূতি সম্পন্ন হয়
বলে, সে তার হৃৎক সহিতে পারে না; প্রণয় বিষয়ে মিলন
প্রচেষ্টায় অতিশয় যত্নশীল হয়ে ওঠে।

শ্রীমতীকে বিরহকাতরা দেখে, বিশাখা একদিন কৃষ্ণের নিকট
গিয়ে বলেছিলেন—

‘তোহারি নয়নবাণ বড়ই পাবন, তাহে যদি রাই মরি যার।

অনুগম গতি তব পাওব হৃন্দরী, সে নহি শোচয়ি তার।

মাধব, এক মহাব বড় শেল।

সেো রূপ নাহি হেরি এ সব জগজন নয়ন অনর্থক ভেল।’

তোমার নয়নবাণে আহত হয়ে প্রিয়সখী শ্রীরাধা যদি মরে
মরুক তাতে হৃৎক নাই। কিন্তু শ্রীমতীর ওই নয়নের দৃষ্টি না

ধাকলে, সকলের নয়নই যে ব্যর্থ হয়ে যাবে। ওই অম্লগম নেত্র শোভার অভাবে জগৎ নেত্রহীন হয়ে পড়বে। অতএব, হে মাধব! তুমি তাড়াতাড়ি গিয়ে তার জীবনরক্ষা কর।

নায়ক ও নায়িকা উভয়ের ক্ষেত্রেই সখী দূতীর কাজ করে।
বাক্য এবং ব্যঙ্গ ভেদে দূত্য দু'প্রকার হয়। ৩৪।

কৃষ্ণপ্রিয়ার বাচ্যদূত্য

শ্রীমতীর প্রতি তুঙ্গবিজ্ঞার উক্তি :

সখি! তোমার এই নতুন অবস্থা যে অমুভব করে নি, তার জীবনই বৃথা। তুমি আমায় শাপ দাও, মার, তর্জন গর্জন কর, দূরে ঠেলে ফেলে দাও, বা ঘর থেকে বের করে দাও—যা করবে তাই কর; আমি সত্য বলছি, আমার মন মানে না। আমি শ্রীকৃষ্ণের কাছে গিয়ে সাধ্য সাধনা করবো। ৩৫।

কৃষ্ণপ্রিয়ার ব্যঙ্গদূত্য

শ্রীমতীর প্রতি সখীর উক্তি :

সুন্দরি! তোমায় দেখে আমার মনে বিতর্কের উদ্ভব হয়েছে। তুমি কি কৃষ্ণবর্ণ অগুরুচন্দনের সৌরভ কামনা করছো? যদি তাই হয়, তাহলে উদ্দেশ্য সিদ্ধির জন্ত আমি চন্দন ব্যবসায়ী সেই বণিকের কাছে যাবো।

ব্যঙ্গার্থ, তুমি কি অগুরুসৌরভশালিনী হয়ে শ্রীকৃষ্ণকে কামনা করছো, অথবা কৃষ্ণের অঙ্গসুরভি কামনা করছো। তা হলে উদ্দেশ্য সিদ্ধির জন্ত আমি সেই নৈগম বা নাগরের কাছে যাই। (নৈগম শব্দে নাগর ও বণিক উভয়কেই বুঝায়।

যথা বা

শ্রীমতীকে উৎকণ্ঠিতা দেখে, কোন এক সখী বলেছিল—

হে চকোরি! তুমি কি তুফার অন্ত্যস্ত কাতর হয়েছ। তা হলে, ভাল কথা বলছি শোন। ওই দেখ, পূর্বাচলে জ্যোৎস্নাবিস্মল

চন্দ্রদেব চকোরীর প্রতীক্ষা করছেন। অবিলম্বে সেখানে যাত্রা কর, নিশ্চয়ই তোমার তৃষ্ণার নিবৃত্তি হবে।

এখানে দৃষ্টান্তচ্ছলে সখী শ্রীরাধাকে অভিসারে যাবার উপদেশ দিচ্ছে। ৩৬।

শ্রীকৃষ্ণের প্রতি বাচ্যদৃষ্ট্য

বিশাখার উক্তি :

হে ব্রজসুন্দর! শ্রীমতীর সৌন্দর্যের কথা তোমায় আর কি বলবো। ত্রিলোকে তাঁর মত অতুলনীয় সৌন্দর্য আর কারো নাই। এই সৌন্দর্যেই ত্রিভুবন সুন্দর হয়ে উঠেছে। শ্রীমতীর এই অভূতপূর্ব সৌন্দর্যের সৃষ্টি করে বিধাতা নিজেই বিষ্ময়ে অভিভূত হয়েছিলেন।

অথ ব্যঙ্গ

শ্রীকৃষ্ণের প্রতি ব্যঙ্গ ছরকমের হয়। প্রেয়সীদের সামনে এক রকম, তাঁদের অনুপস্থিতিতে আর এক রকম। এই দুই ব্যঙ্গ আবার সাক্ষাৎ এবং ব্যপদেশভেদে প্রত্যেকটি ছ'রকমের হতে পারে। অর্থাৎ ব্যঙ্গ মোট চার রকমের হয়। ৩৭।

কৃষ্ণপ্রিয়ার সম্মুখে কৃষ্ণের প্রতি সাক্ষাৎ ব্যঙ্গ

শ্রীকৃষ্ণের প্রতি বিশাখার উক্তি :

হে নবঘনশ্যাম! দেখ, ওই কলাপিনী কিছুতেই আমার কাছে আসছে না। আমি ওকে বশীভূত করতে পারলাম না। তুমি আমার প্রতি প্রসন্ন হও, ওই স্নিগ্ধা রাধাকে নিজের হাতে ধর। ৩৮।

এখানে ব্যঙ্গ এই যে, কলাপিনী মেঘবিলাসিনী ময়ূরীর সঙ্গে তুলনা করে, সখী নবঘনশ্যাম শ্রীকৃষ্ণের প্রীতি-অমুরক্তা স্নিগ্ধা শ্রীরাধার প্রতি নায়কের দৃষ্টি আকর্ষণ করছেন। অবশীকৃত্য নায়িকাকে বশীভূত করার, মিলনের অধিক উৎকর্ষ সাধিত হয়।

৩৯। ব্যঙ্গ বা উক্তব্য সম্বন্ধে—

বিশাখার উক্তি :

হে মাধব ! বৃন্দাবনে অনেক ক্ষীতাজিনী যুবতী আছে, যারা তোমার সম্ভোগ-অমুকুল। কাজেই আমার অগ্রবর্তিনী এই কোপন-স্বভাবা সহচরীকে আর ঘাঁটিও না। তুমি শঠকুলের গুপ্ত, একথা নিশ্চয় জানেন, তাই উনি ক্রোধমুখে অর্ধচন্দ্রাকৃতি কটাক্ষের যোজনা করছেন।

ব্যঙ্গোদ্দেশে বিশাখার বক্তব্য এই যে, বৃন্দাবনে যে সব পীনোন্নতপয়োধরা ও গুরুনিতম্বিনী যুবতী আছে, তারা বিদগ্ধা নয়। সেইজন্য তারা রতিবামা হতে পারে না। সুতরাং ইচ্ছা করলেই সেখানে সহজে বিলাস বাসনা সিদ্ধ হবে। কিন্তু শ্রীমতী বিদগ্ধা ও তেজস্বিনী, তাঁকে ক্ষুব্ধ করলে কাম-সংগ্রাম উপস্থিত হবে এবং সহজে তাঁকে জয় করা সম্ভব হবে না। ৩৯।

ব্যাপদেশ ব্যঙ্গ

অর্থাৎ ছলে অশ্ল বস্তুকে উপলক্ষ্য করে স্বগত ভাব প্রকাশ করা।

বিশাখা বললেন—ওই দেখ, মাধবীলতা কদম্ব-পরিমলে আকৃষ্ট হয়ে উৎফুল্ল ও উৎকালিকা হয়ে উঠেছে। আপন আশ্রয়বৃক্ষ পরিত্যাগ করে, সে কদম্ববৃক্ষে আশ্রয় নেবার জন্য উৎকণ্ঠিত হয়ে উঠেছে।

তাৎপর্য : হে হলধরপ্রিয় ! মাধবী (শ্রীরাধা) তোমার প্রেমে মুগ্ধা হয়ে, আপন (ধর) পতিকের পরিত্যাগ করে তোমার আশ্রয় গ্রহণ করবার জন্য উৎকণ্ঠিত হয়ে উঠেছে। ৪০।

কৃষ্ণপ্রিয়ার পরোক্ষে শ্রীকৃষ্ণের প্রতি সাক্ষাৎ ব্যঙ্গ

চম্পকাবলির কোন সখী তার অসাক্ষাতে শ্রীকৃষ্ণের কাছে এসে বললে—যুকন্দ ! বৃন্দাবনে যে সব ব্রজাঙ্গনা আছে, তাদের তিতর একমাত্র চম্পকাবলিই তোমার অমুকুলা। তুমি যেমন উজ্জল কৌন্তভমণিতে স্নানোত্তিত, সেও তেমন পদ্মিনীবৃক্ষের শিরোমণি

তুমি সুরভীগণ পরিবৃত, সে সৌরভবতী। তোমার নবজলধর-
কান্তি, তার বিহ্যৎতুলা ছাতি। তাই চম্পকাবলি ছাড়া অন্য কোন
নারিকা তোমার শোভা পায় না। অতএব হে মুরারি, তোমাদের
উভয়ের মিলন অতি বাঞ্ছনীয়। ৪১।

ব্যপদেশ ব্যঙ্গ

ললিতার উক্তি—

হে মধুসূদন ভ্রমর! ওই যে উন্মূক্ত শৈলরাজি বিরাজ করছে,
তার উত্তরে বিস্তৃত সরোবর আছে। সেই সরোবরের তীরে যে উন্নত
বন বিরাজিত, তার মাঝখানে সুন্দর একটি লতামণ্ডপ আছে। সেই
লতামণ্ডপের দ্বারদেশে চারিদিক সৌরভে আমোদিত করে, পুষ্পিতা
মালতী লতা তোমার পথ চেয়ে আছে। তুমি সেখানে যাও।

হলব্যঙ্গ এই যে, হে মধুসূদন কৃষ্ণ! ওই তুঙ্গশৃঙ্গ গিরি-
গোবর্ধনের উত্তরে, সরোবরতীরে বনের মধ্যে ত্রীরাধা তোমার পথ
চেয়ে আছেন। তুমি অভিসারে যাও, বিলম্ব করো না। ৪২।

দূতী নিয়োগ

দয়িত্বের সঙ্গে মিলন কামনায় নারিকারা যেভাবে দূতী নিয়োগ
করে, তার প্রথা দ্বিবিধ—ক্রিয়াসাধ্য এবং বাচিক। ক্রিয়াসাধ্য বলতে
বুঝায়, মুখে কিছু না বলে কার্যকলাপের দ্বারা (by actions
and gestures) দূতী বা সমীকে বুঝিয়ে দেওয়া হয় যে, দূতের
প্রয়োজন। আর বাক্যের দ্বারা (by instructions and
expressions) দূত কার্যের জন্য সমীকে কাছে যে মনোভাব প্রকাশ
করা হয়, তা বাচিক (verbal)।

ক্রিয়া সাধ্য

অর্থাৎ হাবভাবে নারিকার উৎকণ্ঠিতা অবস্থা লক্ষ্য করে, সমী
নিজে থেকেই দূত কার্যে এগিয়ে যায়; নারিকার উপদেশের
অপেক্ষা রাখে না।

আকাশে নবমেঘের উদয় দেখে, তরী দুটি বাছ প্রসারিত করে সেই নব জলধরকে আলিঙ্গন করবার জন্য উদ্ভত হয়েছেন। মুখে কিছু না বললেও, সহচরী তাই দেখে, নিজেই শ্রীকৃষ্ণের কাছে গেল তাঁর সেই উৎকণ্ঠার কথা জানাতে। ৪৩।

ক্রিয়াসাধ্য দূত্য ছ'রকমের, অমুভব ও সাঙ্গিক। এটি অমুভব।

সাঙ্গিক

যথা—

শ্রীকৃষ্ণের মুরলীধ্বনি শুনে শ্রীমতীর অঙ্গ স্বেদসিক্ত হয়ে উঠলো। তাঁর সেই স্বেদসিক্ত তনু রোমাঞ্চ শিহরণে কণ্টকিত হয়ে উঠেছিল। তিনি সখীকে তাই দেখালেন। মুখে কিছু বলতে হলো না। উৎকণ্ঠিত তনুই যেন সখীকে দূত্য কাজে নিয়োগ করলো। সখী স্বয়ং গেল মাধবের কাছে শ্রীমতীর অবস্থা জানাতে।

অঙ্গের এই স্বেদোদ্গম ও রোমাঞ্চই সাঙ্গিক নামে অভিহিত।

‘মাধব বেণু শুনল যব রাধা। ছদয়ে বিধায়িল মনসিজ বাধা ॥

কিছু নাহি বোলল দূতীক পাশ। তহু মাঝে হোয়ল পুলক বিকাশ ॥

এছন দেখি দূতী করি অহুমান। নাগর আনিত্তে করল পয়ান ॥’

বাচিক

পূর্বের মত বাচ্য ও ব্যক্তভেদে বাচিকও ছ'রকমের হয়।

বাচ্য

যথা, বিশাখার প্রতি শ্রীমতী—

সহচরী! তুমি আমার প্রাণস্বরূপা। তুমি যেমন নিপুণা তেমনি বাক্পটুয়সী। আমায় লঘুর চেয়েও লঘু (অত্যন্ত ছোট) প্রতিপন্ন না করে, যেমন করে পারো, আমার প্রতি মাধবকে অল্পরস্কর করো।

ব্যক্ত

ব্যক্ত ছ'রকমের, শব্দমূল ও অর্থমূল। ৪৪।

শব্দমূল

শ্রীরাধা বললেন—হে যুগাক্ষী বৃন্দে ! আমি অশ্রু কোন প্রকার কলাকৌশল বা চাতুরি শিক্ষা করতে চাই না। শুধু ‘কেশবন্ধন’ অনুশীলন করতে চাই। অর্থাৎ ব্রজসুন্দরীগণের (কেশবন্ধনং) করবী বন্ধন অভ্যাস করতে চাই। শব্দমূলগত অর্থ, সুন্দর অবিশিষ্টা ব্রজনারীগণের ‘কেশবং ধনং’ (কেশবরূপী ধনকে) আয়ত্ত করতে চাই। ৪৫।

অর্থমূল ব্যঙ্গ

অর্থমূল ব্যঙ্গ বলতে স্বীয় পতির প্রতি আক্ষেপ, গোবিন্দের প্রেংসা এবং দেশাদিবৈশিষ্ট্য প্রভৃতি বুঝায়। ৪৬।

স্বীয় পতির প্রতি আক্ষেপ

যথা—বিশাখার প্রতি পূর্বরাগবতী শ্রীমতীর উক্তি :

‘দেখ দেখে সখি, বিধাতা করেছে বিষম চরিত পতি ।
তাহাতে যখন না হইল মন, কি মোর হইল মতি ॥
এ রূপমাদুরী নিতিনিতি বাড়ে, নিকটে যমুনা বন ।
তাহা দেখি মোর অন্তর পুড়িছে, ধৈর্য না মানে মন ॥’

বিধিবিড়ম্বনা বশতঃ আমার চিন্তে ঘোরপ্রকৃতি পতির প্রতি কোনো রুচি নাই। আমার রুচিশীল মন দিনদিন শ্রীকৃষ্ণের প্রতি আকৃষ্ট হচ্ছে। পোড়া দেহ শাসন মানে না। যমুনাপারের ওই বন আমার কন্দর্প অগ্নি-প্রজ্জ্বলিত করে। ৪৭।

গোবিন্দের প্রেংসা

‘কুলবতী হ’রা পরপুরুষের ভক্তি করা নহে ভালি ।
তুহু প্রাণসখী পরাণ সমান তেঞি সে ভোমারে বলি ॥
কহ না মাদুরী আছে তার গারে, বার এক কথা দেখি ।
অরিয়া সিনান হইল আমার, কিরিয়া না জানে আখি ॥’

সখি! শ্রীকৃষ্ণের কি অপরূপ রূপমাধুরিমা! ওই রূপের ছটায় আমার নয়ন মূহু হয়ে আসে। এমন ভুবনমনোমোহন রূপ এ জগতে বিরল। ৪৮।

সখি! তুমি দূত্যা কাজে অতি চতুরা। নাগর ব্রজরাজের নন্দন। আমার সেই শিশুতা এখন আর নাই। দেখো, যেন প্রমাদে না পড়ি। ৪৯।

দেশাদি বৈশিষ্ট্য

‘মনোরম বৃন্দাবনে বহুলতাত্ত্বগণে পুষ্প লাগি করিল ভ্রমণ।

অঙ্গ মোর ভাজে প্রমে, আমি রহি এইস্থানে, প্রম দূষ করি কতক্ষণ।

একাকী রহিব আমি, ক্ষত চলি যাও তুমি, কালিন্দীর তীরে সখি যাও।

তাহা করে বলমল বহুবিধ সুকমল তাহা মোর হাতে আনি দাও।’

দেশাদি ও স্থল বিশেষের সৌন্দর্যের প্রতি সখীর দৃষ্টি আকর্ষণ করার প্রচ্ছন্ন উদ্দেশ্য এই যে, দয়িত্বের সঙ্গে রতিবিহারের এই উৎকৃষ্ট স্থান। তাই নায়িকা বলছেন—সখি, তুমি যাও, মিলন ঘটাবার ব্যবস্থা কর। ৫০।

যথা বা—

শ্রীরাধা বিশাখাকে বললেন, সখি! যমুনা-পুলিনের ওই বনতুমি যেমন বাসন্তী সুষমা ও চন্দ্রালোকে মধুময় হয়ে উঠেছে, তেমনি আমার তনুলতাও নববয়স ও যৌবনমাধুর্যে ভরপুর হয়ে উঠেছে; এখন আমার কি করা উচিত, তাই বল। ৫১।

শ্রীমতী আদেশ না করলেও, প্রসঙ্গচ্ছলে যে মনোভাব প্রকাশ করলেন, তাতে সখীর বুঝতে বাকী রইল না যে, মিলন সংঘটনের জন্য দূত প্রয়োজন। যথা—

‘এই যমুনার বন তাহে বক্ষিণ পবন, তাহে পুনঃ চাঁদ প্রকাশিত।

প্রিয় সখী আছে সঙ্গে, ভ্রমণ করিহু যদে, কর এখন বা হয় উচিত।’

সখী প্রকরণ

নায়ক-নায়িকার প্রেমলীলা ও বিহারাদি সম্যক্ রূপে বিস্তারিত করতে যে সহায়তা করে এবং বিশ্বাসরত্নের পেটিকাশ্বরূপা অর্থাৎ অত্যন্ত বিশ্বাসের পাত্রী, সে-ই সখী। সখীদের প্রকৃতিগত ভেদ সূষ্ঠুভাবে বিবেচনা করা প্রয়োজন।

সখীদের মধ্যে যে-যে সখী একই যুগের অন্তর্ভুক্ত, তাদের ভিতরেও অধিকা, মধ্যা এবং মৃদ্বী প্রভৃতি প্রকৃতিভেদ অনুসারে পার্থক্য হয়।

সখীদের মধ্যে যার প্রেম-সৌভাগ্য ও গুণের আধিক্য সবচেয়ে বেশী, তাকে 'অধিকা' বলা হয়। আত্যস্তিকা, আপেক্ষিকা, সমা ও লঘু ইত্যাদি পর্যায়ক্রমে সখীদের বারোটি ভাগে বিভক্ত করা হয়েছে। এ বিষয়ে বর্ষ অধ্যায়ের শেষে বিস্তৃত বিবরণ দেওয়া হলো।

গুণানুযায়ী পর্যায় : । ১—১২।

১ আত্যস্তিকাধিকা-প্রথরা	৭ সমপ্রথরা
২ " মধ্যা	৮ " মধ্যা
৩ " মৃদ্বী	৯ " মৃদ্বী
৪ আপেক্ষিকাধিকা-প্রথরা	১০ লঘুপ্রথরা (আপেক্ষিকী ও আত্যস্তিকী)
৫ " মধ্যা	১১ " মধ্যা
৬ " মৃদ্বী	১২ " মৃদ্বী

বামা

যে নায়িকা সব সময়েই মান করতে চান এবং মানের শৈথিল্য ঘটলেই কুপিতা হয়ে ওঠেন, ফলে নায়ক তাঁকে বশীভূত করতে পারেন না, সেই নায়িকাকে 'বামা' নায়িকা বলা হয়। বামা নায়িকা প্রায়ই নায়কের সঙ্গে রূঢ় ব্যবহার করে থাকেন।

বামা সখী নায়িকাকে মান বিষয়ে উত্তেজিত করে।

দক্ষিণা

যে নায়িকা মান করে থাকতে পারেন না, যুক্তি দিয়ে নায়কের সঙ্গে কথা বলেন, এবং নায়কের স্তুতিবাক্যে প্রশংসা হন, তাঁকে ‘দক্ষিণা’ নায়িকা বলে।

দক্ষিণা সখী যুক্তি দ্বারা নায়িকার মান প্রশমিত করে, তাঁকে মিলন বিষয়ে উৎসাহিত করে। ১৩—১৫।

দূত

যুগ্মসখীদের দূতকার্যের নিমিত্ত নায়িকা ও সখীদের প্রকৃতিগত গুণাগুণ বিশেষ ভাবে বর্ণিত হলো।

দূত কার্য বলতে বুঝায়, দূরবর্তী নায়ক ও নায়িকার মধ্যে মিলন বা অভিসারের যোগাযোগ স্থাপন করা। ১৬।

নায়িকা দূতী ও সখী

নায়িকাগণের মধ্যে যিনি প্রথম বা আত্যন্তিক্যাদিকা তাঁকেই নিত্যনায়িকা বলা হয়। আর মধ্যস্থতা তিনটি অর্থাৎ আপেক্ষিকাদিকা, সমা ও আপেক্ষিকা লঘু—এই তিন নায়িকার পক্ষে নায়িকাও ও সখীও হতে পারে। ১৭।

তিন প্রকার নায়িকার মধ্যে যে প্রধানা, অর্থাৎ আপেক্ষিকাদিকা তাঁকে নায়িকা প্রায় বলা হয়। আর দ্বিতীয়া, অর্থাৎ সমাকে ‘দ্বিসমা’ বলা হয়। নিজের চেয়ে যে ‘অধিকা’ তার ক্ষেত্রে দ্বিসমা নায়িকা সখীর কাজ করে। গুণপর্যায়ের নিজের চেয়ে যে লঘু, তার সম্পর্কে সে নায়িকাও করে। আর তৃতীয়া, অর্থাৎ আপেক্ষিকী লঘু, প্রায় সকল ক্ষেত্রেই সখীও করে। যে পঞ্চমী, অর্থাৎ আত্যন্তিকী লঘু, তাঁকে নিত্যসখী বলা যায়। কেননা, তার চেয়ে আর কেউ লঘু নাই; সুতরাং তার পক্ষে নায়িকাও করা সম্ভব হয় না। ১৮।

আত্মা অর্থাৎ আত্যন্তিক্যাদিকার ক্ষেত্রে আপেক্ষিকাদিকা প্রকৃতি সখীরা সব সময় দূতীই হয়ে থাকে, কখনো নায়িকা হয় না। আর

পক্ষ্মী অর্থাৎ আত্যন্তিকী লঘুর ক্ষেত্রে পূর্বোক্ত সকল সখীই নায়িকা হয়, কিন্তু তারা কখনো দূতী হতে পারে না।

নিত্যনায়িকা

যাঁকে যুথেশ্বরী বলে উল্লেখ করা হয়েছে, তিনিই নিত্যনায়িকা। এই নিত্যনায়িকা অত্যন্ত আদরের পাত্ৰী বলে, তাঁর দ্বারা মুখ্যদূতীর কাজ সম্ভব হয় না। যুথভূক্তা সখীদের মধ্যে যে তাঁর অত্যন্ত অমুরক্তা, যুথেশ্বরী তাকেই দূত্যকার্যে নিয়োগ করেন। তাছাড়া, কখনো কখনো যুথেশ্বরী অতিশয় প্রণয় বশতঃ তাঁর সখীর দৌত্য করেন। কিন্তু এই ধরনের দৌত্য গোণ। তাকে মুখ্য বলা যায় না। দূরবর্তী স্থানে যাতায়াত না করে যে দূত্যসিদ্ধি হয়, তাকে গোণদূত্য বলে।

গোণদূত্য হ'রকমের, যথা—সমক্ষ এবং পরোক্ষ।

সমক্ষদূত্য

সমক্ষ গোণদূত্য হ'রকম—সাক্ষেতিক ও বাচিক। ১৯।

চোখের কোণ, ক্র বা আঙুলের ইসারায় ত্রিক্ষককে আপন সখীর কাছে যাবার জ্ঞাপ্ত ইঙ্গিত করে, দূতী নিজে আত্মগোপন করে। এর নাম সাক্ষেতিক সমক্ষদূত্য। ২০

যথা—

‘স্বন্দরী জানলু তৌহার চরিত। কাহু সঞে করলি নয়ন ইঙ্গিত।

তুঁহ সে লুকাওলি কুঙ্কি মাঝ। মুখে হুঃখ দেখল নাগর রাজ।

যদি ইহ না রহত লতাতরু আলি। কি করিত মনু গতি শঠ বনবালী।’

এই উদাহরণে অধিক মুখীর দূত্যক্রিয়া প্রকাশিত হলো। ২১।

বাচিক দূত্য

বাচিক দূত্য তিন রকমের—(১) ত্রিক্ষক ও সখী উভয়ের অগ্রে (উপস্থিতিতে) বা সামনে ত্রিক্ষককে বলা, (২) ত্রিক্ষকের পশ্চাতে

(অনুপস্থিতিতে) বা আড়ালে সখীকে বলা, এবং (৩) সখীর পশ্চাতে বা আড়ালে শ্রীকৃষ্ণকে বলা। ২২।

যথা—

সখী ও কৃষ্ণের সামনে কৃষ্ণের প্রতি শ্যামলার উক্তি :

‘আমি গোপনারী আর কি করিব উপকার, এক উপকার এবে করি।
এই মোর সহচরী বনফুল করে চুরি, তারে আমি আনি দিল ধরি।
এই ধরি দিহু চোর আর দোষ নাহি মোর। আমি গৃহে করিএ গমন।
যে ইচ্ছা হয় তোমার, কর সেই প্রতিকার, তুমি ব্রজরাজের নন্দন।’

এটি অধিকপ্রখরা-দূত্যের উদাহরণ। ২৩।

শ্রীকৃষ্ণের পশ্চাতে সখীর প্রতি উক্তি—

শ্রীমতী ছলপূর্বক চিত্রার দৌত্য করলেন।

‘আমার মুহূর্তা ঝুরি ভূমিতে পড়িল ছিঁড়ি তুমি তাহা লহ অবৈষিয়া।
মালা গাঁথে ফুল লঞা তাহে ব্যগ্রচিত্ত হঞা হরি আছে আনমন হরা।
বিস্মিত হয়াছে কাম, পড়েছে মোহন বেণু, গড়ি যায় ধূলির উপরে।
কপটে নিকটে যায় বেণু রাখি লুকাইয়া বড় দুঃখ দিয়াছে আমারে।’

এই উদাহরণে ‘অধিকমধ্যার’ দূত্য প্রকাশিত হলো। ২৪।

সখীর পশ্চাতে শ্রীকৃষ্ণের প্রতি বাচিক দূত্য। ২৫।

যথা—

‘গহন কাননে কুসুম আনিতে গেছে মোর সহচরী।
নির্জন বনে একাকী পাঠাঞা ভাবি আমি মূরহরি।
সেই সহচরী কিছুই না জানে যুবতী কুলেরবালা।
তারে একাকিনী পথ মাঝে পাঞা তুমি না করিহ আলা।’

হে অম্বর। তুমি এখন আমার গৃহ থেকে যাচ্ছ। আমি
সখীকে গহন বনে পুষ্পচয়ন করতে পাঠিয়েছি। তোমার কাছে
আমার এই প্রার্থনা, সেই অভিমুখ্যাকে নির্জন বনে একাকিনী পেয়ে
তুমি যেন তাকে খেদাবিতা করো না।

পরোক্ষদূত

এক সখী যখন অন্তকোন সখীকে কৃষ্ণের হাতে সমর্পণ করেন বা ছল করে কোন সখীকে কৃষ্ণের কাছে পাঠান, তখনই হয় তাঁর পরোক্ষ দূত।

‘চল, আমরা বৃন্দারণ্যে গিয়ে চাঁদ দেখে আসি’-এই কথা বলে কলাবতী তাঁর সখী রঙ্গদেবীকে আগে আগে নিয়ে বৃন্দারণ্যের গহন কুঞ্জ মধ্যে প্রবেশ করলেন।

শঙ্কিতা হয়ে রঙ্গদেবী বললেন -‘কিন্তু চাঁদ কৈ, সখি ? তুমি যে আমায় অঙ্ককার কুঞ্জবনের পথে নিয়ে চলেছ !’

কলাবতী বললেন—‘তোমার দ্বিতীয় প্রতিমূর্তি শশিকলা জীঘাংসী আজ গুরুজনের আদেশে গৃহে অবরুদ্ধা। সুন্দরি ! জীমতীর কোন অসম্মতি নাই। তিনি সব সময়ই তোমার কল্যাণ কামনা করেন।—তুমি এগিয়ে যাও। ওই দেখ, কৃষ্ণের অঙ্গসৌরভে আকৃষ্ট হয়ে ভ্রমরেরা গুঞ্জন করে’ পথের সংকেত সূচনা করছে। তুমি আর বিলম্ব করো না।’

‘মধুকর নিকর তুয়া পথ দরশে। তুয়া লাগি মাধব বনমাঝে বিলসে।

না কক বিলম্বন খঞ্জন নয়নে। তুরিতে চলহ অব কুঞ্জকি ভবনে ॥’

ব্যপদেশ বা ছল

কৃষ্ণের নিকট লিখিত কোন পত্র বা প্রেরিত কোন উপহার নিয়ে, কিংবা নিজের প্রয়োজনে, অথবা কোন আশ্চর্য জিনিস দেখবার অহিলায় গিয়ে উপস্থিত হওয়াকে ব্যপদেশ বা ছল বলে।

শ্রীকৃষ্ণের প্রতি রসালমঞ্জরীর উক্তি : (লেখ্য ব্যপদেশ)

‘আমি জীমতীর পত্রবাহিকা দূতী। তুমি আমার সঙ্গে লাম্পট্য করবার চেষ্টা করছো কেন ? দূতীর এ ধর্ম নয়। সে প্রাণত্যাগ করতে পারে, কিন্তু সখীর জন্ত দৌড়্য করতে এসে, নিজে বেহুসান করতে পারে না।’

শ্রীকৃষ্ণ বললেন, ‘তুমিই বা দ্বিতীয় রীতি পরিত্যাগ করে বাম চক্ষের বক্রদৃষ্টিতে আমার দিকে চেয়ে আছো কেন? তোমার সখীর লেখা এনেছ, পড় শুনি। শুল্লরি! এই কুঞ্জভবনে সুগন্ধ পুষ্পে আবৃত কোমল শয্যা রচিত আছে। অলিকূল মৃদুগুঞ্জে তোমায় আহ্বান করছে।’ ২৬।

উপায়ন ব্যপদেশ

শ্রীকৃষ্ণের প্রতি রতিমঞ্জরীর উক্তি :

‘ছাড় ছাড় নাথ, বসন আঁচল নিছনি লইয়া মরি ।
গহন কাননে একেলা পাইয়া হট না করিহ হরি ॥
নিরঞ্জন বন বড়ই গহন হইল সাঁঝের বেলা ।
স্বাধার বচনে এখানে আইছ তোমা দিতে বনমালা ॥
তুয়া গুণাগুণ জানি হে সকল, কারে বা করিব ঘোষ ।
এখানে আসিয়া ভাল না করিল, নাহিক তোমার ঘোষ ॥’

‘নিজ-প্রয়োজন’ ব্যপদেশ

শশিকলার প্রতি মলিতার উক্তি :

‘গত রাত্রে কদম্ববনের কুঞ্জকুটীরে শ্রীমতী ভুলকরে যে মুক্তামালা কেলে গিয়েছিলেন সেই মালা তোমায় আনতে বলেছিলেন । কিন্তু তুমি তা না নিয়ে গৃহে ফিরে এলে যে ।

তাৎপর্য—নিজের প্রয়োজনীয় জিনিস আনবার ছলে, শ্রীমতী তাঁর প্রিয় সখীকে কদম্ববনের কুঞ্জকুটীরে পাঠিয়েছিলেন । উদ্দেশ্য ছিল, নির্জন কদম্ববনের কুঞ্জमध्ये শ্রীকৃষ্ণের সঙ্গে সেই প্রিয়সখার মিলন ঘটানো । ২৭।

‘আশ্চর্য-দর্শন’ ব্যপদেশ

আশ্চর্যদর্শনহলে সখীকে কোন নির্জনস্থানে পাঠিয়ে শ্রীকৃষ্ণের সঙ্গে তার সম্বোগ ঘটানার প্রয়াস ।

সরোবরের তীরে একটি অলিষ্ঠায় হংসের অক্লুত কেলি দেখবার

জগু জীমতী তাঁর কোন প্রিয়সখীকে পাঠিয়েছিলেন। উদ্দেশ্য ছিল, জীকৃষ্ণের সঙ্গে সখীর মিলন ঘটানো। সখী কিরে এলে, জগু সখীদের সামনে পরিহাস করে জীমতী বললেন—

‘মুখে আছে ভুজঙ্গিনী কণ্ঠেতে অমরমণি গিয়ে আছে সুধাকরণ।
মুখেতে মানিক থলে হেন শ্রামবর্ণ হংসে দেখিবারে করিলে গমন ॥
আমার বচনে গেলে আশ্চর্য দেখিয়া আইলে বিলম্ব হইল কতক্ষণ।
আশ্চর্য দেখিলে তুমি, সত্য কয়েছিলাম আমি, কোপ কর কিসের কারণ ॥’

অধরে মুরলী—যা কামসর্পের প্রতীক, কণ্ঠে কৌস্তভমণি, মস্তকে ময়ূরপুচ্ছের চম্পকলাশোভিত চূড়া, ওষ্ঠে অক্ষুট মধুর বাক্যে মানিক বারে; এ হেন ভ্রমরশ্রাম কৃষ্ণ সরোবরতটে কেলিরত ছিলেন। তাঁকে দেখবার জগু, ছল করে জীমতী তাঁর সখীকে পাঠালেন, যাতে শ্রামের সঙ্গে সখীর মিলন হয়।—এই ধরনের দূতাকে ‘আশ্চর্য দর্শন’ ব্যপদেশ দূত্য বলা হয়। ২৮।

নায়িকাপ্রায়াত্রিক

আপেক্ষিকাদিকাদিত্রয় অর্থাৎ অধিক প্রথরা, অধিক মধ্য ও অধিক মূষী—এই তিন প্রকার নায়িকা যদি ‘লঘু’ নায়িকার জগু স্পষ্টরূপে দূত্য করে, তা হলে তাকে নায়িকাপ্রয়া দূত্য বলে। ২৯।

অধিকপ্রথরা দূত্য

নিজের চেয়ে লঘীয়সী সখীকে ললিতা বললেন—‘শঙ্কলি। বহুদিন পরে আজ তুমি আমার হাতে পড়েছ। অমন আকুল হয়ে মিনতি করলে আর কি হবে। তোমায় অভিসার করিয়ে করিয়ে শীর্ণ করে তবে ছাড়বো। যে কষ্ট আমায় দিয়েছ, তার শোধ নেবো।

হে সখি! লতাকৃষ্ণের সীমানায় এসে, কেন থমকে দাঁড়াছো? তোমার ভাগ্য খুব প্রসন্ন, দেখছি! এখনই রতিনস্তোগে সিংহের মত পরাক্রমশালী শ্রাম তোমার কুচকুস্তস্থিত যুক্তাহার ছিন্নবিচ্ছিন্ন করে ছড়িয়ে দিবেন।’ ৩০।

অধিকমধ্যা দূত্যা

বিশাখা তাঁর চেয়ে লঘু কোন সখীকে শ্রীকৃষ্ণের সান্নিধ্যে এনে বললেন—সখি ! তুমি বাক্যের দ্বারা আমার সঙ্গে বারবার ছলনা করেছ, চোখের ইসারায় শ্রীকৃষ্ণকে এনে আমার অঙ্গ সন্তোষ করিয়েছ ; আজ সেই কৃষ্ণকে বশীভূত করে আমি তোমায় পাইয়ে দিলাম। হে পদ্মিনি ! এখন সেই কৃষ্ণহস্তী তোমার উপর যথেষ্ট লাম্পট্য বিস্তার করুন।’ ৩১।

‘নিতিনিতি কাহ্নসনে ইজিত করিঞা, তাকর নিকটে দেয়লি মনু ধরিঞা।
আছ পাণ্ডলু তুহে কুঞ্জকি নিলয়ে, হরি কাছে দেয়লু কি করব বিনয়ে ॥’

অধিকমুখী দূত্যা

কোন এক বিনীতা সখীর প্রতি চিত্রার উক্তি :

‘সখি ! যমুনাতীরের পুষ্পিত কুঞ্জবনে তুমি আমায় প্রতিদিন অভিসার করিয়েছ। কিন্তু আমি অতি অকৃতজ্ঞা, তাই তোমার জ্ঞান কিছু করতে পারি নি। একবার যদি তোমায় নিয়ে গিয়ে ওই কুঞ্জের ভিতরে প্রবেশ করাতে পারি, তা হলে সেই ঋণ থেকে কিছুটা নিষ্কৃতি পাই।’

‘কত কতদিন গহন কাননে কাহ্ন মিলাইলে তুমি।

অনেক বতনে ভোমার সে ধার শুধিতে নারিহু আমি।

এবে উপকার কি করিব আর, আনিল কুঞ্জবনে।

মনের হরষে এ নব কাননে বিহর হরির সনে ॥’

দ্বিসমাজিক

সমপ্রকৃতি প্রথরা, মধ্যা ও যুধী—এই তিন জ্ঞেয়ীর নায়িকা বা সঙ্গী পরম্পরের নায়িকা ও দূতী হু-ই হতে পারে। এদের দ্বিসমাজিক বলা হয়। ৩২।

সমপ্রথরা দূত্য

অন্য সখীর প্রতি এক সখীর উক্তি :

‘সখি ! যদিও আজ তোমার পালা, তবুও আজ আমিই দূত্য করবো। তুমি আর অমন করে ক্র নাচিও না। তনুলতা সৌন্দর্য মণ্ডিত করো, অর্থাৎ প্রসাধন করে অঙ্গশোভা বৃদ্ধি করো। তোমার বামচক্ষু আজ নৃত্য করে আমায় অনুরোধ করছে ! আমি গোষ্ঠে চললাম মাধবের যুগয়ায় ; তোমার জুতা মাধবকে ধরে আনতে।’ ৩৩।

‘তোমাতে আমাতে মনের পীরিতি স্থখে থাকি নিতিনিতি।

তুমি একদিন আমি একদিন পরস্পর হই দূতী ॥

তোমার নয়ন কহে পুনপুন আনিতে নাগর বরে।

ভঙ্গি ছাড় তুমি, এই যাই আমি কাহ্ন আনিবার তরে ॥’

সমমধ্যা দূত্য

কমলা তাঁর সখী শশিকলাকে বললেন—‘আজ তুমি মুরারির হাতে পড়েছ। আমি এখন এখান থেকে যাই।’

শশিকলা বললে—‘কি আশ্চর্য ! আমি না তোমার দূতী ! কেন বৃথা এ জল্পনা করছো ?’

পরস্পরের এই আলাপন শুনে, শ্রীকৃষ্ণ প্রণয়মাধুর্যে মুগ্ধ হয়ে উভয়কে আলিঙ্গন পাশে বদ্ধ করলেন, এবং হৃদয়ে স্থাপন করে একই সঙ্গে দুজনের সঙ্গে প্রণয় লীলায় রত হলেন। ৩৪।

‘এই যুক্তি যব হই সখী করতহি তৈধনে নাগর গেল।

দুহক হৃদয়ে ধরি মনোমথে মাতল, নিবিড় আলিঙ্গন দেল।’

যথা বা—

শ্রীকৃষ্ণের উক্তি :

‘মাধবি ! মালতী তোমায় আমার হাতে সমর্পণ করেছে। এখন তুমি কোথায় যাবে। আর মালতীই বা আমার হাতে তোমায় তুলে দিয়ে, কোথায় যাবে ? তোমাদের দুজনের একসঙ্গে সমাগম সম্ভব

নয়। অতএব এসো, আজ কৃষ্ণ ভ্রমর একসঙ্গে ছুজনের মধুপান করে তৃপ্ত হোক।’

সমমধ্যা দুই সখীর অভিন্ন সৌহার্দ্য খুব মধুর। কিন্তু প্রেম-বিশেষজ্ঞ ব্যক্তির মনে করেন যে, এ ধরণের প্রেম নিদর্শন বিরল।

সমমুখী দূত্য

শ্রীমতীর কোন প্রিয়সখী শ্রীকৃষ্ণকে বললেন—

‘মুকুন্দ! ওই দেখ মন্দরাক্ষী আমায় তোমার কুঞ্জকুটীরে নিয়ে এসে, নিজে গোপনে পালিয়ে যাচ্ছে। যাও, দ্রুত তুমি তার অনুসরণ কর। পিছু পিছু ছুটে গিয়ে তাকে নিবৃত্ত কর।’

এই কথা শুনে শ্রীকৃষ্ণ মন্দরাক্ষীকে আহ্বান করে বললেন—

‘সুন্দরি! তোমার সখীর কথায় আমি তোমার সুখের জন্য তোমায় আহ্বান করছি। এসো, পালিও না। শশধরের পাশে তারকার মত তোমরা দুজনে আমার ছপাশে শোভিত হও।’

সখীপ্রায়ত্রিক

লঘু প্রথরা, লঘু মধ্যা ও লঘু মুদ্বী—এই তিন শ্রেণীর নায়িকা প্রায় সর্বদাই দূত্য কার্য করে থাকে, তাই তাদের সখীপ্রায়ী বলা হয়।

লঘুপ্রথরা দূত্য

উদাহরণ : গীতগোবিন্দে শ্রীমতীর প্রতি তুঙ্গবিজ্ঞা,

স্বাং চিত্তেন চিরং বহন্নয়মিতি প্রাস্তোভুঃ তাপিতঃ

কন্দর্পেণ চ পাতুমিচ্ছতি স্খাসংবাদবিস্বাধরং । ইত্যাদি

‘তুমি গুণ মনে করি কাতর নাগর জরজর মনোমথ বাণে ।

কত অভিলাষ করই হরি তোহারি অধর স্খারস পানে ॥

বাত শুনহ মোর চল তুহ সত্তর বৈঠহ নাগর কোর ।

তোহারি কুটিল দৃগঞ্চল শরাঘাতে দাস হয়ছে হরি তোর ॥’

যে নাগর ক্রীতদাসের মত তোমার চরণ সেবা করছেন,
তাঁর প্রতি সম্ভ্রম কিসের ?

লঘুমধ্যা দৃত্য

শ্রীমতীর প্রতি বিশাখার উক্তি —

‘কেন কেন রাই কুটিল নয়নে চাহিছ আমার পানে ।

কুসুম লাগিয়া তুমি সে এসেছ যমুনা গহন বনে ॥

কুটিল নাগর সে সব জানিয়া কখন আসিল বনে ।

আমি কুলবতী সরল অন্তর কেমনে জানিব মনে ॥’

লঘুমুখী দৃত্য

যথা চন্দ্রাবলীর প্রতি শৈব্যা—

‘নিকুঞ্জবনে নাগর ঘুমায় চামর ঢুলাহ তুমি ।

কালিন্দীর তীরে কমল ফুটেছে তুলিয়া আনি গে আমি ॥’

এই তিন প্রকার নায়িকার মধ্যে কেউ কেউ ঈষৎ নায়িকাত্বের
জ্ঞা উৎসুক হয়। কেউ বা সে বিষয়ে নিজে আগ্রহীলা না হয়ে,
সখীর সুখে অভিলাষিণী হয়।

নায়িকাত্বে ঈষৎ ঔৎসুক্যযুক্তা :

আত্মা—

শ্রীরাধা পরিহাস করে শশিকলাকে বললেন—‘সখি ! কুঞ্জগৃহে
আমি ময়ূরপুচ্ছ ফেলে এসেছি, নিয়ে এসো—এই কথা বলাতে তুমি
হাসিমুখে তখনই গিয়েছিলে। কিন্তু আমি যে ময়ূরপুচ্ছ আনতে
বলেছিলাম তা ত্যাগ করে, নিজে যে শতশত ময়ূরপুচ্ছ লাভ করেছ
তাই আঁচলে ঢেকে নিয়ে, অধোবদনে গৃহে করে আসছো। লজ্জা
কি ? ৩৫।

সখীর স্মৃতি অভিকৃতি :

দ্বিতীয়া—

‘তোমার চরণে বাজিবে বলিয়া নিতি বনে যাই আমি ।

কুহ্ম তুলিতে মোরে বারেবারে আর না পাঠাও তুমি ॥

হুয়া তুমি সখী আমি মনে স্থখী, কখন না জানি দুখ ।

তুমি সেবা হতে নাগর সহিতে রতি নহে বড় স্থখ ॥’

নিত্যসখী

নায়িকাত্বের অপেক্ষা না রেখে, সখ্য বিষয়ে যার সর্বদাই অধিক
শ্রীতি, তাকেই নিত্যসখী বলে ।

নিত্য সখী ছ’রকমের । এক আত্যন্তিকী লঘু; আর এক
আপেক্ষিকী লঘু ।

আত্যন্তিকী লঘু

উদাহরণ :

মাধবের সঙ্গসুখের তুল্য পৃথিবীতে আর কোনো স্থখ নাই । এই
কথা বলে, মণিমঞ্জরীকে অভিসারে প্রলুব্ধ করবার চেষ্টা করলে, সে
বলেছিল—‘সখি ! কৃষ্ণের অঙ্গসঙ্গ লাভে শ্রীরাধা যে-স্থখ অনুভব
করেন, আমার পক্ষে আত্মস্থখ লাভের চেয়ে সেই স্থখই অধিক ।’

অনেক চাতুরি করা সত্ত্বেও মণিমঞ্জরীর মনে কখনো অভিসার
স্পৃহা জাগেনি । সে শ্রীমতীর নিত্যসখী ।

আপেক্ষিকী লঘু

যথা—

বনমালার জন্ত পুষ্পচয়নরতা কোন সখীকে কুঞ্জদ্বারে দেখে,
শ্রীকৃষ্ণ বলেছিলেন—‘হে শোভনাদ্রি ! তুমি কুঞ্জের ভিতরে এসে
আমার অঙ্কশায়িনী হয়ে অলৌকিক স্থখ সম্ভোগ কর ।’

উত্তরে সখী বলেছিল—‘হে গোবিন্দ ! শ্রীরাধাই তোমার উজ্জল
রস-সম্ভোগের যোগ্য তুমি । তোমার অঙ্গসঙ্গ-রসান্বাদনে আমার

কোনো ঔৎসুক্য নাই। তোমার যে সেবায় অশেষ বধুজনের মনোরথ পূর্ণ হয়েছে, আমায় সেই সেবায় নিযুক্ত কর।’

উক্ত সখীদের দূত্য

কোন সখী শ্রীমতীকে অভিসার করিয়ে, কুঞ্জদ্বারে নিয়ে গিয়ে মাধবকে বললেন—‘হে বৃন্দাটবীর অধিপতি! এই যে আমার প্রিয়সখীকে এনেছি। কিন্তু ইনি কুঞ্জের ভিতর প্রবেশ করছেন না। কুঞ্জবনের দেহলী সংলগ্ন হয়ে, আমার দিকে কোপদৃষ্টি নিক্ষেপ করছেন। ক্রকুটিকারিণীকে অনুনয় কর।’

প্রথরা এবং মৃদ্বী—এই দুই প্রকার নায়িকা আপেক্ষিক হয়। অধিক প্রথরার চেয়ে সামান্য-প্রথরা মৃদ্বী, এবং অধিক মৃদ্বীর চেয়ে সামান্য-মৃদ্বী প্রথরা হয়। প্রার্থ্যাদি স্বভাব সম্পর্কে নিম্নে যথাযথ-ভাবে উল্লেখ করা হলো। দেশ-কালাদির বৈশিষ্ট্য অনুযায়ী তাদেরও বিপর্যয় ঘটে। ৩৬।

প্রার্থ্যের বিপর্যয় :

‘ঘন আধিয়ার এ ঘোর রজনী, দেবতা বরিষ হয়।

প্রচণ্ড অনিল ঘন গরজন দেঙ্গিয়া লাগায় ভয় ॥

এমত সময়ে নাগর আইলা, দুয়ারে দাঁড়িয়ে রয়।

আমি সে ললিতা প্রাণসখী তোর চরণে ধরি প্রভা কয় ॥

বিনয় করিয়া কত না কহিছে, ছাড়ি দেহ তুমি মান।

আসিয়া নাগর করুক সঙ্কর তোর মুখ স্বধা পান ॥’

মানিনী শ্রীরাধাকে ললিতা অনুনয় করছেন : অন্ধকার রজনী, ধারাময়ী বৃষ্টি, প্রচণ্ড ঝড় বইছে। তবুও তোমার প্রাণমুগ্ধ নাগর এই ঘোর দুর্যোগ উপেক্ষা ক’রে, দ্বারদেশে এসে অপেক্ষা করছেন। আমি তোমার পায়ে মাথা রেখে বলছি, প্রিয়সখি! মান পরিত্যাগ ক’রে প্রিয়তমের কণ্ঠলগ্না হও। ললিতার এই প্রার্থনা পূর্ণ কর।

ললিতা প্রথরা হলেও, এক্ষেত্রে তার বিপর্যয় ঘটেছে। অতাস্ত
মৃদু হয়ে তিনি রাধা-কৃষ্ণ মিলনের জন্তু দূত্য করেছেন। ৩৭।

মৃদুতার বিপর্যয় :

চন্দ্রাবলার সখী পদ্মার সঙ্গে শ্রীমতীর কথোপকথন শুনে, চিত্রা
শ্রীমতীকে বললে—

‘শুন শুন হৃন্দরী তুয়া গুণগান ছলে পদ্মা করয়ে উপহাস।
তুহু বড় মুগধিনী তব হি আদর করি তাহে আনসি নিজ পাশ ॥
কিঞ্চিৎ রোষনয়ন কুরু হৃন্দরী, চিত্রা পুরাবে মনঃ সাধ।
পদ্ম ‘পরি যেন অতি মৃদু হিমকণ বিতরই দারুণ প্রমাদ ॥’

মৃদুস্বভাবা চিত্রা শ্রীমতীকে তিরস্কার করে বললে—সখি !
গুণগান ছলে কুটিলবুদ্ধি পদ্মা তোমার প্রতি কটাক্ষ করেছে। তবুও
তুমি অনুন্নয় ত্যাগ করছো না ! আদর করে পাশে বসেছো ! তুমি
যদি ক্রুদ্ধ হও, তাহলে চিত্রা সমুচিত প্রতিবিধান ক’রে পদ্মার বিনাশ
সাধন করে।

চিত্রা স্বভাবতঃ মৃদু হলেও, এখানে তার বিপর্যয় ঘটেছে। মৃদুতার
প্রথরতা প্রকাশ পেয়েছে। ৩৮।

সখী-ব্যবহার

সখী চরিত্রের বৈশিষ্ট্য এই যে-যুথেশ্বরীর দূত্য করতে এসে সখী
যদি নির্জনে শ্রীকৃষ্ণের সঙ্গে মিলিত হয়, সে অবস্থায় শ্রীকৃষ্ণ তার
কাছে সুরত প্রার্থনা করলেও, সে কখনো সম্মত হয় না।

যথা

শ্রীমতীর প্রেরিত কোন দূতী নির্জনে শ্রীকৃষ্ণের সঙ্গে সাক্ষাৎ
করলে, শ্রীকৃষ্ণ বারবার কন্দর্প ধনুতে শর যোজনা ক’রে তার উপর
কটাক্ষ নিক্ষেপ করেছিলেন। দূতী তাঁর অভিপ্রায় বুঝতে পেরে
বলেছিল—হে গোবিন্দ ! আমি আমার সখীর জন্তে দূত্য করতে

এসেছি। তুমি কেন আমার প্রতি কন্দর্পবাণ নিক্ষেপ করছো! যদি দরকার হয়, প্রাণ দিতে পারি; কিন্তু দেহ দান করতে পারবো না। এই দেহ দিয়ে বান্ধবীর জন্তে যা আমার করণীয় তাই এখনো করতে পারিনি। ৩৯।

সখীক্রিয়া

যে যে কাজ সখীদের কর্তব্য বা করণীয় তাকে সখীক্রিয়া বলা হয়। ৪০।

সখীগণের কার্যাবলী:

১। নায়কের প্রতি নায়িকার এবং নায়িকার প্রতি নায়কের প্রেম ও গুণগান পরস্পরের নিকট কীর্তন করা।

২। তাদের পরস্পরের মধ্যে আসক্তি বৃদ্ধি করা।

৩। উভয়ের অভিসার করানো।

৪। কৃষ্ণের নিকটে সখীকে সমর্পণ করা।

৫। পরিহাস।

৬। আশ্বাস প্রদান।

৭। নেপথ্যে নায়িকাকে স্নেহজিত করা।

৮। দুজনের মনের কথা উদ্ঘাটন করা।

৯। একজনের কাছে অপরের দোষ ঢাকা।

১০। পতি প্রভৃতিকে ছল করে স্থানান্তরে পাঠানো, ইত্যাদি পরিবঞ্চনা।

১১। শিক্ষা প্রদান।

১২। উপযুক্ত সময়ে নায়ক নায়িকার মিলন ঘটানো।

১৩। চামরাদি ব্যঞ্জন করা।

১৪। উপালব্ধ অর্থাৎ প্রয়োজন মত নায়কের প্রতি তিরস্কার।

১৫। „ „ প্রয়োজন মত নায়িকার প্রতি ভৎসনা।

১৬। সন্দেহ প্রেষণ বা একের নিকট অশ্লের সংবাদ বহন করা।

১৭। নায়িকার প্রাণরক্ষার জন্তু সতত যত্নবতী হওয়া।

পরবর্তী ৪১ হতে ৫৫ শ্লোকে পদাবলী, উদ্ধব সন্দেশ ও হংসদূত প্রভৃতি গ্রন্থ থেকে সখীক্রয়ার বিবিধ উদাহরণ উল্লিখিত হয়েছে।

উল্লিখিত সখাগণের অষ্টবিধ ধর্ম পুনরায় বর্ণিত হলো।

সখীদ্বিবিধা

সখীদের কার্যকলাপ ও মনোভাব অনুযায়ী ‘অসমস্নেহা’ ও ‘সমস্নেহা’ এই দুই শ্রেণীতে ভাগ করা যায়। কৃষ্ণের প্রতি এবং যুথেশ্বরীর প্রতি তারা এই দ্বিবিধ মনোভাব পোষণ করে। ৫৬।

অসমস্নেহা

অসমস্নেহা দ্বিবিধ। এক, কৃষ্ণ অপেক্ষাও প্রিয়সখীর প্রতি অধিক স্নেহবতী। অপর, প্রিয়সখী অপেক্ষা শ্রীকৃষ্ণের প্রতি অধিক স্নেহবতী।

শ্রীকৃষ্ণের প্রতি অধিক স্নেহবতী

যে সব সখী অন্তরে অন্তরে আপনাকে শ্রীকৃষ্ণের অতি আপনজন মনে করে, এবং সেই অভিমানে অষ্ট কোন যুথেশ্বরীর প্রতি আকৃষ্ট হয় না, শুধু মাত্র আপন যুথেশ্বরীকেই আশ্রয় করে, তারা হরিস্নেহাধিকা আবার যারা যুথেশ্বরীর প্রতি সম্পূর্ণ স্নেহশীলা হয়েও অন্তরে কৃষ্ণের প্রতি অধিক স্নেহ বহন ক’রে তাঁর জন্তু দৌত্য কার্য করে, তাদেরও ‘হরি-স্নেহাধিকা’ বলা হয়। ৫৭।

যথা—

শ্রীমতীর প্রতি ধনিষ্ঠার উক্তি :

‘বচনে কতই কহি মনে নাহি আন। মনু মনে নাহি লাগে ঐছন মান।

কিরি দেখ কাতর নাগর ভোর। ইহ দেখি অন্তর বিদরয়ে মোর।

তুয়া মান হোয়ল দিনকর চণ্ড। মলিন হোয়ল দেখ নাগর চন্দ।’

হে সখি! তোমার দুর্জয় মান আমার অন্তর পীড়িত করে,

আমি সহিতে পারি না। ওই দেখ, তোমার মানের খরতর উস্তাপে মাধবের মুখেন্দুচ্ছবি স্নান হয়েছে। হে মানিনি! তাই আমি অন্তরে অত্যন্ত শ্রানি বোধ করছি। অত্যাশ্রু সখাদের মত আমার মনে এক, আর মুখে অশ্রু কথা নাই।

যথা বা—

কোন সখী নির্জনে অশ্রু সখীকে বললে—হে বরাদি! আমি সকল দেবতার পায়ে মাথা রেখে শুধু এই বর প্রার্থনা করি যে, সুবলসখা শ্রীকৃষ্ণ ও রাধিকাকে যেন আমি সর্বদা সেবা দ্বারা আনন্দ দান করতে পারি। তা হলেই আমার মনোবাসনা পূর্ণ হবে।

পূর্বে যে সব সখীর কথা উল্লেখ করা হলো, তারা শ্রীকৃষ্ণের প্রতি স্নেহাধিকা। তেমনি আমার সখী-স্নেহাধিকা বান্ধবীও আছে।

সখীস্নেহাধিকা

যে সখী নিজেকে নায়িকার আপনজন মনে ক'রে সর্বদা তার প্রতি স্নেহশীলা হয়, এবং কৃষ্ণের চেয়ে কৃষ্ণপ্রিয়ার প্রতি অধিক স্নেহবিশিষ্টা হয়, তাকে সখীস্নেহাধিকা বলে। ৫৮।

যথা—

শ্রীমতীর কোন প্রথরা প্রাণসখী বৃন্দাকে বলেছিল—হে সহচরি! তোমার দূত্য-চাতুর্য রাখে। যাও, তুমি গোষ্ঠরাজতনয় শ্রীকৃষ্ণকে গিয়ে বলো যে, এই ঘোর বর্ষা রাত্রি—চারিদিকে বিষম বিষধর সর্প, কেমন করে ভীরুস্বভাবা শ্রীরাধাকে গিরিকুঞ্জে পাঠাবো। ৫৯।

‘বৃন্দে দূর কর দূতীক কাজে। নেওটি কহ তুহ নাগর রাজে ॥

ইহ দেখ বরষ আধিয়ার রাত্তি। পথ মাঝে কত কত ভূজগিনী পাতি ॥

নাহি সহই ভয় রাই আমার। আজ্জ নিশি নাহি করাব অভিসার ॥’

এ ধরনের উক্তি সমস্নেহা সখীর পক্ষেও সম্ভব।

শ্রীমতীর কোন এক বান্ধবী তার নবীনা সখীকে উপদেশ দিয়ে বলেছিল—সখি, তুমি শ্রীরাধার সঙ্গে সখ্য কর। তবে যদি একথা

মনে করে থাকো যে, শ্রীকৃষ্ণের প্রণয়-প্রমোদ লাভের জন্ম রাখার সঙ্গে সখ্য করবে, তাহলে ভুল করবে। শ্রীরাধার সঙ্গে যদি তোমার প্রণয় সিদ্ধ হয়, তাহলে কৃষ্ণের প্রীতিসম্পদ আপনা-আপনিই তোমার উপর বর্ষিত হবে। কাজেই সখ্য করতে হলে, রাখার সঙ্গে সেই ভাবে সখ্য করাই ভালো, শ্রীকৃষ্ণের সঙ্গে প্রণয় স্থাপনের উদ্দেশ্য নিয়ে নয়।

পূর্বে যাদের প্রাণসখী ও নিত্যসখী বলে বর্ণনা করা হয়েছে, মনীষিগণ তাদেরই সখীস্নেহাধিকা বলে অভিহিত করেছেন।

সমস্নেহা

যে সব সখী কৃষ্ণ ও প্রিয়সখীর প্রতি সমান স্নেহ বহন করেন, কারো প্রতি কম বা বেশী স্নেহ যাদের কখনো দেখা যায় না, তারাই ‘সমস্নেহা’। ৬০।

মথা—

কৃষ্ণ বিনা রাধা আমার মনকে অতিশয় ব্যথিত করে। আহা! রাধাবিহীন কৃষ্ণও আমার অন্তরকে তেমনি নিপীড়িত করে। এক সঙ্গে রাধাকৃষ্ণের মুখচন্দ্রিমা যে জন্মে আমার নয়নযুগলকে আনন্দ দান না করবে, তেমন জন্ম যেন আমার না হয়। ৬১।

শ্রীরাধা মান করলে, চম্পকলতাকে বকুলমালা বলেছিল :

‘নাগর না দেখি রাধিকাসুন্দরী কাতর হইয়া রহে।

রাধারে না দেখি নাগর কাতর, আমার পরাণ দহে ॥

তপস্তা করিঞা জনম লইব কামনা করিব তাই।

নাগর নাগরী একাসনে যেন সতত দেখিতে পাই ॥’

যে সকল সখী রাধা ও কৃষ্ণের প্রতি তুল্য প্রেম অন্তরে বহন করে, নিজেদের শ্রীরাধিকার ‘অতি আপনজন’ বলে উচ্চ অভিমান গর্ব বোধ করে, তাদেরই পরমশ্রেষ্ঠসখী অথবা প্রিয়সখী বা নিত্যসখী বলা হয়। ৬২।

হরিবল্লাভ প্রকরণ

উল্লিখিত ব্রজসুন্দরীদের চারটি প্রকারভেদ হয়। যেমন—স্বপক্ষ, সুহৃৎপক্ষ, তটস্থ ও প্রতিপক্ষ। পূর্বে প্রসঙ্গতঃ সুহৃৎপক্ষ ও তটস্থা গোপিনীদের সম্পর্কে বলা হয়েছে।

স্বপক্ষ এবং বিপক্ষ এই দু'রকমের গোপিনী চরিত্র অত্যন্ত রসপ্রদ। তার মধ্যে স্বপক্ষের সম্বন্ধে পূর্বে বিশেষভাবে বলা হয়েছে। এখন সুহৃৎপক্ষ গোপাঙ্গনাদের বিভিন্ন দিক আলোচনা করা হচ্ছে। ১।

সুহৃৎপক্ষ

সুহৃৎপক্ষ দু'রকমের হয়—ইষ্টসাধক ও অনিষ্টসাধক। ২।

ইষ্টসাধক

কুন্দবল্লী শ্যামলাকে বললে—

সখি! তুমি ও তোমার পরিজনবর্গ সকলে মিলে আমার কথা শোন। তোমার প্রতি শ্রীরাধার যে শ্রীতি দেখতে পাই, তাতে জগজ্জনের চিত্ত বিমোহিত হয়। শ্রীমতী উল্লাসভরে অঙ্গরাগ প্রস্তুত ক'রে, তোমার নাম ক'রে তোমারই সখীর হাত দিয়ে ঠিক সময়ে শ্রীকৃষ্ণের কাছে পাঠান। এই সব দেখে বেশ বোঝা যায় যে, তোমার প্রতি শ্রীরাধার শ্রীতি অতিশয় গভীর। ৩।

অনিষ্টসাধক

ভাণ্ডীর বটমূলে শ্রীকৃষ্ণের সঙ্গে শ্রীরাধাকে ক্রীড়া করতে দেখে এসে, পদ্মা জটিলাকে বললে—তোমাদের বধূর চরিত্র দেখ গিয়ে। সে ভাণ্ডীরমূলে শ্রীকৃষ্ণের সঙ্গে লালাখেলা করছে। একথা শুনে জটীলা কুপিতা হয়ে ভাণ্ডীর অভিমুখে ছুটে গেল।

এখানে পদ্মা অনিষ্টসাধিকা।

শ্যামলা এসে ছল ক'রে জটিলাকে নিবৃত্ত ক'রে বললে—শ্রীরাধা নয়, কৃষ্ণের সখা সুবল বধু বেশ ধ'রে কৃষ্ণের সঙ্গে খেলা করছে।

জটিল প্রসন্ন হয়ে বললে—আমি অনভিজ্ঞা মুখের কথায় ভুল ধারণা করেছিলাম। এখন তোমার কথায় সঠিক জানলাম যে, ওই বধু শ্রীরাধা নয়; কৃষ্ণ বধুবেশধারী সুবলের সঙ্গে হাসি-খেলা করছেন। ৪।

এখানে শ্যামলা ইষ্টসাধিকা।

তটস্থ

যে বিপক্ষের সুহৃৎপক্ষ তাকে তটস্থ বলা হয়। ৫।

যথা—

পদ্মা চন্দ্রাবলীর পক্ষ, শ্যামা শ্রীরাধার পক্ষ। চন্দ্রাবলী ও শ্রীরাধা পরস্পর বিপক্ষ। সুতরাং শ্যামা চন্দ্রাবলীর বিপক্ষের সুহৃৎপক্ষ অর্থাৎ চন্দ্রাবলীর বিপক্ষা শ্রীরাধার বান্ধবী। এ ক্ষেত্রে চন্দ্রাবলী সম্পর্কে শ্যামা তটস্থা। চন্দ্রাবলীর দোষকে সে উদ্ঘাটিত করে, গুণের কথা কখনো বলে না।

‘চন্দ্রাবলীর দুঃখ দেখি শ্যামা নাহি হয় দুঃখী। সুখ দেখি সুখ নাহি পায়।

দোষে নাহি দোষ ধরে, গুণ শুনি মৌন করে। শ্যামার মন বৃনন না যায় ॥’

চন্দ্রাবলীর দোষ থাকাটা দোষের নয়, অর্থাৎ দোষ থাকাই তার স্বাভাবিক। গুণের কথা বলবার কিছু নাই। চন্দ্রাবলী সম্পর্কে শ্যামার মনোভাব বোঝা যায় না।

বিপক্ষ

যারা পরস্পরের প্রতি বিদ্বেষসম্পন্ন, পরস্পরের ইষ্ট হানি করে এবং অনিষ্টকারক, তাদেরই পরস্পরের বিপক্ষ বলা হয়। ৬।

ইষ্টবিনষ্টকারিত্ব

বৃন্দা শ্রীকৃষ্ণকে বললেন—হে মুকুন্দ! আজ সুবল গিয়ে শ্রীরাধাকে বলেছিল যে, তুমি কুঞ্জগৃহে তার আগমন পথ চেয়ে অপেক্ষা করছিলে। কুটিলবুদ্ধি পদ্মা হঠাৎ এই কথা জানতে পেরে,

সেখানে চন্দ্রাবলীকে নিয়ে গিয়েছিল। সূবলের মুখে এই কথা শুনে, শ্রীমতী স্তব্ধ হয়ে দাঁড়িয়েছিলেন। তাঁর অঙ্গে নীলপট্ট শাড়ি দেখে, প্রাতঃকালে জটীলা তাঁকে তর্জন করেছে। ৭।

অনিষ্টকারিত্ত

জটীলা ও পদ্মার উক্তি-প্রত্যাশিত :

‘এসো এসো পদ্মা, এস মনু ভবনে। আঁলু যাই গো প্রণাম চরণে ॥
আঁলি কোন পথে কোন ঘর হৈতে। গোবর্ধন বট হতে আঁলু তুরিতে ॥
মোর বধু দেখলি তুহু নিজ নয়নে। তাহে দেখলু হাম দিনকর ভবনে ॥ (১)
চিরকাল (২) হলো কেন না আইল সদনে। তাহে হরি ঘেরল দারুণ গহনে ॥
হরি বড় চঞ্চল সেহ বর যুবতী। শুনি এই জাটীলা ধাওল ঝটিতি ॥’

বিপক্ষ পক্ষপাতিনী বা প্রতিপক্ষ

বিপক্ষ-পক্ষপাতিনী বা প্রতিপক্ষ সখীদের কথায় ও কাজে ছিল, দ্বৈর্বা, চপলতা, অসূয়া, মাৎসর্য, অমর্ষ (অধৈর্য) ও গর্ব ইত্যাদি প্রকাশ পায়।

ছদ্ম বা ছল

মণিমঞ্জরীর প্রতি ভানুমতীর উক্তি :

‘গিরিধর উপরি বাঁশ বিটলী সব ধ্বনি করু গুরুতর বায়।
সহজহি বরিশ সময় নবজলধর আসি উদয় ভেল তায় ॥
তাহা দেখি মুগ্ধ দেখুসব ধাওয়ি কাহু ভরম বিপরীত।
ধিক্ ধিক্ চাতুরী নারি তুহু ধাওলি জ্ঞানরহিত তুয়া চিত ॥
ঐহন চাতুরী বচন রচন করি পদ্মা গোপীয়ে শুনায়।
ললিতা সত্বর নিজ গৃহে পৈঠল তুরিত হি রায় সাজায় ॥’

গিরি গোবর্ধনে শ্রীকৃষ্ণের বংশীধ্বনি হচ্ছে শুনে চন্দ্রাবলী যাতে ক্ষিপ্তগতি সেখানে গিয়ে উপস্থিত না হয়, সেজন্য ললিতা প্রতারণা করে পদ্মাকে বলেছিল যে, বাঁশবনে বাতাসের ঝাপটায় বাঁশীর মত

(১) স্বর্ষ বন্দির। (২) এত কাল, এত বিলম্ব।

শব্দ হচ্ছে, বর্ষাকাল তাই আকাশে মেঘ উঠেছে। ধেমুগণ বংশীধ্বনি শুনে ও নবজলধর দেখে ছুটে যাচ্ছে। তারা পশু, কাণ্ডজ্ঞানহীন। কিন্তু তুমি কেন বুদ্ধিমতী হয়ে ছুটে চলেছ !

ললিতা এইভাবে ছলনা ক'রে চন্দ্রাবলীর অভিসার নিবারণ ক'রেছিল এবং তখনই গৃহে গিয়ে তাড়াতাড়ি শ্রীরাধাকে অভিসারের জ্ঞাত সাজাতে বসেছিল। ৮।

ঈর্ষা

পদ্মা তার কেশপাশ উদ্ঘাটিত ক'রে, বনমালা দেখিয়ে সৌভাগ্য জানাচ্ছিল। তাই দেখে, ললিতা বললে—দেবি! তুমি তোমার কেশকলাপ উন্মোচন ক'রে আমায় বনমালা কি দেখাচ্ছে? এসে দেখ, আমার অলিন্দে নীলযষ্টির মত স্তব্ধ হয়ে বনমালী নিজেই দাঁড়িয়ে আছেন। ৯।

পদ্মার কেশপাশে বনমালা দেখে, ললিতার মনে ঈর্ষা সঞ্চারিত হয়েছিল। তার ফলে, নিজের সৌভাগ্য যে পদ্মার চেয়েও অনেক বেশী, এই কথা জানাবার জন্ত ললিতা বললেন,—তুমি কৃষ্ণের কাছে বনমালা পেয়েছ ব'লে গর্ব করছো। কিন্তু বনমালী স্বয়ং আমার দ্বারে দাঁড়িয়ে থাকেন।

অসুয়াগর্ভ ঈর্ষা

পদ্মা শ্রীরাধার পক্ষপাতিনী কোন সখীর হাতে কৃষ্ণপ্রদত্ত মণিহার দেখে বলেছিল—এ হার তুমি কোথায় পেলে? শ্রীকৃষ্ণ অত্যন্ত আগ্রহের সঙ্গে এটা আমায় দিয়েছিলেন। কিন্তু এর নায়ক-মণির (লকেটের) অনেক দোষ আছে, সেইজন্ত আমি এটা গ্রহণ করিনি। কিন্তু লুক্ক হয়ে তুমি সেটা নিয়েছ। যদি নিজের মজল চাও, অসৌভাগ্যকর এই হার ফেলে দাও। নইলে সমূহ অমঙ্গল হবে। আঙুলে সাপে কামড়ালে, মানুষ বাঁচবার জন্ত আঙুল কেটেও ফেলে দেয়। ১০।

চাপল্য

খট্ঠোতিকার প্রতি পদ্মার উক্তি :

‘গহননিকুঞ্জ মাঝে ভেটিল নাগর রাজ্যে, তুমি কেন আছছ বসিয়া ।

সংকেত করেছে মোরে সে হেন নাগরবরে চন্দ্রাবলী মিলিবে আসিয়া ॥’

হে খট্ঠোতিকে ! তুমি কেন মিছে এই কুঞ্জবনে রাগসঞ্চিত রূপলাবণ্য দেখিয়ে নিজের আত্মাকে ছুঃখ দিচ্ছ ? আজ শৈলশিখরে নবজলধরের বৃকে বিদ্যুৎ-লেখার মত চন্দ্রাবলী কৃষ্ণের সঙ্গে মিলিত হয়েছে । সুতরাং আজ আর তোমার মনোরথ সফল হবে না । ১১ ।

খট্ঠোতিকা শ্রীরাধার বান্ধবী । নিকুঞ্জ মধ্যে তাকে দেখে, চন্দ্রাবলীর সখী পদ্মার মনে অশ্রুয়ার সঞ্চার হলো । তাই সে খট্ঠোতিকাকে আঘাত দিয়ে এ কথা বললে ।

অশ্রুয়া

শ্রীমতীর সখী রঙ্গদেবী পদ্মাকে বললে—তোমার সহচরী শৈব্যা ভাগীর তরুণ্মূলে যে তাণ্ডব নৃত্য করছিল, তা দেখে কে না বিস্মিত হয়েছে ! তাও যদি সেই সুন্দরী তব্বী তোমার কাছে নাচ শিখতো ! তাহলে তার নয়নভঙ্গিমায় ত্রিভুবন বিমোহিত হতো । ১২ ।

শ্রীরাধার পক্ষপাতিনী রঙ্গদেবী পদ্মার সখী শৈব্যার নৃত্য দেখে, অশ্রুয়া পরবশ হয়ে, পদ্মার নিকট তার বান্ধবী সম্বন্ধে এই টিপ্সনী কেটেছিল এবং পদ্মার নৃত্যকলা পারদর্শিতা সম্পর্কেও কটাক্ষ করেছিল ।

মৎসর বা মাৎসর্য (Jealousy)

মৎসর বা মাৎসর্য বলতে বুঝায়, পরের ভালো দেখতে না পারা । অর্থাৎ অপরের যোগ্যতা বা গুণাবলী সম্পর্কে ঈর্ষান্বিত হয়ে ওঠা ।

পদ্মা চন্দ্রাবলীকে বললে—সুন্দরি ! ধূর্ত মুরারি শ্রীরাধার হৃদয় অলঙ্কৃত করেছেন মহামূল্য কণ্ঠহার দিয়ে, আর তোমার কবরীতে দিয়েছেন কপর্দক মূল্যের তুচ্ছ একটা মালা । তোমার মনষে দেখছি

মুনি-ঋষিদের মত বিকারহীন। এই ধরনের বৈষম্যমূলক ব্যবহার করা সত্ত্বেও তুমি সেই মুরারির সঙ্গে বনবিহারে বিরত হ'চ্ছ না।

অমর্ষ বা অসহিষ্ণুতা

অক্ষমা বা অধৈর্যজনিত ক্রোধকে (Indignation due to intolerance) অমর্ষ বলে।

পদ্মার প্রতি চন্দ্রাবলীর উক্তি :

‘অল্প ফুট কুটমলে তাথে গাঁথি গুঞ্জাফুলে কুণ্ডল নাগরে দিলাম আমি।

সে কুণ্ডল রাধার কানে দেখি ক্রোধ করি মনে, বিষাদ করিলে কেন তুমি ॥’

তুমি কেন রাধার কর্ণে সে কুণ্ডল দেখে, মনোবেদনা প্রকাশ করলে ? তাতে যে আমাদেরই লঘুতা প্রকাশ পেল। ১৩।

অমর্ষে প্রেম-ঈর্ষা জাগে কৃষ্ণসখীর চিত্ত তলে।

অকপটে মনের কথা অতর্কে সে আপনি বলে ॥

—হংসদূত

গর্ব (Conceit)

অন্যকে ছোট মনে ক’রে অবহেলার ভাব প্রকাশ করার নাম ‘গর্ব’। গর্বকে সাধারণতঃ ছয় ভাগে ভাগ করা যায়। যথা—
অহঙ্কার, অভিমান, দর্প, উদ্ধাসিত, মদ, ঔদ্ধত্য।

অহঙ্কার (Pride)

স্বপক্ষের গুণ বর্ণনার জন্য অপর পক্ষের প্রতি যে আক্ষেপ, তাকেই অহঙ্কার বলে। ১৪।

যথা—

চন্দ্রাবলীর সভায় একদিন ললিতা গেলে, পদ্মা তাকে বলেছিল—
সখি ! ইন্দ্রনীল বর্ণের আকাশে সোমাতাই (চন্দ্রের আভা অর্থাৎ চন্দ্রাবলী) বেশি শোভা পায়।

এই কথা শুনে, অসহিষ্ণুতা প্রকাশ ক’রে ললিতা অহঙ্কারের সঙ্গে

বলেছিল—সখী পদ্মা! সুনীল আকাশে নেত্র-অঙ্ককার-নাশিনী সূর্যপ্রভার বরণ্য দীপ্তি যতক্ষণ প্রকাশিত না হয়, ততক্ষণই চন্দ্র আভা শোভা পায়। অর্থাৎ শ্রীকৃষ্ণের অঙ্কে ততক্ষণই চন্দ্রাবলী শোভা পায়, যতক্ষণ শ্রীরাধার আবির্ভাব না হয়।

‘কৃষ্ণে চন্দ্রাবলী যে তাবত শোভা করে।

যাবত রাধিকা নাহি রহে তার ক্রোড়ে।’

—শচীনন্দন

অভিমান (Vanity)

ভঙ্গিমা সহকারে স্বপক্ষের প্রেমোৎকর্ষ বর্ণনা করাকে ‘অভিমান’ বলে। ১৫।

কৃষ্ণের প্রতি স্বপক্ষের প্রেমাখ্যান। ১৬। যথা—

ললিতা চন্দ্রাবলীকে বলেছিল—সুন্দরি! তুমি দেখছি ধীরবুদ্ধি সম্পন্ন। কৃষ্ণ কদম্ববৃক্ষ হতে কালীয় হ্রদে ঝাঁপ দিয়েছিলেন একথা তুমি কেমন নিষ্পন্দ হৃদয়ে গল্প ক’রে বলতে পারছো কিন্তু আমার বান্ধবী তরলপ্রকৃতি শ্রীরাধা সে প্রসঙ্গে শুধুমাত্র কদম্ব বৃক্ষের নাম উচ্চারিত হলেই, বৃকে করাঘাত ক’রে কাঁদতে আরম্ভ করেন। ১৭।

ললিতার এই উক্তিতে প্রমাণিত হয় যে, কৃষ্ণের প্রতি চন্দ্রাবলীর যে প্রেম, তার চেয়ে শ্রীরাধার প্রেম অনেক বেশী গভীর। শ্রীকৃষ্ণ কোনো বিপজ্জনক অবস্থার কথা মনে হলেই, শ্রীমতী অধীর হয়ে ওঠেন; কিন্তু চন্দ্রাবলীর হৃদয় স্থির থাকে। সুতরাং চন্দ্রাবলীর তুলনায় শ্রীরাধার প্রেমের উৎকর্ষ অনেক বেশী।

স্বপক্ষে কৃষ্ণ-প্রেমাখ্যান। ১৮। যথা—

ললিতার সখী রত্নমালা পদ্মাকে বললে—তুমি ধন্য! তোমা’র ললাটে শ্রীকৃষ্ণ স্বয়ং পত্রবল্লী (তিলক চিত্র) এঁকে দিয়েছেন। তাই মদনমদে তোমার অঙ্গের গতি অতিমন্থর হয়েছে। হায়! আমরা সে সৌভাগ্য থেকে বঞ্চিত। অখিলশিল্পধরুন্দের শ্রীকৃষ্ণ

ললিতার মুখচন্দ্রের পানে চেয়ে সব ভুলে যান। তাই আমাদের অদৃষ্টে পত্রবল্লী জোটে না।

এই উদাহরণে ললিতার প্রতি শ্রীকৃষ্ণের প্রেমোৎকর্ষের কথা উল্লেখ করে রত্নমালা অভিমান (Vanity) প্রকাশ করছে।

দর্প (Elation)

আপন সৌভাগ্য বা রতিবিহারের উৎকর্ষের জন্তু নায়িকার মনে যে গর্ব, তাকেই দর্প বলে। ১৯। যথা—

পদ্মার প্রতি ললিতার উক্তি :

‘তুমি বড় পুণ্যবতী জানি কুলবতী সতী সদা থাক প্রাসাদ উপরে।
শারদ চান্দিনী রাতি তাথে দিব্য শয্যা পাতি নিজা যাও বরিষ অন্তরে ॥
যবে মোরা সজ্জা ক’রে শয়ন করি কন্দরে, তবে হয় দৈব বিড়ম্বন।
এক শ্রাম হস্তী আসি জাগায় সকল নিশি, সবাকারে করে উন্মাদন ॥’

এখানে ললিতার বক্তব্য এই যে, জ্যোৎস্না-পুলকিত শারদ নিশীথে পদ্মা প্রাসাদে শয্যা রচনা ক’রে সুখে নিজা যায়। কিন্তু তাদের সারাটি রাত্রি বৃন্দাবনের গিরিকন্দরে কৃষ্ণের সঙ্গে রতিবিহারে অতিবাহিত হয়। পদ্মার নিকট নিজেদের রতিবিহার-সৌভাগ্যের গর্ব প্রকাশে প্রকারান্তরে ললিতার দর্পই প্রকাশ পায়।

উদ্ধসিত (Taunt)

বিপক্ষের প্রতি নায়িকা প্রকাশভাবে যে উপহাস বা বিদ্রূপ করে, তাকে উদ্ধসিত বলে। ২০।

যথা—

পদ্মার প্রতি বিশাখার উক্তি :

‘বিষাদ না কর মনে নিশ্বাস ছাড়হ কেনে কৃষ্ণ প্রতি ছাড়হ আগ্রহ।
তোমারে মলিন দেখি আমি মনে বড় দুখী, বিনয় বচন কেন কহ ॥
ললিতার প্রেমভোরে বেঁধেছে নায়কবরে, হইয়াছে আস্থাবিশ্বরণ।
তিলেক ছাড়িতে নারে কি ক’রে শুনাবে তারে কিরি যাহ আপন ভবন ॥’

সখি! দীর্ঘশ্বাস ফেলো না, বিবাদ ত্যাগ করে প্রসন্ন হও।
 দুর্লভ বস্তু সম্বন্ধে আগ্রহ ত্যাগ কর। তোমার শ্লানমুখ দেখে আমার
 মনে করুণার উদয় হচ্ছে। দেখ, ললিতার প্রণয়জ্বালে বারবার
 আবদ্ধ হয়ে, কৃষ্ণকুরঙ্গ আত্ম-বিস্মৃত হয়েছেন। অশ্বের কথা মনে
 করবার অবকাশ তাঁর কোথায়?

মদ (Boast)

সেবার উৎকর্ষ জনিত যে গর্ব তাকে মদ বলে।

ললিতার প্রতি পদ্মার উক্তি :

সখি ললিতা! পৃথিবীতে তোমরাই ধন্য। কেন না, এইসব
 অমৃত সুগন্ধি পুষ্প দিয়ে তোমরা সব সময় সূর্যের উপাসনা কর।
 কিন্তু আমাদের এমনই অদৃষ্ট যে, সব ফুলই কৃষ্ণের জন্ত বনমালা
 গাঁথতে ফুরিয়ে যায়। এমন কি, কাত্যায়নীর পূজার জন্তও একটি
 পাপড়ি থাকে না।

এখানে পদ্মা তাদের কৃষ্ণ-সেবার উৎকর্ষ ও গৌরব জানিয়ে গর্ব
 বোধ করছে।

ঔদ্ধত্য (Arrogance)

স্বস্পষ্টভাবে নিজের উৎকর্ষ জানিয়ে যে গর্ব প্রকাশ করা হয়
 তাকেই ঔদ্ধত্য বলে। ২১।

ললিতা গর্বের সঙ্গে স্পষ্ট ভাষায় পদ্মাকে বলেছিল—হায়! এই
 ব্রহ্মমণ্ডলে এমন কে আছে, যার কাছে কীর্তিধ্বজাশালিনী স্ত্রীরাধা
 স্পর্ধা দেখাবেন? সংকুলোদ্ভবা দীনহীনা নারীদের প্রতি কুপায়
 তাঁর চিত্ত বিগলিত হয়, তাই তিনি মাঝে মাঝে কৃষ্ণকে ছেড়ে দেন;
 যাতে কামসিক্তচিত্তা রমণীরা তাঁর সেবার ক্ষণিক সুযোগ পায়।

শ্লেষ (Scoff)

যে সব মৌখিক বা বাহ্যিক প্রশংসার অন্তর্নিহিত গূঢ় অর্থে
 নিন্দার ইঙ্গিত থাকে, তাকে শ্লেষ বলে। ২২।

সভামধ্যে সখীদের রূপগুণ ও প্রেম সম্পর্কে আলোচনা প্রসঙ্গে একদিন চন্দ্রাবলীর সখী ভব্যাকে চম্পকলতা বললে—তোমার সৌদামিনী সখীর সৌভাগ্যের অন্ত নাই। তার প্রদত্ত সুন্দর হার ও ভূষণাদি শ্রীকৃষ্ণ সবই তাকে ফিরিয়ে দেন। তবুও তার মনে দুঃখ হয় না। সে দক্ষা ও বিদগ্ধা নারী; বার বার নিজের যৌবন ভরা দেহকাস্তি প্রদর্শন করে।

বস্তুতঃ ভব্যার শিল্পরুচি নেই। লৌহমুদগারের মত তার কাস্তি। কিন্তু চম্পকলতা এখানে বিপরীত লক্ষণা দ্বারা প্রশংসাচ্ছলে তার নিন্দা করছে। ২৩।

নিন্দা হ'রকমের—প্রেম সম্বন্ধীয় ও গুণ সম্বন্ধীয়। পূর্বোক্ত নিন্দাটি প্রেম-সম্বন্ধীয়।

গুণ সম্বন্ধীয় নিন্দা : যথা—

শৈব্যাকে রঙ্গদেবী বললে—সুন্দরি! এই কুঞ্জগৃহে তোমার খেলাবতী সখী অস্থলিত রমের সঙ্গে যে নৃত্য করেছে, তা দেখে সকলেই খুব আনন্দ পেয়েছে। তার নাচের এমন কৌশল যে, অঙ্গ নৃত্যচঞ্চল হলেও, গলার হার একটুও দোলে নি। প্রাণচঞ্চল অঙ্গের কাস্তি যেন হরিতালের ছাত্তিকেও পরাজিত করে।

এখানে বিপরীত লক্ষণা দ্বারা শৈব্যার খেলাবতী সখীর নিন্দা করা হয়েছে। বস্তুতঃ নৃত্যের অভীপ্সিত রসকে নিরাশ করে সে তার দেহচাঞ্চল্যই প্রকাশ করেছে। ২৪।

যে সব ব্রজসুন্দরী যুগ্মেশ্বরী পদবাচ্যা, তাঁরা ধৈর্য এবং গাভীর্য গুণ বজায় রাখবার জন্ত, নিজেরা কখনো বিপক্ষা নায়িকার ঈর্ষা বা নিন্দা করেন না।

যথা—

পৌর্ণমাসীর প্রতি বৃন্দা :

‘বিপক্ষ রমণী যব আওল সদনে। কত হি গরব করু চঞ্চল বচনে ॥

মজলা ঐছন হেরল যব হি। তা মনে বিনয় বচনে কহে তব হি ॥

‘সো নিজ গরব লাজে আধোবদনে। লঘু লঘু যাওল আপকি সদনে ॥’

সখীগণ প্রথরা হলেও বিপক্ষা যুথেশ্বরীদের সামনে প্রায়ই কোনো ঈর্ষান্বিতক কথা বলে না। ২৫।

পদ্মা ক্রোধভরে নিন্দাকারিণী চম্পকলতাকে বলেছিল—তোমার ভাগ্য ভালো, তাই আমার বাক্যপাশ থেকে মুক্তি পেলে। যমুনা তীরে শ্রীরাধা আছেন, কাজেই তাঁর সামনে আমার ঔদ্ধত্য প্রকাশ করা শোভা পায় না। কিন্তু এ কথা জেনে রাখ যে, আমার বাক্‌চাতুর্যে স্বয়ং বাগ্‌দেবীও লজ্জা পান। তুমি কোন ছাড়! ২৬।

ব্রজসুন্দরীরা সকলে কৃষ্ণের প্রিয়া, সুতরাং তাদের সম্পর্কে কোন প্রকার বিদ্বেষ বা ঈর্ষা থাকা উচিত নয়। কিন্তু রসশাস্ত্র মতে পৃথিবীতে একথা রসিকজনোচিত নয়। ২৭।

কেন না—

‘কোটি কাম জিনি কৃষ্ণের সৌন্দর্য অপার।

মূর্ত প্রিয় নর্মসখা শৃঙ্গার যাহার ॥

সেই ত শৃঙ্গার ব্রজে ‘উজ্জল’ নাম ধরে।

তার সঙ্গে আছে ঈর্ষা আদি পরিবারে ॥’

শৃঙ্গার রস শ্রীকৃষ্ণের প্রিয় নর্মসখা রূপে ব্রজে মূর্ত হয়ে বিরাজ করে। দ্বেষ ও ঈর্ষা (Jealousy) দ্বারা সেই শৃঙ্গার রসের উৎকর্ষ এবং স্নেহের বা প্রেমের নিবিড়ত্ব সাধিত হয়। সেই জগ্নু মিলন বিষয়ে রাগদ্বেষ বা ঈর্ষার প্রয়োজন। বিরহে রাগদ্বেষ বা নায়িকাদের পারস্পরিক ঈর্ষা থাকে না। ২৮।

যথা—

কৃষ্ণপ্রেমে চন্দ্রাবলী শ্রীরাধার বিপক্ষা ও প্রতিদ্বন্দ্বী। কিন্তু মাথুর বিরহে শ্রীমতী খেদাঘিতা হয়ে বলেছেন—

‘প্রিয় সখী চন্দ্রাবলী তোরে পূণ্যবতী বলি করেছিলে কৃষ্ণ আলিঙ্গন।

আমি ত ব্যাকুল হৈয়া বেড়াই তাতে অঘেঘিয়া বহুদিন পাইনা দর্শন ॥

অনাথিনী করি মোরে হরি রৈলা মধুপুরে না দেগে পরাণ ফেটে যায়।
করে কব এই কথা কে জানে মনের বাথা তেই কিছু কহিব তোমায়॥
তোমার যে ভুজদ্বন্দ্ব আছে কৃষ্ণ-অঙ্গ-গন্ধ সেই ভুজ মোর কণ্ঠে ধর।
সেই গন্ধ অঙ্গে দিয়া মোর হিয়া জুড়াইয়া খানিক জীবনদান কর॥’

—ললিত মাধব

শ্রীকৃষ্ণের সঙ্গে সংযোগ কালে পরম্পর বিপক্ষা হলেও, শ্রীকৃষ্ণ মথুরায় চলে যাওয়ার পর, শ্রীমতী ও চন্দ্রাবলীর মধ্যে স্নেহভাব সঞ্চারিত হয়েছে। ২৯।

সব দিক দিয়ে যুথেশ্বরীদের মনে এক-জাতীয় ভাব থাকলে, তাদের ‘স্বপক্ষ’ বলে। যদি ঈষৎ বৈলক্ষণ্য থাকে, অথচ পরম্পরের নমনোভাবে বিরোধিতা না থাকে, তাদের ‘মুহুৎপক্ষ’ বলা যায়। আর যদি ভাবের সমতা অতি অল্প হয়, এবং পার্থক্য অধিক হয়, তা’হলে ওই ভাবকে ‘তটস্থ’ বলা যায়। যেখানে সর্ববিষয়ে বৈজ্ঞাত্য ঘটে, সেখানে তাদের ‘বিপক্ষ’ বা ‘প্রতিপক্ষ’ বলা হয়। ৩০।

পরম্পরের ভাব বিজাতীয় হলে, পরম্পরের পক্ষে রুচিকর হয় না। সেই অরুচিকর ভাব থেকে পারম্পরিক অসহিষ্ণুতা ও অক্ষান্তির সঞ্চার হয়। তাই থেকে ঈর্ষা জন্মায়। ৩১।

‘পদ্মাবতী চন্দ্রাবলী কৃষ্ণের যোগ্যা হয়।

রাধিকারগণে কেহ ইহা নাহি সয়॥

হরিতে সমান প্রেম হয় যাহাকার।

স্বপক্ষ বিপক্ষ ভেদ জানিহ তাহার॥’

শুদ্ধা, বিদগ্ধা, পটীয়সী ও উল্লাসবতী চন্দ্রাবলীও শ্রীকৃষ্ণের আশা পূর্ণ করতে সমর্থ। সেইজন্য এই সব নায়িকার সঙ্গে শ্রীমতীদের ‘স্বপক্ষ’ ‘বিপক্ষ’ ভেদ ঘটে। দয়িতের সঙ্গে অপর কোনো নায়িকার প্রেমের যোগ্যতা পৃথিবীতে কে সহ করতে পারে? । ৩২।

চন্দ্রাবলীর ভাব যেমন রাধার পক্ষে শ্রীতিকর নয়, তেমনি রাধার ভাবও চন্দ্রাবলীর পক্ষে রুচিকর নয়।

কোন এক সখী প্রসঙ্গতঃ শ্রীরাধার চরিত্র বর্ণনা করছিল ; তাই শুনে চন্দ্রাবলী অসহিষ্ণু হয়ে তাকে তিরস্কার ক'রে বললে—‘রাধার নাম তো দূরের কথা, তুমি অনুরাধা নক্ষত্রের নামও আমার সামনে উচ্চারণ করবে না। তার দুর্বিনীত ব্যবহারে শাস্ত মুনিজনের মনও কুপিত হয়। ধিক্ ! মুনিগণের শিরোভূষণ ও ব্রজবাসিগণের পূজ্য যে শ্রীকৃষ্ণ, সেই মাধব তার চরণে পতিত হয়েছিলেন, তবুও তাঁর প্রতি রাধা দৃকপাত করে নি। ৩৩।

যেখানে অশ্রুর ভাব নিজ ভাবের প্রায় তুল্য হয়, সেখানে নায়িকারা পরস্পরের পক্ষ। এই পক্ষই পরস্পরের মিত্র হয়, বিদ্বেষেরও উপযুক্ত পাত্র। ৩৪।

‘শ্রীরাধার প্রেম যেন অমৃতের সিক্ত।
আর কোন গোপিকাতে নাহি তার বিন্দু ॥
তবে যেই বিপক্ষতা করি এ গগন।
রসের পুষ্টতা লাগি কহে কবিগণ ॥’

শ্রীরাধার যে প্রেমাঙ্গি গুণসম্পদ আছে, অন্য কোনো নায়িকার বা ব্রজাঙ্গনার মধ্যে তার শতাংশের একাংশও নাই। কিন্তু রসের পুষ্টির জন্য পরস্পরের গুণসম্পদে সমতা আরোপিত হয় ও বিপক্ষাঙ্গি ভেদাভেদ সৃষ্ট হয়। ৩৫।

যুথেশ্বরীদের মধ্যে পরস্পরের ভাব সর্বপ্রকারেই একজাতীয় ; তবে তুলনামূলক ভাবে তাদের সমান প্রমাণ করা কঠিন। ৩৬।

দুজন যুথেশ্বরীর মধ্যে হয়তো কখনো কথঞ্চিৎ সৌহার্দ্য হতে পারে। তবুও রসের বা প্রেমের স্বভাবধর্ম বশতঃ উভয়ের ভিতর বিপক্ষতা ঘটে। ৩৭।

ইতি হরিবল্লভ প্রকরণ।

উদ্দীপন প্রকরণ

যার সন্নিবেশে রসের উৎপত্তি হয়, বা বিদগ্ধ প্রেম সঞ্চারিত হয়, তাকে বিভাব বলে। এই বিভাবের ভিতরেই থাকে উদ্দীপনা। ১।

‘উদ্দীপন’ বা উদ্দীপনা ভাবকে (রতিভাব থেকে মহাভাব পর্যন্ত) প্রকাশিত করে। ‘উদ্দীপনাস্তু তে প্রোক্তা ভাবমুদ্দীপয়ন্তি যে।’ যেমন—শ্রীকৃষ্ণের গুণ, চেষ্টা, প্রসাধন, স্মিত, অঙ্গসৌরভ, বংশী, শৃঙ্গ, নৃপূর, শঙ্খ, পদাঙ্ক, ক্ষেত্র, তুলসী, ভক্ত ও বাসরাদি।—ভক্তিরসামৃত সিদ্ধি।

কৃষ্ণ এবং কৃষ্ণপ্রিয়াগণের গুণ, নাম, চরিত্র, ভূষণ, তটস্থ অর্থাৎ উদাসীন বা অস্থায়ী প্রভৃতি ভাবগুলিকে উদ্দীপন-বিভাব বলা হয়।

গুণ

কায়মনোবাক্যবিভেদে গুণ সাধারণতঃ তিন প্রকার। যথা—মানসিক, বাচিক ও কায়িক।

মানসিক

কৃতজ্ঞতা, ক্ষমা ও করুণা প্রভৃতি গুণ মানসিক। ২।

যথা—

শ্রীরাধার কোন এক সেবাপরায়ণা অসমস্নেহা সখী তার সম-পর্যায়ের অপর এক সখীকে বলেছিল—‘কৃষ্ণের আশ্চর্য গুণাবলীর কথা আর কি বলবো! তিনি অতি অল্প সেবাতেই সন্তুষ্ট হন। গুরুতর অপরাধ করলেও তিনি কষ্ট হন না, তাঁর মুখে হাসি ফুটে ওঠে। পরের দুঃখ দেখলে তাঁর অন্তর কাতর হয়ে ওঠে। তাই সখি, তাঁকে দেখলেই আমার মন ভূষাতুর হয়ে ওঠে।’

‘অলপহি সেবনে হোয়ত বশ। বহুতর অপরাধে বচন সরস ॥

পরদুঃখ দেখি কত হোয়ত কাতর। হরিগুণে মগ্ন মনে স্থখ বহুতর ॥’

বাচিক

যে সব কথা কানে শুনে আনন্দ সঞ্চারিত হয়, তাকে বাচিক গুণ বলে। ৩।

যথা—

বিশাখার প্রতি শ্রীরাধার উক্তি :

‘কাস্তুর মধুর বাক্য মোর শ্রুতি হরে।

রসাল বচন মোর লেগেছে অন্তরে।’

শ্রীমতী লতামণ্ডপের অন্তরালে দাঁড়িয়ে ছিলেন, তবুও শ্রীকৃষ্ণকে দেখছিলেন না। তাই দেখে, বিশাখা জিজ্ঞেস করেছিল—সখি, লতামণ্ডপের আড়ালে থেকেও তুমি কাস্তুরকে দেখছো না কেন?

উত্তরে শ্রীমতী বলেছিলেন—সখি, মাধব মূবল সখার সঙ্গে কথা বলছেন। আমি তাঁর সেই কথাগুলি শুনবার জন্য আড়ালে দাঁড়িয়ে আছি। তাঁর বাক্য এত মধুর যে, সেই বাক্য শুনে যেন কিছুতেই আমার আকাজক্ষা মিটেছে না। আমি এই আড়ালে থেকে তাঁর সেই মধুর বচনাবলী শুনবো।

কায়িক

বয়স, রূপ, লাবণ্য, সৌন্দর্য, অভিরূপতা বা মনোহারিত্ব, মাধুর্য ও মৃদুতা ইত্যাদিকে কায়িক গুণ বলে। ৪

বয়স

মধুর রসে বয়স চার রকমের হয়। যথা—বয়ঃসন্ধি, নব্যবয়স, ব্যক্ত বয়স ও পূর্ণ বয়স। বয়সাদি যে-সব গুণ প্রেয়সীদের মধ্যে বিদ্যমান, সেইসব গুণ শ্রীকৃষ্ণেরও আছে। তারই কিছু কিছু আলোচনা করা হ’চ্ছে। ৫।

বয়ঃসন্ধি

‘বাল্য যায়, যৌবনের প্রথম সন্ধান।

কবিগণ কহে তার ‘বয়ঃসন্ধি’ নাম ॥’ ৬।

শ্রীকৃষ্ণের বয়ঃসন্ধি, যথা—

‘কৃষ্ণের যে রোমাবলী কপিশ বরণ ছাড়ি আচয়িতে হইল শ্রামল ।

যৌবন আরম্ভে দেখে কাম পাঠাইল লেখ তার আখর করে কলমল ॥

পাইয়া তারুণ্য জল নেত্র দুটি কি চঞ্চল, সফরি হইয়া জলে ফিরে ।’ ৭ ।

শ্রীকৃষ্ণের মাধুর্য, যথা—

‘কামব্যাধ তাহে আশ্রয় অপাঙ্গ সন্ধান কৈল, যুবতী যুগীর প্রাণ হরে ॥’ ৮ ।

নান্দীমুখী বলেছিল—হে ব্রজমহেন্দ্র ! তোমার আঁখিতারকায়
ওই যে অনঙ্গ-দেবের সংযোজিত লুক্ক পঞ্চশর চাকুলোর সৃষ্টি
করেছে, তার অব্যর্থ সন্ধানে বৃন্দাবনের কুরঙ্গনয়না ব্রজসুন্দরীদের
নেত্র অশ্রুসিক্ত ও ভীতিচঞ্চল হয়ে উঠেছে । ৯ ।

কৃষ্ণপ্রিয়াগণের বয়ঃসন্ধি । ১০ ।

শ্রীমতীকে দূর থেকে দেখে শ্রীকৃষ্ণ সুবল সখাকে বলেছিলেন—
সখা, ওই দেখ, নবযৌবনরাজ শ্রীরাধার অঙ্গরাজ্য অধিকার
করেছে । তাই তার উন্নত নিত্য গৌরবগর্বে কিঙ্গিনী বাত্ম করে ।
যৌবনরাজকে উপহার দিবার জন্য বন্ধঃস্থল দুটি সাধু ফল তুলে
ধরেছে । ক্ষীণ কটিদেশ পাছে ভেঙ্গে পড়ে, সেই ভয়ে ত্রিবলী
বন্ধনের সাহায্য নিয়েছে । ১১ ।

কৃষ্ণপ্রিয়াগণের মাধুর্য, যথা—

‘কটাক্ষ ভ্রমরচয়ে তোর নেত্র কুবলয়ে বশতি করিতে সদা মন ।

তোমার চিত্ত মরাল লজ্জারূপ যুগল ক্ষণে ক্ষণে করে অন্বেষণ ॥

তুয়া মুখপঙ্কজে পরিহাস মধু সাজে লুকাইতে নারিছ যতনে ।

বুঝিলাম তোর দেহ করিঞা পরম মোহ জানাইল ব্রজেন্দ্রনন্দনে ॥’

বিশাখা শ্রীরাধাকে পরিহাস ক’রে বলেছিল, সুন্দরি !
তোমার অপরূপ রূপমাধুর্য বিকশিত হয়েছে । তুমি মাধবের
উৎসবপ্রদ অবস্থার সন্ধানে আছো । কিন্তু লজ্জা তোমায় বাধা
দিচ্ছে । তাই তোমার চিত্তরূপী হংসশাবক সেই ঈষৎ লজ্জার যুগল-
খুঁজে বেড়াচ্ছে ।

নব্য বয়স

যে বয়সে স্তন ঈষৎ উদ্ভিন্ন হয়, নয়নে ঈষৎ চঞ্চলতা ও মুখে যুগ্মমন্দ হাসি ফুটে ওঠে এবং মনে উড়ু-উড়ু ভাব দেখা দেয়, তাকেই নব্য বয়স বা নব-যৌবন বলে।

যথা—

শ্রীমতীর প্রতি বৃন্দার উক্তি :

‘অল্প অল্প তোর স্তন বক্রবক্র ও বচন নেত্র দুটি কিঞ্চিৎ চঞ্চল ।
জঘন হৈল ঘন ব্যক্ত হৈল রোমাগণ মধ্য ক্ষীণ করে টলমল ॥
তোমার অপূর্ব তনু সুন্দর নাগর কাহ্ন তুমি বট সেবাযোগ্য তার ।
গোবিন্দ নিকুঞ্জবনে কাহ্নর বিশ্রামস্থানে তুমি সেথা যাহ বারবার ॥’

কৃষ্ণপ্রিয়াগণের বয়োমাধুর্য

প্রোঢ়া কোন বধু তাঁর তরুণী ননদিনীকে বললেন—‘সুন্দরি! কেন তুমি বারবার শ্রীকৃষ্ণের বিশ্রামবেদীতে যুরে বেড়াচ্ছ? বাতাসে তাঁর অঙ্গগন্ধ ভেসে বেড়াচ্ছে, তাই কি তুমি উদ্ভ্রান্ত হয়ে উঠেছ? ওগো উত্তমা! কিসের জন্মই বা তুমি ইতস্ততঃ দৃষ্টি নিক্ষেপ করছো? দেখলে মনে হয়, নিশ্চয়ই তোমার মনে ভাবের আগুন জ্বলে উঠেছে, তাই তোমার চিত্ত ধূমায়িত হয়ে উঠেছে।’

ব্যক্তবয়ঃ বা যৌবন

যখন বক্রঃস্থলে পয়োধরের সুস্পষ্ট উদগম হয়, কটিদেশ ক্ষীণ হয় এবং অঙ্গ-প্রত্যঙ্গ উজ্জলতায় ঝলমল করে, তখনই জানা যায় যৌবন প্রস্ফুটিত হয়েছে। ১২।

যথা—

ইন্দ্রাবলীর প্রতি নান্দীমুখীর বাক্য :

‘চক্রবাক হুই স্তন সফরিণী ছনয়ন বলিভয় হইল তরঙ্গ ।
স্তন ইন্দ্রাবলী সখী তরুণিম জল দেখি ধরিয়াছ সরসের রঙ্গ ॥’ ১৩

ব্যক্তবয়ঃ বা যৌবন মাধুর্য

শ্রীমতীর প্রতি শ্যামলার উক্তি :

হে হরিণনয়নে ! যে সিংহের নখরাঘাতে করিকুন্ত বিদীর্ণ হওয়ার গজমুক্তার মালা ছিন্ন হয়ে কুঞ্জে কুঞ্জে ছড়িয়ে প'ড়ে কুঞ্জবনের শোভা বর্ধন করে, তুমি কি শৃঙ্গার-রসের সমুদ্রতুল্য সেই মহা-শক্তিশালী পুরুষসিংহকে তোমার নয়ন রক্তভূতে আবদ্ধ ক'রে হৃদয়তটে আকর্ষণ করেছ !

‘যে হরির নখকণে বরদস্তীর মুক্তাগণে বিস্তার করেছে বনে বনে ।

গহন নিকুঞ্জচারী হেন মহামত্ত হরি তুমি তারে বেঁকেছ নয়নে ॥’

পূর্ণ যৌবন

‘নিতম্ব বিপুল হয় মধ্য অতি ক্ষীণ ।

উরুযুগ রম্ভা তুল্য স্তনযুগ পৌন ॥

অঙ্গের অতীব কাস্তি পূরিত যৌবনে ।

এই ত বয়স পূর্ণা কহে কবিগণে ॥’

বৃন্দা বললেন—লীলাবতি ! তোমার আঁখিছটি মীনযুগলের বক্র উল্লাসলহরী হরণ করেছে, মুখচন্দ্রিমার অমেয় সৌন্দর্যে পূর্ণিমার চাঁদও পরাজিত হয়েছে, কুচছটি কুস্তুর আকার ধারণ করেছে । হে সুন্দরি ! পরিপূর্ণ যৌবনে তোমার তনুলতা অপূর্ব শোভায় সমুজ্জ্বল হয়ে উঠেছে ।

পূর্ণবয়ঃ মাধুর্য

চন্দ্রাবলীকে আশ্বাস দিয়ে পদ্মা বললে—হে প্রিয়সখি ! তোমার সৌন্দর্য দেখে, প্রতিপক্ষের কোন যুবতী না ভীতা হয় । তোমার প্রণয় মেঘের বর্ষণে কে না স্তম্ভিত হয়েছে । তোমার বিদগ্ধ কলা-নৈপুণ্যে ব্রজের সব তরুণীই আজ তোমার শিষ্য গ্রহণ করেছে ।

মাধবের নিকুঞ্জরাজ্যে তুমি একাকিনীই যেন পাটরাণী হয়ে বিরাজ করছো। ১৪।

কোন কোন ব্রজশুক্রবার তারুণ্য নূতন, কিন্তু বিশেষ ভাবে সজ্জিতা হয়ে পূর্ণ যৌবন প্রকাশের চেষ্টা করে।

রূপ

‘অলঙ্কার বিনা অঙ্গ যাতে বিভূষিত।

‘রূপ’ নামে সেই ভাতি আপনি কথিত ॥’

যথা—দান কেলি কোমুদৈতে

বৃন্দা বললেন—হে ললিতা! শ্রীমতীর নিরাভরণ দেহের সৌন্দর্য দেখেই যখন চন্দ্রাবলীর সখী পদ্মা লজ্জিতা হয়, তখন আর তাঁর মণিময় ভূষণের প্রয়োজন কি?। ১৫।

যথা বা—

বিদগ্ধমাধবে শ্রীমতীর প্রতি কৃষ্ণের উক্তি :

হে প্রিয়তমে! তুমি ললাটে যে সুন্দর কস্তুরী তিলক রচনা করেছ, তোমার চূর্ণ কুন্তুলের সৌন্দর্য তাকে ব্যর্থ করেছে। তোমার শ্রুতিমূলের কুবলয় ছুটি নয়নযুগলের সৌন্দর্যে নিস্প্রভ হয়েছে। তোমার বিধুমুখের মুছ হাসির ছটায় মণিহারের মনোহারিত্ব স্তান হয়েছে। আপন অঙ্গহ্যাতিতেই যখন তুমি এত সমুজ্জল, তখন অলঙ্কারে তোমার আর প্রয়োজন কি?। ১৬।

লাবণ্য

‘মুক্তা জিনি অঙ্গকাস্তি করে ঝলমল।

তাহারে লাবণ্য কহে রসিক সকল ॥’

মুক্তা-কলাপের স্নিগ্ধ ও স্বচ্ছহ্যাতির মত যে কমনীয় কাস্তি আপনা-আপনি অঙ্গে প্রতিভাত হয়, তাকে লাবণ্য বলে।

যথা—

শ্রীমতীর প্রতি বিশাখা :

‘প্রতিমূলে এক বচন কহি সুন্দরি তুহ তাহে কর অবধান ।
কাহে অধোবদন হোই তুহ বৈঠলি অসময়ে বিরচিলি মান ॥
দেখ হরিরূদয় উপরি ইহ বিলসই তু নহে আন কেহ নারী ।
নিরমল দর্পণ সদৃশ হরিবক্ষসি ও প্রতিবিম্ব তোহারি ॥’ ১৭ ॥

যথা বা—

শ্রীমতীকে সম্বোধন করে, শ্রীকৃষ্ণ বললেন—রাধে ! বিশাখা
নিশ্চয়ই জগতের অমল রুচিসমূহ অর্থাৎ পৃথিবীর সকল অনাবিল
সৌন্দর্য চয়ন ক’রে তোমার অঙ্গপ্রত্যঙ্গ রচনা করেছেন । হে
কুরঙ্গনয়না ! তোমার অঙ্গের উজ্জ্বল দীপ্তি মণিময় দর্পণকেও বিড়ম্বিত
করে । ১৮ ।

সৌন্দর্য

অঙ্গপ্রত্যঙ্গের যথোচিত সূষ্ঠু সন্নিবেশ ও সুশ্লিষ্ট সন্ধিবদ্ধকে
সৌন্দর্য বলা হয় । ১৯ ।

যথা—

শ্রীকৃষ্ণ বললেন—রাধে ! তোমার সৌন্দর্যের কথা আর কি
বলবো ! তোমার মুখমণ্ডল চন্দ্রের মত, উচ্চ কুচযুগ বক্ষঃস্থলকে অতীব
সুদৃশ্য করেছে, বাহু দুটি স্বক্কেদেশের শোভা বর্ধন করে, মধ্যদেশ অতি
ক্ষীণ, নিতম্ব বিশাল, উরুযুগ ক্রমশঃ ক্ষীণ বা লঘু হয়ে অপরূপ শোভা
ধারণ করেছে । অপূর্ব কমনীয়তা বিভাতি হয়েছে তোমার এই
অনিন্দ্য সুন্দর দেহে ।

‘মুখ জিনি পূর্ণচন্দ্র বিব জিনি কুচদ্বন্দ্ব ভূজ দুই আনত কঙ্কর ।
মধ্য মুষ্টিপরিস্রিত শ্রোণী অতি বিস্তারিত উরু দুই অতি গুরুতর ॥’

অভিরূপতা

আপন গুণের উৎকর্ষ দ্বারা সমীপস্থ অম্ম বস্তুকে গুণাঙ্কিত করে
তোলার কারকতাকে বলে অভিরূপতা ।

যথা—শ্রীরাধার প্রতি বিশাখা :

‘কৃষ্ণের দশনে বসি স্ফটিক হইল বাঁশী হাতে হয় পদ্মরাগ মণি ।
গণ্ডের নিকটে যেঞা ইন্দ্রনীলমণি হঞা বাঁশী হলো রতনের থনি ॥’

যথা বা—

শ্রীকৃষ্ণ বললেন—হে রাধে ! কি আশ্চর্য ! ওই স্থেত কোকনদের কলিকাটি তোমার স্বর্ণকুস্তুর মত স্তন যুগের সংস্পর্শে চাঁপার কলির মত কাস্তি ধারণ করেছে । হাতের লীলাপদ্মটি সিন্দুরাভ করতলের স্পর্শে হিন্দুলবর্ণ হয়ে উঠেছে । তোমার ওই অতিসুন্দর কেশকলাপে সংলগ্ন বিকশিত কোকনদটি নীলোৎপলের আভা ধারণ করেছে । একই ফুল তোমার অঙ্গসঙ্গে তিনটি বিভিন্ন বর্ণাভায় উদ্ভাসিত হয়ে উঠেছে । ২০ ।

মাধুর্য

দেহের যে-রূপ অনির্বচনীয় তাকেই মাধুর্য বলে । ২১ ।

যথা—

শ্রীরাধার প্রতি বিশাখা :

‘কিরূপ দেখিলাম আমি যমুনারি কুলে । বরণি না হয় ওর মন রৈল তুলে ॥
আঁখি ঠারে কুলবতীর ত্রত কৈল নাশ । এমন মাধুর্য কৃষ্ণ অঙ্গে পরকাশ ॥’

বিশাখা বললেন—হে রাধে ! নবনীরদশ্যাম শ্রীকৃষ্ণ কুলস্রীগণের হৃদয় হরণ করে, আপন হৃদয়ে স্থাপন করছেন । তাঁর নেত্র বলপূর্বক তাদের তনুবিভঙ্গী হরণ করে নিচ্ছে । হে স্নমুখি ! সেই জন্তই কুল-কামিনাদের মানসনেত্রের অভাব ঘটেছে, তারা নিজেদের ধর্ম রক্ষা করতে পারছে না । মাধবের অভিনব মাধুর্য তাদের নারীধর্মকে চঞ্চল করে তুলেছে ।

মার্দব বা মৃদুতা

কোমল বস্তু সহিবারও যে অসহিষ্ণুতা তাকে মার্দব বলে। অর্থাৎ যা কোমলের চেয়েও কোমল।

‘কোমল বস্তুর স্পর্শ না পারে সহিতে।

মার্দব কহি যে তারে রসশাস্ত্র মতে ॥’

ওই মার্দব বা মৃদুতা তিন প্রকারের। যথা—উত্তম, মধ্যম ও কনিষ্ঠ। ২২।

উত্তম মার্দব

অভিনব নবমালিকা-রচিত পুষ্পশয্যায় শ্রীরাধা নিশাকালে শয়ন করেছিলেন। কিন্তু আশ্চর্যের বিষয়, একটি ফুলের পাপড়িও তাঁর দেহের সংস্পর্শে লান হয়নি। উপরন্তু পুষ্পের আঘাতেই শ্রীমতীর অঙ্গে অগণিত ব্রণ চিহ্ন অঙ্কিত হয়েছে। ২৩।

মধ্যম মার্দব

ধনিষ্ঠার প্রতি ললিতার উক্তি :

হে পীনস্তনি ধনিষ্ঠা! তুমি সূক্ষ্ম চীনাংশুক পরিধান করেছিলে, তাই তোমার কোমল অঙ্গ ব্যাধিত হয়ে, রক্ত চন্দনের রক্তিম আভা ধারণ করেছে! সূক্ষ্ম রেশমী বস্ত্রের সংস্পর্শেও কোমল অঙ্গ রাঙা হয়ে উঠেছে। ২৪।

কনিষ্ঠ মার্দব

পদ্মার আমোদিত মুখপদ্মে সুগন্ধি নীল চূর্ণকুন্তলগুলি ভ্রমরের মত নিবদ্ধ হয়ে আছে। সে মুখপদ্ম এতই কোমল যে, প্রভাত রবির মৃদু কিরণেও তাম্রবর্ণ হয়ে উঠলো।—রসসুধাকর।

এই তিনটি উদাহরণে এই কথাই প্রতিপন্ন হয় যে, নায়িকার অঙ্গের মৃদুতা বা কোমলতা এত বেশী যে, কোমল বস্তুর সংস্পর্শে সহিতে পারে না। একেই মার্দব বলে।

নাম

শ্রীকৃষ্ণের প্রতি বৃন্দার উক্তি :

‘মধুর কালিন্দী তটে হরিণী রয় নিকটে বিহার করয়ে কৃষ্ণসার ।
এই কৃষ্ণ নাম শুনি চমকি উঠিল ধনী ভূমিতে পড়য়ে কতবার ॥’

মুরারি ! আমি রাধার কাছে গিয়ে বললাম যে, হে গৌরাজি, দেখ যমুনার তীরে কুরঙ্গদল পরিবেষ্টিত হয়ে কৃষ্ণসার রঙ্গবিহারে মস্ত । আমার মুখে ‘কৃষ্ণসারের’ কৃষ্ণ শব্দটি শোনামাত্রই শ্রীমতী অনঙ্গ বিপাকে ঘূর্ণিত হয়ে উঠলেন । ২৫ ।

চরিত

শ্রীকৃষ্ণের চরিত্র অনুভাব ও লীলার সমন্বয় ।

সেই চরিত্রকে দুটি পর্যায়েও ভাগ করা যায়—অনুভাব ও লীলা ।
অনুভাব সম্পর্কে পরে আলোচনা করা হবে । এখন লীলা সম্পর্কে আলোচনা করা যাক ।

লীলা

মনোহর ক্রীড়া, তাণ্ডব, বেণু বাদন, গো-দোহন পর্বত উত্তোলন, গো-আশ্বান এবং গমন ইত্যাদিকে লীলা বলে উল্লেখ করা হয়েছে ।

মনোহর ক্রীড়া

রাস ও কন্দুক ক্রীড়া বা ভাঁটা নিয়ে খেলা করা ইত্যাদিকে চারুক্রীড়া বা মনোহর লীলা বলা হয় ।

রাস

শ্রীরাধার প্রতি শ্যামলার উক্তি :

‘রাস করল হরি ব্রজনারী সঙ্গে । কোটি মদন জিনি নয়ন কি ভঙ্গে ॥
অথমে তা দেখি সুরচয় নারী । ঠোরি না পাওল ইহ রস ভারি ॥’ ২৬ ।

‘পেখত হরি অব খেলত গেড়ুয়া । পিঠত দোলই বেণী ঘন চাকুয়া ॥
কত কত ভকী করত হরি নয়নে’। মনু মন আরল ফুলশর দহনে ॥’

শ্রীকৃষ্ণের কন্দুক ক্রীড়া দেখে শ্রীমতী সখীদের বললেন—
সখীগণ! ওই দেখ, শ্রীকৃষ্ণ অরুণ বর্ণের ক্ষেপনীর দ্বারা গোলকটি
উর্ধ্বনিক্ষেপ ক’রে, তার পিছনে পিছনে ছুটছেন। পিঠে তাঁর
দীর্ঘ বেণী ছলছে। কন্দুক আন্দোলনের সঙ্গে-সঙ্গে তাঁর লীলাচঞ্চল
আয়ত নেত্র বিভ্রমের সৃষ্টি করছে। তাই দেখে, আমাদের অন্তর
আনন্দে উদ্বেলিত হয়ে উঠছে। ২৭।

তাণ্ডব

তাণ্ডব বলতে বুঝায় উদ্যম নৃত্য; যে নৃত্যে অঙ্গ-প্রত্যঙ্গ চঞ্চল
হয়ে ওঠে।

সখীর প্রতি শ্রীরাধা—

‘দেখ দেখ সখি! নাগর নাচিছে কালিন্দী নদীর কূলে।
এমন নাচন দেখেছে যে জন সেই রহে এথা ভুলে ॥
শিশিপাখা শিরে পবনে উড়িছে সখাগণ তাল ধরে।
এমন দেখিয়া কোন কুলবতী রহিতে পারিবে ঘরে ॥’ ২৮ ॥

বেণুবাদন

শ্রীরাধার প্রতি ললিতা—

‘কটিতটে ধড়া বান্ধি ওড়ুটি চরণ ছান্দি কাঁকালি পড়য়ে বেন হেলে।
বাঁকা নেত্র কঙ্করে বাঁশী লঞা অধরে তার ছিন্ন আচ্ছাদি অঙ্গুলে ॥
চঞ্চল নয়নবাণে আর মুরলীর গানে হানিলেক অবলার প্রাণে।
কিবা মন্ত্র জানে কান্ন অবশ করিল তনু সেই রূপ দেখিয়া নয়নে ॥’

হে বরাজি! ওই দেখ, শ্রীকৃষ্ণ তাঁর বামজজ্বার অধোভাগে দক্ষিণ
স্রগ রেখে, বক্ষিম ভঙ্গিমায় দাঁড়িয়ে, তির্যক কুটিল দৃষ্টিতে চেয়ে, ঈষৎ
বিকশিত অধরে বংশী নিয়ে অঙ্গুলি সঞ্চালন করছেন। ভ্রমরের মত

সুন্দর ক্রছটি সেই সঙ্গে নৃত্য ক'রে পরম আনন্দ সঞ্চার করে।
তাঁকে স্বীকার করে নাও।—ললিত মাধব।

গো-দোহন

শ্রীকৃষ্ণের গো-দোহন ভঙ্গিমা শ্রীরাধাকে দেখিয়ে, বিশাখা বললে—প্রিয়সখি! ওই দেখ, ছুটি চরণ অর্ধ-উত্তোলন ক'রে, ভূমিতে বসে, শ্রীকৃষ্ণ নতাগ্র-জানুহুটিতে দোহন পাত্র ধারণ ক'রে, অঙ্গুষ্ঠ ও সংলগ্ন অঙ্গুলিহুটি দ্বারা গাভীস্তনের উধস্ বা বাঁট ঝুঙ্ক-প্রলেপে আর্জ করে নিয়ে গো-দোহনে রত হচ্ছেন। দামোদরের ওই অঙ্গুলিদ্বারা স্তনাগ্র সঞ্চালন, ও গো-দোহনের মনোহর দৃশ্য দেখে, আমার চিত্ত রসসিক্ত ও মুগ্ধ হচ্ছে। ২৯।

পর্বতোদ্ধার

শ্রীমতী বিশাখাকে বললেন—ওই দেখ সখি, কি আশ্চর্য! শ্রীকৃষ্ণ বামহস্ত উত্তোলন ক'রে, গিরি গোবর্ধন ধারণ করেছেন। দক্ষিণ হস্ত কটিদেশে রেখে, মুহু-মুহু মধুর হাস্য করছেন। তাঁর চঞ্চল নয়নহুটি ভ্রমরের মত খেলা করছে। কৃষ্ণের ওই মোহন মূর্তি আমার মানসপদ্মকে চঞ্চল ক'রে তুলেছে।

গো-আহ্বান

ললিতাকে শ্রীমতী বললেন—সখি! দূরগত ধেমুগণকে একের পর এক নাম ধরে, শ্রীকৃষ্ণ মুহুর্মুহু হী-হী রবে আহ্বান করছেন। তাঁর সেই আহ্বান আমার চিত্তকে হরণ করছে।

গমন

শ্রীরাধা ললিতাকে বললেন—দেখ সখি! মাধবের ওই গতিভঙ্গী আমায় অপার আনন্দ দান করে।

‘গজরাজ জিনি দেখে কাহ্ন চলে। মধুপ আকুল নবমালে দোলে ॥

চঞ্চল বায় শিশিখুচ্ছ উড়ে। যুহুহাস্তে তার মাণিক মোতি পড়ে ॥’

প্রতি পদক্ষেপে বাহ্যুগল আন্দোলিত হয়। মাল্যগন্ধে

মধুপগণ আকুল হয়ে ওঠে, এবং বায়ুহিল্লোলে ঈষৎ চঞ্চল শিখিচূড়া
অপূর্ব সৌন্দর্য বিস্তার করে। ৩০।

মণ্ডন

বসন, ভূষণ, মাল্য, অনুলেপন ইত্যাদি ভেদে মণ্ডন চার রকমের।
নায়ক ও নায়িকার সুরুচিসম্পন্ন বেশভূষা ও প্রসাধনাদি পরম্পরের
আকর্ষণ, প্রেম ও সন্তোগলিপ্সা বৃদ্ধি করে।

বসন

শ্রীরাধা ললিতাকে বললেন—সুন্দরি ! ওই যে পদ্মপলাশলোচন
শ্রীকৃষ্ণ কটিতে মণিপ্রভার শ্রায় উজ্জল বসন পরিধান করেছেন, তা
কি তুমি দেখতে পাচ্ছ না ? ওই বসনের আশ্চর্য শোভা দেখে যে
আমার ধৈর্যচ্যুতি ঘটলো। ৩১।

দলিত-হরিতালদ্ব্যতি-সিঞ্চিত-পীতবসনধারী।

উজ্জল নব-রক্ত-জবা রঞ্জিত রাঙা চরণচারী ॥

কৌতুকলীলা-লাস্তভরে মঞ্জরে হাসি বিষপুটে।

তমাশ্রাম নিত্য সেরূপ চিত্ত আকাশে উঠুক ফুটে ॥

—হংসদূত।

শ্রীমতীর পট্টবাস দেখে শ্রীকৃষ্ণ বলেছিলেন—রাধে ! অমল
পদ্মরাগের মত তোমার ওই পট্টবাস জয়যুক্ত হয়েছে। আমার
হৃদয়ের অনুরাগের রঙ তার সঙ্গে মিশে তোমার বসনকে দ্বিগুণ
রক্তবর্ণ করে তুলেছে। ৩২।

ললিতার প্রতি শ্রীমতী—

‘নীপপুষ্প কৃষ্ণকর্ণে রহে ত কামের তুণে সেই মোরে দুঃখ দিতে পারে।

শিখিপাখা আছে শিরে কিবা দোষ দিব তারে সেও কেন দুঃখ দেয় মোরে ॥’

যথা বা—

পথে ললিতাকে যেতে দেখে, শ্রীকৃষ্ণ তার রূপ বর্ণনা ক'রে সুবলকে বললেন—সখা, ওই যে দেখছো ললিতা যাচ্ছে, ওর কণ্ঠহারের ছাতি, কানের দোহল্যমান কুণ্ডল এবং কনক অঙ্গদের উজ্জলতা আমাকে আকর্ষণ করছে; আমার মনে অভিলাষ সঞ্চারিত ক'রে, আমায় ব্যথিত ক'রে তুলেছে। ৩৪।

মাল্য ও অমুলেপন

শ্রীকৃষ্ণ সুবলকে বললেন—বন্ধু, শ্রীরাধা যে তাঁর কেশদামে পুষ্পমাল্য ধারণ করেছেন, বস্ত্রের দ্বারা তা আবৃত থাকলেও, মকরন্দ-লোলুপ মধুপবন্দ সেখানে গুঞ্জন করে ঘুরে বেড়াচ্ছে। গণ্ডছয়ের অনির্বচনীয় কাস্তি তাম্বুল রাগকে বর্ধিত করেছে। ওই সুরূপাব বিদগ্ধ বেশ আমার নয়নকে পরিতৃপ্ত করে। তাঁর অঙ্গের প্রসাধন সুগন্ধে আমার মন বিমোহিত হয়ে ওঠে। ৩৫।

যথা বা—

শ্রীকৃষ্ণের নিকটে গিয়ে দূতী বললে—হে দামোদর! তোমার চন্দনাদি অঙ্গরাগ কি অঙ্গনাদের অনঙ্গ বর্ধনের জন্ম? তোমার গলায় যে পুষ্পমাল্য ধারণ করেছ, তাও কি কুলাজ্ঞানাদের উদ্দাম মনোভাব সৃষ্টি করবার উদ্দেশ্যে?

সম্বন্ধী

নায়ক ও নায়িকার মধ্যে যোগাযোগের উপলক্ষ্য বা উদ্দীপন এবং সমীপবর্তিত্বকে সম্বন্ধী বলে। লগ্ন ও সন্নিহিত ভেদে সম্বন্ধী ছরকমের।

লগ্ন

বংশীরব, শৃঙ্গীধ্বনি, গীত, সৌরভ, ভূষণশব্দ, চরণচিহ্ন, বীণারব এবং শিল্পকৌশল ইত্যাদিকে বিদগ্ধ ব্যক্তিগণ লগ্ন-সম্বন্ধী বলেন। ৩৬

বংশীরব বা মুরলীধ্বনি

শ্রীরাধার প্রাত ললিতার উক্তি :

‘ওই যে বেগুর নাদ তরুলতা উন্মাদ শুনি তরু বিকশিত হয় ।
কোকিলের কুহুরব সন্ধ্যামেঘ তাণ্ডব তারা সব মৌন হয়ে রয় ॥
গোপীগণের স্মরানল তাহে ঝঙ্কা হানল সে আগুনে হিয়া জলে যায় ।
রাধা-ধৈর্য গিরিরাজ তাহা বিদারিছে বাজ, রাধিকা চঞ্চল হৈলা তায় ॥’
—দানকেলি কৌমুদী ।

মুরলী শুনে, শুধু যে শ্রীরাধার পর্বতসদৃশ ধৈর্যই বিদীর্ণ হয়,
তাই নয় । সুপটু মাধব যখন মধুর মাধবীলতামণ্ডপের ভিতর থেকে
সুমধুর বংশীধ্বনি করেন, গোপিকাগণের মানরূপী মীন যেন বড়িশ
বিদ্ধ হয় ।

—রসসুধাকর ।

যে সব উদ্দীপনের কথা বলা হলো, তার মধ্যে শ্রীকৃষ্ণের
মুখনিঃসৃত মুরলীধ্বনিই সব চেয়ে উৎকৃষ্ট ।

শৃঙ্গীরব বা শৃঙ্গাধ্বনি

শৃঙ্গাকে সম্বোধন করে শ্রীরাধা বললেন—রে শৃঙ্গি ! মুরলী
অহরহ শ্রীকৃষ্ণের মুখচন্দ্রের সুধাপান করছে, তা করুক । কারণ,
সে সদ্ধংশজাতা, সরলা এবং পঞ্চমস্বরনির্নাদে গরীয়সী । কিন্তু তুমিও
তো শ্রীকৃষ্ণের অধর স্পর্শ কর । তবে তুমি কেন এমন বিষমা ?
তোমার দেহ বক্র, ‘অঙ্গারের মত কৃষ্ণবর্ণ ! সে যাই হোক, তুমি
অমন উচ্চরব করো না । তোমার ধ্বনি শুনে, সকলেরই হৃদয়
ব্যথিত হয় । সূতরাং তুমি ক্লান্ত হও ।

গীত

কলহাস্তুরিতা শ্রীরাধা ললিতাকে বললেন—সখি ! ওই দেখ
আমার মনের আগুন নিবিয়ে দেবার জন্য কৃষ্ণমেঘ গীতি-অমৃত বর্ষণ

করছে। রাগ করো না সখি, প্রসন্ন হও। তুমি সাক্ষাৎ ঝড় (স্বয়ং বাত্যা), তোমার প্রভাবে ওই কৃষ্ণ জলদকে দূরে সরিয়ে দাও। ৩৭।

‘নিভাইয়া মানানল বরিষয়ে গীত জল মেঘ হঞা আসিয়াছে হরি।
দক্ষিণ পবন হঞা দেহ মেঘ উড়াইয়া তবে মান রাখিবারে পারি ॥’

সৌরভ

অভিসারিকা শ্রীরাধা বনের ভিতর প্রবেশ করে, ললিতাকে জিজ্ঞাসা করলেন—সহচরি! এই নিবিড় বনে কার সুমধুর অঙ্গ-পরিমল বাতাসে ভেসে এসে, আমার অঙ্গ স্পর্শ করছে? সেই স্পর্শে আমার তনুলাভা রোমাঞ্চিত হয়ে উঠলো। আমি বেশ জানতে পারছি যে, এই গভীর অরণ্যে নিশ্চয়ই শ্রীকৃষ্ণ পূর্বে এসেছেন। নইলে, এমন অঙ্গগন্ধ আর কার হবে! ত্রিভুবনে তিনি একাই এ-হেন সৌরভশালী ব’লে খ্যাতিলাভ করেছেন। ৩৮।

যথা—

‘কার পরিমল আঁগুল মঝু গেহে। তহুঝ নর্তন করত হি দেহে ॥
জানলু মাধব আঁগুল ধাম। যাকর ভুবনে সুরভি বলি নাম ॥’

যথা বা—

শ্রীকৃষ্ণ নুবলকে জিজ্ঞাসা করলেন—বন্ধু, হঠাৎ এই উৎকৃষ্ট নব সৌরভ কোথা থেকে এলো? এই পরিমল যে আমার হৃদয়ে মাদকতার সৃষ্টি করে! আমার মনে হয়, নিশ্চয়ই শ্রীরাধা পুষ্পচয়নের জন্তু গিরিশিখরে প্রবেশ করেছেন। ৩৯।

ভূষণকণ

বুলা শ্রীকৃষ্ণকে বললে—মাধব! আজ হংসগামিনী শ্রীরাধা যমুনাতটে কলহংসের নিনাদ শুনে, তোমার নৃপুরুষনি বলে ভুল করেছিল। ফলে, তার এমন চিন্তাচঞ্চল্য উপস্থিত হলো যে, শ্রীমতীর মস্তক থেকে জলপূর্ণ কলসী ঝলিত হয়ে ভূপতিত হলো। সে তা জানতেও পারেনি। ৪০।

‘কালিন্দীতে কমলিনী শুনিয়া হংসীর ধ্বনি কৃষ্ণের নৃপুরুষ বলি জানিল।

কাঁধে ছিল কলসী ভূমিতে পড়িল খসি তাহা কিছু জানিতে না পারিল ॥’

যথা ললিত মাধবে—

শ্রীরাধাকে দর্শন করবার অভিলাষ নিয়ে, শ্রীকৃষ্ণ মনে মনে বিচার করছিলেন—আহা ! শ্রীরাধার ওই কিঙ্কিনী ঝংকারের মাধুর্য আকাশে উড়ীয়মান কলকাকলিমত্ত সারস পক্ষীদের কলধ্বনিকেও হার মানায় । কিন্তু তা ভেবে তো আমার হৃদয়ের বিকার প্রশমিত হচ্ছে না । ৪১ ।

পদাঙ্ক

দানকেলি কোমুদীতে শ্রীরাধা ললিতাকে বলেছেন—

‘অঙ্কুশসহ পঙ্কজ বজ্রের সহিত ধ্বজ এ চিহ্ন ও কৃষ্ণের চরণ ।

সেই চিহ্ন ধরণীতে দেখিয়া আমার চিতে কতু প্রীতি কতু বা কম্পন ॥’

সখি ! এই বনশ্রেণী শ্রীকৃষ্ণের উজ্জল চরণচিহ্ন দেখে আমোদিত হয়ে, পুষ্পিত অগ্রভাগ নত ক’রে আমার পায়ে লুটিয়ে পড়ছে । এই বনশ্রেণী দেখে, আমার চিত্তে অতিশয় আনন্দ সঞ্চারিত হচ্ছে । ৪২ ।

বিপক্ষীনিরুণ বা বীণার ঝংকার

শ্রীকৃষ্ণ শ্যামলাকে দেখবার ইচ্ছা প্রকাশ করে বললেন—বন্ধু, এই বৃন্দাবনে একমাত্র শ্যামলাই পূজ্যতমা । কারণ, শ্যামলা তার বীণায় কন্দর্পকেলি নাট্যের যে মঙ্গল-বেদ পাঠ করেছে, সেই নান্দীপাঠ যেন বেদের শব্দব্রহ্মের মত সুহৃৎ সুহৃৎ আমার চিত্তকে আমোদিত করেছে ।

শিল্পকৌশল

মাল্যবাহিকা বনদেবীর প্রতি শ্রীরাধার উক্তি—

‘কি মালা গেঁথেছে হরি নানা ফুল সারিসারি পট্টস্থতে করিয়াছে গুণ ।

দেখি মন কাঁপে শৃঙ্গ যেন তীক্ষ্ণ বাণপূর্ণ কন্দর্পের অভিনব তুণ ॥’

নির্বাচিত ভালো ভালো ফুলগুলি এবং মালা গাঁথবার সৌষ্ঠব ও শিল্পকৌশল দেখেই আমি বুঝেছি যে, এ মালা শ্রীকৃষ্ণ স্বয়ং

গেঁথেছেন। তাই, এ মালা দেখেই আমার হৃদয় কেঁপে উঠছে।
এ যেন কন্দর্পের শাগিত শরপূর্ণ তুণ ! ৪৩।

সন্নিহিত

যে সব জিনিস, ব্যক্তি ও স্থান শ্রীকৃষ্ণের সহিত ঘনিষ্ঠ সম্পর্কে
সংশ্লিষ্ট, বা যে সব জিনিস দেখে শ্রীকৃষ্ণের কথা মনে হয়, তাকে
সন্নিহিত বলে। যেমন—নির্মাল্য, বহঁ, গৈরিক, উত্তমা গাভী,
পাঁচনী, বেণু, শৃঙ্গা, প্রিয়জন, গোধূলি, বৃন্দাবন, বৃন্দাবনে আশ্রিত
লতা, কুঞ্জ, কদম্ব, তুলসী, ভ্রমর, ময়ূর-ময়ূরী প্রভৃতি জীব,
গিরিগোবর্ধন, যমুনা ও রাসস্থলী ইত্যাদি ॥ ৪৪—৫১ ॥

উদাহরণ :

নির্মাল্যাঙ্গি

‘অঙ্গোস্তীর্ণ বিলেপন মন কৈল আকর্ষণ নামে পুনঃ বশ কৈল মন।
এই যে নির্মাল্য মালা পুন মনসমোহিলা তিন বস্ত্র পরম মোহন ॥’

বিশাখার প্রতি শ্রীমতী—বিদম্বমাধব।

বহঁ ও গুঞ্জা

পৌর্ণমাসীর উক্তি :

‘শিখিপুচ্ছ দরশনে রাই কাঁপে ঘনে ঘনে গুঞ্জা দেখি করএ রোদন।
রাধার হৃদয়ে আসি কোন গ্রহ রৈল পশি বিরচিয়া অপূর্ব নটন ॥’

নৈচিকী বা উত্তমা গাভী

‘সঙ্ক্যাকালে ধেমু সব পথে করে হাথারব তোমা বিনা হৈয়া কাতরে।
তাহা শুনি চন্দ্রাবলী দুঃখের অনলে জলি ছটকট করয়ে অন্তরে ॥’

মাধুর—পদ্মার উক্তি।

নিম্প্রয়োজনবোধে অত্যাণ্ড সন্নিহিতের বিস্তৃত বিবরণ দেওয়া
হলো না।

তটস্থ বা ভটস্থ উদ্দীপন

যে সব উদ্দীপন উৎকর্ষা, প্রেমামুভূতি, বা মিলনের ঔৎসুক্য
সৃষ্টি করে, তাদের তটস্থ উদ্দীপন বলা হয়।

‘তটস্থ চন্দ্রের জ্যোৎস্না, মেঘ ও বিদ্যুৎ।
বসন্ত, শরৎ-চন্দ্র, স্বপ্নস্থি মাকুত ॥

পক্ষী আদিগণ হয় তটস্থ উদ্দীপন।

পূর্বে জানো উদাকৃতি যত বিবরণ।’

চন্দ্রিকা বা জ্যোৎস্নালোক, আকাশে মেঘ ও বিদ্যুৎ, বসন্তকাল, শরৎকালের পূর্ণিমা রাত্রি, সুগন্ধি বায়ু, ময়ূর-ময়ূরী-শুকশারী-পাণিয়া-কোকিল ইত্যাদি পক্ষীগণ প্রেমিক-প্রেমিকার বিরহ বা মিলনের অনুভূতিকে উদ্দীপিত করে ও উৎকণ্ঠা সঞ্চার করে। তাই এগুলিকে তটস্থ উদ্দীপন বলা হয়। ৫২—৫৬।

প্রতিটী তটস্থ উদ্দীপনের স্বতন্ত্র উদাহরণ দেওয়া হলো না। উল্লিখিত উদ্দীপনগুলির কারকতা সুস্পষ্ট। চাঁদের আলো, মেঘ, বিদ্যুৎ, বসন্তকাল ও দক্ষিণা বাতাস এবং পুষ্পিত কানন, শরৎকালের জ্যোৎস্না-পুলকিত রজনী, পুষ্পগন্ধবাহী মৃদু বাতাস, ময়ূর ময়ূরীর নৃত্য, কোকিলের কুহুতান ইত্যাদি যে প্রেমিক প্রেমিকার হৃদয়াবেগ বৃদ্ধি করে, তা সর্বজনবিদিত। সুতরাং উদাহরণের দ্বারা পুনরায় সেই সব উদ্দীপনের বিশ্লেষণ নিম্নয়োজন।

অনুভাব প্রকরণ

নায়ক-নায়িকার ভাবোদ্দীপক বা মনোভাব প্রকাশক ক্রভঙ্গি প্রভৃতি রত্নসূচক গুণ-ক্রিয়াদি, ব্যঞ্জনা, চোখের চাতুৰ্য ইত্যাদিকে অনুভাব বলে।

অনুভাব তিন রকমের : অলঙ্কার, উদ্ভাস্বর (নীবী ও উত্তরীয় অংশনাদি সপ্তবিধ) এবং বাচিক (আলাপাদি দ্বাদশবিধ) ।

অলঙ্কার

যৌবনকালে কামিনীগণের সঙ্গুগ্ধজনিত অলঙ্কার বিংশতি প্রকার হয়। নায়কের প্রতি সর্বপ্রকার অভিনিবেশ হেতু ওই অলঙ্কার সময় সময় প্রকাশ পায়।

বিকারের কারণ থাকা সত্ত্বেও চিন্তে যে অবিকৃত ভাব থাকে তাকেই সঙ্গুগ্ধ বলে। প্রণয় সঞ্চারে নায়িকার মনে বিকার উপস্থিত হয়। কিন্তু নায়ক বা কাস্তের প্রতি সকল বিষয়ে তার অভিনিবেশ থাকে বলে, সে বিষয়ে চিন্তা অবিকৃত থাকে। এরূপ অবস্থায় সময় সময় শুধু ওই সঙ্গুগ্ধজনিত অলঙ্কারগুলি প্রকাশিত হয়। এই অলঙ্কারের মধ্যে হাব, ভাব ও হেলা—এই তিনটাকে অঙ্গজ অলঙ্কার বলা হয়।

শোভা, কাস্তি, দীপ্তি, মাধুর্য, প্রগল্ভতা, ঔদার্য ও ধৈর্য—এই সাতটিকে অযত্নজ বলা হয়। শোভার জন্তু বেশাদি বিষয়ে প্রযত্নের অভাবেও শোভা স্বতঃ প্রকাশিত হয়। অযত্নজ শোভা বলতে সাধারণতঃ বুঝায়, যত্ন না করলেও যে শোভা বিকশিত হয়, অর্থাৎ স্বয়ম্প্রকাশিত (Spontaneous)। কিন্তু চেষ্টিত অযত্নের দ্বারা যা ঘটানো হয়, তাকেও অযত্নজ শোভা (Beauty created by careful carelessness) বলা যায়।

অপর—লীলা, বিলাস, বিচ্ছিত্তি, বিভ্রম, কিলকিঞ্চিত, মোটায়িত, কুটুমমিত, বিস্বেদক, ললিত এবং বিকৃত—এই দশটি অনুভাব স্বভাবজ। নায়িকাদের এই অনুভাবগুলি স্বভাবতই ঘটে থাকে, তার জন্ত তাদের চেষ্টা করতে হয় না। ৫৭।

অজ্ঞ অলঙ্কার ভিন রকম

ভাব

বীজের আদি বিকৃতি যেমন অঙ্কুর, তেমনি শৃঙ্গার রসে নায়িকার নির্বিকার চিন্তে রতিবিষয়ক প্রথম বিকারের নাম ভাব।

‘নির্বিকারে মনসি উদ্ধুক্ষমাত্র বিকারো ভাবঃ।’

নির্বিকারাত্মকে চিন্তে ভাবঃ প্রথম বিক্রিয়া ॥ ৫৮ ॥

চিন্তাস্রাবিকৃতি সৎ বিকৃতে কারণে সতি।

তত্রাত্মা বিক্রিয়া ভাবো বীজস্তাদিবিকারবৎ ॥ ৫৯ ॥

শৃঙ্গার রসে নির্বিকার চিন্তে রতিনামক স্থায়িভাবের প্রাচুর্য্য হলে, প্রথম যে বিক্রিয়া হয়, তাকে ভাব বলে।

বিকারের কারণ থাকা সত্ত্বেও চিন্তের যে অবিকৃত অবস্থা, তার নাম সত্ত্ব।

এই সত্ত্বের যে প্রথম বিক্রিয়া (disturbance of equilibrium) বা রতিবিষয়ক আবেগ বা চাঞ্চল্য, তাকেও ভাব বলা হয়।

যথা—

কোন সখী হৃদয় উদ্ঘাটনের পটুতা দেখিয়ে, যুথেশ্বরীকে বললে—
সখি! তোমার পিত্রালয়ের কাননে কত ফুল ফুটে শোভা বর্ধন করতো। সেখানে পরম সুন্দর দেবরাজ ইন্দ্রকে দেখেও, তোমার মন আগে কোনদিন স্পন্দিত হয় নি। কিন্তু আজ সম্মুখের ওই বন্দারণ্যে মুকুন্দকে ভ্রমণ করতে দেখে, তোমার চোখছটি অমন

আন্দোলিত হচ্ছে কেন ? কানের শাদা কুমুদ ফুল-ছুটিই বা অমন পদ্মের মত আভা ধারণ করলো কেন ? । ৬০ ।

‘কখন তোমার নয়ন কমল চঞ্চল নাহি দেখি ।

কাহ্ন বনমাঝে বিহার করিছে, দেখিছ পশারি আঁখি ॥

আজি ত নয়ান চঞ্চল হইঞা শ্রবণ নিকটে গেল ।

যাহার শোভাতে ঐতির কুমুদ ইন্দীবরসম হল ॥’

হাব

ঐঁবা বক্র করে, ক্র ও নয়নের যে ভঙ্গিমা দ্বারা ভাবের ঐষৎ প্রকাশ হয়, তাকে হাব (Gesture) বলা হয় । ৬১ ।

যথা—

শ্রীরাধাকে শ্রামা বললে—

হে গৌরাজি ! তোমার ঐঁবা বামদিকে বক্র হয়ে আছে, নয়ন ভ্রমরচঞ্চল গতিতে অর্ধনির্মীলিত হয়ে কর্ণমূলের দিকে ধাবিত হচ্ছে, ক্রলতা নৃত্য করছে । মনে হয়, যমুনাতীরে কুসুমচয়ের উল্লাসকারী বনপ্রিয়বধুবন্ধু মাধব নিশ্চয়ই তোমার চোখের সামনে আবির্ভূত হয়েছেন । তাই তোমার এই ভাবোদ্গম—চোখেমুখে মনোগত চাক্ষুর্য উদ্বেষ ।

হেলা

হাব এব ভবেৎ হেলা ব্যক্তঃ শৃঙ্গার সূচকঃ । ৬২ ।

হাব যদি শৃঙ্গার সূচক রূপে স্পষ্ট ব্যক্ত হয়, তা হলে তাকে হেলা বলে ।

যথা—

বিশাখা শ্রীরাধাকে বললে—প্রিয়সখি ! বংশীধ্বনি শুনে যে তোমার বক্ষস্থল ক্ষুরিত ও স্পন্দিত হয়ে উঠছে । কপোল ও বদন পুলকিত হয়ে উঠলো । নয়ন তির্যক্ হলো । নীবিবন্ধ স্থলিত হলেও জঘনদেশে স্বেদসিক্ত হয়ে উঠলো ; আদ্র বসন অঙ্গে জড়িয়ে যায় ।

দেখো, যেন প্রমাদ ঘটিয়ো না। সখি। ওই দেখ, গুরুজনেরা বাম দিকে ঘুরে বেড়াচ্ছেন। ৬৩।

অযত্ন অলঙ্কার

অযত্ন অলঙ্কার সাত রকমের হয়। যেমন—

শোভা

রূপসম্ভোগে অঙ্গের বিভূষণকে শোভা বলে।

শ্রীকৃষ্ণ সুবলকে বললেন—সখা, প্রভাত বেলায় বিশাখা চঞ্চল-নেত্রা হয়ে, রক্তাঙ্গুলিযুক্ত করপল্লবে কদম্বের শাখা ধরে, লতামণ্ডপ থেকে বেরিয়ে আসছিল। অধমুক্ত বেণী লুটিয়ে পড়েছিল তার স্বন্ধে। বিশাখার সেই রূপ আজো আমার হৃদয়ে লগ্ন হয়ে আছে। সে মূর্তি কোনমতেই মন থেকে অপসারিত হ'চ্ছে না। ৬৪।

কাস্তি

শোভা যখন মন্থ-প্রাবল্যে উজ্জলতর হয়, তখন তাকে কাস্তি বলে। নায়িকার যে শোভা নায়কের মন্থ বৃদ্ধি করে, তাকেও কাস্তি বলা হয়। শোভাকে বলা চলে রূপ, আর কাস্তি সেই রূপের মাদকতা।

যথা—

শ্রীকৃষ্ণ সুবলকে বললেন—সখা, শ্রীরাধা স্বভাবতই মধুর-মূর্তি, তাতে আবার নব তারুণ্য তার দেহকে আলিঙ্গন করেছে। তার উপর, মদনবিহারে তার বিশেষ উদারতা দেখেছি। তাই আমার হৃদয়কে মদির ক'রে, রাধিকা প্রণয় পাশে অবরুদ্ধ করেছে।

দীপ্তি

বয়স, ভোগ, দেশকাল ও গুণাদি দ্বারা যে কাস্তি অতিশয় বিস্তৃত বা বিকশিত হয়, তাকে দীপ্তি বলে। দীপ্তি দ্বারা প্রভাষিতা ও উদ্দীপিতা হয়ে নায়িকা দয়িতের মনোহরণ করে।

যথা—

রূপমঞ্জরী তার সখীকে বললে—সুন্দরি ! ওই দেখ, শ্রীমতীর আঁখিছুটি নিমীলিত হয়ে আসছে। মলয় বাতাসে তার অঙ্গের স্বেদবিন্দুগুলি সম্পূর্ণ শুষ্ক হয়েছে। অমল হারে কুচযুগ উজ্জল হয়ে আছে। চন্দ্রকিরণ-উদ্ভাসিত তটনিকুঞ্জে অঙ্গ ছড়িয়ে, তিনি শুয়ে আছেন। কিশোরীর এই মূর্তি মাধবের চিত্তে মনসিজ জ্বালা সৃষ্টি করছে।

মাধুর্য

সর্ব অবস্থায় নায়িকার যে চেষ্টা নায়কের মনোহরণ করে, তাকে মাধুর্য (charm) বলে

যথা—

বিধুমুখী কংসারির স্বরূপদেশে পুলকিত দক্ষিণ বাহু স্থাপন করে, বামহস্ত নিজের শ্রোণীতটে রেখে, মাথাটি ঈষৎ হেলিয়ে, ছলিত পদে দাঁড়িয়ে আছেন। দেখে মনে হয়, রাসলীলার পর শ্রীমতী যেন অলসাজিনী হয়েছেন।

প্রগল্ভতা

সম্ভোগ বিষয়ে নিঃশঙ্কচিত্তা হয়ে, নায়িকা যে প্রয়াসে উত্ততা হয়, তাকে প্রগল্ভতা বলে।

নায়িকার অকুণ্ঠিত আচরণ, এবং অসংকোচে কথাবার্তা বলাকেও প্রগল্ভতা বলা হয়।

যথা—বিদগ্ধ মাধবে

বৃন্দা বললেন—সখি ! কামকলায় প্রবীণতা দেখিয়ে, শ্রীমতী যে ভাবে প্রতিকূলতার সঙ্গে কৃষ্ণের অঙ্গে নখরাঘাত ও অধর দংশন করেছিলেন, তাতে মাধব পরম পরিতুষ্ট লাভ করেছেন।

ঔদার্য

সর্ব অবস্থায় বিনয় প্রদর্শন করাকে ঔদার্য বলে। ৬৫।

ঔদার্যগুণাবিতা নায়িকার ব্যবহারে সর্বদাই বিনয় ও উদারতা প্রকাশ পায়।

যথা—বিদগ্ধমাধবে

‘সরল নয়নগতি বদনে করয়ে স্তুতি, দেখি করে সম্মম অপার।

তাথে করি অহুমান হৃদয়ে রাধার মান, বিদগ্ধের এই ব্যবহার ॥’

শ্রীকৃষ্ণ মধুমঙ্গলকে বললেন—দেখ, হৃদয়ের অভিমান চাপা রেখে, চন্দ্রাবলী কেমন সুষ্ঠু দাক্ষিণ্যের সঙ্গে ব্যবহার করেন। চোখে সারল্যের পরাকাষ্ঠা, মুখে বিনয়স্তুতি, এবং ব্যবহার অতীব সম্মমপূর্ণ ও বিদগ্ধ।

যথা বা—

প্রোষিতভর্তৃকা শ্রীরাধা বললেন—সখি! শ্রীকৃষ্ণ কৃতজ্ঞ। তা ছাড়া, তাঁর বুদ্ধিও প্রেমোজ্জল। তিনি অত্যন্ত বিনয়ী এবং অভিজ্ঞ-চূড়ামণি। কিন্তু অমন কৃপাসমুদ্র এবং নির্মলহৃদয় হয়েও, যখন এই বৃন্দাবনের কথা তিনি আর স্মরণ করছেন না, তখন এ আমার জন্মান্তরের পাপের ফল ভিন্ন আর কিছুই নয়।

ধৈর্য

উন্নত অবস্থায় নায়কের ঔদাসীন্য প্রকাশ পেলেও, বিরহিণী নায়িকার চিন্তে যে স্থিরভাব বজায় থাকে, তাকে ধৈর্য বলে।

যথা—ললিতমাধবে

শ্রীরাধা নববৃন্দাকে বললেন—সখি! শ্রীকৃষ্ণের হৃদয় যদি উদাসীনতায় পরিপ্লুত হয়, এবং তার জন্ম যদি তিনি আমার প্রতি সহস্র বৎসরকাল স্মেরী হয়ে কাঠিন্য অবলম্বন করতে চান, তা করুন। কিন্তু আমি ভুলেও সেই প্রিয়ের-চেয়ে-প্রিয় শ্যামসুন্দরের প্রতি প্রণয়ানুগত্য জন্মজন্মান্তরে ত্যাগ করতে পারবো না।

স্বভাবজ অলঙ্কার

স্বভাবজ অলঙ্কার দশ রকমের। যথা—

লীলা

রমণীয় বেশ ও কার্যকলাপের দ্বারা প্রিয়জনের অনুকরণ করাকে লীলা বলে। ৬৬।

যথা—বিষ্ণুপুরাণে

পরশর মৈত্রেয়কে বললেন—

কৃষ্ণবিরহে উন্মত্তা কোন এক গোপাঙ্গনা বাহুমূলে করাঘাত করে, বীরত্বব্যঞ্জক শব্দের সঙ্গে বলেছিল—ওরে ছুঁষ্ট কালীয়! থাক, আমিই কৃষ্ণ, আজ আমিই কালীয়দমন করবো।

যথা বা—গঙ্গাদাসকৃত ছন্দোমঞ্জরীতে

রতিমঞ্জরী তার সখীকে বললে—সুন্দরি! ওই দেখ, কৃষ্ণবিরহে উন্মত্তা রাধা গায়ে মৃগমদ লেপন ক'রে, গীতবাস পরিধান করেছেন। কেশপাশে সুন্দর ময়ূরপুচ্ছ বেঁধে, গলায় বনমালা নিয়ে, আনত স্বক্কে সরল বাঁশীটি রেখে, মধুর বাজ করছেন। মাধব-বেশধারিণী সেই রাধা আমাদের রক্ষা করুন।

বিলাস

প্রিয়সঙ্গমের জন্তু গতি, স্থান, আসন, মুখ ও নেত্রাদির যে ভাংকালিক বৈশিষ্ট্য, তাকে বিলাস বলে। ৬৭।

যথা—

শ্রীরাধার প্রতি বীরার উক্তি :

‘নাগরে দেখিয়া নাসার মুকুতা মাজিছ করিয়া ছল।

মুখে মৃদুহাসি ছাপায়ে রেখেছ ইহাতে কি আছে ফল ॥

লখি দূরেতে চাতুরি রাখ।

তোমর হাসি লবে ত্রিভুবন সবে ঝলমল করে দেখ ॥’

হে মধুরদন্তি! সম্মুখে উল্লসিত মাধবকে দেখে, তোমার মুখে হাসি ফুটে উঠেছে। তুমি নাসাগ্রের মুক্তা-বেসর অবনমিত

করবার জন্য মুখে হাত চাপা দিয়ে, কেন ছল ক'রে তোমার সেই মধুর হাসি গোপন করবার চেষ্টা করছো? চন্দ্রকিরণের মত তোমার দম্ভত্ব্যতি যে উদ্ভাসিত হয়ে উঠছে। সেই সুধাকিরণ-কৌমুদী মাধুরী সঙ্কোপন ক'রো না। ৬৮।

যথা বা—

বৃন্দা শ্রীরাধাকে অভিসারে নিয়ে গিয়ে বললেন—হে তব্বী, ওই কদম্ববৃক্ষের সন্নিহিতবর্তী কুঞ্জকূটরে শ্রীকৃষ্ণ আগেই এসেছেন। তুমি কৌতুকবশতঃ তাঁকে দেখতে গিয়ে, তোমার নয়নতরঙ্গে যে ক্ষীরোদসাগরের লাবণ্য উদ্বেলিত করে তুলছে, সেই ক্ষীর প্রবাহে যমুনার নীল জলরাশি গঙ্গাজলের মত ধবলবর্ণ হয়ে উঠলো।

বিচ্ছিন্তি

যে বেশরচনা বা প্রসাধন অসম্পূর্ণ বা অতি অল্প হয়েও দেহকাস্তিকে উজ্জলতর ক'রে তোলে, তাকে বিচ্ছিন্তি বলে।

এক হিসাবে বিচ্ছিন্তিকেও চেষ্টিত অযত্নজ-শোভা (careful carelessness) বলা যায়।

যথা—

নান্দীমুখীর প্রতি বৃন্দা—

‘একটি মাকন্দ পত্র পরিয়াছে কানে। তাহাতে পরম শোভা রাখার বহনে। রক্তবর্ণ সেই পত্র হৈল আভরণ। তাহাতেই বশ কৈল গোবিন্দের মন॥’

শ্রীরাধা মুকুন্দের চিত্তপ্রমোদকারী একটা মাত্র রক্তবর্ণ কচি আশ্র পল্লব দিয়ে কর্ণভূষণ রচনা করেছেন। যুহু বায়ুহিল্লোলে সেই পল্লবটি স্পন্দিত হওয়ায়, তাঁর মুখকমল অপূর্ব শোভা ধারণ করেছে। আশ্চর্য! এই সামান্য এবং অসম্পূর্ণ প্রসাধনেও শ্রীমতীর রূপ অপরূপ হয়ে উঠেছে।

যথা বা হরিবংশে

বৈশম্পায়ন ঋষি কৃষ্ণের রূপ বর্ণনা করে বললেন—কি আশ্চর্য ! লতা দিয়ে গাঁথা কয়েকটি আমলকী পত্রের মালার সঙ্গে একটি মন্মথ পুচ্ছ মৃদুস্পর্শ সমীরণে কম্পিত হয়ে, শ্রীকৃষ্ণের রূপ কি অনুপম করে তুলেছে । ৬৯ ।

কোন কোন রসজ্ঞ ব্যক্তির মতে, প্রিয়জনের প্রতি অভিমান বশে বরজীরা যখন অবজ্ঞা ভরে অঙ্গ থেকে আভরণ খুলে ফেলে দেয়, এবং সখীদের সহিত চেষ্টাতেও অঙ্গে ধারণ করতে চায় না, তখন তাকেও বিচ্ছিন্নি বলে ।

যথা—

বিশাখার প্রতি শ্রীরাধা—

‘কেন হৃষ্ট টাড় লয়া তাথে দূঢ় মূঢ়া দিয়া পুন পরাইলে মোর হাতে ।
দূঢ় গ্রস্থি দিয়া পুনঃ হার পরাইলে কেন দূর করি ফেলহ তুরিতে ॥
কৃষ্ণ ভূজঙ্গের বিষে সব অলঙ্কার দোষে আমি তাহা কেমনে ধরিব ।
আভরণ সঙ্গে আসি বিষ মোর অঙ্গে পশি অচিরাতে পরাণে মরিব ॥’

সখি ! তুমি অতিমূঢ়া, তোমার কিছুমাত্র জ্ঞান নাই যে, এই সব অলঙ্কার কৃষ্ণভূজঙ্গের দুর্বীর বিষ-দৃষ্টিতে দূষিত হয়েছে। এ রত্নালঙ্কারে আমার মন বিন্দুমাাত্র তুষ্ট হচ্ছে না। আমি সইতে পারছি না। অঙ্গদহুটি দূঢ় হয়ে হাতে বসেছে; মণিময় হার কঠোর হয়ে উঠেছে। গ্রস্থি মোচন ক’রে, আমার কণ্ঠ থেকে এই মণিহার তুমি শীঘ্র খুলে দাও ।

বিভ্রম

বল্লভের নিকট অভিসারে যাবার সময়, নায়িকা প্রবল মদনাবেগে উন্মনা হয়ে, ভুলক্রমে মাল্য ও হার প্রভৃতি আভরণ অযথাস্থানে স্থাপন করে । অঙ্গভূষণের এই স্থানবিপর্যয়কে বিভ্রম বলে ।

যথা—বিদগ্ধমাধবে

ললিতা শ্রীরাধাকে বললেন—সখি ! আজি যে তোমার করবীতে নীল রত্নহার অর্পণ করেছ, কুচযুগে কেশ-শোভাকর কুবলয় কুমকা ধারণ করেছ, অঙ্গে কাজল চর্চা করে, নয়নে কস্তুরিকা ধারণ করেছ ! কৃষ্ণ অভিসারের আবেগ-আতিশয্যে তুমি কি আজ জগৎ বিশ্বত হয়েছ ?

যথা বা—শ্রীমদ্ভাগবত দশমস্কন্ধে

কোন কোন গোপাঙ্গনা অঙ্গে অঙ্গরাগ লেপন করছিল, কেউ বা অঙ্গমার্জনা করছিল, কেউ নয়নে অঙ্গন-রেখা অঙ্কিত করছিল ; এমন সময় হঠাৎ কৃষ্ণের বাঁশী শুনে, তারা সব কাজ পরিত্যাগ করে ছুটলো সেই পথে । অতিমাত্র ব্যস্ততায় তাদের বসন-ভূষণের স্থান বিপর্যয় ঘটলো । ৭০ ।

প্রিয়তমের প্রতি অতিশয় বামা বা পরাঙ্মুখী হয়ে, তাঁর সমাদর প্রত্যাখ্যান করাকেও বিভ্রম বলা হয় ।

শ্রীকৃষ্ণ আদরের সঙ্গে শ্রীরাধার বেশ-বিন্যাসে যত্নশীল হলে, শ্রীরাধা অভিমান ভরে বামা হয়ে বললেন—

‘আমার কবরী বান্ধিতে তোমাতে কে সেধেছে বারবার ।

গলিত চিকুরে মোর বড় স্থখ, তুমি কেন বান্ধ আর ॥

কেন বা আমার বদন মাজিয়া দূর কর শ্রম জল ।

ঘরম হইলে মোর বড় স্থখ তহুতে বাড়ায় বল ॥

কেশের উপরে মালতী না দেহ আমারে লাগয়ে ভার ।

অঙ্গ আভরণ না পরাহ পুনঃ মানা করি বারবার ॥’

কিলকিঞ্চিত

হর্ষের আধিক্য হেতু গর্ব, অভিলাষ, রোদন, হাস্ত, অশ্রুয়া, ভয় ও ক্রোধ—এই সাতটি মানসিক অবস্থার এককালীন উদ্ভবের নাম ‘কিলকিঞ্চিত’ ভাব । ৭১ ।

যথা—

শ্রীকৃষ্ণ সুবলকে বললেন—বন্ধু ! আমি উল্লাসভরে, প্রিয় সহচরীদের সামনে, শ্রীরাধার পুষ্পকলিকাসম কুচযুগে বলপূর্বক হস্তক্ষেপণ করেছিলাম। তার জ্ঞাত্য তিনি সপুলকে, ভ্রাতৃঙ্গির সঙ্গে, ক্রোধভরে স্তব্ধ হয়ে গর্বের সঙ্গে তির্যক্ভাবে ফিরে দাঁড়িয়েছিলেন। রোদনও করেছিলেন, আবার সেই সঙ্গে তাঁর মুখে হাসিও ফুটে উঠেছিল। ফলে শ্রীমতীর মুখপদ্ম এক অপূর্ব শোভা ধারণ করেছিল। শ্রীরাধার সেই কাল্মাহাসি, মিশ্রিত সৌন্দর্যমণ্ডিত মুখ আমার স্মৃতিপথে বারবার উদিত হচ্ছে।

এখানে শ্রীরাধার এই ভাবকে ‘কিলকিঞ্চিত’ বলা যায়। কেন না, এখানে একসঙ্গে ওই সাতটি ভাব তাঁর মধ্যে প্রকটিত হয়ে উঠেছে। ৭২।

যথা বা—দানকেনিকৌমুদীতে

কেবল অঙ্গস্পর্শ প্রভৃতি কার্যের দ্বারাই যেনায়িকার কিলকিঞ্চিত ভাবের উদয় হয়, তা নয়। পথরোধ প্রভৃতি কার্যের দ্বারাও কিলকিঞ্চিত ভাব সঞ্চারিত হয়।

যথা—

একদিন শ্রীকৃষ্ণ দানঘাটে বসে ছিলেন। এমন সময় শ্রীরাধা দধি বিক্রয়ের জ্ঞাত্য সেই পথ দিয়ে যাচ্ছিলেন। তাঁকে দেখে, শ্রীকৃষ্ণ স্তব্ধ আদায়ের ছলে, তাঁর পথরোধ করে দাঁড়ালেন। তৎক্ষণাৎ শ্রীরাধার চোখছটি চাপা হাসিতে উজ্জল হয়ে উঠলো। নেত্রপল্লব সজল হলো ও প্রাস্তভাগ রোষে রক্তিমাত হয়ে উঠলো। আঁখিতারা উন্নত হলো, কিন্তু সেই সঙ্গে রসিকতায় উৎসিক্ত নয়নাগ্র কুঞ্চিত ও কুটিল এবং দৃষ্টি উদগ্র হয়ে উঠলো। শ্রীরাধার সেই নয়ন তোমাদের মঙ্গল বিধান করুন। এখানে হাস্য, রোদন, ক্রোধ, রসিকতা-উৎসিক্ত অভিলাষ, ভয়, গর্ব, এবং অসূয়া—এই সাতটি ভাব শ্রীমতীর মধ্যে প্রকাশিত হলো।

মোট্টায়িত

কাস্তের কথা স্মরণ করে, এবং তাঁর বার্তাদি শুনে, নায়িকার হৃদয়ে তাঁর জন্য রতিভাবের যে অভিলাষ সঞ্চারিত হয়, তাকে মোট্টায়িত বলে।

যথা—

বুন্দা শ্রীকৃষ্ণকে বললেন—

‘সখিগণ বারে বারে জিজ্ঞাসা করিল তারে কেন এত দুঃখ তোর মনে ।
পালী উত্তর নাহি দিল, সখিগণ যুক্তি কৈল তুয়া বাতা কহে সেই স্থানে ॥
শুনিয়া পাইল স্তম্ভ প্রফুল্ল হইল মুখ পুলকে পূরিল সব অঙ্গ ।
সখীরা চতুরা বড় অহুমান্যে কৈল দৃঢ় জানিতে তোমার এই রঙ্গ ॥’

হে পীতাম্বর ! সখীরা বারংবার পালীকে তার দুঃখের কারণ জিজ্ঞাসা করলে, সে কোনো কথাই বলেনি। কিন্তু তোমার প্রসঙ্গ উত্থাপন করে সখীরা যখন চাতুর্যের সঙ্গে শুধু তোমার কথাই বলতে আরম্ভ করেছিল, তখন আনন্দে সে এমন উৎফুল্ল হয়ে উঠেছিল যে, ফুল কদম্বপুষ্পও বিড়ম্বিত হয়েছিল।

কুটুম্বমিত

দয়িত যদি নায়িকার স্তন বা অধর গ্রহণ (স্পর্শ ও চুম্বন) করে, তা হলে নায়িকার হৃদয়ে প্রীতি সঞ্চারিত হলেও, সম্ভ্রমবশতঃ সে বাহ্যিক ক্রোধ প্রকাশ করে। নায়িকার এই ভাবকে পণ্ডিতেরা কুটুম্বমিত বলে অভিহিত করেছেন।

যথা—

নায়িকার উক্ত—

‘কি কর কি কর দূরে নেহ কর কবরী গলিত হল ।
কিবা উপহাস ছাড় মোর বাস নীবির বাঁধন গেল ॥
চঞ্চল না হয় ছাড়ি দেহ মোরে তোমার চরণে পড়ি ।
বাহ নিরদয় নিবার হয়, ধানিক শয়ন করি ॥’

পুনরায় সন্তোষ-উত্তম মাধবকে শ্রীরাধা বললেন—কি আশ্চর্য !
এ কি আরম্ভ করলে তুমি ? হাত সরিয়ে নাও । আর হেসো না ;
আমার চুল এলিয়ে পড়লো, কাপড় খুলে গেল । তোমার পায়ে
পড়ি, আমায় একটু ঘুমোতে দাও । ৭৩ ।

যথা বা—

ভূজবন্ধনে শ্রীরাধার কণ্ঠ বেঁধেন ক’রে মাধব বললেন—প্রিয়ে !
অমন করে ক্রলতা কুটিল ক’রো না, আমার হাত ঠেলে দূরে সরিয়ে
দিও না । পুলক-শিহরিত মুখকমল অবরুদ্ধ ক’রো না । হে সুন্দরি !
পরিতৃপ্ত কর । তোমার ওই বাঙ্কুলি ফুলের মত মধুর অধরের মধুপান
করে এই মধুসূদন শ্রীত হোক । ৭৪ ।

বিবেবাক

গর্ব ও মান ভরে ইষ্টবস্তুকে অনাদরে প্রত্যাখ্যান করাকে
বিবেবাক বলে ।

নায়িকা অনেক সময় অত্যন্ত কাম্য ও বাঞ্ছিত বস্তুকেও গর্বে বা
অভিमानে অনাদর করে থাকে ।

পুষ্পচয়নরতা রূপমঞ্জরী বকুলমালাকে লক্ষ্য ক’রে বললে—

‘অনেক বিনয় করি বনমালা দিল হরি নৈল শ্রামা হস্ত প্রসারিয়া ।

মনের প্রিয়তম মালা তথাপি করিঞা হেলা ফেলি দিল বিপক্ষ দ্বেষাঞা ॥’

এখানে নায়িকার বিবেবাক গর্ব হেতু । কিন্তু মানের জ্ঞানও ঠিক
এমনি বিবেবাক সম্ভব ।

‘বিনয় করিল হরি তারে তুমি মান করি আসিতে না দিলে এই স্থানে ।

যে শুক পড়িতে পারে গোবিন্দের নাম করে, তারে তুমি পড়াইছ কেনে ॥’

কলহাস্তুরিতা গোঁরীকে তার সখী বলেছিল—হরি তোমায় তুষ্ট
করবার জ্ঞান অনেক চাটুবাণ্য বলেছিলেন । তখন তুমি মান ভরে
তার সেই প্রিয়বাক্যে কর্ণপাত করোনি, অনাদর করেছিলে ।
কিন্তু এখন সুশিক্ষিতা শারীকে নিজে আবার পড়াতে বসলে

কেন? দয়িতের যে-নাম সে জানে, সেই নাম তাকে আবার কেন শিক্ষা দিচ্ছ।

দয়িতকে অভিমানে প্রত্যাখ্যান করে, পরে নায়িকা আবার পাণ্ডীকে শিক্ষা দিবার ছলে সেই দয়িতের নাম নিজে বারবার উচ্চারণ ক'রে প্রণয়ের অনুভূতি ব্যক্ত করছে।

‘যারে তুমি মান ভরে করেছিলে হেলা।
ভারি লাগি কান্দ কেনে বসি সারা বেলা ॥’

ললিত

অঙ্গাদির বিদ্যাসভঙ্গি, সৌকুমার্য ও ভ্রুবিক্ষেপের মাধুর্য প্রকাশকে ললিত বলে। ৭৫।

কুঞ্জকাননে ভ্রমণরতা স্ত্রীরাধাকে দেখে কৃষ্ণ বলেছিলেন—

‘বৃন্দাবনে লতা যত ফুলে ফলে বিকশিত ক্রভঙ্গিতে তার পানে চায়।
ও পদপঙ্কজরাজে চলি যায় বনমাঝে অঙ্গ গঙ্গে মধুকর ধায় ॥
মুখপদ্মে অলি ধায় করপদ্মে বায়ে তায় এইমত বনে চলি যায়।
যেন বৃন্দাবনদ্ব্যতি হয় স্বয়ং মূর্তিমতী তরুলতা দেখিয়া বেড়ায় ॥’

কন্দর্পকে পুষ্পধ্বা এবং তাঁর বাণকে পুষ্পবাণ বলা হয়। তাই লতাগুলিকে কবি ‘অনঙ্গবাণ-জননী’ বিশেষণে ভূষিত করেছেন। চলমতী নায়িকার চরণদ্বয়কে ‘সোল্লাস-পদপঙ্কজ’ বলে অভিহিত করেছেন। চিত্তহারিণী নায়িকার চরণের গতিচ্ছন্দে নায়কের চিত্তে উল্লাস সঞ্চারিত হয়। নয়নভঙ্গিতে মাধুর্য প্রকাশিত হয়। এগুলি নায়িকার ‘ললিত’ গুণ। এই ললিত গুণ ও চমৎকারিষ্য নায়ককে মুগ্ধ করে। ৭৬।

বিকৃত

লজ্জা, মান ও ঈর্ষাদি দ্বারা যেখানে মনের কথা বা বিবক্ষিত বিষয় প্রকাশিত হয় না, কিন্তু চেষ্টা বা উক্ত মানসিক ভাবের দৈহিক

লক্ষণ প্রকাশে মনোগত ভাব পরিলক্ষিত হয়, তাকে বিকৃতি বা বিকৃত ভাব বলা হয়।

লজ্জাজনিত বিকৃতি

যথা—

সুবল শ্রীকৃষ্ণকে বললেন—মাধব! আমি তোমার প্রার্থনা শ্রীমতীকে জানিয়েছিলাম। তাঁকে বলেছিলাম যে, মধুসূদনের অমুরোধ, তুমি গোবর্ধন গিরিকন্দরে তাঁর নির্মিত আশ্চর্য চিত্র দর্শনের জন্তু যেও। সুন্দরী সে কথা শুনে কোনও আগ্রহ প্রকাশ করলেন না। কিন্তু তাঁর কপোলে আনন্দের উজ্জল আভা ফুটে উঠলো। ৭৭।

‘তোমার বচন বাণী মোর মুখে শুনি ধনি বাক্য অভিনন্দন না কৈল।

অঙ্গেতে পুলক সারি দেখা দিল খরি খরি, অহুমতি তাহাতে জানিল ॥’

যথা বা—

শ্রীরাধার কথা প্রসঙ্গে বিশাখা ললিতাকে বললে—সখি! আজ আমি শ্রীমতীকে বললাম, ‘হে বরাক্ষি! তুমি সাক্ষী কুলবালা, পরপুরুষের দিকে দৃষ্টি নিক্ষেপ করা তোমার উচিত নয়। আমার প্রতি প্রসন্ন হয়ে, তুমি মুখ ফিরিয়ে নাও।’ পথিমধ্যে নর্মচ্ছলে তাঁকে এই কথা বলেছিলাম। শুনে, রাধিকা নতুন ক’রে কৃষ্ণের মুখদর্শনের জন্তু কাতর হয়ে, আমার মুখপানে চেয়ে রইলেন।

মানহেতু বিকৃতি

শ্রীকৃষ্ণ উদ্ধবকে বললেন—

‘কি কর কুটিল প্রেমা মান কৈল সত্যভামা হেনকালে চান্দের গ্রহণ।

আমি ত আসক্ত চিতে গেলাম তারে প্রসাদিতে চন্দ্রগ্রহণ হৈয়া বিস্মরণ ॥

আমার বিনয় শুনি এক ইন্দ্রনীলমণি নিজ মুখচন্দ্রেতে ধরিল।

চন্দ্রগ্রহ নিরখিয়া স্নানদান কর গিয়া, ইহা ছলে মনে পড়াইল ॥’

উপর্যুপ বা গ্রহণের কথা আমায় স্মরণ করিয়ে দেবার জন্তু সত্যভামা কথা বলেনি, বা ‘মান’ পরিত্যাগ করেনি; নিজের মুখ

চন্দ্রের উপর হাতের ইস্ত্রনীলমণি স্থাপন ক'রে জানিয়ে দিয়েছিল যে, চন্দ্রে কৃষ্ণছায়া পড়েছে অর্থাৎ চন্দ্রগ্রহণ আরম্ভ হয়েছে। সে অবস্থায় স্নানদান ইত্যাদি সংকার্ষে মন দেওয়াই ভালো। ৭৮।

এখানে নিজের মান ভঙ্গ ক'রে কথা না বললেও, নায়িকা তার বিবক্ষা বা বক্তব্য বিষয় লক্ষণা দ্বারা নায়ককে জানিয়ে দিল।

ঈর্ষাহেতু বিকৃতি

শ্রীকৃষ্ণ স্রবলকে বললেন—সখা, যমুনাতীরে শ্রীরাধা বিহার করছিলেন। আমি তাঁকে বললাম, ‘তুমি আমার বাঁশী চুরি করেছ। কল্যাণি! দয়া ক'রে আমার বাঁশীটি আমায় দাও।’

শুনে, শ্রীরাধা ঈর্ষান্বিতা হয়ে, ভ্রুকুটিকুটিল দৃষ্টিতে আমার দিকে চাইতে লাগলেন।

এখানে বিবক্ষা, ‘আচ্ছা দেখে নেব : এই অপবাদের প্রতিশোধ নেব।’ তিনি মুখে কিছু বললেন না। কিন্তু তাঁর বক্তব্য বিষয় দৃষ্টি-ভঙ্গিমায়ে প্রকাশিত হলো।

এই যে বিংশতি প্রকার আঙ্গিক এবং চিস্তজ বা মানসিক অলঙ্কারের কথা বলা হলো, সেগুলি নায়িকাদের সম্পর্কে যেমন প্রযোজ্য তেমনি মাধব সম্পর্কেও প্রযোজ্য। অগাধ মনোবিরা আরো অনেক রকম অলঙ্কারের কথা বলেছেন। কিন্তু সেগুলি ভরতমুনিস্বীকৃত নয় ব'লে, তন্মধ্যে শুধু ‘মৌখ্য’ ও ‘চকিত’ সম্পর্কে আলোচনা করা হলো। কেন-না, এই দুটি অলঙ্কারের কারকতা মাধুর্যের পুষ্টিসাধনে সহায়তা করে।

মৌখ্য বা মুগ্ধতা

প্রিয়জনের নিকট জানা জিনিস সম্পর্কেও অজ্ঞের মত জিজ্ঞাসা করাকে মৌখ্য বলে (Pretension of ignorance)।

যথা—মুক্তাচরিতে

সত্যভামা শ্রীকৃষ্ণকে জিজ্ঞাসা করলেন—প্রিয়তম! আমার কঙ্কণে যে মুক্তাফলগুলি আছে, সেগুলি কোন্ লতার ফল? সে লতা কোথায় আছে? কে রোপন করেছে?

মুক্তা যে কোন বৃক্ষের বা লতার ফল নয়, তা সত্যভামা জানেন। তবুও দয়িতের কাছে এই ধরনের প্রশ্ন করায় সত্যভামার মাধুর্য যেন নায়কের চোখে কিছুটা বর্ধিত হলো। এইভাবে পৃথিবীর অসংখ্য বস্তু বা ব্যক্তি সম্পর্কে নিজের অজ্ঞতা জানালে স্বতঃই নায়কের মনে হয় যে, নায়িকা একমাত্র দয়িত ভিন্ন আর কোনকিছুই জানেন না। এই কৃত্রিম অজ্ঞতায় নায়িকার সরলতা ও দয়িতের প্রতি প্রণয়মুগ্ধতা প্রকাশ পায়। দয়িতও মুগ্ধ হন নায়িকার এই সারল্য ও অনন্যমানসিকতা দেখে।

চকিত

যে জিনিস দেখে ভয় করবার কোনো কারণ নাই, সেই জিনিস দেখে বা তার কথা শুনে, প্রিয়তমের সামনে গুরুতর ভয় প্রকাশকে চকিত বলে। ৭৯।

যথা—

দয়িত সন্নিকটে থাকা কালে, নায়িকা একটি উড়ন্ত মধুমক্ষিকা দেখে চকিতা হরিণীর মত ভীতিচঞ্চলা হয়ে বলে উঠলো—‘আমায় রক্ষা কর, রক্ষা কর। ওই দেখ, আমার কানে টাঁপার ছল দেখে মৌমাছিটা মধুপান করবার লোভে ছুটে আসছে।’

এইভাবে অকারণ অত্যন্ত ভীতিচঞ্চলা হয়ে হরিণনয়না হরিকে জড়িয়ে ধরলো।

নায়িকার এই প্রকার আচরণে প্রণয়ের গুণ্টি সাধিত হয়।

‘ওহে কৃষ্ণ রক্ষা কর ওই ছোট মধুকর উড়ি বৈসে আমার বদনে।

এই বাক্য কহি রাধা যেন ঘুচাইল বাধা, আলিঙ্গয়ে ব্রজেন্দ্রনন্দনে ॥’

ইতি অলঙ্কার বিবৃতি

উদ্ভাস্বর প্রকরণ

স্বস্থানে অবস্থানকালেও নায়িকার মনের যে ভাব দেহে প্রকাশ পায়,তাকে উদ্ভাস্বর বলে ।

নীবিবন্ধন খসে পড়া, উত্তরীয় অঙ্গচ্যুত হওয়া, কবরী এলিয়ে যাওয়া, গা ভাঙ্গা (আঙুল মটকানো ইত্যাদি), জৃম্ভণ বা হাই তোলা, আত্মাণের উল্লাস বা প্রফুল্লতা এবং গভীর নিঃশ্বাস ইত্যাদি উদ্ভাস্বর । ৮০ ।

নীবি অংসন

যথা—বিদগ্ধমাধবে

শ্রীরাধাকে বৃন্দা বললেন—

‘তোমার যে ছনয়ন অশ্রুজলে নিরঞ্জন কুচযুগ নহে আর রাগী ।

ক্ষুরে তোমার বক্ষস্থল হবে তার মঙ্গল অচিরে হইবে কৃষ্ণ ভোগী ॥

সবাকার ধর্মে মন তাহা করি দরশন নীবি বলে আমি মোক্ষ লব ।

সাক্ষাত কৃষ্ণের কাছে মোক্ষ হবে অনায়াসে তাহা আজি কেবা নিবারিব ॥’

রাধে ! তোমার নীবিবন্ধন যে শ্লথ হলো । আশঙ্কা হয় যে, অচিরাত্ তার মুক্তি হবে অর্থাৎ বন্ধন খুলে পড়বে । ৮১ ।

উত্তরীয় অংসন

কৃষ্ণকে দেখে শ্রীরাধার উত্তরীয় স্থলিত হয়ে পড়ছিল । তাই দেখে শ্রীকৃষ্ণ পরিহাস করে বললেন—

‘তুয়া হৃদি যত রাগ বস্ত্রে তার একভাগ ইহা মোরে স্পষ্ট দেখাইতে ।

তোমার হৃদয় বস্ত্র ভূমিতে পড়িল ত্রস্ত, যতন না কর আচ্ছাদিতে ॥’

আমার অনুরাগের চেয়েও গরীয়ান কোন গভীর রাগ তোমার হৃদয়ে প্রস্ফুটিত ; তাই দেখছি অপমৃত বস্ত্রাঞ্চলের অন্তরালে । মঞ্জিষ্ঠা লতার রক্তিমরাগে রঞ্জিত তোমার উত্তরীয় স্থানচ্যুত হয়ে

আমার সম্মুখে তোমার বক্ষস্থলকে আজ প্রকাশিত করেছে।
উত্তরীয়ের রক্তিমরাগের চেয়েও তোমার হৃদিতট অধিক রক্তিম।

ধন্মিল্ল অংসন

দয়িতকে দেখে নায়িকার কবরী শিথিল হয়ে পড়ে। এই
আলুথালু বেশ ও তনুভাব নায়কের চিত্তে সন্তোগ-স্পৃহা জাগিয়ে
তোলে।

শ্রীকৃষ্ণকে দেখে, শ্রীমতীর কেশপাশ হঠাৎ কবরী ভ্রষ্ট হয়ে
এলিয়ে পড়লো। তাই দেখে বৃন্দা বললেন—গৌরি! তোমার
সম্মুখে দাঁড়িয়ে ব্রজেন্দ্রনন্দন। যাকে দেখে হুরাওয়ারও ভববন্ধন
থেকে মুক্তি হয়, তাঁর দরশনে যে তোমার সংযত কেশপাশ বন্ধনমুক্ত
হবে, তাতে আর আশ্চর্য কি?। ৮২।

গাত্রমোটন বা অনঙ্গভঙ্গ

ব্রজভূমিতে ব্রজেন্দ্রনন্দন শ্রীকৃষ্ণকে দেখে কুরঙ্গীনয়না ব্রজাঙ্গনারা
যে অনঙ্গভঙ্গ বা গা আড়া-মোড়া দিয়েছেন, তার অনঙ্গভঙ্গি কন্দর্প
তরঙ্গ সৃষ্টি করেছে।

নায়িকার অনঙ্গভঙ্গ অর্থাৎ গা আড়া-মোড়া দেওয়া বা আঙ্গুল
ফোটানো ইত্যাদি নায়কের মনে অনঙ্গ-উদ্দীপনার সৃষ্টি করে। ৮৩।

জুস্তা

নায়িকার জুস্তা নায়কের মনে তার নিজাবেশ অর্থাৎ শয্যা
গ্রহণের সংকেত সূচিত করে। নায়িকা যদি নায়কের সামনে
বারবার জুস্তা করে বা হাই তোলে, নায়কের চিত্তে সন্তোগ লিপ্সা
সঞ্চারিত হয়। জুস্তা দ্বারা নায়িকারও মদনাবেগ প্রকাশ পায়।

শ্রীকৃষ্ণ চন্দ্রাবলীকে বলেছিলেন—প্রিয়ে! তুমি অতি সাধবী।
মদন তোমায় পুষ্পবাণের দ্বারা বশীভূত করতে পারেননি! তাই তিনি
জুস্তা দ্বারা নিক্ষেপ করেছেন তোমায় বশীভূত করবার জঘ। নইলে
এই গোষ্ঠসীমায় এসে বারবার তোমার জুস্তা হবে কেন?। ৮৪।

ভ্রাণের প্রফুল্লতা

ভ্রাণের প্রফুল্লতায় যখন নাসাপুট আন্দোলিত হয়, তখন নায়িকার মূর্তি নায়কের চোখে মাদকতার সৃষ্টি করে। ভ্রাণের প্রফুল্লতায় নিঃশ্বাস ঘন ও নাসাপুট কম্পিত হয়।

শ্রীকৃষ্ণ সুবলকে বলেছিলেন—সখা, ওই পদ্মলোচনা শ্রীরাধার নাসাপুটে যে গজমুক্তার বেশর আছে, সে বেশর ভ্রাণ প্রফুল্লিত ঘন নিঃশ্বাসে স্পন্দিত হওয়ায়, এক অত্যাশ্চর্য সৌন্দর্যের সৃষ্টি হয়েছে। এই রূপ দেখা অবধি শ্রীমতী যেন আমার মনে বিলগ্না হয়ে আছেন, মুহূর্তের জন্তুও মন থেকে সরাতে পারছি না।

‘নাসার নিঃশ্বাসে বেশর ছলিল দুই পুট বিকশিত।

এমন নাসার বিলাস করিঞা রাই হরি নিল চিত।’

যে সব উদাহরণ দেওয়া হলো, সেগুলি যদিও মোটামুটি ও বিলাসের অন্তর্গত, তবুও শোভার বিশেষ বিবৃতির জন্তু পৃথকভাবে আলোচনা করা হলো।

বাচিক

আলাপ, বিলাপ, সংলাপ, প্রলাপ, অপলাপ, সন্দেশ, অতিদেশ, অপদেশ, উপদেশ, নির্দেশ, ব্যাপদেশ ও বাক্যের পরিপাটী বা নৈপুণ্য ইত্যাদির জন্তু মনীষিগণ বাচিক শোভাকে দ্বাদশ ভাগে বিভক্ত করেছেন।

১—আলাপ

চাটু ও প্রিয়-উক্তির নাম আলাপ। ৮৫।

যথা—

ব্রজদেবীগণ শ্রীকৃষ্ণকে বললেন :

‘হেন কে রমণীমণি তোমার মুরলী শুনি নাহি ছাড়ে কুলধর্ম ভয়।

তুয়া রূপ মনোরম ত্রিজগতে অমুপম ইহা দেখি কেবা ঘরে রয় ॥

ওহে নাথ, তুমি না করিহ উপেক্ষণ।

তোমার একরূপ দেখি বুঝে সবে পশুপাখী পুলকিত হয় তরুণণ ॥’

হে গোবিন্দ ! তোমার এই ত্রিলোক-মনোমুগ্ধকর রূপ দেখে কে না সম্মোহিত হয় ! কোন স্ত্রী তার আর্ঘ চরিত্র থেকে বিচলিতা না হয় ! বনের হরিণ, পশুপক্ষী এবং বৃক্ষলতাও তোমার এই রূপ দর্শনে পুলকিত হয়ে ওঠে ।

নায়িকার প্রতি নায়কের চাটু ও প্রিয়োক্তি :

যথা বা—বিদগ্ধমাধবে

শ্রীকৃষ্ণ বললেন—রাধে ! তুমি কঠোরাই হও বা মৃদ্বীই হও, তুমিই আমার প্রাণ । চাঁদ ভিন্ন যেমন চকোরের কোনো গতি নাই, তেমনি রাধা ভিন্ন কৃষ্ণেরও কোনো গতি নাই ।

২—বিলাপ

দুঃখজনিত বাক্যের নাম বিলাপ ।

যথা—শ্রীমদ্ভাগবত দশম স্কন্ধে

উদ্ধবকে গোপাঙ্গনারা বলেছিল—শ্রীকৃষ্ণের সঙ্গে মিলিত হওয়ার আর কোনো সম্ভাবনা নাই, তাই আমরা এত আকুল হয়েছি । আমাদের পক্ষে নৈরাশুই ভালো । স্বৈরিণী পিঙ্গলা বলেছে, নৈরাশুই পরম সুখ । আমরা যদিও সে কথা জানি, তবুও কৃষ্ণের জগ্ন আমাদের আশা ছরতিক্রম্য ; কোনমতেই সে আশা দমন করতে পারছি না ।

‘প্রত্যাশা পরম দুঃখ নৈরাশু পরম সুখ এই বাক্য কয়াকে পিঙ্গলা ।

তথাপি কৃষ্ণের আশ কভু নাহি হয় নাশ এই মোর মনে বড় জ্বালা ॥’

৩—সংলাপ

উক্তি ও প্রত্যুক্তিবিশিষ্ট যে সব বাক্য, তাকে সংলাপ বলে (Dialogue) । ৮৬ ।

যথা—পদ্মাবলীতে

মানস গঙ্গায় নৌকাকেলি-বিশারদ শ্রীকৃষ্ণের সঙ্গে শ্রীরাধার উত্তর প্রত্যুত্তর ।

শ্রীকৃষ্ণ বললেন—হে তরুণি ! এসো, আমার তরুণীতে আরোহণ করো ।

উত্তরে শ্রীরাধা বললেন—হে বিনোদ ! রবিতে আমার প্রীতি নাই । সূর্যের উত্তাপ আমি সহ্য করতে পারি না ।

তরুণী দ্ব্যর্থবোধক শব্দ । শ্রীকৃষ্ণ বললেন নৌকায় উঠবার কথা । শ্রীরাধা উত্তর দিলেন অস্তু অর্থে । তরুণি বা তরুণী শব্দের ভিন্ন অর্থ সূর্য বা সূর্যকিরণ । শ্রীমতী কৌতুকচ্ছলে বললেন যে, রবি বা রৌদ্রের প্রতি তাঁর প্রীতি নাই ।

শ্রীকৃষ্ণ হেসে বললেন—না না, আমি তা বলছি না । আমি বলছি নৌ ।

শ্রীমতী আবার সহাস্তবদনে বললেন—ও, নৌ !—‘মম মে, আবায়ে নৌ ।’ আমাদের ছুজনের ? কই ! ছুজনের আরোহণ অবরোহণের প্রস্তাব তো কিছু ছিল না ।

অজ্ঞেয় শ্রীকৃষ্ণ রাধার বাক্যাচাতুরীতে পরাজিত হয়ে, মৃদু হাস্ত করলেন । তিনি ‘নৌ’ শব্দ ব্যবহার করেছিলেন নৌকা অর্থে ।

নায়ক ও নায়িকার মধ্যে এই ধরণের সংলাপে রসসৃষ্টি হয় এবং প্রণয়ের ঘনত্ব বাড়ে ।

৪—প্রলাপ

ব্যর্থ বা অর্থহীন আলাপের নাম প্রলাপ ।

যথা—

মধুপানে উন্মত্তা শ্রীরাধা বললেন—মাধব ! তোমার মুরলীর মনোহর ধ্বনিতে গোপাঙ্গনাদের হৃদয় মথিত হচ্ছে । তাই ললিতা ব্যথিত চিন্তে তোমার ভজনা করতে আরম্ভ করেছে । তোমার মুরলী যে ‘রলী রলী...লিতা লিতা’ ধ্বনি বারবার উচ্চারণ করেছে ।

মুরলীর ‘রলী-রলী—লিতা-লিতা’ শব্দ নিতান্ত অর্থহীন । তবুও

আবেগভরে শ্রীরাধা মাধবের কাছে সেই কথা বলে মুগ্ধ অনুভূতি প্রকাশ করছেন।

৫—অনুলাপ

একই উদ্দেশ্যে বারবার কোন কথা বলার নাম অনুলাপ। ৮৭।

যথা—

একটি তমালশিশুর পাশে বাকুলী ও স্থলপদ্মের ফুল দেখে, শ্রীরাধা ললিতাকে বললেন—সখি! ও ছুটি কি নেত্র? নেত্র! না—না, পদ্ম! পদ্ম! ও কি গুঞ্জা? গুঞ্জা! গুঞ্জা, না বাকুলী ফুল? ও কি বেণু—বেণু? না ভ্রমরের গুঞ্জন! ও কি কৃষ্ণ? না তমাল!

৬—অপলাপ

পূর্বে কথিত বাক্যের অন্তরূপ যোজনার নাম অপলাপ।

যথা—

কলহাস্তুরিতা শ্রীরাধা বিশাখাকে বললেন—সখি! প্রফুল্ল উজ্জল বনপুষ্প-শোভিত মাধবকে কোন্ প্রমদা অঙ্গনা কামনা না করে?

শ্রীমতীর কথা শুনে, বিশাখা বললে—প্রিয় সখি! তুমি কি তবে কৃষ্ণের জন্ত উৎসুক হয়েছ? স্পৃহা জেগেছে তোমার মনে?

শ্রীরাধা বললেন—না না, সখি! আমি তা বলছি না। আমি বলছি, প্রফুল্ল বনপুষ্প-শোভিত মধুমাসের বা বসন্ত ঋতুর কথা।

৭—সন্দেশ

প্রবাসস্থিত কান্তের নিকট যে বার্তা প্রেরণ করা হয়, তাকে সন্দেশ বলে। ৮৮।

শ্রীকৃষ্ণ যখন মথুরায় ছিলেন, পদ্মা কোন পথিককে সম্বোধন করে বলেছিল—হে পান্থ! মথুরানাথ শ্রীকৃষ্ণকে বলো, কোকিলের কুহুরবে বিকলিতা চন্দ্রাবলী এখন কোথায় লীনা হবে? কার হৃদয়ে আলিঙ্গনবদ্ধ হয়ে নিজেকে বিলীন করবে?

৮—অভিদেশ

যখন অশ্বের কথা হিসাবেই নিজের কথা জানানো হয় (অর্থাৎ তার কথাই আমার কথা) তখন তাকে অভিদেশ বলা হয়। ৮৯।

যথা—

শ্রীরাধা মানিনী হলে, শ্রীকৃষ্ণ যখন তাঁর মান ভাঙাবার জন্য নানাভাবে চেষ্টা করছিলেন, এবং প্রণিপাতাদি দ্বারা তাঁর প্রসাদ ভিক্ষায় উত্তত হয়েছিলেন, তখন ললিতা বলেছিল—হে কৃষ্ণ ! তুমি কেন রাধাকে প্রণাম করছো ? শীঘ্র এখান থেকে দূর হয়ে যাও। একথা গান্ধীবিকারই অন্তরের কথা। ললিতা শুধু বীণা যন্ত্রের মত সেই যন্ত্রীর কথাই ঝংকৃত করেছে। ৯০।

‘যে কথা কহিলাম আমি সন্দেহ না কর তুমি এই বাক্য রাধিকার হয়।
আমি যন্ত্র ত্রিতন্ত্রী রাধা তাণ্ডে হয় যন্ত্রী ইহাতে নাহিক বিপর্যয়।’

৯—অপদেশ

বক্তব্য বিষয়ের অন্য অর্থ কল্পনাকে অপদেশ বলে। ৯১।

যথা—

নান্দীমুখী পৌর্ণমাসীকে বললে—

‘দাড়িম তরু উজ্জল ধরিয়াছে দুই ফল তাণ্ডে রেখা আছে বহুতর।

দুই পুষ্প বিকশিত তাহাতে করেছে ক্ষত বড়ই নিষ্টর মধুকর ॥

সম্মুখেতে গুরুজন হঞা তাই অন্তমন শ্রামা শুনি সখীর বচন।

চমকিত হয় ধনী অধরে ধরিল পাণি বসনে আচ্ছাদে দুই স্তন ॥’

উজ্জল দুটি নব দাড়িমফলকে শুকপক্ষী চঞ্চুদ্বারা বিক্ষত করেছে বা ভৃঙ্গ দুটি রক্তবর্ণ পুষ্পের মধুপান করেছিল বলে, পুষ্পদুটি ত্রণ চিহ্নিত হয়েছে—এই কথা গুরুজনদের সম্মুখে নান্দীমুখী পৌর্ণমাসীকে বলেছিল। সেই কথা শুনে, শ্রামলা বজ্রাঞ্চল দিয়ে বন্ধোদেশ আবৃত করেছিল এবং ওষ্ঠদুটি হাত দিয়ে ঢেকেছিল। ৯২।

যে সহজ উল্লেখে কথাগুলি বলা হলো, ঠিক সেই অর্থে গৃহীত না হয়ে, অন্য অর্থে গৃহীত হলো। রক্তবর্ণ পুষ্প বলতে, ওষ্ঠভূতি আবৃত হলো ; এবং দাড়িম্বফলের কথা উল্লেখ করতেই, বন্ধোদেশ বজ্রাবৃত হলো।

১০—উপদেশ

শিক্ষা দিবার জন্ত যে কথা বলা হয়, তাকে উপদেশ বলে।

যথা—

মানিনী শ্রীরাধাকে তুঙ্গবিদ্যা বলেছিল—

‘যৌবন সে চঞ্চল সদা করে টলমল বড়ই দুঃশ্রাণ্য বনমালি।’

তুরিতে চলহ বনে দেখা হবে হরি সনে মনের আনন্দে কর কেলি ॥’

যৌবন অতি চঞ্চল। তার সম্পদ লোলবিদ্যাতের মত ক্ষণস্থায়ী। ত্রিলোকের মধ্যে অদ্ভুত রূপবান পুরুষ শ্রীকৃষ্ণ। তাঁর মত নায়ক অতি দুর্লভ। অতএব হে মুগ্ধে! তুমি সুযোগ ত্যাগ ক’রো না। বৃন্দাবনের ভ্রমরগুঞ্জিত কুঞ্জে তাঁর সঙ্গে মিলিত হয়ে সচ্ছন্দে কেলি করো।

১১—নির্দেশ

যখন নির্দিষ্টভাবে কোন বস্তু বা ব্যক্তি সম্পর্কে উল্লেখ ক’বে কিছু বলা হয়, তখন তাকে নির্দেশ বলে।

বিশাখা শ্রীকৃষ্ণকে বললে—

‘সেই রাধা বিধুমুখী সেই এ ললিতা সখী সেই আমি বিশাখা স্বন্দরী।

মোরা তিন সখী মিলি গহনে কুসুম তুলি এখা কেন এলে তুমি হরি ॥’

১২—ব্যপদেশ

অন্য প্রসঙ্গে বা ছলে যখন নিজের অভিলাষ বা মনোগত ভাব প্রকাশ করা হয়, তখন তাকে ব্যপদেশ বলা হয়।

যথা-

শ্রীকৃষ্ণ বিপক্ষ কোন গোপাঙ্গনার সঙ্গে প্রমোদ আলাপে রত ছিলেন। তাই দেখে, মালতীর সখী ভ্রমরকে সম্বোধন ক'রে বললে—

‘নূতন পল্লবে হলো বিকশিত মালতী গহন বনে।

তুমীর চুম্বনে ভ্রমর রসিক ইহার কি সব জানে ॥’

হে মধুপ ! দেখ, কাম্যবনে মালতী পুষ্পের স্তবক প্রস্ফুটিত হয়েছে। কিন্তু তুমি কেন সেই মালতী-স্তবক ত্যাগ ক'রে লাউবনে মধুর সন্ধান করে বেড়াচ্ছ ? তুমি ভ্রমর, তোমায় আর কি বলবো !

উল্লিখিত বাচিক অনুভাব সকল রসেই সম্ভব। কিন্তু সেগুলি মাধুর্যরসের পক্ষেই অধিক প্রযোজ্য ও পরিপোষক। সেই জন্য সেগুলি শুধু মাধুর্যরস প্রসঙ্গেই আলোচিত হলো।

ইতি অনুভাব প্রকরণ

সাত্ত্বিক প্রকরণ

সাত্ত্বিক ভাব

সাক্ষাৎ বা পরম্পরায় শ্রীকৃষ্ণ সম্বন্ধীয় ভাবের দ্বারা আক্রান্ত বা অভিভূত চিত্তকে সম্ব বলে। চিত্তের এই অবস্থা থেকে উৎপন্ন ভাবকে সাত্ত্বিক ভাব বলা হয়।—ভক্তিরসামৃত সিদ্ধু।

হর্ষাদিহেতু স্তম্ভিত ভাবকে সাত্ত্বিক ভাব বলা হয়।

হর্ষহেতু স্তম্ভ- যথা দানকেলি কৌমুদীতে । ১ ।

শ্রীকৃষ্ণকে দেখে, রাধিকার অঙ্গে স্বেদবিন্দু ক্ষরিত হয়ে তাঁর বক্ষস্থ স্বর্ণপদক সিক্ত হয়ে উঠলো। দেহ নিম্পন্দ হলো। নয়ন নিমীলিত হয়ে এলো। আশ্চর্যের বিষয়, আরও পাঁচজন সখী থাকার সত্ত্বেও, শ্রীমতী পুত্তলিকার মত নিশ্চল হয়ে গেলেন। ২।

এখানে, শ্রীকৃষ্ণকে দেখে হর্ষহেতু স্তম্ভিতা হয়ে, শ্রীমতী পুত্তলিকার ধর্ম প্রাপ্ত হলেন।

ভয়হেতু স্তম্ভ

শ্রীরাধাকে দূর থেকে দেখে, নান্দীমুখী পৌর্ণমাসীকে বললে—
'দেবি ! ওই দেখ, মেঘের গর্জন শুনে চকিতা হয়ে, ঘনস্তনী ব্রজাঙ্গনা নিশ্চলাঙ্গিনী হয়ে শ্রীকৃষ্ণকে জড়িয়ে ধরেছেন।

দ্বৈধ ভাবের উৎপত্তি হেতু এই অবস্থা প্রাপ্তির নাম দিষ্ট। ৩।

আশ্চর্যহেতু স্তম্ভ

শ্রীকৃষ্ণের অল্পপম সৌন্দর্য দেখে, শ্রীরাধা অত্যন্ত চমৎকৃত হয়ে স্তম্ভিতা হন। এ অবস্থায় তাঁর চোখে পলক পড়ে না, অঙ্গ-প্রত্যঙ্গ নিশ্চল হয়ে আসে। শ্রীমতীর এই অবস্থা দেখে, মধুমঙ্গল শ্রীকৃষ্ণকে বললে—

'তোমার মাধুরী ধাম ত্রিজগতে অল্পপম তাহা আজি রাধিকা দেখিয়া।

মনে হইল চমৎকার নিমেষ নাহিক আর স্তব্ধ হয় আছে ষাড়াইয়া ॥'

বিষাদহেতু স্তম্ভ

পদ্মপলাশলোচনের বিলম্ব দেখে, চিত্রার মনে শঙ্কা হলো যে নিশ্চয়ই বিপ্রলম্ব—প্রতারণা। কই, সংকেত স্থানে তো তিনি এলেন না! মনে বিষাদের সঞ্চার হলো। সংকেত গৃহের দ্বার দেশে চিত্রাপিতার মত নিশ্চল হয়ে চিত্রা দাঁড়িয়ে রইল। ৪।

অমর্ষ বা ক্রোধহেতু স্তম্ভ

নিশীথে শ্রীকৃষ্ণের সঙ্গলাভকালে শ্যামলা হঠাৎ তাঁর মুখে অশ্রু নাড়িকার নাম উচ্চারিত হ'তে শুনে, ক্রোধ ও অভিমানে স্তম্ভিত হয়েছিল। তার চোখে আর পলক ছিল না। দেহকাস্তি লুপ্ত হয়ে গেল। ৫।

স্বৈদ

হর্ষহেতু স্বৈদ

বিষ্ণু পুরাণে : পরাশর মৈত্রেয়কে বলেছিলেন, শ্রীকৃষ্ণের বাহু দুটি গোপাঙ্গনার কণ্ঠে বেষ্টিত হওয়ায় পুলকে রোমাঞ্চিত হয়ে উঠেছিল। হর্ষহেতু স্বৈদাক্ত সেই ভুজদ্বয় দেখে মনে হচ্ছিল, যেন স্বৈদাসুবর্ষণকারী মেঘ। ৬।

যথা—বা

শ্রীকৃষ্ণকে ললিতা বললেন—

'রাধিকার দেহলতা চন্দ্রকাস্ত বিরচিতা, বুঝিলাম তাহার অন্তর।
চন্দ্রের উদয় হেরি তারা রহে নৃত্য করি, স্বৈদ ছলে গলে কলেবর ॥'

ভয়হেতু স্বৈদ

লতাকুঞ্জে শ্রীকৃষ্ণের সঙ্গে বিলাসকালে, বিশাখা হঠাৎ তার পতির আগমন আশঙ্কায়, ভয়ে ঘর্মাকুলেবর হয়ে উঠলো। তার কপোলের সমভ্রুরচিত তিলকচিহ্ন স্বৈদজলে বিলুপ্ত হয়ে যাচ্ছিল। ৭।

শ্রীকৃষ্ণ বললেন—

‘ভয় ছাড় কলাবতী দূরেতে তোমার পতি এই বন নিবিড় গহন ।
অনেক যতন করি দিলাম অলকা সারি ঘর্মজলে হয় বিনাশন ॥’

ক্রোধহেতু শ্বেদ

নান্দীমুখী পৌর্ণমাসীকে বললে—

‘কৃষ্ণের স্থলিত শুনি মনে ক্রোধ কৈল ধনি লজ্জা করি কিছু না কহিল ।
শ্বেদ জল পড়ে গায় বসন ভিজিল তায় মনের ক্রোধ তাহাতে জানিল ॥’

রোমাঞ্চ

আশ্চর্যদর্শনে রোমাঞ্চ

রাসলীলা প্রসঙ্গে গাঙ্গীকে পৌর্ণমাসী বললে—সখি ! আশ্চর্যের কথা আর কি বলবো । রাসলীলা করতে করতে শ্রীকৃষ্ণ যখন একসঙ্গে (যুগপৎ) যুগনয়না গোপাঙ্গনাদের সকলকেই চুম্বন করলেন, আকাশে সুরবালাগণ রোমাঙ্কিত হয়ে, বিস্ময়বিস্ফারিত নেত্রে চেয়ে ছিলেন । ৮ ।

হর্ষহেতু রোমাঞ্চ

শুকদেব বললেন—হে রাজন্ ! কোন অঙ্গনা প্রিয়তম শ্রীকৃষ্ণকে দেখে, স্বীয় নেত্রপথে তাঁর মোহন মূর্তি হৃদয়ে গ্রহণ করে, নয়নচুটি নিমীলিত করলেন । যোগীর ন্যায় হৃদয়ে সেই মূর্তি আলিঙ্গন করে, পুলকে তাঁর সর্বাঙ্গ রোমাঙ্কিত হয়ে উঠলো । ৯ ।

শ্রীমদ্ভাগবত । দ্বাত্রিংশৎ অধ্যায়, সপ্তম শ্লোক ।

যথা বা—ক্লম্বিগী স্বয়ম্বরে

ক্লম্বিগী যখন সুনন্দ ব্রাহ্মণের মুখে সংবাদ পেলেন যে, শ্রীকৃষ্ণ বিদর্ভ রাজ্যে এসে উপস্থিত হয়েছেন, তখন শ্রীকৃষ্ণকে দেখবার জন্ত তিনি অত্যন্ত উৎসুক হয়ে উঠলেন । তাঁর মুকুলিত অঙ্গযষ্টি পুলকে রোমাঙ্কিত হয়ে উঠলো, যেন প্রতিটি লোমকূপ শ্রীকৃষ্ণের অঙ্গশোভা দর্শনের জন্য উদ্গ্রীব হয়ে উঠেছিল ।

ভয়হেতু রোমাঞ্চ

যথা—

‘পাইয়া অঙ্গের গন্ধ আইয়া ভ্রমরবৃন্দ দেখি পালী কম্পিত হইল।

অঙ্গ হইল পুলকিত মন হৈল চমকিত বাস্ত হয়া কৃষ্ণেরে ধরিল ॥’

পালীর অঙ্গ পরিমলে আকৃষ্ট হয়ে ভ্রমরেরা তার মুখপদ্মের দিকে ধাবিত হলো। ভয়ে সে শিউরে উঠলো। অঙ্গযষ্টি কম্পিত হলো। বিপুল পুলকে রোমাঙ্কিতা হয়ে সে ত্রীকৃষ্ণকে আলিঙ্গন করলে। তার লজ্জা সরম আর কিছু রইল না। ১০।

স্বরভেদ

বিষাদহেতু রোমাঞ্চ ও স্বরভেদ—গীতগোবিন্দে

শ্রীরাধার সখী মাধবকে বললে—হে শঠ ! তুমি কেন শ্রীমতীকে দর্শন দিলে না? সেই মৃগনয়না তোমার প্রেমসাগরে নিমজ্জিতা হয়ে, কেবল তোমার চিন্তাতেই জীবন ধারণ করে আছে। বাসক-সম্ভ্রায় কখনো বা সে তোমার সান্নিধ্য কল্পনা করে বিপুল পুলকে পরিপ্লুত হচ্ছে, কখনো বা রূঢ় বিষাদে তার অঙ্গ শিউরে উঠছে; মনোবেদনায় ব্যাকুল স্বরে অশ্রুট কণ্ঠে বিলাপ করছে।

বিস্ময়হেতু স্বরভেদ

শ্রীরাধা ললিতাকে বললেন—সখি ! অভিসারের জন্ম সম্বন্ধে আমার কণ্ঠ রুদ্ধ হয়ে এলো, মুখে কথা ফুটলো না। তাই হাত ইসারায় অনেকবার তোমায় জানিয়েছিলাম। কিন্তু আশ্চর্যের বিষয়, ত্রীকৃষ্ণের বংশীধ্বনি শুনে লতাগুল্ম এমন পুলকচঞ্চল হয়ে উঠেছিল যে, আমার কর-সংকেত তুমি দেখতে পাওনি। ১১।

অমর্ষ বা কোপহেতু স্বরভেদ

ত্রীকৃষ্ণ বিশাখাকে বললেন—এই বৃন্দাবনে আমার কত না প্রেয়সী লীলা করছে! কিন্তু তাদের উজ্জল নর্মভঙ্গীতে আমি

তেমন পরিতৃপ্ত হই না, যেমন পরিতৃপ্ত হয়েছি শ্রীমতীর রোষ তরঙ্গায়িত অধরোষ্ঠের ছুঁতিনটি আশ্রয় বাক্য ও তিরস্কারে। রোষে তাঁর কণ্ঠস্বর গদগদ হয়ে উঠেছিল। ১২।

হর্ষহেতু স্বরভঙ্গ—রুক্মিণী স্বয়ম্বরে

রুক্মিণীকে তার সখীরা বলেছিল—সখি! কেন এত উতলা হচ্ছে? এসো, কোন ছলে আমরা আবার গিয়ে শ্রীকৃষ্ণকে দেখে আসি।

এই কথা শুনে রুক্মিণী সখীদের তর্জনগর্জন করতে লাগলেন। হর্ষহেতু উচ্ছ্বাসে তাঁর কণ্ঠস্বর অস্বাভাবিক হয়ে উঠলো। অন্তবের ভাব গোপন রইল না।

ভয়হেতু স্বরভেদ

শ্রীকৃষ্ণ বিশাখাকে বললেন—প্রথম মিলনের দিন আমি শ্রীরাধাকে বলেছিলাম, দয়া করে এই তৃষ্ণার্ত মধুকরকে মধুপানের অনুমতি দাও। শুনে মদিরাক্ষী ভীতিচকলা হয়ে উঠেছিলেন, এবং গদগদ কণ্ঠে আমার প্রতিভটে এক আশ্চর্য নবসুখার তরঙ্গ প্রবাহিত করেছিলেন। ১৩।

বেপথু

বেপথু অর্থে কম্পন বা শিহরণ বুঝায়। ত্রাসে, হর্ষে ও অমর্ষে বা অধৈর্যে (ক্রোধে) নায়িকা বেপথুমতী হয়।

ত্রাসে বেপথু

একদিন জটীলা শ্রীমতীকে গৃহে আবদ্ধ করে রেখেছিল : অভিসারে যেতে দেয়নি। এ অবস্থায় শ্রীকৃষ্ণ যুবতীর বেশ ধরে এসে শ্রীরাধার পাশে উপবিষ্ট হয়েছিলেন। সেই সময় হঠাৎ মৃত্ত অভিমুখ্য এসে সামনে উপস্থিত হলো। অকস্মাৎ অভিমুখ্যকে

দেখে, শ্রীরাধা আসে বাত্যাহত কদলী পত্রের মত বেপথুমতী হয়ে উঠলেন। তাই দেখে, বিশাখা বললে—

‘নাগর হোয়ল যুবতী আকার। ম্চমতি তুয়া পতি কি করু আর ॥
কাহে তুহু কম্পসি কদলী সমান। দূর কর আস ধৈর্য ধরু প্রাণ ॥’ ১৪।

হর্ষহেতু বেপথু

শ্রীমতী পুষ্পচয়ন করছিলেন। ললিতা বললে—সখি! ব্রজ-রাজতনয় তোমার সামনে এসে মিলিত হলেন দেখে, কম্পিতা হচ্ছে কেন? আমি চতুরা ললিতা, তোমার পাশে আছি। আতঙ্ক পরিত্যাগ কর। ১৫।

অমর্ষহেতু বেপথু

মানিনী পদ্মাকে শ্রীকৃষ্ণ বললেন—সখি! তুমি যদি কুপিতা না হয়ে থাক, তাহলে তোমার তনু কম্পিত হচ্ছে কেন? ঝড় না উঠলে কি কখনো নির্ভরস্বিক দীপশিখা কম্পিত হয়! ১৬।

বৈবর্ণ্য বা পাণ্ডুরতা

বিষাদহেতু বিবর্ণতা

বিপ্রলক্ষা শ্রীরাধার বিষাদম্লান মুখচ্ছবি দেখে এসে, সখী শ্রীকৃষ্ণকে বললে—

‘মুখের মাধুরি দেখি কুসুম হইত দুখী সেই মুখ শুক্লবর্ণ হলো।
চান্দ্রের উপমা তাথে দিতে ভয় করি চিতে বিধিবর তারে বিড়ম্বিল ॥ ১৭ ॥

এইভাবে রোষ এবং ভীতির জগুও নাগ্নিকার মুখকাস্তি বিবর্ণ ও তনু কালিমাময় হয়।

রোষহেতু বৈবর্ণ্য

যথা—

বৃন্দারণ্যে বিহারকালে মাধবের হৃদয়ে শ্রীমতীর প্রতিবিম্বই প্রতিকলিত হয়েছিল। কিন্তু শ্রীমতীর ভ্রম হলো যে, মাধবের হৃদয়ে

অশ্ব কাস্তার মুখচ্ছবি প্রতিফলিত হয়েছে। শ্রীমতী অভিমানিনী হয়ে উঠলেন; রোষে তাঁর মুখমণ্ডল তাম্রবর্ণ হয়ে উঠলো। তাই দেখে মাধব বললেন—‘সখি! এই জ্যোৎস্নাপুলকিত শরৎকালীন অৰ্ধরাত্রে কি কখনো অশ্ব চম্পের উদয় সম্ভব? হে প্রিয়ে! আশঙ্কা করো না। আমার হৃদয়ে তুমিই প্রতিবিস্মিতা হয়েছে।’ ১৮।

ভয়হেতু বৈবর্ণ্য

যথা—

বৃন্দা পৌর্ণমাসীকে বললেন—দেবি! আজ যমুনাতে শ্রীমতী মাধবের সঙ্গে বিহার করছিলেন, এমন সময় হঠাৎ পতিকে দেখে তাঁর বৈক্লব্য উপস্থিত হলো। কিন্তু আয়াণ তাঁকে চিনতে পারেনি। ১৯।

অশ্রু

হর্ষহেতু: আনন্দাশ্রু

যথা—গীতগোবিন্দে

‘রাধার নয়ান অরণ নিকটে যাইতে প্রয়াস করে
বহু দূর পথ চলিয়া যাইতে অম হলো কলেবরে ॥
সেই শ্রমে বারি অশ্রু ছল করি পড়িছে ধরণী তলে।
নিকুঞ্জভবনে নাগরের সনে দেখা হলো সেই কালে ॥’

প্রিয়তমকে দেখে শ্রীরাধা আনন্দ-সাগরে নিমগ্না হলেন। তাঁর নয়নতারা আনন্দে বিহ্বল হয়ে অপাঙ্গসীমা অতিক্রম করে কর্ণমূল পর্যন্ত ধাবমান হলো। সেই শ্রমেই যেন স্বেদাসু স্রবণের মত ছুটি আঁখি হতে আনন্দাশ্রু বারে পড়তে লাগলো। ২০।

নায়ক সন্দর্শনে গগুদেশ প্রফুল্ল ও তনু রোমাঙ্কিত হয়ে নয়নে যে বাষ্প উদগত হয়, তাকেও আনন্দাশ্রু বলে। ২১।

রোষহেতু অশ্রু

খণ্ডিতা ইন্দুমুখী প্রাতঃকালে শ্রীকৃষ্ণের বৃকে অশ্ব নারীর তিলকের দাগ দেখে, মুখে কিছু বললেন না। কিন্তু রোষে তাঁর দৃষ্টি কুণ্ডিত হলো। বারবার চোখের জল মুছতে লাগলেন।

ঈর্ষা হেতুও নারীর চোখে অশ্রু ঝরে। তাতে শিরঃকম্পন, দীর্ঘশ্বাস, কপোলের ক্ষুতি এবং কটাক্ষ ও ভ্রুকুটি থাকে। খণ্ডিতা নায়িকার অশ্রুধারায় কণ্ঠহার সিক্ত হয় এবং নায়কের প্রতি সে নিষ্ঠুর বাক্য প্রয়োগ করে।

বিষাদহেতু অশ্রু

প্রোষিতভর্তৃকা শ্রীরাধাকে বিশাখা বললে—

নয়নের জল মুছে ফেল সখি, বিষাদ রেখো না মনে।

আবার আসিবে সে নিষ্ঠুর কাল এ মধু বৃন্দাবনে ॥

—হংসদূত

হে করভোরু! অশ্রুধারায় মুখচন্দ্র মলিন করো না। শ্রীকৃষ্ণ করুণার সাগর। আবার তিনি তোমার প্রতি পর্যাপ্ত করুণা বিধান করবেন।

শ্রীকৃষ্ণ যখন বৃন্দাবন ছেড়ে মথুরায় চলে গিয়েছিলেন, শ্রীরাধা বিষাদ-সাগরে নিমজ্জিতা হয়েছিলেন। রাত্রিদিন তাঁর নয়নে শুধু অশ্রুবন্তা প্রবাহিত হতো।

আমল সখা বিহনে আজ কুঞ্জভবন অন্ধকার,

কোমল হিয়া কৃষ্ণপ্রিয়া সহিতে নায়ে দুঃখভার।

সেই বিরহ সাগরতলে ডুবলো সারা পরাগমন।

ঘূর্ণীধন ব্যথার চাপে অশ্রু ঝরে অতৃপ্ত ॥

—হংসদূত

স্বাভাবিক অবস্থার বিপর্যয়কে প্রলয় বলে। সুখ বা দুঃখের আধিক্যহেতু প্রলয়ের উৎপত্তি হয়।

সুখে প্রলয়

সুখে বা আনন্দের আতিশয্যে যেমন বিহ্বলতা দেখা যায়, তেমনি আবার নিশ্চেষ্টতাও ঘটে।

শ্রীকৃষ্ণ সন্দর্শনে শ্রীমতীর দেহমনে যে প্রলয় বা অস্বাভাবিক অবস্থায় ও নিশ্চেষ্টতার উদ্ভব হয়েছিল, সেই অবস্থা বিশাখাকে দেখিয়ে ললিতা বলেছিল—সখি ! ওই দেখ, শ্রীরাধার জজ্বাহুটি স্থবির হয়েছে, চলৎশক্তি নাই। নেত্র যুগল নিষ্পন্দ, কণ্ঠের ভাষা কুণ্ঠিত, নাকে শ্বাস-প্রশ্বাস বইছে না। মুনিরা যেমন সমাধিস্থ হন, শ্রীমতী তেমনি নিশ্চেষ্ট ও অনড় হয়েছেন। শ্রীকৃষ্ণ সন্দর্শনের পরম প্রমোদ স্মৃশা, অপরিসীম সুখ ও আনন্দ শ্রীরাধাকে সমাচ্ছন্ন করেছে। ২২।

দুঃখেহেতু প্রলয়

যথা—ললিতমাধবে

সহসা তড়াগ জলশূন্য হলে শফরীদের যে অবস্থা হয়, কৃষ্ণবিহীন বৃন্দাবনে আভীর-শফরীরাও তেমনি নিদারুণ মনোবেদনায় শ্বাসরহিতা হয়ে মাটিতে লুটিয়ে পড়ছে। হায় ! এখন তারা কার শরণ নেবে ? দুরাত্মা কংসের বৃকে কৃষ্ণসর্প সরোষে দংশন করুক। ২৩।

ধুমায়িতা

পূর্বে যে ভাবগুলির কথা বলা হলো, সেই ভাব যদি অল্প ছ'—একটি ভাবের সঙ্গে মিশ্রিত হয়, এবং যদি তা গোপন করবার সম্ভাবনা থাকে, তা হলে তাকে ধুমায়িত ভাব বলা হয়। যে নায়িকার অন্তরে প্রচ্ছন্ন কামনা ধুমায়িত, তাকে ধুমায়িতা বলে। ২৪।

কোন সিদ্ধবিনিতা বিমানচারিণী দেবীকে বললেন—

‘তন ওগো সুরাঙ্গনে মথুরার অঙ্গনে দেখিয়াছ পুরাণ পুরুষ।

তোমার নেত্রে অশ্রুজল পুলকিত গণ্ডস্থল হইয়াছ মদনের বশ ॥’

শ্রীকৃষ্ণকে সন্দর্শন করে দেববালায় মনে যে মিশ্রভাবের উদয় হয়েছিল, তা তিনি সংগোপন করলেন। কিন্তু চিত্ত ধুমায়িত হলো এবং তার লক্ষণ তাঁর অশ্রুজলে ও পুলকিত গণ্ডস্থলে প্রতিভাত হলো। ২৫

জলিতা

দুই বা তিনটি ভাব একসঙ্গে উদ্ভিত হলে যে অবস্থা প্রকট হয়, সেটা কষ্টের সঙ্গে গোপন করলে, নায়িকার জলিতা অবস্থার উদ্ভব হয়। অন্তর জ্বলে যায়, কিন্তু মুখে ফুটে নায়িকা তার মনের ভাব প্রকাশ করতে পারে না।

যথা—

ধন্যাকে তার সখী বললে—

‘জাহ্ন দুই অশ্রুজল নেত্রে বহে অশ্রুজল রোমাবলী করিছে মর্তন।

বুঝিলাম নীলবর্ণ অপূর্ব পুরুষ রত্ন পাইয়াছ তুমি দরশন ॥’

তোমার স্তব্ধ উরুযুগ, হর্ষে রোমাঙ্কিত তমু ও সজল আঁখিভূটি দেখে স্পষ্টই বুঝিলাম যে, নীলনিধি তোমার করতলগত হয়েছেন। হে কমলমুখি! তোমার অদৃষ্ট সুপ্রসন্ন। ২৬।

দীপ্তা

তিন, চার বা পাঁচটি প্রোঢ়ভাব যদি একসঙ্গে চিত্তে উদ্ভিত হয় এবং নায়িকা সেভাব সংরক্ষণ করতে অসমর্থ হয়, তা হলে তাকে দীপ্তা বলে। ২৭।

যথা—বিদগ্ধমাধবে

শ্রীরাধার প্রতি বিশাখা :

‘তোমার যে অশ্রুজল ভিজাইল ক্ষিতিতল নিখাসে নাচিছে অঙ্গবাস।

পুলকে দস্তুর অঙ্গ বুঝি কৃষ্ণলীলারঙ্গ তোমার শ্রুতিপুটে কৈল বাস ॥’

তোমার পদ্মনয়নের জলবিন্দুতে ক্ষিতিতল সিক্ত হচ্ছে, ঘন-নিঃখাসে কুচাংগুক (কাঁচুলি) নৃত্য করছে, রোমাঙ্কিত তমু দস্তুর হয়েছে; বক্ষস্থল নত ও উন্নত হচ্ছে (heaving), এবং দেহ কণ্টকিত হচ্ছে। হে সখি! তাই আমার স্থির বিশ্বাস হচ্ছে যে, মাধবের লীলা হয়তো তোমার কর্ণমূল পর্যন্ত এসে পৌঁচেছে। ২৮।

পাঁচ, ছয় অথবা সমস্তভাব যদি একসঙ্গে উদ্ভূত হয়ে প্রেমের

পরমোৎকর্ষ-পর্যায়ে উপনীত হয়, তা হলে তাকে উদ্দীপ্ত অবস্থা বলে। এই অবস্থাপ্রাপ্তা নায়িকাকে উদ্দীপ্তা নায়িকা বলা হয়।

শ্রীকৃষ্ণের নিকট বিরহিণী ললিতার দশা বর্ণনা করে, উদ্ধব বলেছিলেন—সখা, তোমার বিরহে ললিতা এমন কাতর হয়েছেন যে, অবিরল অশ্রুধারায় তিনি স্নান করছেন। মুক্তাকলাপের মত স্নেদবিন্দু তাঁর সর্বাঙ্গের শোভা বর্ধন করছে। রোমাঞ্চকর কাঁচুলিতে হৃদয়তট আবৃত করে রেখেছেন ; চন্দনতুলা পাণুর অঙ্গকাস্তি প্রকাশ করে, মুখে গদগদ বাক্য উচ্চারণ করছেন। তোমার সঙ্গে নবসঙ্গমের জন্যই যেন সজ্জিতা হয়ে ললিতা স্তম্ভিতভাবে অবস্থান করছেন।

উদ্দীপ্ত ভাবগুলির ভেদ কোথাও কোথাও সুস্পষ্টরূপে প্রকাশ পায়। কিন্তু সাঙ্গিকভাব সকল এই উদ্দীপ্ত ভাবেরই পরম উৎকর্ষ ও পরাকাষ্ঠা সাধন করে।

‘উদ্দীপ্তির বিশেষ ‘সুদীপ্তা’ নাম হয়।

সাস্থিকের উৎকৃষ্টতা বড় তাথে রয় ॥’ ২৯ ॥

যথা—

পূর্বাঙ্কে গৃহনিষ্ক্রান্তা শ্রীরাধা বনপথে যাচ্ছিলেন, এমন সময় হঠাৎ শ্রীকৃষ্ণের বাঁশী শুনে, তাঁর অঙ্গে সুদীপ্ত সাঙ্গিকভাব সকল প্রকাশিত হতে লাগলো। কোন সখী দূর থেকে শ্রীমতীর সেই অবস্থা দেখে, স্বরায় শ্রীকৃষ্ণের নিকটে গেল। বললে—মাধব ! তোমার বংশীধ্বনি শুনে, শ্রীরাধা স্নেদসিক্ত হয়ে উঠেছেন। অশ্রুজলে তিনি বৎসগণের তৃষ্ণা নিবারণ করছেন। আপদমস্তক রোমাঞ্চিত হয়ে উঠেছে, এবং তম্বু এমন মুকুলিত হয়ে উঠেছে যে, মুগ্ধ বিদ্বার্থীরা ভারতীর প্রতিকৃতি ভ্রমে তাঁর আরাধনায় রত হয়েছে। নিরন্তর স্নেদবারি ও অশ্রুপাতে শ্রীমতীর চম্পক বর্ণ পাণুর হয়েছে। হে গোবিন্দ ! সেই সাঙ্গিক ভাবের পরাকাষ্ঠাভ্যন্তরক মুর্তি কৃষ্ণসঙ্গতৃষ্ণায় সহসা স্নেদসিক্ত শুভ্রবর্ণ ধারণ করায়, বিদ্বার্থীদের মনে ভারতীর প্রতিকৃতি বলে ভ্রম উপস্থিত হয়েছে। ৩০।

ইতি সাঙ্গিক বিবৃতি

ব্যভিচারী ভাব । ১ ।

অমৃত সমুদ্রে তরঙ্গের মত স্থায়িত্ব থেকে ব্যভিচারিত্বের উৎপত্তি হয় । এই ভাব স্থায়িত্বের পুষ্টিসাধন ক'রে আবার তাতেই মিলিয়ে যায় ।

‘বিশেষণাভিমুখ্যেন চরন্তি স্থায়িনঃ প্রতি । বাগঙ্গসঙ্কসুচ্যা য়ে জ্জয়াস্তে ব্যভিচারিণঃ ।’ অর্থাৎ ব্যভিচারিত্ব বিশেষরূপে স্থায়িত্বের অভিমুখী হয়, এবং স্থায়িত্বের মধ্যেই বিচরণ করে ; কদাচ তার সীমা লঙ্ঘন করে না । হাবভাব, বাক্য, অঙ্গ অর্থাৎ ক্র ও নেত্র প্রভৃতি এবং মন বা সাত্ত্বিকভাব থেকে উৎপন্ন অন্তঃকরণের দ্বারা ব্যভিচারিত্ব প্রকাশিত হয় । ব্যভিচারিত্ব অস্থায়ী ।

স্থায়িত্ব বলতে সাধারণতঃ বুঝায়, নায়ক নায়িকার যে ভাব স্থায়ী ভাবে মনে রেখাপাত করে । ব্যভিচারী ভাব সেই ভাবের তরঙ্গায়িত সাময়িক উচ্ছ্বাস । এই উচ্ছ্বাস প্রেমকে আরও ঘনীভূত করে, এবং প্রেমের মাধুর্য বৃদ্ধি করে ।

নির্বৈদ্যাদি তেত্রিশটি ভাবের মধ্যে উগ্রতা ও আলস্য ভিন্ন সবগুলি ভাবেই ব্যভিচারিত্ব বলা হয় । ২ ।

এই ব্যভিচারিত্বে সখী প্রভৃতির সঙ্গেও নায়িকার প্রেম সঞ্চারিত হয় । ৩ ।

উক্ত ব্যভিচারিত্বে মরণাদিকে সাক্ষাৎ অঙ্গ বলে স্বীকার করা যায় না । তবে মরণাদি ভাব (নিজের মরণ কামনা বা উত্তম) অনেক ক্ষেত্রে প্রণয়ের বৃদ্ধি সাধন করে । কিন্তু এই মরণ বলতে প্রকৃত মৃত্যু বা প্রাণত্যাগ বুঝায় না । তার অভিলাষ বা উল্লেখ মাত্র বুঝায় । প্রকৃত মৃত্যু বা প্রাণত্যাগ প্রণয়ের অপকর্ষ । ৪ ।

প্রণয় বিষয়ে নায়ক-নায়িকার মুখে, বিশেষতঃ নায়িকার মুখে

মরণের ইচ্ছা প্রকাশ, প্রাচীন ও আধুনিক কাব্যে বা সাহিত্যে
ব্যাপকভাবে চোখে পড়ে।

‘স্বরতরু তল যব ছায়া ছোড়ল

হিমকর বরিখায় আগি।

দিনকর দিন ফলে নীত না বারল

হম জীয়েব কথি লাগি ॥’

—বিজ্ঞাপতি

‘কিয়ে স্তথ লাগি ভসম নহ দেহ।

অব মনু জীবন উপেখন হোয় ॥’

—গোবিন্দ দাস

‘বন্ধুরে কহিও মোর কথা।

অনলে পশিব যদি না আইসে এথা।

মরণ অধিক ভেল এ ছার জীবন।

পিয়া বিহু দগধয়ে যেন দাবে বন।’

—জানদাস

‘এ বিরহ হায় সহিতে পারি না, অনলে পশিব আমি।’

‘মরিব মরিব সখি, নিশ্চয় মরিব।

কাহ্ন হেন গুণনিধি কারে দিয়ে যাব।’

‘না পোড়াইও রাধা অঙ্গ, না ফেলিও জলে।

মরিলে তুলিয়া রেখো, তমালেরি ডালে ॥’

—কীর্তন পদ

নির্বৈদ

‘নির্বৈদঃ আত্মধিকারঃ’ নির্বৈদ বলতে আত্মধিকার, খেদ,
অনুতাপ ও নৈরাশ্য বুঝায়।

মহার্তি, বিয়োগ ও ঈর্ষা থেকে নির্বৈদের উৎপত্তি হয়।

অভিশয় আৰ্ত্তিহেতু নির্বৈদ

যথা—বিদগ্ধ মাধবে

নির্বৈদবতী ত্রীরাধার উক্তি—

যাঁর উৎসঙ্গ-সুখ কামনায় গুরুজনদের নিকটেও লজ্জা শিথিল

করেছি, প্রাণ অপেক্ষা প্রিয় সখীদের ক্লেশ ভোগ করালাম, মহান্ সতীধর্মে জলাঞ্জলি দিলাম, সেই কৃষ্ণ অবহেলা করলেন ! আমার জীবনে শিক্ ! উপেক্ষিতা হয়েও পানীয়সী এখনো জীবিত আছে !

বিপ্রয়োগ বা বিপ্রিয়হেতু নির্বেদ—যথা উদ্ধব সন্দেশে

প্রোষিতভর্তৃকা শ্রীরাধা ললিতাকে বললেন—

সখি ! মুকুন্দের প্রতি আমার প্রেমগন্ধ কিছু মাত্র নাই। তবে যে আমি তাঁর জন্ম রোদন করি, সে শুধু লোককে জানাবার জন্ম যে আমি তাঁর প্রণয়-পাত্রী। কেন না, সেই বংশীবদন শ্রীকৃষ্ণের মুখবিস্ম দর্শন করতে না পেয়েও আমি এই প্রাণকীট ধারণ করে আছি। ৫।

ঈর্ষাহেতু নির্বেদ

যথা—

শ্রীরাধার সৌভাগ্য সর্বজনবিদিত দেখে, ঈর্ষায় (in jealousy) অসহিষ্ণু হয়ে চন্দ্রাবলী আক্ষেপ করেছিল। পদ্মা তাই দেখে তাকে সান্ত্বনা দিয়ে বললে—সখি ! তোমার গভীর গরিমার কথা ভুলে গিয়ে, অমন মলিন বদনে নিজেকে দিক্কার দিও না। চন্দ্রের সঙ্গে তারকার (অর্থাৎ চন্দ্রাবলীর সঙ্গে শ্রীরাধার) পার্থক্য পৃথিবীতে কে না জানে ! ৬।

বিষাদহেতু নির্বেদ

ইষ্টবস্তু না পেয়ে যে বিষাদ বা অনুতাপ হয়, তাকে বিষাদহেতু নির্বেদ বলে।

পূর্বরাগবতী শ্রীরাধা বিশাখাকে বললেন—সখি ! আজ আর নিঃশব্দ হয়ে শ্রীকৃষ্ণের বাক্যসুধা পান করতে পারলাম না। তাঁর মুখকমলে চঞ্চল দৃষ্টিনিষ্ক্ষেপও করতে পারলাম না। অনেকদিনের পর এমন সুন্দর অবসর পেয়েছিলাম, কিন্তু হায় আমার ছুঁভাগ্য ! হতভাগী জরতী (জটীলা) ছল ক'রে আমায় রোধ করেছে। ৭।

শ্রীমন্তাগবত দশমস্কন্ধ—একবিংশ অধ্যায়, সপ্তম শ্লোকে এবং গীতগোবিন্দে পৌৰ্বাহিক বিষাদ এবং প্রারব্ধকার্য অসিদ্ধির জন্তু বিষাদের উদাহরণ আছে।

পৌৰ্বাহিক বিষাদ—শ্রীমন্তাগবত দশমে।

শ্রীমতীর বিষাদের কথা উল্লেখ ক'রে, ব্রজসুন্দরীরা বলাবলি করতে লাগলেন—সখীগণ, প্রিয়দর্শনেই চক্ষুস্মান ব্যক্তিদের চোখেব সার্থকতা; তাছাড়া আর কি ফল আছে, তা আমাদের বুদ্ধিই অগম্য। ব্রজরাজতনয় বয়স্য়গণসহ গাভীদল নিয়ে বনে প্রবেশ করছিলেন; তাঁর অধরে অনুক্ষণ বেণু শোভা পাচ্ছিল, মাঝে মাঝে স্নিগ্ধ কটাক্ষ নিক্ষেপ করছিলেন। সেই ভুবনমোহন রূপ যারা দর্শন করেছে, তাদেরই নয়ন সার্থক! তা ছাড়া, অশ্রু কেউ সে মাধুর্যের আস্বাদ পায়নি।

প্রারব্ধকার্যের অসিদ্ধিহেতু বিষাদ—গীতগোবিন্দে

কলহাস্তুরিতা শ্রীরাধা ললিতাকে বললেন—সখি! আমার মন নিরন্তর শ্রীকৃষ্ণের গুণের কথাই ভাবে; ভুলেও তাঁর প্রতি কোপ প্রকাশ করতে চায় না। তাঁর দোষের কথা ছেড়ে দিয়ে, কেবল পরিতোষই বহন করে। আমায় পরিত্যাগ করে, তিনি অতিশয় তৃষাকুল হয়ে যুবতীদের সঙ্গে বিহার করছেন। তা জেনেও মন আমার নিরন্তর তাঁর প্রতিই অভিলাষী। আমায় আর কামশাস্ত্র পড়িয়ে কি করবে বলো?

বিপত্তিহেতু বিষাদ—ললিত মাধবে।

প্রোষিতভর্তৃকা শ্রীরাধা বিলাপ করতে করতে বললেন—আমি শ্রীকৃষ্ণের নর্মবাক্য শ্রুতিপুটে পান করতে পারিনি, নিঃশঙ্কচিত্তে তাঁর মুখকমলের প্রতি দৃষ্টি নিক্ষেপ করতে পারিনি, তাঁর বিশাল বক্ষে গাঢ়রূপে আলিঙ্গনবদ্ধ হতে পারিনি, তাই ভেবে আমার মন বিকল হয়ে পড়েছে। ৮।

অপরাধহেতু বিবাদ

কলহাস্তুরিতা শ্রীরাধা বিলাপ করে বললেন—সখি! আমি কুটিলবুদ্ধি হয়ে মাধবের স্তমধুর বচনে কর্ণপাত করিনি। তিনি আমার পায়ে ধ'রে সাধলেও আমি তাঁর দিকে দৃকপাত করিনি। হিতবাক্য অবহেলা করেছি। তাই আমার অন্তর আজ তুষানলে দগ্ধ হচ্ছে। ৯।

দৈত্য। ১০।

দুঃখ, ত্রাস এবং অপরাধ থেকে দৈত্যের উৎপত্তি হয়।

যথা—বিষমঙ্গলে

দুঃখের জন্ম দৈত্য—

‘শুন কৃষ্ণের মুরলী তোরে ভাগ্যবতী বলি সদা থাক কৃষ্ণমুখচন্দে।
তোমার চরণ ধরি কহিছি বিনয় করি মোর দশা কহিও গোবিন্দে ॥’

বা—যথা

রাস-আরম্ভে ব্রজাঙ্গনাগণ শ্রীকৃষ্ণের উদাসীনতাব্যঞ্জক আচরণে ও বাক্যে ব্যথিতা হয়ে, চাটুবাচ্য প্রয়োগ করে বললে—হে দুঃখ-নাশন! আমাদের প্রতি প্রসন্ন হও। তোমার উপাসনা করবো বলে গৃহত্যাগ ক’রে, যোগিদের মত তোমার পদপ্রান্তে এসেছি। হে পুরুষভূষণ, তোমার মুখের সুন্দর হাসি দেখে, চিন্তে তীব্র কাম বহি জ্বলে উঠেছে। অধীনাগণের দাস্ত্রের অধিকার দাও।

ত্রাসহেতু দৈত্য

বনবিহারকালে একটি উড়ন্ত ভ্রমর মুখ পদ্মের দিকে ধাবমান হচ্ছে দেখে, শ্রীমতী হাত নেড়ে তাকে তাড়াবার চেষ্টা করলেন। কিন্তু নিজে তাকে নিবারণ করতে না পেরে, ত্রাসে বিহ্বলা হয়ে শ্রীকৃষ্ণের শরণাপন্ন হয়ে বললেন—হে অঘদমন! আমার প্রতি প্রসন্ন হও; তোমার পায়ে পড়ি, এই ছুষ্ট ভ্রমরকে তাড়াও। ১১।

অপরাধহেতু দৈন্ত

শ্রীরাধা বিশাখাকে বললেন—সখি! মাধবকে প্রত্যাখ্যান ক’রে আমি সত্যই অপরাধ করেছি। কিন্তু আমার কোন দোষ নাই। মানরূপী দুষ্ট ফণী আমায় দংশন করেছিল, সেই বিষে আমি হিতাহিত জ্ঞান হারিয়েছিলাম। হে সুন্দরি! আমার অপরাধের দিকে দৃষ্টিপাত না ক’রে, তুমি শিখিপিঙ্গুমৌলিকে অনুন্নয় কর যে, তিনি যেন আমার প্রতি বিমুখ না হন। ১২।

গ্লানি বা নির্বলতা। ১৩।

শ্রম, মনঃপীড়া ও রতি—এই তিনটি থেকে গ্লানির উৎপত্তি হয়।

শ্রমহেতু গ্লানি

যথা—

বৃন্দা পৌর্ণমাসীকে বললেন—যমুনায়ে শ্রীকৃষ্ণের সঙ্গে জলকেলি করতে গিয়ে পঙ্কজাক্ষী শ্রীমতী শ্রান্ত হয়ে পড়েছিলেন। তাঁর শিথিল প্রকোষ্ঠ থেকে মণিবলয় স্থলিত হয়ে পড়েছিল যমুনার জলে। কিন্তু শ্রমজনিত গ্লানি বা অবসাদে তিনি তা রোধ করতে পারেন নি।

‘কৃষ্ণ সঙ্গে জলকেলি কৈল রাধা সখী মিলি মণিবলয় পড়িছে খসিয়া।

সখীগণ হাসে তারে তুলিয়া লইতে নারে অঙ্গ সব পড়িছে ভাঙ্গিয়া ॥’

আশ্বি বা মনঃপীড়াহেতু গ্লানি—হংসদূতে

শ্রীকৃষ্ণ যখন মথুরায় ছিলেন, বিরহিণী শ্রীরাধার মানসিক অবস্থা দেখে, ললিতা একটি হংসকে দূত কল্পনা ক’রে বলেছিল— হে বিহঙ্গ! তুমি মথুরায় গিয়ে শ্রীকৃষ্ণকে বলো যে, মনঃপীড়ায় শ্রীমতীর দশম দশা উপস্থিত হয়েছে। তিনি আর জীবিত থাকবেন না। সখীরা প্রতিকারের চেষ্টা ক’রে বিফল মনোরথ হয়েছে। কিন্তু সেই কুবলয়সদৃশা রাধা তোমার আশা ত্যাগ করতে পারেন নি। তাই জোর ক’রে তিনি প্রাণ ধারণ ক’রে আছেন।

রতিহেতু গানি যথা—গীতগোবিন্দে

কন্দর্পচিহ্নিত রতিকেলি-সঙ্কুল সময়ের প্রারম্ভে শ্রীরাধা দয়িতকে জয় করবার জন্য সাহসে ভর ক'রে, সম্ভ্রম বজায় রেখে যে সব কাজ করতে আরম্ভ করলেন, তাতে তাঁর জঘনস্থল আশ্রিতে নিষ্পন্দ হলো; বাহুদ্বিটি শিথিল হয়ে এলো, এবং ক্লান্ত বক্ষস্থল উৎকম্পিত হতে লাগলো। অবসাদে চোখদ্বিটি মুদিত হয়ে এলো। পৌরুষ রস কি কখনো নারীর পক্ষে সহজসাধ্য হয়? । ১৫।

শ্রম । ১৬।

শ্রম সাধারণতঃ তিন রকমের—পথশ্রম, নৃত্যশ্রম, ও রতিশ্রম।

পথশ্রম

দুতী শ্রীকৃষ্ণের নিকট শ্রীমতীর অভিসার যাত্রার শ্রম বর্ণনা করে বললে—

‘দুই তিন পদ যেঞা কেলিপদা ফেলাইয়া কেশমালা ফেলে কত দূরে।
কণ্ঠের মুক্তার মালা তারপর ফেলি দিলা শ্রমে অঙ্গ হৈল জরজরে।
কৃষ্ণপ্রেম অন্তরে দূরে অভিসার করে শ্রোণী ভরে চলিতে না পারে।
বহু চিন্তা কৈল তায় তার উপায় নাহি পায় দুঃখী হৈয়া নিন্দে নিতম্বেরে।’

নৃত্যহেতু শ্রম

বৃন্দা পৌর্ণমাসীকে বললেন—আজ রাসলীলায় নৃত্যের আতিশয্য হেতু অনিন্দিতা ক্ষীণাঙ্গিনীদের গতিবিলাস শিথিল হয়েছে। ক্লান্ত হয়ে তারা শ্রীকৃষ্ণের স্কন্ধে পদ্যহস্ত রেখে দাড়িয়ে আছে। শ্রম বশতঃ প্রতি পদক্ষেপে শ্বেদ-উদগম হচ্ছে। তাই তাদের চূর্ণ অলকের অগ্রভাগ ললাট দেশে সংশ্লিষ্ট হয়ে আছে। ১৭।

রতিশ্রম

রতিশ্রাস্তা বিশাখাকে শ্রীকৃষ্ণ বললেন—বিশাখিকে! রতিশ্রমে তোমার বাহুদ্বিটি শিথিল হয়েছে। গণ্ডযুগে ঘন শ্বেদবিন্দু উদগত

হয়ে তোমার মূর্তি অল্পপম মাধুর্যমণ্ডিত হয়ে উঠেছে। সেই মাধুর্য আমার প্রমদাক্রান্ত চিত্তকে অতিশয় শ্রীত করে। ১৮।

মদ বা বিবেকহারী উল্লাস। ১৯।

মধুপানজনিত মত্ততায় বিবেকশূন্যতা ঘটে, তাকে মদ বলে।

যথা—

কুলদবল্লী নান্দীমুখীকে বললে—দেবি! দেখ, কি আশ্চর্য! যে রাধা লজ্জায় কখনো শ্রীকৃষ্ণের সামনে মুখতুলে কথা বলতে পারতেন না, সেই কিশোরী আজ অনঙ্গমধুপানে আত্মহারা হয়ে শারীর মত অনর্গল পাঠ আবৃত্তি করে চলেছেন। ২০।

গর্ব

সৌভাগ্য, রূপ, গুণ ও নিজের শ্রেষ্ঠত্ব-বোধ বা সর্বোত্তম-আশ্রয় থেকে গর্বের উৎপত্তি হয়। গর্বিতা নায়িকা অন্তকে অবহেলা করে।

সৌভাগ্যহেতু গর্ব

‘সখীগণ সঙ্গ ছাড়ি, ছাড়ি সব ব্রজনারী কৃষ্ণ তোমার দুয়ারে দাঁড়াঞা।

কুণ্ডল রচিছ তুমি বারবার বলি আমি কৃষ্ণপানে চাহ গো ফিরিঞা।’

কুঞ্জগৃহে অবস্থিতা গর্বিতা শ্রীরাধাকে বিশাখা বললে—সখি! বান্ধবীদের সঙ্গ পরিত্যাগ ক’রে, এবং উৎসুক প্রেয়সীদের ভজনা না ক’রে, শ্রীকৃষ্ণ তোমারই দ্বারে এসে তোমার মুখপানে চেয়ে আছেন। কিন্তু কি আশ্চর্য! তুমি একবারও তাঁর দিকে চেয়ে দেখছো না : হাসিমুখে বসে বসে যুঁইফুলের মকরকুণ্ডল তৈরি করছো!

রূপহেতু গর্ব

চন্দ্রাবলীর রূপগরিমায় গর্বিতা হয়ে, তার সখী পদ্মা ললিতাকে বলেছিল—এ পৃথিবীতে এমন কে আছে, যে চন্দ্রাবলীর মুখচন্দ্রিমার অল্পপম সৌন্দর্য-পুঞ্জের স্তব করতে পারে! তার মুখের ওই লাবণ্য-প্রভায় মুগ্ধ হয়ে, শিখিপুচ্ছকিরীটী শ্রীকৃষ্ণও তার গৃহসমীপবর্তী কাননের কুঞ্জে কুঞ্জে ঘুরে বেড়াচ্ছেন।

যথা বা—বিদগ্ধ মাধবে

ললিতা পদ্মাকে বলেছিলেন—চন্দ্রাবলীর রূপের গর্ব ততক্ষণই থাকে, যতক্ষণ শ্রীরাধার আবির্ভাব না হয়। প্রদীপ্ত সূর্যের আবির্ভাবে চন্দের কাস্তি যেমন ঘান হয়ে যায় শ্রীমতীর আবির্ভাবে চন্দ্রাবলীর রূপও তেমনি নিস্প্রভ হয়। ২১।

গুণহেতু গর্ব

এই ব্রজে গোপিকা কপোতীরা ততক্ষণই বকম্ বকম্ ক'রে আনন্দ দান করে, যতক্ষণ ললিতার কোকিলকণ্ঠে স্নমধুর কলধ্বনি পবিত না হয়। ২২।

সর্বোত্তম-আশ্রয় হেতু গর্ব

অন্য নায়িকাদের তুলনায় কোন নায়িকা যদি সর্বোত্তম ব্যক্তির আশ্রয় লাভে সক্ষম হয়, বা ইষ্ট বস্তু লাভ করে, তাহলে নিজের শ্রেষ্ঠত্ববোধ হেতু গর্বিতা হয়।

সৌভাগ্য, রূপ, গুণ বা সর্বোত্তম-আশ্রয়হেতু যে শ্রেষ্ঠত্ববোধ নায়িকার মনে সঞ্চারিত হয়, তাকে Superiority Complex বা Pride of Supremacy বলা চলে।

যথা—বিষ্ণুপুরাণে

সত্যভামা দূতমুখে ইন্দ্রপত্নী শচীকে জানিয়েছিলেন—তোমার পতি ইন্দ্র, তা আমি জানি। তিনি যে স্বর্গের রাজা, তাও আমি জানি। কিন্তু আমি মানবী হয়েও তোমার উদ্ধানের ওই পারিজাত হরণ করাতে পারি। ২৩।

এখানে সত্যভামা সর্বোত্তম-আশ্রয় গৌরবে গরীয়সী ও গর্বিতা।

ইষ্টলাভহেতু গর্ব

আধিক্য বর্জনের জন্য বিস্মৃত উদাহরণ দেওয়া হলো না। শ্রীমতী একদিন সখীদের সামনে পাচনির সঙ্গে বাঁশীর তুলনা ক'রে, শ্রীকৃষ্ণের মুখচুষনের গর্ব প্রকাশ করেছিলেন। এখানে ইষ্টলাভহেতু নায়িকার মনে গর্ব সঞ্চারিত হয়েছে। ২৪।

শ্রীমন্তাগবত দশমস্কন্ধে উল্লিখিত আছে যে, কুরুক্ষেত্রে মিলিত যুবতী-সভায় দ্রোপদীকে নিজের স্বয়ম্বর বৃত্তান্ত জানিয়ে লক্ষ্মণা বলেছিলেন—রাজ্ঞি ! আমি বিষদ হাশ্র ও উরুকুন্তল এবং কুণ্ডল-কাস্তিযুক্ত বস্ত্র উন্নত ক’রে, চারিদিকে উপবিষ্ট রাজাদের নিরীক্ষণ করতে লাগলাম। তারপর সেইসব রাজাদের সামনে স্বল্প পদ-বিক্ষেপে এগিয়ে গিয়ে, অনুরক্ত হৃদয়ে শ্রীকৃষ্ণের গলায় মালা দিলাম। ২৫।

ইষ্টলাভ এবং নিজের রূপগুণের শ্রেয়তাবোধ হেতু লক্ষ্মণার মনে যে গর্বের সঞ্চার হয়েছিল, সেই গর্বে উন্নতগ্রীবা হয়ে অত্যাশ্র রাজস্ববর্গের প্রতি উপেক্ষা প্রকাশ করে, তিনি গবিত মন্তরপদে শ্রীকৃষ্ণের দিকে অগ্রসর হয়ে তাঁর গলায় মালাদান করেছিলেন।

শঙ্কা । ২৬।

চৌর্য, অপরাধ ও পরের ক্রুরতা—এই তিনটি কারণে শঙ্কার উৎপত্তি হয়।

চৌর্যহেতু শঙ্কা

‘কৃষ্ণ নিজা গেল দেখি বাঁশী লঞা বিধুমুখী লুকাইল লতার ভিতরে।

অঙ্গের যে ছটাগণ তমঃ করে বিনাশন তাথে রাধা শঙ্কিতা অন্তরে ॥

রাধা করে বিধির নিন্দন।

হেন অঙ্গ মোর কৈল অঙ্ককার দূরে গেল। বিধি নাহি বুঝে প্রিয়জন ॥’

অপরাধহেতু শঙ্কা—ললিতমাধবে

নিশীথ অভিসারে কুঞ্জকুটীরে যাবার সময় রজনীর গাঢ় অঙ্ককার সম্পদস্বরূপ হয়েছিল। কিন্তু রাত্রিশেষে যখন চারিদিকে প্রভাতের আলো ছড়িয়ে পড়লো, নায়িকা শঙ্কিতা হয়ে উঠলো—‘হায়, এখন কেমন করে কুঞ্জ থেকে বেরিয়ে গোষ্ঠে প্রবেশ করবো? সবাই যে দেখতে পাবে!’ এই আশঙ্কায় পালী বিহ্বলা হয়ে পড়লো। সে যে গোপন-অভিসারে এসে সমাজনিন্দিত কাজ করেছে, এই অপরাধ-

বোধ তাকে শঙ্কিত করে তুললো। পাছে দূর থেকে কেউ দেখতে পায়, এই ভয়ে সে মুখ নীচু ক'রে, শঙ্কিত দৃষ্টিতে এদিক ওদিকে চেয়ে দ্রুতপদে কুঞ্জভবন থেকে বেরিয়ে গোষ্ঠে গিয়ে প্রবেশ করলো। বেগী মুক্ত ক'রে, এলায়িত কেশরাশি মুখমণ্ডলে ও স্কন্ধদেশে ছড়িয়ে দিল, যাতে সামনে এসে পড়লে কেউ তাকে চিনতে না পারে। রাত্রি জাগরণে পালীর অঙ্গ অলস ও অবসন্ন হয়েছিল। ২৮।

উত্তমা স্ত্রীগণ প্রকৃতিগতভাবেই ভীৰু। তাই তাঁরা সমাজ, ধর্ম ও লোকলজ্জার ভয়ে স্বভাবতই শঙ্কিতা হন। আত্মমর্যাদা বিষয়ে সচেতনতার জন্ম বিদগ্ধ নারীর চিন্তে সর্বদাই শঙ্কা থাকে।

অশ্রুর ক্রুরতাহেতু শঙ্কা—বিদগ্ধমাধবে

শ্রীকৃষ্ণ জটিলার কার্যকলাপে শঙ্কিত হয়ে বললেন—আমার বিনোদবৃত্তান্তের রহস্য যদি প্রকাশ পায়, তা হলে লবুহৃদয় অভিমন্যু অবিলম্বে শ্রীমতীকে গৃহে অবরুদ্ধ করবে। না হয়, নির্জন কোন স্থানে লুকিয়ে রাখবে, অথবা মথুরায় নিয়ে চলে যাবে। তখন উপায় কি হবে! । ২৯।

ত্রাস

আকাশে ঘনঘটা ও বিদ্যুৎ দেখে, ভয়ানক কোন জন্তু দেখে, বা কোন উগ্র শব্দ শুনে, নারীর অন্তরে ত্রাসের সঞ্চার হয়।

বিদ্যুৎ-দর্শনে ত্রাস

রূপমঞ্জরী কুন্দবল্লীকে বললে—

‘জলদেব দ্যুতি দেখি ত্রাস পাঞা বিধুমতী কৃষ্ণের কোলেতে লুকাইল।

দ্বিতীয় বিদ্যুৎ যেন যেঘে প্রবেশিল পুনঃ সেই শোভা সখীরা দেখিল।’ । ৩০।

ভয়ানক জন্তু-দর্শনে ত্রাস

হিংস্র জন্তু দর্শনে নারীর মনে ত্রাসের সঞ্চার তো হতেই পারে ; এমন কি, ভ্রমর বা মধুমক্ষিকা দেখেও তাঁরা সন্ত্রস্ত হয়ে ওঠেন।

শ্রীকৃষ্ণ রাধাকে বললেন—প্রিয়ে ! তোমার কানে যে রক্তপদ্ম
হলছে, তার মধুপান করবার জন্য ভ্রমরেরা বাক্সার করে বেড়াচ্ছে।
সেই ভ্রাসে তুমি ব্যাকুলা হয়ে উঠেছ; তোমার ভ্রমরকৃষ্ণ আঁখি
ইতস্তত দৃষ্টিনিষ্ক্রেপ করছে। কিন্তু হে রাধে ! তোমার ওই ভ্রমরসদৃশ
শঙ্কিত আঁখির চঞ্চল দৃষ্টি আমার চিত্তে আনন্দ বিস্তার করছে। ৩১।

উগ্রমিশ্রন বা ভয়জনক শব্দহেতু ভ্রাস

মেঘের গুরুগম্ভীর শব্দে, বা অশ্ব কোন ভয়াবহ শব্দ শুনে,
নায়িকা সম্ভ্রান্ত হয়ে নায়কের হৃদয়লগ্না হয়। মেঘের গর্জনে ভীতা
হয়ে শ্রীরাধা মান পরিত্যাগ ক'রে বক্ষোলগ্না হয়েছিলেন বলে,
শ্রীকৃষ্ণ মেঘের বন্ধুকৃত্য স্বীকার করেছিলেন। ৩২।

আবেগ। ৩৩।

প্রিয়দৃষ্টি, প্রিয়শ্রুতি, অপ্ৰিয় দর্শন ও অপ্ৰিয় শ্রবণ থেকে
আবেগের সঞ্চার হয়। চিত্তের সম্ভ্রম হেতু কিংকর্তব্যবিমূঢ় হওয়াকে
আবেগ বলে।

প্রিয়দৃষ্টি বা প্রিয়দর্শনহেতু আবেগ বা চিত্তবিভ্রম

অনুরাগিণী শ্রীরাধা সখীকে বললেন—

‘জলধর স্নানর যুবা কোন নাগর আমার নিকটে দেখা দিল।

চঞ্চল নয়ন কোনে চাহিয়া আমার পানে ধৈর্য হরিয়া মোর নিল ॥’ ৩৪।

যথা ললিতমাধবে

—দ্বারকায় গিয়ে শ্রীকৃষ্ণ মধুমঙ্গলকে বলেছিলেন—সখা, তরু
সমীপবর্তিনী ললিতাকে চিনতে পেরে এবং সেখানে প্রকৃতিমধুরা
রাধার প্রতিকৃতি দেখে ও শঙ্খচূড়মণির পরিচয় পেয়ে, আমার
মুহুমুহুঃ ঘৃণা হতে লাগলো। ৩৫।

প্রিয়শ্রবণজনিত আবেগ—ললিতমাধবে

দূরাগত মুরলীধ্বনি শুনে নায়িকারা আবেগ-চঞ্চলা হয়ে ছুটে
চললেন। কারো এক পায়ে নূপুর, কারো বা কটিদেশ থেকে
মেখলা স্থলিত হয়ে পড়ে।

অপ্রিয়দর্শনে আবেগ

রথে আরোহণ করে শ্রীকৃষ্ণ মথুরার পথে যাত্রা করলেন। তাই দেখে, শ্রীমতী আবেগচঞ্চলা হয়ে রথাগ্রে ভুলুষ্ঠিতা হলেন। চোখের জলে তাঁর দৃষ্টি ঝাপসা হয়েছে। এই দৃশ্য দেখে শ্রীরাধার দেহমন রোদনের ভাৱে ভেঙ্গে পড়েছে বাষ্পাকুল নেত্রে শ্রীকৃষ্ণের দিকে চেয়ে আছেন।

অপ্রিয় শ্রবণজনিত আবেগ

কুন্দবল্লী নান্দীমুখীকে বললে—দেবি! মধুপুরী গমন সম্পর্কে ব্রজরাজের আদেশে দ্বারপাল যে ঘোষণা প্রচার করছেন, তা তো সামান্য নয়! এ ঘোষণা বজ্রের চেয়েও কঠিন ও নির্মম। এই ঘোষণা শুনে, আভীর-অঙ্গনাদের চিত্ত গভীর আবেগে আকুল ও কিংকর্তব্যবিমূঢ় হয়ে উঠেছে। ৩৬।

উন্মাদ বা চিন্তাবিভ্রম

অত্যন্ত আনন্দে বা বিরহে চিন্তে উন্মাদ ভাব উদ্ভূত হয়।

প্রোঢ়ানন্দ বা অত্যন্ত আনন্দে বিভ্রম

বৃন্দা বললেন—সখি! ওই দেখ, শ্রীকৃষ্ণকে দেখে শ্রীমতী উন্মাদ হয়ে প্রমদবিহ্বলা হয়ে উঠেছেন। ভ্রম বশতঃ ভ্রমরিকা দেখে, শ্রীমতী প্রিয়সখীজ্ঞানে তাকে বলছেন, ‘তুমি আমার প্রতি প্রসন্ন হও। আমায় আলিঙ্গন করবার জন্য যে নবযুবা আসছে, তাকে রোধ করো। ৩৭।

বিরহহেতু উন্মাদ—যথা

মথুরায় এসে উদ্ধব শ্রীকৃষ্ণের নিকটে শ্রীমতীর বিরহের অবস্থা বর্ণনা ক’রে বললেন—যত্নপতি! তোমার বিরহে অতিশয় উদ্ভণ্ডা হয়ে, রাধা লুলিতকেশে বিলুষ্ঠিতা হচ্ছেন। কখনো বা ক্রকুট ক’রে আঙ্গুল ফুটিয়ে, নিজের অধর দংশন করে, কংসকে অভিশাপ দিচ্ছেন।

কোথাও বা তমাল গাছ দেখে, উতরোল হয়ে সেই দিকে ছুটে চলেছেন। বিরহে তিনি উন্মাদিনী হয়েছেন। ৩৮।

অপস্মার

অতিশয় দুঃখে নায়িকার চিত্তের যে বৈকল্য এবং দেহের বৈগুণ্য ঘটে, তাকে অপস্মার (Epilepsy or Hysteria) বলে। ৩৯।

গভীর দুঃখ বা অবদমিত আকাজক্ষা থেকে তরুণী নায়িকার মূর্চ্ছা (Hysteria) বা মৃগী (Epilepsy) রোগের উৎপত্তি হয়।

যথা—

মথুরায় শ্রীকৃষ্ণের কাছে কোন ব্যক্তিকে দূতরূপে পাঠাবেন মনস্থ ক'রে ললিতা বললেন—তঁাকে ব'লো, কৃষ্ণ। তোমার বিরহে আমার প্রিয়সখীর কখনো অঙ্গবিক্ষেপ, কখনো উচ্চ প্রলাপ, কখনো বা চক্ষু-তারকা উদ্ভূত হ'চ্ছে। কখনো কখনো তিনি ফেনরাশি উদ্গীরণ করছেন। গুরুজনেরা তঁাকে এই রকম বিকারগ্রস্ত দেখে, জল্পনা-কল্পনা করছেন যে, তিনি অপস্মার রোগে আক্রান্ত হয়েছেন। ৪০।

ব্যাধি। ৪১।

যথা—রসসুধাকরে

শ্রীকৃষ্ণের নিকট শ্রীমতীর বিরহের কথা জানিয়ে সখী বললে— হে মাধব! তোমার বিরহে শ্রীমতীর এমন সম্ভাপজ্বর উপস্থিত হয়েছে যে, পুষ্পশয্যায় শয়ন করলেও তাঁর উত্তপ্ত অঙ্গের স্পর্শে পুষ্পদল শুষ্ক হয়ে চূর্ণিত পরাগরাশিতে পরিণত হ'চ্ছে। ব্যাজনের পদ্মপত্র তাঁর দেহের উত্তাপে স্নান হয়ে যাচ্ছে। স্তনমণ্ডলে বিলেপিত চন্দন ক্ষণকালের মধ্যেই শুষ্ক হয়ে বিদীর্ণ হ'চ্ছে। স্নানাতল পদ্ম-মৃণালের আভরণ অঙ্গে ধারণ করলে, দেহের উত্তাপে সেগুলি ঝলসে গিয়ে, অগ্রভাগ ফেনময় হয়ে উঠছে। ৪২।

মোহ

হর্ষ, বিরহ বা বিষাদ থেকে মোহের উৎপত্তি হয়।

হর্ষহেতু মোহ—

যথা—বিদগ্ধমাধবে

ললিতা ও বিশাখাকে শ্রীমতী বললেন—সখি। অর্ধপ্রক্ষুটিত নীলোৎপলকাস্তি শ্রীকৃষ্ণের নিবিড় করকমলম্পর্শে যখন কৌতুকে আমার দেহমন আলোড়িত হয়েছিল, আনন্দে মোহগ্রস্ত হয়ে আমি ভুলে গিয়েছিলাম যে—কোথায় আমি, কে আমি, কি করছি! কিছুই বুঝতে পারিনি।

‘নীলোৎপল জিনি বর্ণ সেই সে পুরুষরত্ন যবে মোরে পরশ করিল।

কিবা করি কোথা যাই কেবা আমি কোথা ঠাই সেই হতে সব পাশরিল॥’

যথা বা—মস্তাগবতদশমে

সমর্থার রতিবিষয়ে মোহ উপস্থিত হলেও এই রকম অবস্থার উদ্ভব হয়। দেবাজনারা বিমানযোগে আকাশ পথে বিচরণকালে, বনিতাচিন্তবিমোহন পরম রূপবান্ শ্রীকৃষ্ণকে দেখে এবং তাঁর মৃদু বংশীধ্বনি শুনে, মুগ্ধা ও কামোন্মত্তা হয়ে উঠেছিলেন। দেবতাদের অঙ্কে থেকেও তাঁদের ধৈর্যচূতি ঘটেছিল। তাঁদের কুসুম-কবরী শীতল হয়েছিল এবং নীবিবন্ধন স্থলিত হয়ে পড়েছিল।

বিল্লম্ব বা বিচ্ছেদহেতু মোহ

যথা—উদ্ধবসন্দেশে

উদ্ধব শ্রীকৃষ্ণকে জিজ্ঞাসা করলেন, ব্রজসুন্দরীদের মধ্যে শ্রীরাধাকে কেমন করে চিনবো?

উত্তরে শ্রীকৃষ্ণ বললেন—দেখবে সুন্দরীদের মধ্যে যিনি স্নানীতল কিসলয় শয্যায় শয়ন করে আছেন, সজল চোখে সখারা যঁার সেবা যত্ন করছে, বিচ্ছেদ-বেদনায় অঙ্গ অতিশয় কুশ হয়েছে, শুধুমাত্র কণ্ঠের স্পন্দন হেতু অনুমিত হচ্ছে যে, প্রাণবায়ু এখনো আছে, তিনিই বরাঙ্গিনী শ্রীরাধা। ৪৩।

বিষাদে মোহ—শ্রীমদ্ভাগবত দশমস্কন্ধে

অপরাহ্নে শ্রীকৃষ্ণ যখন বেণু বাজিয়ে ধেনুপাল নিয়ে সুবল ও অন্যান্য সখাদের সঙ্গে আনন্দবিভোর চিত্তে গোষ্ঠ হতে ফিরে আসেন, ব্রজের পথে গজেন্দ্রগমনে তাঁর চরণচিহ্ন অঙ্কিত হয়, তখন গোপাঙ্গনারা তাই দেখে নিশ্চল হয়ে দাড়িয়ে ভাবে—হায় ! আমরা সুবল ও অন্যান্য সখাদের মত ভাগ্য যদি পেতাম ! সতৃষ্ণ নয়নে চেয়ে থাকতে থাকতে তাদের চিত্ত উদ্বেলিত হয়ে ওঠে। তারা মোহগ্রস্তা হয়। তাদের কেশবন্ধন এলিয়ে পড়ে এবং অঙ্গের বসন জ্বলিত হয়। ৪৪।

মৃতি বা প্রাণভ্যাগ

মৃতি বলতে প্রকৃত মৃত্যুর কথা উল্লিখিত হলো না। মরণের উত্তম বা মরণ কামনার কথাই উল্লিখিত হয়েছে। সমর্থ্য, সমঞ্জস্য ও স্থায়ীভাবসম্পন্ন কৃষ্ণপ্রিয়াগণ নিত্যসিদ্ধা। তাদের মৃত্যু সম্ভব নয়। শুধু বিরহে, বিচ্ছেদে ও বিষাদে তারা মরণ কামনা করে ও মৃত্যুর আশ্রয় গ্রহণ ছাড়া গত্যন্তর নাই, ইত্যাদি মনোভাব প্রকাশ করে।

‘মরিব মরিব সই নিচয়ে মরিব।

পিয়ার বিচ্ছেদ আর সহিতে নারিব ॥

হিয়ার মাঝারে মোর রহি গেল দুখ।

মরণ সময়ে পিয়ার না দেখিলুঁ মুখ ॥

—গোবিন্দ দাস।

যথা—উদ্ধবসম্মেশে

শ্রীরাধা ললিতাকে বললেন—সুমুখি ! যতদিন গান্ধিনীতনয় অক্রুরের সংকল্প সুস্পষ্টভাবে না জানা যায়, ততদিন তোমার কাছে আমার এই প্রার্থনা যে, আমি যে-পুষ্পে শ্রীকৃষ্ণের কুণ্ডল তৈরি করতাম, অঙ্গনের সেই ফুলমালতীকে তুমি সযত্নে বাঁচিয়ে রেখো। আমি আর বাঁচবো না। ৪৬।

‘এই যে মালতীলতা যার পুষ্প নবপাতা গোবিন্দ পরিত নিজ কাণে।

তুমি তাথে করি প্রীতি জল দিও নিতিনিতি, আমি না বাঁচিব আর প্রাণে ॥’

আলস্য

কৃষ্ণপ্রিয়াগণের কৃষ্ণ সম্পর্কে কোন আলস্য সম্ভব নয়। কিন্তু অন্তরে কৃষ্ণপ্রেম অটুট থাকলেও, জটীলা প্রভৃতির ভয়ে নায়িকার ভঙ্গিমায় আলস্য সূচিত হতে পারে। জরতী বা জটীলা প্রভৃতির পক্ষে অবশ্য আলস্য সম্ভব।

যথা—

জটিলার আগমন বার্তা শুনে শ্রীরাধা ভয়ে আড়ষ্ট হয়েছিলেন। কিন্তু গোষ্ঠ থেকে রূপমঞ্জরী এসে বললে—কোনো ভয় নাই। তোমার শাশুড়ী নিরন্তর দধিমহ্নন ক'রে, শ্রাস্তি ভরে গা আড়ামোড়া দিয়ে, হাই তুলতে তুলতে মাটিতে শুয়ে পড়েছেন। সুতরাং আশঙ্কার কোন কারণ নাই। তুমি নিশ্চিন্ত মনে শ্রীকৃষ্ণের মাথায় চূড়া বাঁধতো পারো। ৪৭।

জাড্য

ইষ্ট এবং অনিষ্ট শ্রবণ বা দর্শন, অথবা বিরহ ইত্যাদি থেকে জাড্য বা জড়তার উৎপত্তি হয়।

যথা—ইষ্টশ্রবণ-হেতু

কুন্দবল্লী নান্দীমুখীকে বললে,—দেবি! পুরদ্বারে শ্রীকৃষ্ণের নৃপুরুষনি শুনে, মনোরমা শ্রীরাধা সম্ভ্রমবতী হয়ে বেরিয়ে যেতে গিয়েও যেতে পারলেন না। নিমীলিত নেত্রে জড় পদার্থের মত নিশ্চল হয়ে রইলেন। ৪৮।

‘হরির নৃপুরুষদ্বারে বাজিছে তাহা শুনি শশিমুখী।

চলে যেতে চাহে চলিতে না পারে মনে হলো বড় দুখী ॥’

অনিষ্টশ্রবণ-হেতু—ললিতমাধবে

পৌর্ণমাসী খেদের সঙ্গে বললেন—চন্দ্রাবলি! শ্রীকৃষ্ণ আজ মথুরায় চলে যাচ্ছেন। এখন তুমি মালা গাঁথবার জন্ম ব্যস্ত হয়েছ!

এই কথা শুনে, চন্দ্রাবলীর পদ্যহস্ত থেকে অর্ধ-প্রথিত মালা স্থলিত হয়ে পড়লো : ‘হায় আমার অদৃষ্ট !’ চন্দ্রাবলীর সংজ্ঞা যেন মুহূর্তে কেমন আচ্ছন্ন হয়ে এলো। সত্যই তার দশান্তর ঘটলো ; আসন্ন বিচ্ছেদের কথা শুনে সে নিদারুণ জড়তা প্রাপ্ত হলো। ৪২।

ইষ্ট দর্শন বা অনিষ্ট দর্শনেও নায়িকার একরম জড়তা উপস্থিত হয়ে থাকে। গোপবালারা শ্রীকৃষ্ণের সঙ্গে মিলিত হ’লে, কত অভিনব নর্মবাক্যে আনন্দ বিস্তার করে। তারা ধন্য। কিন্তু হায় ! রাধা শ্রীকৃষ্ণকে সামনে দেখে, কেমন যেন জড় ও নিষ্পন্দাঙ্গী হয়ে যান।

বৃন্দা পৌর্ণমাসীকে বললেন—দেবি ! আজ বনের মধ্যে শ্রীরাধা যখন বিহার করছিলেন, হঠাৎ দূরে ক্রুদ্ধ অভিমুখ্যকে দেখে তিনি স্তম্ভিতা ও জড়পদার্থের মত নিশ্চল হয়েছিলেন। ৫০—৫১।

বিরহহেতু জাড্য

বিশ্রলকা শ্রীরাধার বিরহের কথা শ্রীকৃষ্ণকে জানিয়ে, বৃন্দা বলেছিলেন—হে মুরারি, যদিও আত্মীয়স্বজনের অনুরোধে শ্রীমতী তাপুল হাতে নিয়েছিলেন, তবুও বিরহে তাঁর অন্তর এমন জড় ও মুহমান হয়েছিল যে, সে তাপুল তিনি মুখে দিতেও ভুলে গিয়েছিলেন। নাগবল্লী কিশলয় যেমনকার তেমনি তাঁর হাতে ছিল। মুখের গুবাক মুখেই ছিল, চিবানো হয় নি। ৫২।

ব্রীড়া বা লজ্জা

নবসঙ্গম দশা, অকার্য ও স্ততি—এই তিনটি কারণে নায়িকার লজ্জার উদ্ভব হয়।

নবসঙ্গম-হেতু লজ্জা

শ্রীকৃষ্ণ সুবলকে বললেন—প্রথম মিলনের দিন শ্রীমতীকে যখন বললাম যে, এসো, পুষ্পশয্যায় শয়ন করো। শ্রীমতী লজ্জায় অধোমুখী হয়ে দাঁড়িয়ে রইলেন। বললাম যে, এই অনুগত জন

বারবার প্রার্থনা করছে, প্রসন্ন হও। কিন্তু এই স্তুতিবাক্যের সঙ্গে অভ্যর্থনা করা সম্বন্ধেও শ্রীমতী নিকুঞ্জলক্ষ্মীর মত লজ্জাবনতমুখী হয়ে দ্বারদেশে দাঁড়িয়ে রইলেন। ৫৩।

‘কুম্ভ শয়নে বসিয়া আসি দ্বারে দাঁড়িয়ে কেন।
বিনয় করিয়া রাধিকারে আমি ডাকিলাম পুনঃপুনঃ ॥
আধোমুখ হঞা তবহি রহিলা কিছুই না কহে লাজে।
নিকুঞ্জদেবতা আপনি যেমন দাঁড়িয়ে দ্বার মাঝে ॥’

অকার্য-হেতু লজ্জা

মালতী নাম্নী কোন গোপিনী জোর ক’রে শ্রীকৃষ্ণের কণ্ঠহার কেড়ে নিয়ে গলায় পরেছিল। মালতীর মাতামহী তার কণ্ঠে সেই হার দেখে বলেছিলেন—বা বেশ! বিস্তার্ত্তনে বেশ পটীয়সী হয়েছ দেখছি।

এই তিরস্কার শুনে, মালতী তার কণ্ঠস্থিত মণিহারের দিকে চেয়ে লজ্জায় অধোমুখী হয়েছিল। ৫৪।

নিশীথ অঘটনে বা অপ্রত্যাশিত ও অবাঞ্ছিত ক্ষেত্রে নবসঙ্গম বা তজ্জনিত অকার্য হেতু, নিশাবসানে নায়ক ও নায়িকা লজ্জায় কেউ কারো মুখপানে চাইতে পারে না।

প্রশংসা বা স্তব-হেতু লজ্জা

পৌর্ণমাসী গার্গীর নিকট শ্রীরাধার মাহাত্ম্য বর্ণনা করছিলেন, এমন সময় হঠাৎ শ্রীমতী সেখানে গিয়ে উপস্থিত হলেন। নিজের প্রশংসা শুনে, শ্রীরাধা লজ্জায় নতমুখী হলেন।

শ্রীরাধার এই অবস্থা দেখে, বৃন্দা বললেন—লজ্জার কি আছে! যা বলছে, তা তো মিথ্যা নয়। সত্যি কথা শুনে সঙ্কুচিত হচ্ছ কেন? তোমার কীর্ত্তি-কৌমুদীতে জগৎ সমুজ্জল। তাই শ্রীকৃষ্ণের বৃকে তুমি অক্ষয় জ্যোৎস্নারশির মত উদ্ভাসিত হয়ে আছো। ৫৫।

অবজ্ঞা-হেতু লজ্জা—গীতগোবিন্দে

অশ্রু কোন প্রিয়ার সঙ্গে নিশা যাপন কালে তার পায়ের আলতার দাগ শ্রীকৃষ্ণের বুকে লেগেছিল। তাই দেখে শ্রীরাধার মনে প্রণয়ভঙ্গের জন্ম শ্রীকৃষ্ণের প্রতি অবজ্ঞা সঞ্চারিত হলেও তিনি বলেছিলেন—হৃদয়ে যে তোমার প্রিয়তমার পায়ের আলতা লেগে অমুরাগের রঙ ফুটে উঠেছে! আশ্চর্য! দেখে আমার শোকের চেয়ে লজ্জাই বেশী হচ্ছে। নায়কের সঙ্গে অশ্রু নারীর পায়ের আলতার দাগ দেখে, নায়িকার মনে বিতৃষ্ণা, বেদনা ও অবজ্ঞার সঞ্চার হওয়াই স্বাভাবিক। কিন্তু এক্ষেত্রে তা না হয়ে, নায়িকার মনে লজ্জার সঞ্চার হচ্ছে। ৫৬।

অবহিঁখা বা আকার গোপন। ৫৭।

নায়ক বা নায়িকা ক্ষেত্রবিশেষে মনোগত ভাবের বহিঃপ্রকাশ গোপন করে থাকেন। এই আত্মগোপন করাকে অবহিঁখা বলে। অবহিঁখা নানা কারণে ঘটে থাকে। কুটিলতা (Shrewdness), লজ্জা, দাক্ষিণ্য, (Courtesy), ভয় ও গৌরব-দাক্ষিণ্য (Sense of prestige or dignity) ইত্যাদি নানাকারণে নায়ক-নায়িকারা অনেক সময় মনোগত ভাব গোপন করে থাকেন।

জৈম্য বা কাপট্যে যথা—জগন্নাথবল্লভ নাটকে

শশিমুখীর মুখপদ্মনিঃসৃত মধুর বাক্য শুনে, শ্রীকৃষ্ণ মত্তপ্রায় হয়ে মস্তক আন্দোলিত করতে লাগলেন এবং মদনাবেশে অভিভূত হলেন। কিন্তু হৃদয়ের সেই বিকার গোপন ক'রে, হাসিমুখে বললেন—এ কি রকম কথা হলো? । ৫৮।

জৈম্য বা কাপট্য ও লজ্জায় অবহিঁখা

যথা—উদ্ধবসম্মেশে

শ্রীকৃষ্ণের বর্ণনা শুনে, শ্যামলার দেহ রোমাঞ্চিত হয়ে উঠলো।

সখীর সামনে লজ্জা পেয়ে, সে পুলকের কথা গোপন ক'রে, শীতের কথা বললে।

‘সেই ব্রজরাজপুত্র কালিন্দীতীরের ধৃত তার বার্তা না কহ আমারে।

এ যে নাচে রোমচয়, এ মোর পুলক নয়, হিমের পবনে শীত করে ॥’

দাক্ষিণ্যে যথা—ললিতমাধবে

শ্রীকৃষ্ণ মধুমঙ্গলকে বললেন—চন্দ্রাবলী ক্রুদ্ধা হলেও তার মুখচন্দ্র থেকে স্নিগ্ধ জ্যোতি লুপ্ত হয় না। দাক্ষিণ্য (courtesy) হেতু সে কখনো মধুর বাক্য পরিত্যাগ করে না। কিন্তু তার ছুনিবার মনোব্যথা ও রোষ প্রকাশ পায় উষ্ণ নিঃশ্বাসে এবং কাঁচুলির মৃদু কম্পনে।

গৌরব-দাক্ষিণ্য বা মর্যাদাবোধ-হেতু উদ্ভ্রম নায়িকা অনেক সময় মনোগত উষ্ণ, রাগ, দ্বেষ প্রভৃতি প্রকাশ না ক'রে, মনেই আছতি দেন।

হ্রী বা লজ্জা-হেতু অবহিখা যথা—বিদগ্ধমাধবে

অধীরা রাধা সর্বদাই নবনব আনন্দোচ্ছ্বাসে অত্যন্ত মধুরা। কালিন্দীতীরে শ্রীকৃষ্ণের তর্জনগর্জন সকল তিনি অতিকষ্টে গোপন করবার চেষ্টা করেন, বান্ধবীদের নিকট লজ্জায় তিনি কখনই সে মনোবেদনা প্রকাশ করেন না। যদিও তাঁর তনুবনের হৃদয়কুঞ্জে কৃষ্ণের সেই বিজয়ক্রিয়া সুস্পষ্টরূপে প্রকাশ পায়। ৫৯।

এখানে আকার গোপনের কারণ লজ্জা ব'লে উল্লিখিত হলেও, শ্রীরাধার মর্যাদাসম্পন্ন প্রকৃতি এবং শালীনতা-বোধই তাঁকে আত্মপ্রকাশে অধিকতঃ নিরস্ত করে। শ্রীরাধার মত উদ্ভ্রম ও সর্বশূণ্য সম্পন্ন নায়িকা কখনো অশ্রের কাছে নিজের মর্যাদা বা গৌরব ক্ষুণ্ণ করতে পারেন না। তাই শ্রীকৃষ্ণের তিরস্কারে তাঁর অন্তররাজ্যে বিপ্লব ঘটে গেলেও, বাহ্যতঃ তার প্রকাশ কোনদিন হয় না। শ্রীমতীর

স্বাভাবিক প্রকল্পতা অপরাপর গোপাঙ্গনার নিকট সমানভাবে বজায় থাকে।

লজ্জা ও ভয়হেতু অবহিখা

যথা—

শ্রীকৃষ্ণের নিকট এসে শ্রীমতীর দূতী বললে—মাধব! শ্রীরাধা হৃদয়ে তোমার প্রতি অনুরাগ বহন করেন; তাই শমীকৃষ্ণের অন্তরে দাহ থাকা সত্ত্বেও বাহিরে যেমন সবুজ পত্রপল্লব শোভিত হয়, তিনিও তেমনি স্নিগ্ধ সুষমামণ্ডিত হয়ে থাকেন; লজ্জায় ও প্রণয়বিস্ত্রভয়ে কদাচ অন্তরের জ্বালা তিনি বাহ্যতঃ প্রকাশ করেন না। ক্ষমাগুণে শ্রীমতী সর্বদাই সরস। ও স্মৃতিযুক্ত হয়ে থাকেন। ৬০।

ভয়হেতু অবহিখা

যথা—

ললিতার কোন সখী চন্দ্রাবলীর চরিত্রের কথা শুনে, সখীদের সামনে বললে যে, চন্দ্রাবলী তার স্বামীর সম্মুখে গৃহসজ্জায় রত ছিল। হঠাৎ কৃষ্ণের মুরলীধ্বনি শুনে, তার সারাদেহ কেঁপে উঠেছিল। পাছে সে-অবস্থা স্বামীর চোখে পড়ে এই ভয়ে, তাড়াতাড়ি অবহিখাপূর্বক আকাশে গর্জিত মেঘের প্রতি দোষারোপ করে ধূর্ততার সঙ্গে সে দেহকম্পনের কারণ গোপন করেছিল।

গৌরব এবং দাক্ষিণ্য-হেতু অবহিখা বা আকার-গোপন।

যথা—

চন্দ্রমুখীর কোন এক সখীকে বৃন্দা বলেছিলেন—সুন্দরি! তোমার প্রিয়সখী তাঁর স্বহস্তগ্রথিত পুষ্পমালায় প্রতিপক্ষীয় রমণীর কেশপাশে দোহুল্যমান দেখে; যদিও অত্যন্ত ব্যথিতা ও বিষণ্ণ হয়েছিলেন, তবুও তিনি শ্রীকৃষ্ণের প্রতি প্রণয়াদরের জগু মনের ক্রোভ সংবরণ করে, তুষীভাব অবলম্বন করেছিলেন। গৌরব

(dignity) এবং দাক্ষিণ্য (courtesy) বজায় রাখবার জন্ত তিনি মনের ক্ষোভ প্রকাশ করেন নি। ৬১।

উক্তমা নায়িকা অনেক সময় নিজের ও দয়িতের শালীনতা এবং গৌরব রক্ষার জন্ত মনোগত বেদনা ও ক্ষোভ নীরবে বহন করেন, বাহ্যতঃ প্রকাশ করেন না।

স্মৃতি

পূর্ব অমুভূত ও জ্ঞাত বস্তুর বা বিষয়ের পুনরায় মানসিক স্মৃতির নাম স্মৃতি (Memory)।

‘সাদৃশ্যের দরশন আর দৃঢ়াভ্যাস।

ইহাতেই হয় চিত্তে স্মৃতির প্রকাশ ॥

সাদৃশ্য দর্শন (Law of Association or Similarity) এবং দৃঢ় অভ্যাস (Repetition of Perception)-হেতু স্মৃতির স্মৃতি হয়।

সাদৃশ্য-দর্শনে স্মৃতি যথা—হংসদূতে

মথুরা-গমনোচ্ছত হংসরূপী দূতকে সম্বোধন করে ললিতা বললেন—
হে বিহঙ্গ! তমালবৃক্ষ দেখে, গোপাঙ্গনাদের স্মৃতিপটে শ্রীকৃষ্ণের
কথা জেগে উঠেছে। সেই স্মৃতিতে চিত্ত আলোড়িত হওয়ায়, সে
চপলারা উত্তপ্ত দেহে গিরিপরিসরে অবস্থান করছে। যাবার পথে,
তুমি যমুনার জলকণাসিক্ত তোমার ওই সুশীতল পক্ষের ধীর ব্যঞ্জে
তাদের স্বেদকণা অপনোদিত করে। ৬২।

দৃঢ় অভ্যাসহেতু স্মৃতি

একই বস্তু বা বিষয় পুনঃপুনঃ দর্শন, শ্রবণ ও স্পর্শ হেতু স্মৃতিপটে
গভীর রেখাপাত করে। এইভাবে জাত স্মৃতিকে দৃঢ়-অভ্যাসজাত
স্মৃতি বলা হয়। দৃঢ়-অভ্যাসজাত স্মৃতি যখন-তখন কারণ ব্যতীতও
মানসলোকে উদ্ভিত হতে পারে। এই প্রকার দৃঢ় অভ্যাস থেকে

সংশ্লিষ্ট বস্তু বা উপলক্ষ্য সম্পর্কেও মনের স্মৃতি-সংসর্গ ঘটে (Condition Reflex)।

যথা—

প্রোষিতভর্তৃকা শ্রীরাধা বিলাপের সঙ্গে উদ্ধবকে বললেন—
শ্রীকৃষ্ণের সেই অমৃতস্রাবী বাক্য, অঙ্গ পরিমল, সেই ময়ূরপুচ্ছের
উজ্জল চূড়া, সেই তমালসদৃশ তল্লুরুচি, সেই কেলিকৌশল সকল
এবং শরদিন্দুনিন্দী শ্বেতপদ্মসদৃশ নয়নদুটি ক্ষণকালের নিমিত্তও
আমার চিত্ত বিস্মৃত হতে পারে না। সেগুলি আমার মানসলোকে
অবরহ জেগে ওঠে। ৬৩।

উল্লিখিত বস্তুগুলির মধ্যে যে-কোন একটি দেখলেই শ্রীকৃষ্ণের
কথা মনে হয়। কোথাও কোন বংশীধ্বনি শুনলেই শ্রীকৃষ্ণের উপস্থিতি
অনুভূত হয়। এগুলিকে সংস্পর্শ-স্মৃতি বলা চলে।

বিতর্ক। ৬৪।

বিতর্ক দ্বিবিধ

প্রথম, ‘বিমর্শ’ বা কারণ অন্বেষণের নিমিত্ত বিতর্ক এবং দ্বিতীয়,
‘সংশয়’হেতু বিতর্ক অর্থাৎ কেন এমন হলো, সেটা জানবার জ্ঞান;
অথবা কোন বিষয়ে সংশয় হলে, তার সমাধানের জ্ঞান মনে যে
বিতর্ক সমুপস্থিত হয়।

বিমর্শহেতু বিতর্ক

যথা—

আনুযজ্ঞিক কতকগুলি কারণের উপস্থিতিতে শ্রীরাধার মনে
বিতর্কের সৃষ্টি হলো—

‘ভৃঙ্গ সব ঘুরেফিরে মধুপান নাহি করে জাড্যে শুক দাড়িষ না থায়।

বিবর্ণা হরিণীগণ চমকিত ছনয়ন তৃণপানে ফিরিয়া না চায় ॥

বিতর্ক জাগিছে মনে হয়ত বা এইবনে রহিয়াছে ইহার কারণ।

গজেন্দ্র জিনিয়া গতি বুঝি সেই ব্রজপতি এই পথে করেছে গমন ॥’

‘ব্যাগ্ৰহরণরूपो विचारः पूर्वपूर्वामुत्तवाৎ’। পূর্বপূর্ব অনুভূতি থেকে শ্রীমতীর মনে যে বিতর্কের উদ্ভব হয়েছে, তাই থেকে তিনি বিচার করছেন যে, শ্রীকৃষ্ণ এই বনেই আছেন এবং এই পথে বন-মধ্য প্রবেশ করেছেন। ৬৫।

সংশয়হেতু পক্ষদ্বয়ের রহস্য উদ্ঘাটন করতে না পারলে, মনে বিতর্কের সৃষ্টি হয়।

যথা—ললিতমাধবে। ৬৬।

প্রোষিতভর্তৃকা শ্রীরাধা ভ্রমণ করতে করতে শৈলশিখরে মেঘ পুঞ্জীভূত দেখে, মনে মনে বিতর্ক ক’রে বললেন—অহো! শিখি-পুচ্ছধারী শ্রীকৃষ্ণ নিশ্চয়ই গৌরাজিনীদের আলিঙ্গনবদ্ধ হয়ে ওই দূরে বিলাস করছেন। অথবা, হয়তো শ্রীকৃষ্ণ নন, বিদ্যাদাম-শোভিত মেঘমালা গিরিশিখর আশ্রয় করে আছে।

এখানে একই গুণধর্মবিশিষ্ট দুটি বস্তুর মধ্যে কোনটি সত্য, সে বিষয়ে মনে সংশয়ের উৎপত্তি হওয়ায়, বিতর্কের উদ্ভব হচ্ছে। বিদ্যুৎ শোভিত জলধর ও সুন্দরী-আলিঙ্গিত শ্রীকৃষ্ণ উপমাগতভাবে একই রূপে প্রতিবিম্বিত হওয়ায়, বিদ্যুৎশোভিত মেঘ দেখে, গৌরাজী-আলিঙ্গিত শ্রীকৃষ্ণ বলে ভ্রম হচ্ছে এবং সেইহেতু সংশয়ের উৎপত্তি হচ্ছে (Error due to Similarity of objects)। এমত অবস্থাতেই ত্রাস্তি বা বিবর্তভেদ (Error or Illusion) ঘটে। মনে যতক্ষণ এই অনুভূতি সংশয়ের পর্যায়ে থাকে, ততক্ষণ ভ্রষ্টার কারণ-অন্বেষণের সচেতনতা বিद्यমান থাকে; সেই জন্য মনে বিতর্কের সৃষ্টি হয়।

চিন্তা

ইষ্ট বা আকাঙ্ক্ষিত বস্তুর অপ্রাপ্তি এবং অনিষ্টের আশঙ্কা থেকে মনে চিন্তা বা ভাবনার উদয় হয়। ৬৭।

ইষ্টের অলাভ-হেতু চিন্তা

যথা—পত্নাবলীতে

কেমন করে শ্রীকৃষ্ণের সঙ্গলাভ হবে, এই কথা পূর্বরাগবতী শ্রীরাধা ভাবছিলেন। তাই দেখে, বিশাখা তাঁকে জিজ্ঞেস করলেন—সখি ! আহারে তোমার বিরতি, কোন কাজেই মন নাই, না সাগ্রে দৃষ্টি নিবদ্ধ, একাগ্র মন মৌন হয়ে আছে, বিশ্ব যেন তোমার কাছে শূন্য। কি হলো তোমার ? তুমি কি যোগিনী, না বিয়োগিনী ? কি, তাই সত্যি করে বলো।

যথা বা—বিদগ্ধমাধবে

পূর্বরাগাধিত শ্রীকৃষ্ণ যেন ধ্যানমগ্ন হয়ে চিন্তা করছিলেন, কেমন করে শ্রীরাধার সঙ্গলাভ হবে ! তাঁর সেই অবস্থা দেখে পৌর্ণমাসী বললেন—

‘গোবিন্দের হুই আঁখি অধিক চঞ্চল দেখি নিঃশ্বাস বহিছে খরতরি।

কেমন বা সে রমণী বশ কৈল ব্রজমণি, তাহাকেই চিন্তা করে হরি ॥’

মুরারির নেত্রদ্বয় ঘূর্ণিত হচ্ছে। দীর্ঘশ্বাসে মল্লিকা-মালা শ্লান হচ্ছে। এই গোকুলে কে সে এমন ধন্য রমণী, যার জন্ম স্বয়ং মুরারি ধ্যাননিষ্ঠ হলেন ?। ৬৮।

অনিষ্ট প্রাপ্তি-হেতু চিন্তা

যথা—

নান্দীমুখী পৌর্ণমাসীকে বললেন—দেবি ! বাল্য চলে গেলে যেমন শ্রীরাধার অঙ্গে মধুর সৌন্দর্যরাশি দীপ্ত হতে লাগলো, তেমনি পদ্মার মুখপদ্ম মধুকরের অন্তরে খেদ সৃষ্টি ক’রে, বিশীর্ণ হতে লাগলো। শ্রীরাধার সৌন্দর্য-বিকাশ পদ্মার মনে অনিষ্টের ছায়াপাত করলো। তার ইষ্টলাভের পথে নিদারুণ অন্তরায় হলো শ্রীমতীর যৌবন সমাগম। তাই অনিষ্ট আশঙ্কায় পদ্মার মনে চিন্তাক্রোধ উপস্থিত হলো। ৬৯।

যথা বা—

চন্দ্রাবলীকে চিন্তাক্রিষ্টা দেখে, সারী বললে—অয়ি চন্দ্রাবলি !
শ্রীরাধার সৌভাগ্য দেখে বিষণ্ণা হয়ো না। চিন্তা কি ! জ্যোতি-
বিদেরা জানেন যে, কৃষ্ণপক্ষে তারাই বলবতী হয়। অতএব এত
দুঃখিত হওয়ার কারণ নাই। পক্ষান্তর হলে, আবার ইষ্টপ্রাপ্তির
সম্ভাবনা আছে। ৭০।

মতি

বিচারজনিত অর্থনির্ধারণ বা মননকে মতি বলে। ৭১।

যথা—পদ্মাবলীতে

মাথুর বিরহে বিশীর্ণাক্ষী শ্রীরাধাকে দেখে, পৌর্ণমাসী সন্মুখে
বলেছিলেন—বৎসে ! কৃষ্ণের অদর্শনে তুমি মর্মান্বিত হয়ে আছো।
আমি উপদেশ দিচ্ছি, যতদিন শ্রীকৃষ্ণ না আসেন, ততদিন তুমি
নারায়ণে মনোনিবেশ ক’রে দুস্তর সময় অতিবাহন কর।

শ্রীরাধা বললেন—(শ্রীমদ্ভাগবতের মুখপদ্মনিসৃত)

‘আলিঙ্গন করি মোরে চরণে ঠেলুন দূরে, কিম্বা মারুন মর্মান্বিত করি।

যা করু তা করু সেই মোর মনে আর নেই, কেবল প্রাণনাথ মোর হরি ॥’

ভালোমন্দ বিচার ক’রে শ্রীরাধার মতি একমাত্র শ্রীকৃষ্ণেই
অর্পিত হয়েছে তাই তিনি পৌর্ণমাসীকে বললেন—প্রিয়তমের যা
অভিক্রুচি, তাই বিধান করুন। তিনি যে আমার প্রাণনাথ !
অপর কেউ নন। ৭২।

সমস্তসার উদাহরণ

যথা বা—

শ্রীকৃষ্ণের নিকট সুনন্দনামক বিপ্রকে পাঠিয়ে কুশিনীজানালেন-
হে পরমপুরুষ ! দেববন্দিত শিব-ব্রহ্মাদি যখন তোমার চরনপদ্মের
উপাসনা করেন, তখন আর অল্পপুণ্য নৃপতিদের কথা কি বলবো।
হে জগৎপতে ! তুমি মাধুর্যের সাগর, আমার মত কোন্ কণ্ঠাজন
তোমার চরণে দাসী হতে না চায় !। ৭৩।

মুতি

মনের স্বেচ্ছ সম্পাদনের নাম মুতি । ৭৪ ।

দুঃখের অভাব এবং উত্তম-প্রাপ্তি থেকে মনের পূর্ণতা হয় । এ অবস্থায় মন অচঞ্চল হয় । মনের এই অচঞ্চল অবস্থার নাম মুতি ।

দুঃখাভাব-হেতু মুতি

যথা—শ্রীমদ্ভাগবত দশমে

‘ভূনিয়া কৃষ্ণের নাম উল্লাস করায় প্রাণ খলবল করয়ে অন্তর ।
তথাপি না দুঃখ করে অচঞ্চল ধৈর্যধরে স্নগস্তীর রাই কলেবর ॥’

উত্তমপ্রাপ্তি-হেতু মুতি

যথা—

পদ্মার প্রতি বিশাখার উক্তি :

‘মৃগীদশা গুণশ্রেণী নবীন যৌবন ধনি সৌদামিনী জিনিয়া কিরণ ।
গম্য যেন স্নগাস্তীর্ধ্য অচঞ্চল স্থির ধৈর্য্য সদা কৃষ্ণগত রাধামন ॥’

কি কামনায় শ্রীরাধা প্রত্যহ দেবপূজায় যত্নবতী হন, একথা পদ্মা জিজ্ঞেস করলে, বিশাখা বলেছিল—পৃথিবীতে শ্রীরাধার আর কি কাম্য আছে ! তাঁর নবযৌবনমঞ্জরী নিত্য স্থিরভাবে বিরাজ করছে : রূপ এত অপরূপ যে, মৃগনয়না গোপাঙ্গনারা সে রূপ দেখে বিস্মিতা হয়েছে ; গুণরাশি এমন অত্যাশ্চর্য যে, ত্রিলোকে তৎতুল্য গুণ আর কারো নাই । অধিক কি, পুরুষোত্তম শ্রীকৃষ্ণ স্বয়ং শ্রীরাধার প্রতি আসক্ত-চিন্ত হয়ে অশ্রু কোন কাস্তার স্পৃহা একেবারেই পরিত্যাগ করেছেন । অতএব শ্রীরাধা কৃষ্ণ ব্যতীত আর কি কামনা করবেন ! । ৭৬ ।

হর্ষ । ৭৭ ।

অভীষ্ট দর্শন ও অভীষ্টলাভ থেকে হর্ষের উৎপত্তি হয় ।

অভীষ্ট দর্শন-নিমিত্ত হর্ষ

যথা—শ্রীমদ্ভাগবত দশমে

শুকদেব বললেন—হে রাজন্! সেই প্রিয়তম শ্রীকৃষ্ণকে আসতে দেখে, অবলাগণের নয়ন আনন্দে উৎফুল্ল হয়ে উঠলো। দেহে প্রাণসঞ্চারিত হলে যেমন হাত-পা ও অঙ্গ-প্রত্যঙ্গাদি হর্ষে উদ্বেলিত হয়, তেমনি আনন্দ-উদ্বেলিত চিত্তে তাঁরা সকলে উঠে বসলেন। ৭৮।

যথা বা—ললিতমাধবে

শ্রীরাধা ললিতাকে বললেন—সখি! ইনি কি সেই গোপিকা কুমুদিনীদের বিকাশকারী চন্দ্র, না গোকুল-যৌবনরাজ্যের মূর্তিমান উৎসব! অথবা আমার মানস কোকিলের আনন্দবিধায়ক বসন্ত ঋতু? কেন না, হে কৃশোদরি! ইনি আমার হৃদয়নে অমৃত-তরঙ্গ সঞ্চারিত করছেন। ৭৯।

অভীষ্টলাভ-হেতু হর্ষ

যথা—ললিতমাধবে

শ্রীরাধার আনন্দবিভোর অবস্থা বর্ণনা ক'রে নববৃন্দা বললেন—

‘রাই যব শ্রামর ও মুখ হেরই সুখসায়র আসি অঙ্গহি ভরই।

আখি উপেখি কতহি কত কহই নাগর পেখনে নিমেষ কি সহই ॥

সহজে ছুটি আখি সো বিহি করই শ্রাম ত্রিভঙ্গ রূপহি নাহি ধরই।

এতই কহই ধনি সুখে তম্বু ভরই হরষ সরস রস মাধব রচই ॥’

শ্রীমতীর নয়ন অশ্রুপূর্ণ হলো, ভুজবল্লরী স্তম্ভিত হলো, আলিঙ্গন করতে পারলেন না; বাক্য গদগদ হলো, মুখে উত্তর যোগাল না। মহামিলনের ক্ষণ উপস্থিত হলে, কুরঙ্গনয়নার প্রণয়বৃত্তিই তাঁর প্রেমের বিপ্লবকারক হলো। ৮০।

ঔৎসুক্য

ইষ্টদর্শন ও ইষ্টপ্রাপ্তির স্পৃহায় উৎসাহের সঙ্গে কাল যাপন করাকে ঔৎসুক্য বলে।

ইষ্টদর্শনের স্পৃহাহেতু উৎসুক্য

যথা—হংসদূতে

শ্রীকৃষ্ণ মথুরায় প্রবেশ করছেন শুনে, পুরাঙ্গনা তাঁর পরিচারিকাকে বললেন—মুঞ্চে! ক্ষ্যাস্ত হও, আর বেশরচনার দরকার নাই। আমি যাই। সখি, ওই শোন, অলিন্দে পুরবালাদের কলরব উঠছে! বন্দাবন-পুষ্পধন্বা এসেছেন। আমি আর অপেক্ষা করতে পারি না। দক্ষিণপদে অলঙ্কর না দেওয়া হয়, না হোক।

ইষ্টপ্রাপ্তির স্পৃহাহেতু উৎসুক্য

যথা—গীতগোবিন্দে । ৮১।

হে মাধব! তোমার আগমন প্রতীক্ষায় বাসকসজ্জা শ্রীরাধা অঙ্গে নানা আভরণ ধারণ করেছেন। গাছের পাতা নড়লে, মনে করছেন—তুমি বুঝি এলে! উৎসুক হয়ে, কখনো শয্যা রচনা করছেন, কখনো বা চিন্তায় কাল যাপন করছেন। সেই লীলাময়ী কোনক্রমেই তোমা বিহনে রাত্রিযাপন করতে পারবেন না।

যথা বা—

‘আজু আওব যব নাগর রসিয়া । মান করি হাম রব মুখ কিরিয়া ॥
সো যব আদরে হেরব নয়নে । তাহে নাহি হেরব, হেরব গহনে ॥
যবহ কোরে মঝু লেওব শ্রাম । হোই সমুখ মুখ চুষব হাম ॥
যো বোল বোলব বদনহি বদনে । মাধবে সাধব সাধব নিজনে ॥’

ওগ্র্য বা উগ্রতা

নায়ক-নায়িকাদের পরস্পরের প্রতি উগ্রতা প্রণয়াস্বদনের সাক্ষাৎ অঙ্গ বলে পরিগণিত নয়। তবে জটীলা প্রভৃতি বর্ষীয়সীদের ক্ষেত্রে উগ্রতা প্রযোজিত হয়েছে। কেন না, সে ক্ষেত্রে উগ্রতা নায়ক-নায়িকার প্রণয়-পরিপন্থী হয়, এবং মিলনে দুর্লভত্ব সৃষ্টি করে। মিলনের পথে বাধা এবং লাঞ্ছনাভীতি থাকলে, প্রণয়-রসাস্বাদনের মাধুর্য বৃদ্ধি হয় ও স্থায়ীভাবে পুষ্টি সাধিত হয়। ৮২।

যথা—বিদগ্ধমাধবে

একদিন শ্রীকৃষ্ণ মানভঞ্জনের জন্ত শ্রীরাধার নিকট গিয়ে সাধ্য-সাধনা করছিলেন ; সেই সময় এক মুখরা বর্ষীয়সী এসে সেখানে উপস্থিত হয়ে বললেন—কানাই, এরা সব মেয়েছেলে। এদের মাঝখানে তোমার থাকা উচিত নয়। তুমি এখান থেকে যাও।

তবুও শ্রীকৃষ্ণ সেখানে থেকে যাচ্ছেন না দেখে, বৃদ্ধা উগ্রতার সঙ্গে বললেন—ওরে চঞ্চল ! তোর ধর্মভয় নাই ? আমার নাতনীরা অতি নবীনা। আমার বয়স হয়েছে, এই দ্বিপ্রহর বেলাতেও ভালো ক'রে চোখে দেখি না। তুমি যদি আমার প্রাজ্ঞন থেকে না যাও, তা হলে এখনই আমি মহারাজ কংসের নিকট থেকে অশ্বারোহী আনিয়ে, তোমার সমুচিত শাস্তি বিধান করবো। ৮৩।

অমর্ষ

অধিক্ষেপ বা অপমান-হেতু অসহিষ্ণুতাকে অমর্ষ বলে। ৮৪।

অধিক্ষেপ-হেতু অমর্ষ

যথা—শ্রীমদ্ভাগবত দশমে

শ্রীকৃষ্ণের পরিহাস বাক্যে অসহিষ্ণু হয়ে, রুক্মিণী আক্ষেপের সঙ্গে বলেছিলেন—হে অচ্যুত ! মহাদেব এবং ইন্দ্রের সভায় তোমার যে গুণগান হয়, সে গুণগান যে সব রমণীর কানে প্রবেশ করে নি, গো-অশ্বাদিতুল্য হীনপদবাচ্য রাজারাই তাদের পতি হওয়ার যোগ্য গোবিন্দ নন।' ৮৫।

‘যে বলিলে রাজগণ তাথে মোর নাহি মন, তাহাদের পতি হোক তারা।
যাহাদের কর্ণমূলে না প্রবেশে কোনকালে তোমার গুণের মধুধারা ॥’

শ্রীকৃষ্ণের বিদ্রুপ উক্তি শুনে, রুক্মিণীর ধৈর্যচ্যুতি ঘটলো ; এবং অমর্ষ হেতু অশ্রুাশ্রু নায়িকা ও রাজন্যাগণ সম্পর্কে তিনি এই তাচ্ছিল্য সূচক উক্তি করলেন।

অপমান-হেতু অমর্ষ

শ্রীকৃষ্ণের আচরণে অপমানিতা বোধ ক'রে, ললিতা শ্রীরাধাকে বললেন—সখি! কৃষ্ণের উপর থেকে তুমি তোমার মন ফিরিয়ে নাও। যুবতীদের স্তনতটে সর্বদাই তাঁর অর্ধদৃষ্টি। সেই ধূর্ত কামিনীদের সঙ্গে কেলি ক'রে বলপূর্বক তাদের চিত্ত আকর্ষণ করেন এবং তাদের চরিত্রে কলঙ্ক লেপন ক'রে, নিঃশঙ্ক চিত্তে তাদের পরিত্যাগ করেন। ৮৬।

এখানে অপমান-হেতু ললিতার অমর্ষ বা অসহিষ্ণুতা সঞ্চারিত হয়েছে। তাই শ্রীকৃষ্ণ সম্পর্কেও তিনি ক্রোধ পরবশ হয়ে, এরূপ উক্তি করেছেন।

অসূয়া

পরের সৌভাগ্যে বিদ্বেষ বা পরশ্রীকাতরতাকে অসূয়া বলে। পরের সৌভাগ্য বা গুণপনার প্রতি অসহিষ্ণুতা থেকেই অসূয়ার উৎপত্তি হয়।

সৌভাগ্যে অসূয়া

রাসলীলার শেষে হঠাৎ শ্রীরাধাকে দেখতে না পেয়ে, চন্দ্রাবলীর সখী পদ্মা বলে উঠলো—

‘এই পথে গেছে হরি এক নারী কান্ধে করি ইহা মোরা কৈহু অহুমান।

অতি ভার বৈয়া গেছে পদচিহ্ন ডুবি আছে দেখি কাঁপে আমাদের প্রাণ ॥’

নৃত্য শেষে শ্রীকৃষ্ণ রাধিকাকে নিয়ে রাসমণ্ডপ থেকে অন্তর্হিত হয়েছেন দেখে, শ্রীরাধার সৌভাগ্য কল্পনায় চন্দ্রাবলী প্রভৃতির অন্তরে অসূয়া বা বিদ্বেষ সঞ্চারিত হলো। ৮৭।

যথা বা—

গোচারণরত শ্রীকৃষ্ণের মুরলীধ্বনি শুনে, ব্রজাঙ্গনারা পরস্পর বলাবলি করলেন—আহা! ওই বাঁশীর কি অনির্বচনীয় সৌভাগ্য!

বানী যে কি পুণ্য করেছিল, তা বলতে পারি না। যে কৃষ্ণের অধর মুখা পানের জন্ত গোপিনীরা আকুল, বাঁশী সেই অমেয় অধরমুখা একাই আকর্ষণে পরিতৃপ্ত হয়। ৮৮।

গুণহেতু অমুগা

পদ্মা তার নিজের গাঁথা বনমালার প্রশংসা করছিল। তার বনমালা সত্যই সুন্দর হয়েছিল, এবং নিপুণতার পরিচয় দিচ্ছিল। কিন্তু তার এই গুণপনায় বিদ্রোহ পরবশ হয়ে, বিশাখার কোন সখী তাকে বললে—মুগ্ধে! তোমার চেয়ে আমার প্রিয়সখী অনেক ভালো বনমালা গাঁথেন। তিনি অনেক বেশী নিপুণ। কিন্তু প্রণয়াশ্রুতে তাঁর চোখের দৃষ্টি ঝাপসা হয়েছিল, এবং হাত দুটি সিক্ত হয়েছিল; তাই তিনি মনোযোগ সহকারে মালা গাঁথতে পারেন নি। নইলে তাঁর মত সুন্দর বনমালা আর কেউ গাঁথতে পারে না। ৮৯।

এখানে পদ্মার নিপুণতা বা গুণপনা দেখে, বিশাখার সখী অমুগা পরবশ হয়ে উঠেছে।

চাপল্য

চিন্তের লঘুতা হেতু যে গান্ধীর্যের অভাব ঘটে, তাকে চাপল্য বলে ॥ ৯০ ॥

অমুরাগ ও দ্বেষ থেকে এই চাপল্যের উদ্ভব হয়।

রাগ তথা অমুরাগ-হেতু চাপল্য

যথা—

কন্দর্প-বিলাসোৎসুক ক্রীকৃষ্ণকে বাধা দিয়ে ললিতা বললেন—
হে কৃষ্ণ! এই গোকুল-সরোবরে প্রস্তুতিত ফুল-কমলিনীসকল নিয়ে নিঃশব্দচিন্তে চিরকাল কেলি করো। কিন্তু এই অলঙ্কৃতসুমা অর্থাৎ অখ্যতুমতী মৃদী নলিনীকে হাত দিয়ে ছুঁয়ো না, তার অঙ্গস্পর্শ করো না। ৯১।

‘আর ব্রজের রমণী প্রফুল্লিত কমলিনী তাহে জীড়া কর আশা পুরে।

আমি কিছু নাহি জানি অপূর্ণিত কমলিনী কৃষ্ণ হস্তে না ছুঁইহ মোরে।’

যথা বা—গীতগোবিন্দে ।

রাস-উল্লাসে বিভ্রান্ত হয়ে শ্রীমতী চাপল্যভরে আভীরমুন্দরীদের সামনে শ্রীকৃষ্ণকে গাঢ় আলিঙ্গনে আবদ্ধ ক'রে বললেন—‘মাধব, তোমার বদন সুধাময়!’ এইভাবে স্তম্ভিতছিলে তিনি শ্রীকৃষ্ণের মুখচুম্বন করলেন। মাধবের মুখে মৃদু হাসি ফুটে উঠলো। ২২।

দ্বেষহেতু চাপল্য

যথা—

মহাভাববতী শ্রীরাধা বনমালার প্রতি দ্বেষাশ্রিতা হয়ে ললিতাকে বললেন—সখি! গুণসঙ্গরহিত ওই বনমালা কৃষ্ণের বুকে লয় প্রাপ্ত হোক। কারণ, শ্রীকৃষ্ণের ওই কণ্ঠদেশ আমাদের নিখিল-সৌভাগ্যের আশ্রয়। কিন্তু ওই কুটিল বনমালা ক্ষণকালের জঘণ্ড শ্রীকৃষ্ণের কণ্ঠ পরিত্যাগ করে না, আমাদের নিবিড় আল্পেষে বাধা দেয়—অন্তরাল সৃষ্টি করে। সুতরাং অচিরে ওই বনমালার নাশ হওয়াই ভালো। ২৩।

নিদ্রা

চিত্তের নিমীলনকে নিদ্রা বলে। ক্লান্তি বা অবসাদ থেকে নিদ্রার উৎপত্তি হয়।

ক্লম বা ক্লান্তি হেতু নিদ্রা।

যথা—

নান্দীমুখীর প্রতি বৃন্দার উক্তি : ক্লান্তিভরে গোবিন্দ শ্রীরাধার বুকে মাথা রেখে পর্বত-কন্দরে ঘুমিয়ে পড়েছেন। ঘন নিঃশ্বাসের স্পন্দনে তাঁর উদরতল নতোল্লসিত হচ্ছে। মুক্তামালা পুষ্পশয্যায় লুটিয়ে পড়েছে। শিথিল নীবীবন্ধ একহাতে ধরে আছেন; অলস অঙ্গ নিদ্রায় এলিয়ে পড়েছে।

‘বাস বহে নাগিকায় উদয় বন্ধুর তায় অভিনব পুষ্পের আশ্রয়ে।

রাধিকার স্তনগিরি তারে উপাধান করি নিদ্রা বান পর্বত কন্দরে ॥’

নায়িকার কুচকুস্তে উপাধান করা প্রেমিকের অতিকাম্য সম্ভোগ।
('Pillowed on her ripening breast'—Keats.) ।

দ্বিতীয় উদাহরণে শ্রীকৃষ্ণের ক্রোড়ে মাথা রেখে শ্রীমতীর নিজা বর্ণিত হয়েছে।

যথা—হংসদূতে

মথুরাস্থ শ্রীকৃষ্ণের নিকট নিজের অভিলাষ জ্ঞাপন ক'রে ললিতা বললেন—‘হে কৃষ্ণ ! অলিন্দে কালিন্দীকমল-সুরভিত এই কুঞ্জগৃহে শ্রীমতী সন্ত-প্রস্ফুটিত মাধবীপুষ্পে চিকুর-সজ্জা রচনা ক'রে, কবে তোমার ক্রোড়ে মাথা রেখে মুকুলিত নেত্রে নিজা যাবেন ; আর আমি নব কিশলয়গুচ্ছে ব্যজন ক'রে তাঁর সেবা করবো !’ ৯৪ ।

সুপ্তি ও স্বপ্ন

যে নিজায় চিন্তে বিবিধ চিন্তা বা নানাবস্তুর অমুভব বর্তমান থাকে, তাকে সুপ্তি বলে। ইন্দ্রিয়গণের উপরতি, শ্বাস এবং চক্ষু মুদ্রণ প্রভৃতি তার অমুভাব। এ অবস্থায় স্বপ্নাবেশ হয়।

যথা—

স্বপ্নাবেশে শ্রীরাধা—

‘পথ ছাড় চঞ্চল যাব যবুনার জল এই বাক্য কহিয়া স্বপনে ।

গোবিন্দের তুঙ্গ লঞা তাহে নিজশির দিয়া রাধা নিজা যায় কুঞ্জবনে ॥’

শ্রীকৃষ্ণের বাম বাহুতে মাথা রেখে, শ্রীমতী নিজামগ্না হয়েছেন। তাঁর অলস অঙ্গ নিজায় এলিয়ে পড়েছে। শ্রীকৃষ্ণের বক্ষস্থ কোমলত্ব মণি তাঁর স্তন্যাগ্রে শোভা পাচ্ছে। ক্লান্ত দেহে যখন শ্রীরাধা এই ভাবে দরীকুঞ্জে ঘুমিয়ে ছিলেন, স্বপ্নাবেশে তিনি বলে উঠলেন—‘হে চঞ্চল কৃষ্ণ ! আমার পথ ছাড়ো। আমি যমুনার তীরে জল আনতে যাবো !’

শ্রীমতীর এই স্বপ্নাবেশ দেখে এসে, রূপমঞ্জরী পুষ্পচয়নকারিণী রতিমঞ্জরীকে এই বৃত্তান্ত বলেছিল।

বা—

নিদ্রিত শ্রীকৃষ্ণের হস্তস্থলিত মুরলী শয্যায় পড়ে ছিল। শ্রীরাধা সেটি অপহরণ ক’রে নিয়ে গিয়ে, লুকিয়ে রাখবেন ভেবেছিলেন। কিন্তু নিদ্রাতুর শ্রীকৃষ্ণের উজ্জল গণ্ডে পুলক দেখে, শ্রীমতী চকিত হয়ে উঠলেন। মুরলী হরণ করা হলো না। ৯৫।

বোধ বা নিজানিবৃত্তি

নিজাভঙ্গের পর প্রবুদ্ধতা বা জ্ঞানের পুনরাবির্ভাবকে বোধ বলে।

যথা—

পৌর্ণমাসীর প্রতি বৃন্দার উক্তি :

‘সিংহ মহা শব্দ করে নিজার প্রমোদ হরে সেই শব্দে হরি করে স্তুতি ।
স্বাধার পীন পয়োধর লাগিয়াছে অঙ্গ পর তাথে মনে বাড়ে বড় শ্রীতি ॥’

সিংহের গর্জন শুনে, শ্রীরাধার নিজাভঙ্গ হয়েছিল। ভয়ে তিনি চঞ্চলনেত্রা হয়ে গিরিসদৃশ পয়োধর যুগলের গাঢ়নিপীড়নে শ্রীকৃষ্ণকে আলিঙ্গনপাশে বদ্ধ করেছিলেন। সিংহের গর্জন শুনে শ্রীমতী ভয় পেয়েছিলেন, কিন্তু পীন পয়োধর-স্পর্শে শ্রীকৃষ্ণের শ্রীতি বর্ধিত হয়েছিল।

সখীর প্রতি স্নেহ

যথা—

ললিতার কোন সখীকে রূপমঞ্জরী বললে—

‘শৈল’ পরি হরিসঙ্গে রাধিকা বিহরে রঙ্গে রোমগণ করিছে নর্ভন ।
ললিতার মুখশশী অলকা পড়িছে খসি তাহা রাধা করয়ে মার্জন ॥

শ্রীকৃষ্ণের সঙ্গে বিহারকালে, নিজে পুলকে আকুলিতা হয়েও,

শ্রীরাধা তাঁর প্রিয়বান্ধবী ললিতার চূর্ণ-অলকগুলি সন্মুখে কপোল-প্রাস্ত থেকে সরিয়ে দিচ্ছিলেন। ৯৬।

দশা চতুষ্ঠয়

দশা চার রকম—উৎপত্তি, সন্ধি, শাবল্য ও শাস্তি।

উৎপত্তি বা শাবল্য

ভাবের সম্ভাবকে উৎপত্তি বলে। যথা—

শ্রীরাধার মুখমাধুর্য একবার আশ্বাদন ক'রে, আবার আশ্বাদনের পর শ্রীকৃষ্ণ রাধার সখীকে বললেন—শশিমুখি! তুমি আর বলো না যে, শ্রীরাধা অতিশয় মৃদুস্বভাব। কুঞ্জে তাঁর পুরুষভাব দেখে, আমি সেকথা তোমায় বলেছিলাম ব'লে, শ্রীমতীর নয়নের দৃষ্টি কুটিল হয়ে উঠেছিল। তিনি ক্ষুণ্ণ হয়েছিলেন। তাই আমি তাঁরই আশ্রয় নিলাম। ৯৭।

সন্ধি

সমান রূপ বা ভিন্ন ভাবের সংমিশ্রণ বা সমন্বয়কে সন্ধি বলে।

সমান রূপদ্বয়ের সন্ধি। ৯৮।

যথা—

পৌর্ণমাসীর প্রতি বৃন্দা :

‘চিরকাল পরে রাধার ভবনে বিনোদ নাগর যায়।

তা দেখি রায়ান মনেতে কৃষিয়া অরুণ নয়নে চায় ॥

তাহারে দেখিয়া রাধার নয়ান নিমেষ ছাড়িয়া দিল।

চিত্তের পুতলি যেমন রয়েছে তেমনি রাধিকা হল ॥’

এখানে একটা ভাব ইষ্টরূপ ও আর একটা অনিষ্টরূপ—কোনটিই অপরটির চেয়ে কম নয়। এই দুটি সমান ভাব একই সঙ্গে আবিস্কৃত হওয়ায় যে সন্ধি হলো, তাতে শ্রীমতী নিম্পন্দাজী হলেন। স্বর্ণপ্রতিমার মত নিশ্চল দাঁড়িয়ে রইলেন। এখানে দ্বিবিধ জাত্যের সমন্বয় হলো। ৯৯।

ভিন্ন ভাবধ্বয়ের সন্ধি

যথা—ললিতমাধবে

পৌর্ণমাসীর উক্তি :

‘পৰ্ব্বতের ভার জানি মনেতে বিষাদ মানি হুঃখিত সে সব গোপীগণ ।

সদা কৃষ্ণমুখ দেখি তাথে বড় হয় স্থখী সদাই দ্বিবিধ গোপী মন ॥

শ্রীকৃষ্ণের গিরিগোবর্ধন ধারণ দেখে, এবং ওই পৰ্ব্বতের গুরু-ভারের কথা ভেবে, গোপাঙ্গনাদের মনে নিদারুণ উদ্বেগ সঞ্চারিত হলো । কিন্তু কৃষ্ণ-দর্শনের জন্ত উৎফুল্লতা বশতঃ মনে একসঙ্গে ভিন্ন ভাবধ্বয়ের সমন্বয় বা সন্ধি হলো । প্রথম, প্রিয়তম দর্শনের আনন্দ । দ্বিতীয়, পৰ্ব্বতের গুরুভারের কথা ভেবে চিন্তের উদ্বেগ ও সন্তাপ । ব্রজবল্লভদের হৃদয় দ্বিধা হতে লাগলো ।

এই উদাহরণে উদ্বেগজনিত বিষাদ এবং প্রিয়তম-দর্শন জনিত হর্ষ—এই উভয় ভাবের সমন্বয় বা সন্ধি হয়েছে । ১০০ ।

ভিন্ন হেতু-নিমিত্ত সন্ধি

যথা—

বৃন্দা কুন্দলতাকে বললেন :

‘রাধার সহিত নব অমুরাগ যবে বাটাইল হরি

পদ্মারে ললিতা ইঙ্গিত করয়ে কত অবহেলা করি ॥

পদ্মা তাহা শুনি চরণে ধরণী লিখয়ে মৌন করি ।

বহন বহিয়া ঝর ঝর হঞা কত পড়ে শ্বেদবারি ॥’

এখানে কৃষ্ণের জন্ত চিন্তা, এবং হায়, কৃষ্ণ এ কি করলেন ! এই মনোভাব, এবং ললিতার প্রতি অমর্ষ বা অসহিষ্ণুতাজনিত কোপ (Intolerance) সঞ্চারিত হওয়ায়, পদ্মা পায়ের আঙুল দিয়ে মাটিতে লিখতে বা দাগ কাটতে লাগলো । তার মুখপদ্ম থেকে অবিরত ঘাম ঝরে পড়ছিল ।

এই উদাহরণে চিন্তা এবং অমর্ষের সন্ধি হয়েছে । ১০১ ।

শাবল্য

যেখানে ভাবনিচয় মনে উদ্ভিত হয়ে, এক ভাব অশ্রু ভাবকে উত্তরোত্তর মর্দিত করে, তাকে শাবল্য বলে।

যথা—

কলহাস্তুরিতা শ্রীরাধা বললেন—অহো! যাদের সঙ্গে নবযুবা শ্রীকৃষ্ণ আনন্দে বিহার করছেন, সেই মৃগনয়না সুন্দরীরাই ধন্য। আমার যদৃচ্ছাচার ও চপলতা দেখে, ললিতা আমার নিন্দা করবে। কিন্তু কি করবো! মন যে আমার সেই ইন্দুবদন গোবিন্দকে আলিঙ্গন করবার জন্য উৎকণ্ঠিত হয়ে উঠেছে। হায়, যে নির্মম বিধাতা মান-গরলের সৃষ্টি করেছে, তাকে ধিক্।

এখানে চপলতা, শঙ্কা, ঔৎসুক্য এবং অমর্ষ ইত্যাদি ভাব পরস্পরকে সম্মর্দিত করছে।

শান্তি বা ভাবের লয়

চিন্তে যখন ভাবের নিবৃত্তি ঘটে, তখনই শান্তির সঞ্চার হয়।

যথা—

নান্দীমুখী বললে—সখি! যে মানরূপী মহীৰুহ কমলার চিত্ততটাকে বেষ্টিত করেছিল, সখীদের অতিকুশল যুক্তি-কুঠারের দ্বারা তাকে ছেদন করা যায়নি। দূতীদের নিপুণ বাক্য-নির্ঝরের দ্বারাও তা বিচলিত হয়নি। কিন্তু আজ বংশীনাদ আন্দোলিত মৃদু পবনহিল্লোলে সেই বিরাট তরু অচিরে উন্মূলিত হলো।

শ্রীমতীর চিন্তে ভাবের প্রাবল্য-হেতু মান এবং অস্থিরতার উদ্ভব হয়েছিল। শ্রীকৃষ্ণে বংশীধ্বনি মৃদু পবনহিল্লোলে ভেসে আসায় মুহূর্তে চিন্তের সেই ভাবোন্মত্ততা নিবৃত্ত হলো। শ্রীমতীর মান-অভিমান-প্রাণি সব নিমেষে মুছে গিয়ে, মনে শান্তি সঞ্চারিত হলো। ১০২।

ইতি ব্যভিচারিভাববিবৃতি

স্থায়িভাব

শৃঙ্গাররসে মধুরা রতিকে স্থায়িভাব বলে। অতি সহজ কথায় বলতে হ'লে বলা যায়, নায়ক ও নায়িকার যে ভাব মনে স্থায়ী ভাবে রেখাপাত করে, তাকেই স্থায়িভাব বলা হয়। অর্থাৎ হাস্ত প্রভৃতি অমুকূল ভাব এবং ক্রোধাদি প্রতিকূল ভাবকে আয়ত্তে রেখে, যে ভাব আপন প্রভাব অক্ষুণ্ণ রাখে, তাকেই স্থায়িভাব বলে। মধুর রসে কৃষ্ণবিষয়ক রতিকেই স্থায়িভাব বলা হয়েছে। এই রতি দ্বিবিধ—মুখ্য ও গৌণ।

মুখ্য রতিকে আবার দু'ভাগে বিভক্ত করা হয়েছে। যেমন, স্বার্থ ও পরার্থ। এদের প্রত্যেকটিকে আবার পাঁচভাগে বিভক্ত করা হয়েছে। যেমন—শুদ্ধ, প্রীতি, সখ্য, বাৎসল্য ও প্রিয়তা।

গৌণ রতিকে সাতভাগে বিশ্লেষণ করা হয়েছে। যথা—হাস্ত, বিস্ময়, উৎসাহ, শোক, ক্রোধ, ভয় ও জুগুপ্সা।

এই সকল রতির আলম্বন শ্রীকৃষ্ণ। কিন্তু কেবলমাত্র শেষোক্ত কয়েকটি অর্থাৎ হাস্ত বিস্ময় ইত্যাদি ভাব দেহকে আশ্রয় করে বিবর্তিত হয়। সুতরাং এগুলির আলম্বন দেহাদি। এই সকল রতির ভিন্ন ভিন্ন চেষ্টা (action) আছে।

উল্লিখিত মুখ্য এবং গৌণ রতি যতক্ষণ রসাবস্থা প্রাপ্ত না হয় (do not merge into absolute pleasure), ততক্ষণ এদের স্থায়িভাব বলা হয়।

মধুরা রতি

যথা—গৌবিন্দবিলাসে

কালসর্পের জিহ্বার অগ্রভাগের মত গোপীগণের চমৎকার তীক্ষ্ণ দৃষ্টির মাধুর্যে যার অন্তর বিদ্ধ হয়েছে, এবং যিনি আপন অরুণাভ নয়ন

দ্বয়ের স্বর্ণিত প্রাস্তদৃষ্টিতে সতীদেব হৃদয় চূর্ণিত করেছেন, সেই মুকুন্দ হৃদয়ে মধুরা রতি সঞ্চার ক'রে সকলের চিত্তে অপরিমেয় আনন্দ বিস্তার করুন।

যথা বা—দানকেলিকৌমুদীতে

শ্রীকৃষ্ণ মধুমঙ্গলকে জিজ্ঞেস করলেন—সখা! গিরিগোবর্ধন-শিখরে অরোহন ক'রে, আপনকর্ণে শোভিত মণিকুণ্ডলের দীপ্তিতে উজ্জল কটাক্ষবাণ নিক্ষেপ ক'রে, শানিত ব্রহ্মকম্পনে মন চুরি করেন, উনি কে? অতিসম্ভ্রমের সঙ্গে উনি যে আমার চিত্তকে ব্যাধ ক'রে তুলেছেন।

রতি আবির্ভাবের হেতু

অভিযোগ, বিষয়, সম্বন্ধ, অভিমান ও তার বিশেষত্ব এবং উপমা ও স্বভাব ইত্যাদি কারণে রতি (amor) উদ্ভূত হয়। এই কারণগুলি উত্তরোত্তর বৃদ্ধি পায় এবং ক্রমে উৎকর্ষ লাভ করে।

অভিযোগ

নিজেনিজে বা অশ্বের মাধ্যমে নিজের মনোভাব প্রকাশ করাকে অভিযোগ বলে। সুতরাং অভিযোগকে ছ'ভাবে বিশ্লেষণ করা যায়। যেমন, স্বাভিযোগ এবং পরকর্তৃক বা অশ্বের মাধ্যমে অভিযোগ।

স্বাভিযোগ

নিজের মনের কথা বিশাখার কাছে প্রকাশ ক'রে শ্রীমতী বললেন—সখি! আমি যমুনাতীরের বনে মাধবকে দেখেছিলাম। আমায় দেখে, তিনি আমার অধরে দৃষ্টি নিক্ষেপ ক'রে, একটা কচি লতার নবপল্লব দংশন করতে লাগলেন। তাই দেখে, আমার অন্তর প্রস্ফুটিত হয়ে উঠেছে।

এখানে নিজে এই অভিযোগ উত্থাপিত ক'রে শ্রীমতী বিশাখাকে বলতে চান, আমি আর ধৈর্য রাখতে পারছি না। সখি, অবিলম্বে

শ্রীকৃষ্ণের সঙ্গে তুমি আমার মিলনের ব্যবস্থা করো, আমায় অভিসারে নিয়ে চলো।

স্বথা বা—

শ্রীকৃষ্ণ সুবলকে বললেন—সখা! যাঁর চঞ্চল দৃষ্টি চারিদিকে ঘুরে বেড়াচ্ছে, যিনি যমুনাতটে পদ্মবন সৃষ্টি ক’রে অর্থাৎ সখীজনসহ পদ্মের মত প্রস্ফুটিতা হয়ে, আমার চিন্তভ্রমরকে বলপূর্বক হরণ করে নিচ্ছেন, সেই চঞ্চল-চপলনয়না কে?

কুবলয়-সদৃশা শ্রীরাধা তাঁর চঞ্চল লোচনের আকর্ষণে বলপূর্বক শ্রীকৃষ্ণের চিন্তহরণ করছেন, এই অভিযোগের দ্বারা শ্রীকৃষ্ণ নিজেই তাঁর প্রবল মিলনেচ্ছা প্রকাশ করছেন। ১।

পরকর্তৃক অভিযোগ

অন্যে যখন নায়ক বা নায়িকার মিলন-আকাঙ্ক্ষা-নিপীড়িত মনের কথা উভয়ের যে-কোন একজনের পক্ষ থেকে অপরকে জানায়, তখন পরকর্তৃক অভিযোগ সূচিত হয়।

স্বথা—

কোন এক পত্রহারী দূতী শ্রীকৃষ্ণের নিকট শ্রীরাধার গভীর অনুরাগের কথা জানিয়ে বললে—

‘তোমার সম্বাদ শুনি চঞ্চল হইলা ধনী তার মন হইল ঘূর্ণ্যমান।

ভাবের তরঙ্গে ভাসে অঙ্কের বসন খসে তথাপি নাহিক তার জ্ঞান ॥’

বিষয়

শব্দ, স্পর্শ, রূপ, রস ও গন্ধ—এই পাঁচটিকে বিষয় বলে। ২।

চন্দ্র, কর্ণ, জিহ্বা, নাসিকা ও স্বক—এই পাঁচটি ইন্দ্রিয়গ্রাহ্য বিষয়ের যে-কোন একটি বা ততোধিক বিষয়কে অবলম্বন ক’রে চিন্তে রতিলিঙ্গা সঞ্চারিত হতে পারে। সেইজন্য ওই পাঁচটিকে রতি আবির্ভাবের হেতু বলে উল্লেখ করা হয়েছে।

শব্দ-নিমিত্ত

যথা - বিদগ্ধমাথবে

ললিতা শ্রীরাধাকে জিজ্ঞেস করলেন - সখি ! তুমি কেন এমন বিবশা হচ্ছে ?

উত্তরে শ্রীমতী বললেন—ওই কদম্ববনের অন্তরাল থেকে কোন্ এক অপূর্ব স্নমধুর ধ্বনি উথিত হয়ে আমার কর্ণকুহরে প্রবেশ করলো, তা আমি বুঝতে পারলাম না। হায়, ওই ধ্বনি বুঝি আজ আমাকে কুলবধূর ধর্মগর্হিত কোন এক অনির্বচনীয় দশায় উপনীত করবে। আমি যে আর কুল-মান রাখতে পারছি না। ৩।

যথা বা—

শ্রীরাধা কোন সখীকে বললেন—একে ওই কৃষ্ণ নামের একটা অক্ষর শুনেই আমার বুদ্ধি লোপ হচ্ছে। তার ওপর আবার সেই পুরুষের বংশীনাদ কর্ণে প্রবেশ ক’রে আমায় উন্মাদ ক’রে তুলেছে। সেই স্নিগ্ধ নবজলধরকাস্তি পুরুষকে ক্ষণেক দেখে, তাঁর মূর্তি আমার চিন্তে লগ্ন হয়ে আছে। হায়, কেমন ক’রে এই তিনটি পুরুষরত্নের রতি আমি বহন করবো ? তার চেয়ে আমার মৃত্যুই শ্রেয়। ৪।

স্পর্শ-হেতু

যথা—

ব্যগ্রতার কারণ জিজ্ঞেস করলে, শ্রীরাধা সখীকে বললেন—

সখি ! নিবিড় অন্ধকারাচ্ছন্ন ব্রজপুরের ভিতর দিয়ে আমি পথ ধরে যাচ্ছিলাম। হঠাৎ কোন পুরুষের অঙ্গে আমার অঙ্গ ঠেকলো। আমি শিউরে উঠলাম। আমার দেহ রোমাঙ্কিত হলো। চেয়ে দেখ, আজো সেই রোমাঙ্ক ক্ষণকালের জগু উপরত হলো না। ৫।

রূপ-হেতু

যথা—

দূতরূপী হংসকে সম্বোধন ক'রে ললিতা বললেন—মথুরায় গিয়ে
শ্রীকৃষ্ণকে বলো যে, তাঁর রূপ-দর্শনে উন্মত্তা রাধা বিরহানলে দগ্ধ
হচ্ছে। পুড়ে মরছে, তবুও শ্রীকৃষ্ণের প্রতি প্রেম সে ত্যাগ করতে
পারছে না। আগুনের রূপ দেখে পতঙ্গের যে অবস্থা হয়, কৃষ্ণের
রূপে আকৃষ্টা শ্রীরাধার ঠিক সেই দশা হয়েছে। তাঁর হিতাহিত
জ্ঞান লোপ পেয়েছে। হতাশ হয়ে শ্রীমতী সেই প্রেমানলেই
বারবার ঝাঁপিয়ে পড়ে অগ্নিদাহ সহ্য করছেন। ৬।—হংসদূত।

উদাহরণ

যথা—পদাবলীতে

‘জনম অবধি হাম ওরূপ নেহারিছ
নয়ন না তিরপিত ভেল।
লাখ লাখ যুগ হিয়ে হিয়া রাখছ
তবু হিয়া জুড়ন না গেল ॥’

—বিদ্যাপতি

‘রূপ লাগি আঁখি বুঝে গুণে মন ভোর।
প্রতি অঙ্গ লাগি কঁাদে প্রতি অঙ্গ মোর ॥
হিয়ার পরশ লাগি হিয়া মোর কঁাদে।
পরান পুতলি হায় থির নাহি বাঁধে ॥’

—লোচন দাস।

‘তুয়া রূপ আকর্ষণ রাধা কৈল দরশন হিতাহিত কিছুই না জানে।
প্রেমানলে প্রবেশিল তাপে আত্মা খোয়াইল কীট যেন পুড়য়ে দহনে ॥’

—শচীনন্দন

রস-হেতু

যথা—

‘অঙ্গ হৈল পুলকিত তহু যেন বিগলিত তরঙ্গিত হৃদয় হইল।
রাধার এমন দেখি মনে অহুমানি সখি ললিতারে কহিতে লাগিল ॥
আমি ইহার বুঝিলাম কারণে।
কৃষ্ণের অধরাগত তাব্বালের চর্কিত তুমি দিলে রাধার বদনে ॥’

হে সখি ! আজ হঠাৎ যখন তোমার এই মুগ্ধা সখীর অঙ্গে পুলকোদগম হয়েছে, গাত্রভঙ্গ হচ্ছে অর্থাৎ গা আড়ামোড়া দিচ্ছে এবং অন্তরে অমুরাগ সমুদ্র তরঙ্গায়িত হয়ে উঠেছে, তখন নিশ্চয়ই দয়িতের সঙ্গে কোন রস-সংযোগ ঘটেছে। নিশ্চয়ই শ্রীকৃষ্ণের চর্চিত তাম্বুল এনে তুমি শ্রীমতীর মুখে দিয়েছ। নইলে হঠাৎ তাঁর এমন বিকার উপস্থিত হলো কেন ? । ৭।

গন্ধ-হেতু

যথা—

শ্রীকৃষ্ণের পরিত্যক্ত বৈজয়ন্তী মালা আত্মাণ ক'রে কোন গোপাঙ্গনা মোহপ্রাপ্ত হলো। কিছুক্ষণ পরে পুনরায় সংবিৎ ফিরে পেয়ে, বিস্ময়বিমুক্ত হয়ে বললে—সখি, যে গাছের ফুলে এই অমুপম বৈজয়ন্তী মালা গাঁথা হয়েছে, সে সুখময় তরু কোথায় আছে ? কি আশ্চর্য ! চেয়ে দেখ, এই মালা গলায় দিয়ে কেউ রাত্রিযাপন করেছেন। কিন্তু পরিত্যক্ত হলেও এ মালার গন্ধে ভ্রমরেরা আকৃষ্ট হচ্ছে, আমার চিন্তে বারবার স্তম্ভ (Stupor) উপস্থিত হচ্ছে। ৮।

লোকোত্তর বস্তুর এমন কোন অনিবার্য প্রভাব আছে, যাতে অবিলম্বে রতি ও রতিবিষয়ক আলম্বন প্রকটিত হয়। শ্রীকৃষ্ণের প্রতি গোপিনীদের বা শ্রীরাধার প্রেম যে সব সময় রূপ, রস, গন্ধ, স্পর্শ ইত্যাদির উপর নির্ভর ক'রে সঞ্চারিত হয়েছে, তা নয়। শ্রীকৃষ্ণের লোকোত্তর অনিবার্য প্রভাব তাঁদের প্রভাবান্বিত করেছে, যার জন্ম তিনি শ্রীমতী ও গোপাঙ্গনাদের নিকট রতিবিষয়ক আলম্বন রূপে প্রকটিত হয়েছেন। ৯।

সম্বন্ধ

কুল, রূপ, শৌর্য ও শীল ইত্যাদির সামগ্রিক গৌরবকে অর্থাৎ আধিক্যকে সম্বন্ধ বলে। ১০।

কুলাদির গোরব-হেতু

যথা—

কোন ব্রজসুন্দরী বললেন—যাঁর বীরত্বের কাছে পর্বত কন্দুক সদৃশ (ভাঁটার মত) হয়েছে, যাঁর রূপ নিখিল বিশ্বের ভূষণ স্বরূপ, যিনি আভীরশ্রেষ্ঠ নন্দের গৃহে জন্ম গ্রহণ করেছেন, যাঁর গুণ অপরিমেয়, এবং অনির্বচনীয় লীলায় বিশ্বজগৎ-কে যিনি বিস্ত্রিত করেছেন, সেই লোকাভীতচরিত্র মুরলীধর কার ধৈর্যচ্যুতি না ঘটিয়েছেন ! তাঁর বেণুরব সেই সব কুল-রূপ-শৌর্য ও লীলাদি সম্বন্ধে সকল কথা মনে করিয়ে দিয়ে, কার চিত্তে রতি উৎপন্ন না করে ? । ১১।

‘সখি, হেন কৃষ্ণ ব্রজেন্দ্রনন্দন।

তাহার মুরলী শুনি হেন কে রমণীমণি যে করয়ে ধৈর্য্য সম্বরণ ॥’

—শচীনন্দন।

অভিমান

পৃথিবীতে অগণিত রমণীয় বস্তু আছে, তা থাক। কিন্তু আমি এইটিই চাই—এইটিই আমার প্রার্থনীয়, এই ধরণের নির্ণয়কে বা আত্মনির্বাচনের নিশ্চয়তাকে সুধীগণ অভিমান ব’লে অভিহিত করেছেন। ১২।

তাৎপর্য : মমতার আধার বা প্রেমাস্পদ বিষয়ে অনন্তসঙ্কল্পের নাম অভিমান। এই অভিমান রূপাদির অপেক্ষা না রেখেও, নায়ক-নায়িকার চিত্তে রতি উৎপাদন করে।

যথা—

নান্দীমুখীকে জীরাধা বললেন :

‘এই তো ধরণী মাঝে অনেক নাগর আছে তাহারা অনেক রস জানে।

তাহাদিকে কুলবতী স্বয়ম্বরে কৈল পতি তাহা মোর নাহি লাগে মনে ॥

চুড়া নাহি যার মাথে বেণু নাহি যার হাতে গিরিধাতু নাহি যার দেহে।

হউক না সে সুন্দর বিদগ্ধ নাগরবর তৃণসম নাহি গণি তাহে ॥’

পৃথিবীতে বিদগ্ধচূড়ামণি মাধুর্যগুণালঙ্কৃত যত পুরুষই থাক না কেন, ত্রীরাধা শিখিপুচ্ছমৌলি মুরলীধর ত্রীকৃষ্ণ ছাড়া আর কোন নায়ককে তৃণতুল্যও মনে করেন না। এখানে ত্রীমতীর এই অনশ্রুমানসিকতা অভিমানের পরিচায়ক। ১৩।

তদীয় বিশেষ

পদ, গোষ্ঠ ও প্রিয় প্রভৃতিকে কৃষ্ণ সম্বন্ধীয় বিষয়সমূহের বিশেষ বলা হয়।

পদ—যথা

এক্ষেত্রে পদ বলতে পদচিহ্নের কথা উল্লেখ করা হয়েছে। ১৪।

পদচিহ্ন বা পদাঙ্ক

কোন নবাগতা গোপবধূ বৃন্দাবনে প্রবেশ করেই আশ্চর্যাব্বিতা হয়ে বললে—সখি! কালিন্দীতটভূমিতে এ কার চরণচিহ্ন অঙ্কিত দেখছি? সুস্পষ্ট বজ্র-চক্র-পদ্মচিহ্নের পঙ্ক্তি! এ পদচিহ্ন দেখেই যে আমার হৃদয় ব্যাকুল হয়ে উঠেছে। হৃদয়কোরক প্রস্ফুটিত হয়ে উঠলো। তনুলতিকা রোমাঞ্চিত হচ্ছে।

গোষ্ঠ

বৃন্দাবন-সংলগ্ন প্রান্তর বা গোচারণ-ভূমিকে গোষ্ঠ বলে।

যথা—

দেশান্তর হতে সমাগতা কোন নববিবাহিতা গোপাঙ্গনা ব্রজভূমে এসেই বললে—সখি! এই ব্রজভূমি অপূর্ব মাধুর্যে আমার হৃদয় উৎফুল্ল করে তুলেছে। এত মধুরিমা আমি পূর্বে কোথাও কখনো দেখিনি। নিশ্চয়ই এখানে ত্রিভুবনমোহন মধুরমূর্তি কোন শ্রেষ্ঠ নাগর বিহার করেন।

পূর্বেই বলা হয়েছে যে, কৃষ্ণসম্বন্ধীয় বস্তু নায়িকার অন্তরে রতি এবং রতিবিষয়ক আলম্বনকে একই সঙ্গে অবিলম্বে প্রকটিত করে

তোলে। গোষ্ঠে প্রবেশ করেই নববধূ কৃষ্ণসম্বন্ধীয় বস্তুগুলি দেখতে পেল এবং সেগুলি দেখামাত্রই তার অন্তরে রতি এবং রতিবিষয়ক আলম্বনের অর্থাৎ শ্রীকৃষ্ণের কথা উদিত হলো।

প্রিয়জন

যে ব্যক্তি প্রগাঢ়ভাবে হৃদয়ে অনুবিন্দু হয়, এবং যার দ্বারা হৃদয় আক্রান্ত ও অধিকৃত হয়, তাকেই প্রিয়জন বলে। ১৫।

যথা—

শ্রীরাধাকে দেখে কোন নববধূ বললে—

‘রাধারে দেখিতে মোর গুরুজন নিবারিল বায়েবার।

তথাপি রাধারে দেখিলাম আমি সকল মাধুরী সার ॥

সেইদিন হতে তুষিত নয়নে চারিদিক পানে চাই।

শ্রামলবরণ একটি পুতলি তাহাতে দেখিতে পাই ॥’ ১৬।

উপমা

কোন বস্তুর সঙ্গে অন্তকোন বস্তুর কথঞ্চিৎ সাদৃশ্য থাকলে তাকে সেই বস্তুর উপমা বলা হয়।

যথা—

কোন গোপকুমারী রাজসভায় একজন নটের নৃত্য দেখে বললে—সখি। এই নট যার অনুকরণ ক’রে নৃত্য করছে, তার মত নবজলধরকাস্তি কোনো যুবা কি তোমার দৃষ্টিগোচর হয়েছে? তাহলে আমায় তার কাছে নিয়ে চলো। ১৭।

এখানে সাদৃশ্য দর্শনে নায়িকার মনে উপমান বা কৃষ্ণবিষয়ক রতি সঞ্চারিত হচ্ছে।

যথা বা—

কোন ব্রজবালার রতি-উৎপাদনের হেতু বর্ণনা ক’রে, বৃন্দা শ্রীকৃষ্ণকে বললেন—

‘কৃষ্ণতুল্য মেঘলেখা ইন্দ্রতুল্য শিখিপাখা বিহাৎ হয়্যাছে পীতাম্বর।

সে মেঘ দেখিয়া ধনি নয়নে বহিছে পানি ভাবে অঙ্গ হইল স্থিরভর ॥’

সেই ব্রজবালা নবজলধর দেখে, হে গোকুলেশ্বর!—এই কথা ব'লে, তোমার প্রতি অর্পিতচিন্তা হয়ে অবস্থান করছে। ১৮।

স্বভাব

যা বাহ্য কোন হেতুর অপেক্ষা না রেখে, স্বতই বা আপনা-আপনি প্রকটিত হয়, তার নাম স্বভাব। এই স্বভাব নিসর্গ এবং স্বরূপ ভেদে ছ'রকম। ১৯।

নিসর্গ

সুদৃঢ় অভ্যাসের জগু মনে যে সংস্কার গড়ে ওঠে, তার নাম নিসর্গ। গুণ, রূপ ও শ্রুতি থেকে এই সংস্কার উদ্ভূত হয়। জন্মান্তরের সংস্কার আপনা-আপনি প্রকাশ পায়। ২০।

গুণ-শ্রবণ নিমিত্ত স্বভাব

শ্রীকৃষ্ণের গুণাবলী শুনে আকৃষ্টা হয়ে, ক্লিষ্টা বলেছিলেন—
সখি! অগ্রজ আমায় তিরস্কার করেন, করুন। সুহৃদ্বর্গ যদি পরিত্যাগ করে, করুক। পিতা যদি লজ্জিত হন, হোন। মায়ের চোখে যদি জল পড়ে, পড়ুক। কিন্তু যাঁর সর্ববিধ রূপ ও গুণের কথা শুনেছি, স্বভাবতঃ সেই বদন্তমের প্রতিই আমার মন সর্বতোভাবে অমুরক্ত হয়েছে। চেদিরাজ্যের কোনো নরপতির প্রতি আমার চিন্তে কোন আকর্ষণ নাই। ২১।

‘তুনি কৃষ্ণের গুণগান ভুলিয়াছে মোর মন শিশুপালে করে ঘৃণাকার।
যে বল সে বল মোরে মোর মন যদুবরে কিছু না বলিহ মোরে আর ॥’

যথা বা—

ক্লিষ্টা নিত্যপ্রিয়সী। সেই জগু শ্রীকৃষ্ণ তাঁর স্বভাবসিদ্ধ রতি। কিন্তু অশু নায়িকার পক্ষেও রূপ ও গুণাদির কথা শুনে, শ্রীকৃষ্ণ বিষয়ে নৈসর্গিক রতির উদাহরণ দেওয়া হয়েছে। যেমন—

কোন ব্রজসুন্দরী তার সখীকে বললে—তিনি অসুন্দর হোন বা সুন্দরশ্রেষ্ঠই হোন, গুণহীন হোন বা গুণিশ্রেষ্ঠই হোন, আমার প্রতি তিনি বিদ্রোহ প্রকাশ করুন বা করুণার সাগরই হোন, তবুও আজ সেই শ্যামই আমার গতি। ২২।

স্বরূপ

কারণ না থাকলেও যা স্বতঃসিদ্ধভাবে চিন্তে রতিভাব সঞ্চার করে, সেই বস্তুবিশেষকে স্বরূপ বলে। এই স্বরূপ নির্ভাভেদে তিন প্রকার। যেমন—কৃষ্ণনিষ্ঠ, ললনানিষ্ঠ ও উভয়নিষ্ঠ। ২৩।

কৃষ্ণনিষ্ঠ যথা—

দৈত্যপ্রকৃতি ব্যতীত অশুভজনের পক্ষে কৃষ্ণনিষ্ঠ স্বরূপ অনায়াস-লভ্য। ২৪।

যথা—

কৌতুক বশতঃ শ্রীকৃষ্ণ একদিন নারীবেশ ধারণ ক'রে ব্রজ-বীথিকার পথে যাচ্ছিলেন। বিমানচারিণী দেবীগণ তাঁকে দেখে পরম্পর বললেন—প্রিয় সখি! ওই সম্মুখে যাঁকে দেখছি, উনি গোপী নন। নিশ্চয়ই শ্রীকৃষ্ণ নারীবেশ ধারণ করেছেন। নইলে, আমরা সুরদ্বী, ওই অপরূপ রূপ দেখে আমাদের মনও এমন চঞ্চল হয়ে উঠবে কেন! একমাত্র সূর্য ভিন্ন নিখিল বিশ্বে সর্বজনের নয়নের অঙ্ককার কে দূর করতে পারে? সে যোগ্যতা আর কার আছে বলো!

বাদের অসুর বা দৈত্যপ্রকৃতি নয়, অর্থাৎ যারা দিব্য প্রকৃতি-বিশিষ্ট তাদের অন্তর কৃষ্ণনিষ্ঠ হওয়ায় স্বতঃস্ফূর্তভাবে সেখানে কৃষ্ণপ্রীতি সঞ্চারিত বা উৎপন্ন হয়। তাই দেববালাদের মনে স্বতই শ্রীকৃষ্ণের স্বরূপ-অশুভব-জনিত সুখ উৎপন্ন হলো। ২৫।

ললনানিষ্ঠ স্বরূপ

ললনানিষ্ঠ স্বরূপ আপনা-আপনি উদ্দীপিত হয়, এবং এই স্বরূপ জন্মগত (Innate) ব'লে নায়কের বা শ্রীকৃষ্ণের রূপদর্শন বা গুণ শ্রবণ ছাড়াও তাঁর প্রতি অতিক্রান্ত রতি উৎপাদন করে । ২৬।

যথা—

শ্রীকৃষ্ণকে না দেখেই এবং তাঁর গুণাগুণের কথা সম্যক্ না শুনেই অতিদূরবর্তিনী কোন নায়িকার অথবা শ্রীরাধার মনে কৃষ্ণের প্রতি রতি সঞ্চারিত হলো। তাঁর অগ্ন্যমনস্কতার কারণ জিজ্ঞেস করলে, তিনি সখীকে বললেন—

‘নাহি দেখি নাহি শুনি হেন যে পুরুষমণি মোর মন করে সন্তানন ।

ঘনশ্রাম পীতাহরে সঙ্কল্প করিয়া তারে বুখাই ঘুরয়ে মোর মন ॥’

উভয়নিষ্ঠ স্বরূপ

নায়কের প্রতি নায়িকার এবং নায়িকার প্রতি নায়কের এই প্রকার স্বভাবনিষ্ঠা যদি উভয়তঃ হয়, তাহ'লে তাকে উভয়নিষ্ঠ বা কৃষ্ণ-ললনানিষ্ঠ স্বরূপ বলে ।

যথা—ললিতমাধবে

ললিতার প্রতি শ্রীরাধার উক্তি :

‘দ্বিজ বেশ ধরি রবি পুজিবারে বুঝি সে নাগর এল ।

নহে কেন মোর তহু পুলকিত অন্তর ত্রিবিয়া গেল ॥

গগন মাঝারে শশধর যদি উদয় নাহিক করে ।

চন্দ্রকান্তমণি কেন বা গলিবে বন্ধন না কর মোরে ॥’ ২৭ ॥

বিলাসের আধিক্য বর্ণনা প্রসঙ্গে এখানে আভিযোগ অর্থাৎ রূপ, গুণ ও অমুভব প্রভৃতি উদ্দীপনের কথা বলা হলো। কিন্তু শ্রীকৃষ্ণের প্রতি ব্রজসুন্দরীদের রতি প্রায়ই স্বভাবসিদ্ধ । ২৮ ।

রত্নের তারতম্য

তারতম্য-ভেদে রতি তিন শ্রেণীর হতে পারে। যেমন—সাধারণী, সমঞ্জসা ও সমর্থী। রত্নের সঙ্গে তুলনা করলে, পর্যায়ক্রমে মণি, চিন্তামণি ও কৌশ্তভমণির সঙ্গে এই ত্রিবিধ রত্নের তুলনা করা যায়।

সাধারণী রত্নও অতিমূল্যবান নয়, তাই মণির সঙ্গে তার তুলনা করা হয়েছে। কুজা প্রভৃতির কৃষ্ণপ্রেম সাধারণী রত্নের পর্যায়ভুক্ত।

সমঞ্জসা রত্ন চন্দ্রকান্তমণি, অর্থাৎ আরো হ্রলভ। তাই কৃষ্ণ-মহিষীগণ ভিন্ন অস্ত্র কারো পক্ষে সমঞ্জসা রত্ন সম্ভব নয়।

আর সমর্থী রত্নের তুলনা করা হয়েছে কৌশ্তভমণির সঙ্গে। কৌশ্তভমণি যেমন ত্রিভুবনে সুহ্রলভ, একমাত্র শ্রীকৃষ্ণের হৃদয়েই শোভিত, তেমনি সমর্থী রত্ন একমাত্র ব্রজগোপাঙ্গনা ভিন্ন অস্ত্র কোন নায়িকার পক্ষে সম্ভব নয়। ২৯।

সাধারণী রত্ন

এই রত্ন কখনো অতিনিবিড় হয় না; প্রায় শ্রীকৃষ্ণকে অর্থাৎ নায়ককে দেখেই সজ্জাত হয়। নায়ককে দেখে বা তাঁর সংস্পর্শে এসে, যে ভালবাসা সন্তোষ-ইচ্ছা জাগ্রত করে, তাকেই সাধারণী রত্ন বলে। ৩০।

যথা—শ্রীমদ্ভাগবত দশমে

সম্ভুক্তা হয়েও শ্রীকৃষ্ণের প্রতি রতিবিশিষ্টা হয়ে কুজা বললে—হে বাহিত! এখানে আরো কিছুদিন আমার সঙ্গে বাস করো এবং রতিজীড়া করো। হে পদ্মলোচন! তোমায় ছাড়তে আমার প্রাণ চায় না। ৩১।

প্রণয়ের গাঢ়তার অভাব হেতু, কুজার অন্তরে যে রতি তা স্পষ্টতঃ সন্তোষ ইচ্ছা ছাড়া আর কিছুই নয়। এই শ্রেণীর রত্নিতে সন্তোষ

বাসনা হ্রাস পেলেই আকর্ষণ হ্রাস পায়। সুতরাং এ ক্ষেত্রে সম্ভোগেচ্ছাই রতি উৎপত্তির হেতু। তাই এই রতিকে সাধারণী রতি আখ্যা দেওয়া হয়েছে (Voluptuous attraction)। ৩২।

সমঞ্জসা রতি

যেখানে পত্নীত্বের অভিমান থাকে, গুণাদি শুনে রতি উৎপন্ন হয়, প্রণয় নিবিড় অথচ কখনো কখনো সম্ভোগেচ্ছা বা সম্ভোগের তৃষ্ণা থাকে, সেখানে রতি সমঞ্জসা। ৩৩।

যথা—শ্রীমন্তাগবত দশমে

শ্রীকৃষ্ণের নিকট রুক্মিণী লিখে পাঠালেন—হে মুকুন্দ! তুমি কুল-শীল-রূপ-বিদ্যা-বয়স-সম্পদ ইত্যাদি সর্ববিষয়ে অতুলনীয়। তুমি বিশ্বজনের মনোভিরাম। কোন্ বুদ্ধিমতী কুলবতী কণ্ঠা তোমায় পতিত্বে বরণ করবার অভিলাষ না করে।। ৩৪।

সমঞ্জসা রতিতে যখন সম্ভোগেচ্ছা প্রবল হয় এবং পৃথকরূপে প্রতীয়মান হয়, তখন হাবভাবের দ্বারা শ্রীকৃষ্ণকে বশীভূত করা কঠিন হয়। সমঞ্জসা নায়িকা যদি শুধুমাত্র রমণেচ্ছাজ্ঞাপক হাবভাবের সাহায্যে নায়ককে আকর্ষণ করবার চেষ্টা করে, তা হলে নায়কের চিন্তা আকৃষ্ট না হয়ে প্রায়ই বিমুখ হয়। ৩৫।

পত্নীপ্রেমের নিবিড়ত্ব ও সেই সঙ্গে সময়োচিত সম্ভোগেচ্ছার সমঞ্জস সংমিশ্রণকে সমঞ্জসা রতি বলা হয়।

যথা—

শ্রীমন্তাগবত দশম স্কন্ধে শুকদেব পরীক্ষিতকে বলেছেন—রাজন্ বোড়শসহস্র পত্নীও তাঁদের গুঢ় হাসি, কটাক্ষ এবং ক্রভঙ্গিমা প্রভৃতি কামশাস্ত্র-প্রসিদ্ধ হাবভাবের দ্বারা শ্রীকৃষ্ণের মনে কাম সঞ্চারিত করতে সমর্থ্য হন নি। তাঁদের সুরতবিষয়ক কুশলী অনঙ্গবাণ ব্যর্থ হয়েছিল। ৩৬।

সমর্থা রতি

সাধারণী এবং সমঞ্জসা রতির চেয়ে কিছুটা অন্তরকম সম্ভোগেচ্ছা বাতে নায়ক এবং নায়িকা একীভূত ভাব প্রাপ্ত হয়, তাকে সমর্থা রতি বলে। ৩৭।

স্ব স্ব রূপের সমন্বয়ে অথবা ললনানিষ্ঠ স্বভাবের জ্ঞাত কৃষ্ণ সম্পর্কিত বিষয়ের সঙ্গে নায়িকার সংযোগ ঘটলে, সমর্থা রতি উৎপন্ন হয়। এই রতি উৎপন্ন হলে, নায়িকা তার কুল-মান-ধর্ম-ধৈর্য-লজ্জাদি সবকিছু বিস্মৃত হয়। এই রতি এত নিবিড় হয় যে, তাতে আর কোনো ভাবান্তরভেদ থাকে না। ৩৮।

এখানে নায়িকা কৃষ্ণপ্রেমে উন্মত্তা হয়ে, কুল-মান-লজ্জা প্রভৃতি সবকিছু বিসর্জন দিয়ে, নিজেকে নিবেদন করে দয়িতের নিকট। সমর্থা রতিতে নায়িকার স্বতন্ত্র সত্তা থাকে না। আপন প্রেমে সে আপনাকে পূর্ণাঙ্গীত দেয়। এই সমর্থা রতিই (Selfless love) শ্রেষ্ঠ রতি এবং এই রতি একমাত্র ব্রজদেবীগণের ভিতরেই মূর্ত হয়েছে।

যথা:—

বৃন্দা ত্রীকৃষ্ণকে বললেন—

‘ত্রিভুবনে বস নারী রাধা হয় সর্বোপরি দেখি সেই রূপের তরঙ্গ।

তোমার কথা মনোহারী গুরুজন শঙ্কা করি তার কাছে না করে প্রসঙ্গ ॥

পথে চলে যাও তুমি হয় নৃপূরের ধনি সেই ধনি শুনিয়া কিশোরী।

কখনো যা না শুনিল তার কর্ণে না কহিল উঠে রাধা ‘কৃষ্ণ কৃষ্ণ’ করি ॥’

তোমায় না দেখেও, তোমার কথা না শুনেও, শুধুমাত্র তোমার নৃপূরের ধনি শুনে তোমার সঙ্গে যেটুকু যোগাযোগ ঘটলো, তাতে ত্রীমতী গুরুজনের গৌরব ভুলে গিয়ে, আপন প্রশয়নিষ্ঠ স্বরূপ হেতু ‘কৃষ্ণ কৃষ্ণ!’ বলে নিবিড়-রতিবিশিষ্টা হয়ে উঠলেন। ৩৯।

‘অদন্ত বিলাস ইহা অতি চমৎকার।

সম্ভোগেচ্ছা বিশেষের ভেদ নাহি তার ॥’

সবচেয়ে অদ্ভুত এই যে, এই রতি কখনো সন্তোগেচ্ছা-বিশেষ ভেদে হয় না। শুধুমাত্র কৃষ্ণের সুখের জন্মই সমর্থ্য রতির এই উত্তম প্রকাশ পায়। ৪০।

পূর্বোক্ত সমজ্ঞসা রতিতে কখনো কখনো আত্মসুখের উত্তম সম্ভব হয়। ৪১।

যেমন—ক্লান্তিগী দেবীর পত্র পেয়েই শ্রীকৃষ্ণ বিদর্ভনগরে গিয়েছিলেন।

সত্যভামার আনন্দবিধানের জন্ম তিনি পারিজাত আহরণ করে এনেছিলেন।

মহাভাব

সমর্থ্য রতি প্রৌঢ় (mature) হলে মহাভাবদশাপ্রাপ্তি ঘটে। এইজন্ম মুক্ত এবং প্রধান ভক্তগণ সমর্থ্য রতির সাধন করতে চান। কিন্তু সহজলভ্য হয় না। ৪২।

যথা—

শ্রীমদ্ভাগবত দশমস্কন্ধে :

উদ্ধব বললেন—পৃথিবীতে এই সব গোপাঙ্গনাদের জন্মই সার্থক। কেন না, তাঁরা অখিলাত্মা গোবিন্দের প্রতি এই প্রকার প্রেমবিশিষ্টা হয়েছেন। এই প্রেম সামান্য নয়। মুনিগণ মুক্ত হয়েও এই প্রেম বাঞ্ছা করেন। আমরা সকলেই করি। এই অনন্ত ভগবানের কথায় যিনি রসাস্বাদন করেন, তাঁর ব্রহ্মজন্মে প্রয়োজন কি ?। ৪৩।

প্রেম, স্নেহ ইত্যাদি

সমর্থ্য রতিকে যদি প্রতিকূল ভাব বিচলিত করতে না পারে, তাহলে তাকে প্রেম বলে। প্রেম যথাক্রমে স্নেহ, মান, প্রণয়, রাগ, অহুরাগ ও ভাবরূপে পরিণত হয়। ৪৪

যুক্তিকায় রোপিত ইক্ষুগ্রন্থি থেকে যেমন ইক্ষুদণ্ড জন্মায়, তারপর সেই ইক্ষু থেকে রস, রস থেকে গুড়, খণ্ড, শর্করা ইত্যাদি যথাক্রমে

উৎপন্ন হয়, তেমনি রতি থেকে প্রেম, প্রেম থেকে রাগ, রাগ থেকে অমুরাগ এবং অমুরাগ থেকে মহাভাব ইত্যাদি যথাক্রমে ধীরে ধীরে উৎপন্ন হয়।

পণ্ডিতগণ স্নেহাদি ছয়টি ভাবকেই প্রায় প্রেম অর্থে ব্যবহার করে থাকেন। ৪৫।

সমর্থা-রতিবিশিষ্টা প্রেয়সীর যে জাতীয় প্রেম শ্রীকৃষ্ণের প্রতি সজ্জাত হয়, শ্রীকৃষ্ণেরও সেই জাতীয় প্রেম সেই নায়িকার প্রতি সঞ্চারিত হয়।

প্রেম

ধ্বংসের কারণ থাকা সত্ত্বেও যার ধ্বংস হয় না, নায়ক-নায়িকার পরস্পরের প্রতি সেই ভাববন্ধনকে প্রেম বলে।

যুবক-যুবতী, নর ও নারী, নায়ক এবং নায়িকা—উভয়ের অন্তরে পরস্পরের প্রতি যে-ভাব ধ্বংসের কারণ থাকা সত্ত্বেও কখনো ধ্বংস হয় না, অর্থাৎ সকল অবস্থায় স্থায়ী হয়, তাকে প্রেম বলে।

‘সর্বথা ধ্বংসরহিতং সত্যপি ধ্বংসকারণে ॥

যন্তাববন্ধনং যুনোঃ স প্রেমা পরিকীর্তিতঃ ॥’ ৪৬ ॥

যথা—

পূর্বরাগবতী শ্রীরাধা নান্দীমুখীকে বললেন—সখি! তুমি যদি আমার কথা বিশ্বাস না করো, তা’হলে ধর্মের নামে শপথ ক’রে বলতে পারি যে, আমি শ্রীকৃষ্ণকে বলেছিলাম—‘হে লম্পট, আমার কাঁচুলিতে হাত দিও না। যদি দাও, আমি লজ্জাসরম ত্যাগ ক’রে নন্দিনীকে বলে দেবো।’ কিন্তু ভয় দেখিয়ে নিরস্ত করবার চেষ্টা করলেও তিনি আমার পথ ছাড়েন নি। অতএব হে প্রিয়সখি, আমি ঘোর বিপদে পড়েছি। গৃহপতি শাস্তি দিলে, দিন। আমার অন্তকোন উপায় নাই।

এখানে, ভয় দেখালেও শ্রীকৃষ্ণ নিরস্ত হচ্চেন না; গৃহস্বামী শাস্তি দিলেও, শ্রীরাধা সেই শাস্তি ভোগ করতে প্রস্তুত, তবুও অশ্রু কোন উপায় তিনি অবলম্বন করতে পারেন না। এই উদাহরণের দ্বারা এই কথাই প্রকাশ পায় যে, ধ্বংসের কারণ (ভীতি ও শাস্তি) থাকা সত্ত্বেও পরস্পরের ভাববন্ধন ধ্বংস হচ্ছে না। সুতরাং শ্রীরাধার প্রতি শ্যামের ও শ্যামের প্রতি শ্রীরাধার উভয়নিষ্ঠ প্রেম প্রকাশ পাচ্ছে। ৪৭।

যথা বা—

বৃন্দা কুন্দলতাকে বললেন—সখি! শ্রীরাধার অসামান্য রূপ, অনুরাগ ও সদৃশাবলীর তুলনায় অশ্রু কাস্তা তুচ্ছ। তবুও চন্দ্রাবলী এবং কৃষ্ণের পরস্পরের প্রতি যে ভাবক্রম, তা কখনো ম্লান হয় না। কি আশ্চর্য!

শ্রীরাধার রূপ, গুণ এবং অনুরাগ চন্দ্রাবলীর কৃষ্ণানুরাগ ধ্বংস করবার পক্ষে যথেষ্ট হলেও, তার সে অনুরাগ বা ভাবক্রম ধ্বংস হচ্ছে না। এই অনুরাগ প্রেম। প্রকৃত প্রেম যখন সঞ্চারিত হয়, তখন নায়ক অশ্রু নায়িকার প্রতি আকৃষ্ট হলেও সে প্রেম ধ্বংস হয় না। মান, বিচ্ছেদ, কলহ ও প্রবঞ্চনা প্রভৃতি সর্ববিধ কারণ থাকা সত্ত্বেও নায়ক ও নায়িকার এই ভাববন্ধন শিথিল হয় না।

প্রেমভেদ

প্রেমকে তিনটি পর্যায়ে ভাগ করা যায়। যথা—প্রোঢ়, মধ্য ও মন্দ। নিবিড়তার তারতম্য অনুযায়ী প্রেমের এই তিনটি ভাগ নির্ণয় করা হয়েছে।

প্রোঢ় প্রেম

বিলম্বেও যখন প্রিয়জনের চিন্তাবৃত্তি জানা যায় না, এবং নায়িকার মনোভাব জানতে না পারায় নায়কের চিন্তে ক্লেশ সঞ্চারিত হয়, তখন তাকে প্রোঢ় প্রেম বলে।

কাল অতীত হলেও যখন নায়ক এসে নায়িকার সঙ্গে মিলিত হন না, এবং তার জন্ত নায়িকার চিন্তে ক্লেশ সঞ্চারিত হয়, তখন তাকেও প্রৌঢ় প্রেম বলে।

তবে উভয় ক্ষেত্রেই একজন অপরের ক্লেশের কথা চিন্তা ক'রে উদ্ভিগ্ন হয়। প্রেম ভিন্ন এই পারস্পরিকতা (reciprocity) থাকে না, এবং মমত্ব বিবেচনায় এই প্রৌঢ় থাকে ব'লেই একে প্রৌঢ় প্রেম বলা হয়। ৪৮।

যথা—

শ্রীকৃষ্ণ মধুমঙ্গলকে বলেছিলেন :

‘হে সখা নিকুঞ্জে বাহ বাঞ্ছা রাধিকারে কহ আমার মুখের এক বাণী।
আমার বিলম্ব দেখি মনে না হইও দুঃখী তিলেক বিলম্বে যাব আমি ॥
এথা এক মহামত্ত আসিয়াছে ছুট দৈত্য আমি তায় করি বিনাশন।
মিলিব গা প্রিয়াসঙ্গে করিব অনেক রঙ্গে উৎকণ্ঠিত আছে মোর মন ॥’

মধ্য প্রেম

যে প্রেমে নায়ক অশ্রুকোন কান্তার জন্ত অপেক্ষা করছেন জেনেও নায়িকা অধীরা হয় না, সহ্য করে, সে প্রেমকে মধ্যম বা মধ্য প্রেম বলে। ৪৯।

যথা—

চন্দ্রাবলীর সঙ্গে সম্ভোগরত শ্রীকৃষ্ণ বললেন—অহো ! সর্ববিয়মে মনোহারিণী চন্দ্রাবলীকে এখন লাভ করেছি, এবং তার সঙ্গে শারদ রাত্রির উপযুক্ত সম্ভোগ ক্রীড়া পর্যাপ্ত ভাবে করলাম—যে ক্রীড়াতরঙ্গ দেখে কন্দর্পসেনাও চমৎকৃত হয়েছে। এখন আমার চিন্তা অপেক্ষা করছে। শ্রীরাধার জন্ত।

চন্দ্রাবলীর সঙ্গে মিলনকালে শ্রীরাধার কথা মনে উদ্ভিত হচ্ছে। এক্ষেত্রে চন্দ্রাবলীর প্রতি শ্রীকৃষ্ণের প্রেম মধ্যম। তবে অশ্রু নায়িকার সঙ্গে তুলনা করলে, চন্দ্রাবলীর প্রতি শ্রীকৃষ্ণের প্রেম প্রৌঢ়।

একমাত্র শ্রীরাধা ব্যতীত অশ্রু নায়িকা সম্ভোগকালে চন্দ্রাবলীর কথা শ্রীকৃষ্ণের মনে উদিত হতে পারে। কিন্তু শ্রীরাধার সঙ্গে মিলন কালে অশ্রু নায়িকার কথা তাঁর মনে উদিত হয় না; এমন কি, চন্দ্রাবলীর কথাও মনে পড়ে না। সুতরাং শ্রীরাধার প্রতি তাঁর প্রেম সর্বাধিক প্রোঢ়। শ্রীরাধা তাঁর প্রিয়সখী কমলার প্রতি অতিশয় শ্রীতিসম্পন্ন ব'লে, কমলার নিকট অভিসারকালে তিনি শ্রীরাধাসঙ্গমের সমতুল সুখানুভব করেন, এবং তখনো চন্দ্রাবলীর কথা তাঁর মনে উদিত হয় না। অতএব শ্রীরাধা এবং তাঁর অতিপ্রিয় সখী কমলা প্রভৃতির ক্ষেত্রে শ্রীকৃষ্ণের প্রেম সমধিক প্রোঢ়। তবে রাধা-প্রেমের তুলনায় সখীদের প্রেম মধ্যম।

মন্দ প্রেম

সর্বদা আত্যন্তিকরূপে পরিচিত থাকলেও, যে প্রেম অশ্রু কান্ত্যাকে উপেক্ষা করে না, বা তার অপেক্ষাও করে না, তাকে মন্দ প্রেম বলা যায়। ৫০।

বৃন্দাবনে মন্দ প্রেমের উদাহরণ বিরল। সেই হেতু দ্বারকায় এতাদৃশ প্রেমের উদাহরণ দেওয়া হলো।

যথা—

পুরোহিতপত্নী শ্রীকৃষ্ণকে বললেন : হে নাথব! যে প্রেমবতী নায়িকা, তার প্রতি বিন্দুমাত্র উপেক্ষাও দোষের। অতএব সত্যভামার সখী মানিনী অশোকলতাকে অমুনয় করে নিয়ে এসো। ৫১।

এখানে অশোকলতার প্রতি শ্রীকৃষ্ণের প্রেম যে মন্দ, তাই প্রমাণিত হচ্ছে। নিজে থেকে শ্রীকৃষ্ণ তার সঙ্গ-কামনা করছেন না। তার প্রতি শ্রীকৃষ্ণের কথঞ্চিৎ অনাদর বা উপেক্ষাই প্রকাশ পাচ্ছে। তাই পুরোহিতপত্নী অমুরোধ ক'রে শ্রীকৃষ্ণের সঙ্গে নায়িকার যোগাযোগ স্থাপনের চেষ্টা করছেন।

প্রেমসীদের বিষয়ে যেমন শ্রীকৃষ্ণের প্রেমভেদ দেখানো হলো, তেমনি শ্রীকৃষ্ণ বিষয়েও প্রেমসীদের প্রেমভেদ আছে।

প্রৌঢ় প্রেম

যাতে বিচ্ছেদের অসহিষ্ণুতা থাকে, তাকে প্রৌঢ় প্রেম বলে। ৫২।

শ্রীকৃষ্ণের সঙ্গে বিচ্ছেদের কথা ভাবতে যেখানে নায়িকার ধৈর্যচ্যুতি ঘটে, সেখানে তার প্রৌঢ় প্রেমের নিদর্শন পাওয়া যায়।

যথা—উদ্ধবসম্মেশে

ললিতা শ্রীমতীকে বললেন—সখি! তুমি মান ত্যাগ করে না। এই কথা শুনে, শ্রীমতী ললিতাকে বললেন—প্রিয়সখি! বারবার তুমি আমায় মান ক’রে থাকতে বলছো। বেশ, তা’হলে তুমি চিত্রফলকে কংসারির মনোহর মূর্তি অঙ্কিত করে এনে আমায় দাও। আমি অহঙ্কারের সঙ্গে মহামানিনী হয়ে গৃহকোণে বসে পরম সুখে সেই মূর্তি দেখে মুহূর্ত যাপন করবো। কর্ণকুহর রুদ্ধ করে রাখবো, যাতে তাঁর মধুর মুরলীধ্বনি আমার কর্ণে প্রবেশ না করে। নইলে আমি বিচ্ছেদ সহ্যে পারবো না।

মধ্য প্রেম

যাতে কষ্টেসৃষ্টে ধৈর্যসংবরণ করা হয়, তার নাম মধ্যপ্রেম। ৫৩।

যথা—

কোন যুগেশ্বরী তাঁর সখীকে বললেন—

‘এই ত দীর্ঘ দিন কখন হইবে ক্ষীণ সন্ধ্যাকাল হইবে কখন।

বাহাতে কৃষ্ণের মুখ দেখিয়া পাইব স্তম্ভ বনে হতে আসিবে যখন।’

কষ্টেসৃষ্টে এই দীর্ঘ দিন অতিবাহিত হলে, সন্ধ্যা আসবে। তখন সেই ব্রজেন্দ্রনন্দনের গোধূলিধূসর-কেশদামযুক্ত মূর্তি এবং মধুর যুগ্মহাস্যশোভিত মুখচন্দ্রিমা দেখতে পাবো। ৫৪।

মন্দ প্রেম

যে প্রেমে কোন-কোন সময়ে বিস্মৃতি ঘটে, তাকে মন্দ প্রেম বলে । ৫৫ ।

যথা—

কোন যুথেশ্বরী তাঁর সখীকে বললেন—সখি ! প্রতিপক্ষ নারীর প্রতি ঈর্ষাহেতু আমি তার কথাই ভাবছিলাম, তাই বনমালা গাঁথতে ভুলে গিয়েছি। এখন কি হবে ! ওই খেজুরগণের হাঙ্গারব শোনা যাচ্ছে, ত্রীকৃষ্ণ গোর্ষ্ঠ থেকে ফিরে আসছেন। আমার বনমালা যে এখনো গাঁথা হলো না !

এখানে ঈর্ষার জন্ম প্রেমের একাগ্রতায় বিঘ্ন ঘটেছে। সেই হেতু এই প্রেমকে মন্দ প্রেম বলা হয়েছে। কিন্তু নায়িকার অন্তরের আকুতি থেকে স্পষ্টই প্রতীয়মান হচ্ছে যে, ধ্বংসের কারণ (ঈর্ষা) থাকার সত্ত্বেও অল্পভব ধ্বংস হয়নি। তাই নায়িকার প্রেমকে অস্বীকার করা যায় না। প্রেমের প্রধান লক্ষণ এখানে বিদ্যমান। ৫৬।

স্নেহ

যে প্রেম পরম-উৎকর্ষে উপনীত হয়ে, নায়িকার চিত্তদীপ প্রজ্জ্বলিত করে এবং হৃদয় জ্বলিত করে, তাকে স্নেহ বলে।

স্নেহ উদ্ভিত হ'লে, শুধুমাত্র চোখের দেখায় তৃপ্তি হয় না। ৫৭।

যথা—ক্রমদীপিকায়

ত্রীকৃষ্ণের কমনীয় এবং অতিমধুর অমৃতরসময় রূপপানে বাদের লালসা, তাদের সে রূপস্থাপানে আশা মেটে না। তাঁর প্রেমভার বহনে গোপসুন্দরীরা শ্রান্ত হয়ে, তাঁর চঞ্চল লোচনপদ্ম হতে প্রবাহিত প্রণয়-সলিল-রাশি উপভোগ করে, কিন্তু তাতেও তারা তৃপ্ত হয় না। লোকধর্ম ও নিন্দার ভয়ে তাদের অল্পভব কখনও ধ্বংস হয় না। ৫৮।

যথা বা—

বৃন্দা শ্রীরাধাকে বললেন :

‘কৃষ্ণের বদনবিধু তাহার কিরণসীধু তাহে রাধা নয়ন চকোর ।

পুনঃ পুনঃ পান করে তবু নাহি ছাড়ে তারে সীধুপানে হইয়াছে ভোর ॥

অভূত লাগিল সেই মাধুরী দেখিয়া ।

কণ্ঠভরি সুধা খায় অশ্রুজলে উগরায়, তবু গীয়ে উন্নত হইয়া ॥’

অঙ্গসজ্জ, অবলোকন ও শ্রবণ ক্রমানুযায়ী মনোদ্রব বা স্নেহ তিন প্রকার । যথা—কনিষ্ঠ, মধ্যম ও জ্যেষ্ঠ । ৫২ ।

অঙ্গসজ্জে মনোদ্রব

যথা—

পালীর সখী শ্রীকৃষ্ণকে বললে :

‘ঘনরসরূপ তুয়া তহুখানি যাহার পরশ পাঞা ।

লাবণিয়া পালী মনেতে জবিল বিলাসে কোতুকী হঞা ॥’

তুমি ঘনরসের স্বরূপ, পালীর লাবণ্যরসময়ী মূর্তি । তোমার আলিঙ্গনে সে কেন দ্রবীভূত হবে না ! । ৬০ ।

অবলোকনে বা বিলোকনে মনোদ্রব

যথা—

শ্রামার সখী বকুলমালা শ্রীকৃষ্ণকে বললে :

‘তুয়া মুখ পদ্মস্বরূপ শ্রামার হৃদয় ঘুত দ্রবীভূত হইবারে পারে ।

দেখি শ্রামার মুখচন্দ্র তুয়া মন চন্দ্রকান্ত না গলিলে চিত্র লাগে মোরে ।’

হে কৃষ্ণ ! শ্রামার হৃদয় স্নাতসদৃশ, স্নতরাং তোমার মুখমণ্ডলের দিকে চেয়ে, তা দ্রবীভূত হতে পারে । সেটা আশ্চর্য নয় । কিন্তু আশ্চর্য এই যে, শ্রামার মুখচন্দ্রিমা প্রকাশিত হলে, তোমার চিত্তরূপ চন্দ্রকান্তমণি দ্রবীভূত হয়ে জলধারায় পরিণত হচ্ছে । শ্রামা সন্দর্শনে তোমার চিত্ত স্থির ও শুদ্ধ হয়ে আসছে । অর্থাৎ শ্রামাকে দেখে তুমিও অতিশয় বিমোহিত হয়েছ ।

শ্রবণে মনোজব

যথা—

বিশাখা শ্রীকৃষ্ণকে বললে :

হে মুরারি ! তোমার নামার্থ কানে প্রবেশ করলেই, চোখের জলে শ্রীরাধার বুক ভেসে যায়। মদনমধুতে বিভোরা হয়ে, শ্রীমতী বিমূঢ়া হন। সেই কুবলয়াক্ষী কখনো স্থলিতবসনা হন, কখনো বা জন্তুণ করেন। ৬১।

স্মরণ-হেতু মনোজব

যথা—

হঠাৎ শ্রীরাধাকে অশ্রুপ্লুতা দেখে, নান্দীমুখী বললে :

‘কৃষ্ণচন্দ্র করি মনে বসিয়াছ স্বভবনে তেই তহু কাঁপিছে সঘনে।

তোমার স্নেহ অতিশয় তাথে মন জব হয় ইহা আমি বুঝিয়াছি মনে ॥’

স্বরূপ অনুযায়ী স্নেহ দু’রকম—ঘৃত এবং মধু, অর্থাৎ ঘৃত-স্নেহ ও মধু-স্নেহ। এক শ্রেণীর স্নেহকে ঘৃতের সঙ্গে তুলনা করা যায়, অণু শ্রেণীর স্নেহ মধুর সঙ্গে তুলনীয়। ৬২।

ঘৃত-স্নেহ

যে স্নেহ অত্যন্ত আদরময়, তাকে ঘৃতস্নেহ বলে। ৬৩।

ভাবাস্তরের সঙ্গে মিলিত হ’লে ঘৃত-স্নেহের মাধুর্য বৃদ্ধি হয়। এই স্নেহ আপনা-আপনি স্বাছতা লাভ করে না। পরস্পরের আদর জনিত স্নিগ্ধতা বা শীতলতায় এই স্নেহ ঘনীভূত হয়। প্রগাঢ় আদরে এই স্নেহের পুষ্টি হয় ব’লে একে ঘৃত-স্নেহ বলা হয়েছে। ৬৪।

যথা—

পদ্মা বললে :

দূর থেকে যাকে দেখে, শ্রীকৃষ্ণ স্বয়ং আদর জানিয়ে নিজে উঠে গিয়ে আলিঙ্গন করেন, এবং যে নায়িকা নিজেও পবিত্র নিবিড় স্নেহে

শ্রীকৃষ্ণকে বশীভূত ক'রে রেখেছে, এবং কেলিবৃষ্টিতে সিতোপলার (ওলার) মত অতিদ্রুত বিগলিত হয়ে যায়, সেই চন্দ্রাবলীর সঙ্গে কার তুলনা হয়।

এই উদাহরণে মধু-স্নেহের প্রতি কটাক্ষ করা হয়েছে। ৬৫।

নিম্প্রয়োজন বোধে স্নত-স্নেহের দ্বিতীয় উদাহরণ এখানে বিস্তৃতভাবে দেওয়া হলো না। মর্মমাত্র উল্লিখিত হলো। যথা—

পুনর্বীর নৃত্যের জন্তু রাসমণ্ডলে দাঁড়িয়ে, শ্রীকৃষ্ণ চন্দ্রাবলীর বাঁ হাতখানি আপন স্বন্ধে রাখলেন। চন্দ্রাবলী সে হাতখানি সরিয়ে নিয়ে মাথবের স্বন্ধে ডানখানি রেখে, মদনাবেশে বিগলিতা হলো। তাই দেখে, শ্রীমতীর কোন যুবতী সখী হেসেছিল। ৬৬।

গৌরব

যদিও গৌরব থেকে আদর উৎপন্ন হয়, তবুও এই ছুটি স্নেহ পরস্পরের আশ্রিত। রতি বিষয়ে আদর থাকলেও, স্নেহ বিষয়ে সেটা আরও স্পষ্ট। ৬৭।

মধু-স্নেহ

প্রিয়ে, তুমি আমারই। কিংবা, আমার কৃষ্ণ।

নায়ক ও নায়িকার পরস্পরের প্রতি এই ধরণের আচরণে যে স্নেহ পরিবেশিত হয়, তার নাম মধু-স্নেহ। ৬৮।

‘সহজে মধুর নানা রস সমাহার।

যদি উন্মাদ ধরে সেই মধু সাম্যে তার।’

যার মাধুর্য আপনা আপনি প্রকাশ পায়, সূক্ষ্মভাবে যে অল্পভব নানারস-সমন্বিত এবং যা উষ্ণতা ও মত্ততা সঞ্চার করে, তার নাম মধু-স্নেহ। ৬৯।

যথা—

শ্রীকৃষ্ণ সুবলকে বললেন :

‘স্নেহময় মাধুৰ্য সার তাহাতে নির্মাণ যার হেন রাধা সুধার প্রতিমা ।

গুণ সংখ্যা নাহি তায় ভাব-উন্মাদা সদা গায় কিবা দিব তাহার উপমা ॥

সুবল, রাধা মোর মন হরি নিল ।

যার নাম কর্ণপথে অর্ধমাত্র প্রবেশিতে সব মোর বিশ্বাসি হইল ॥’

যা মধুর, তার মাধুৰ্য প্রকাশে অশ্রু বস্তুর প্রয়োজন হয় না ।
শ্রীরাধা স্বয়ং মধুরা । মধু যেমন নানা পুষ্পের সুধাসমন্বয়ে সমৃদ্ধ,
শ্রীরাধাও তেমনি নানাগুণের সমন্বয়ে পরিপূর্ণা । তাই শ্রীরাধার
স্নেহ মধু’র মতো মাদক ও উত্তেজক, এবং সেই অল্পপমা নিবিড়
আনন্দময়ীর সংস্পর্শে শ্রীকৃষ্ণ জগৎ বিস্মৃত হন । ৭০ ।

মান

যে স্নেহ উৎকর্ষ লাভ ক’রে নবতম মাধুৰ্য আশ্বাদন করায়, এবং
নিজেকে আচ্ছাদন করবার জন্য অদাক্ষিণ্য ধারণ করে, অর্থাৎ বাম
হয়, তাকে মান বলে ।

যথা—

শ্রীকৃষ্ণের সঙ্গে বনবিহারকালে আপন স্নেহ-প্রাচুর্যে শ্রীমতী
বিগলিতা হয়েছিলেন । তাঁর নয়নে অশ্রুধারা প্রবাহিত হচ্ছিল ।
তাই দেখে, শ্রীকৃষ্ণ তাঁর চোখে ফুঁ দিতে লাগলেন । স্নানরী ক্রকুটি
ক’রে মুখ ফিরিয়ে নিয়ে বললেন—তোমার গাভীদের পায়ের ধুলো
উড়ছে । সেই ধুলো আমার চোখে প’ড়ে চোখ কড়কড় করছে ।
এখন আর ফুঁ দিয়ে কি হবে ?

তাৎপর্য : থাক, ছুঁখ দিয়ে আবার কপট ভালবাসা দেখানো
কেন ? খুব হয়েছে, এখন আর দরদ দেখাতে হবে না ।

শ্রীমতীর এই প্রকার উক্তি ও নিবিড় স্নেহ-পরিবেশের মাঝখানে
হঠাৎ ক্রকুটি সহকারে বামা হওয়ায়, মান প্রকাশিত হলো ।

এই মান ছ’রকমের হয়, উদাস্ত ও ললিত । ৭১ ।

উদাস্ত মান

মৃত-স্নেহ থেকে উদাস্ত মানের উৎপত্তি হয়। উদাস্ত মান আবার দু'প্রকারের। প্রথম, এই মান কোনক্ষেত্রে গহনক্রম বা হৃবোধ্য রীতি ধারণ ক'রে বাইরে দাক্ষিণ্য বা সরলতা প্রকাশ করে, কিন্তু প্রকৃতপক্ষে অদাক্ষিণ্য পোষণ করে। দ্বিতীয়, কোন ক্ষেত্রে বাইরে বামাতাব অর্থাৎ কোপ প্রদর্শন করে ও অদাক্ষিণ্য দেখায়। ৭২।

দাক্ষিণ্য-উদাস্ত মান

যথা—

শ্রীকৃষ্ণ কুন্দবল্লীকে বললেন :

‘আমার বদলে রাধিকার নাম তাহা শুনি চন্দ্রাবলী।

মুখের হাত দ্বিগুণ করিল হাতে দেয় করতালি ॥

বিনয় বচন শুনিয়া আমার বিনয় বচন কয়।

তাহা শুনি মোর সখাগণ যেন চিত্রপুতলি হয় ॥’

শ্রীকৃষ্ণের মুখে রাধিকার নাম শুনে, চন্দ্রাবলীর অন্তরে যে আর্তি ও মানের উদ্ভব হলো, তা গোপন করবার জন্ত সে হাস্যসহকারে করতালি দিল। এটা চন্দ্রাবলীর দাক্ষিণ্যযুক্ত উদাস্ত মান। ৭৩।

বাম্যগন্ধ উদাস্ত মান

যথা—বিষ্ণুপুরাণে

শ্রীকৃষ্ণের পর শ্রীকৃষ্ণ অন্তর্ধান করেছিলেন। তার পর যখন তিনি ফিরে এলেন, তাঁকে দেখে কোন গোপাঙ্গনা ভ্রুকুটি ক'রে ললাট কুঞ্চিত করলেন, অথচ নেত্রভঙ্গের দ্বারা তাঁর মুখপদ্মের মধুপান করতে লাগলেন। ভ্রুকুটি ও ললাটভঙ্গের দ্বারা নায়িকার বামাতাব প্রকাশিত হলো। কিন্তু নেত্রে দাক্ষিণ্য ফুটে উঠলো। ৭৪।

যথা বা—

চন্দ্রাবলীর সখী অশ্বকোন সখীকে বললে :

‘পাশক খেলিতে ধনিরে জিনিয়া হরি চাহে আলিঙ্গন।

হুটিল নয়নে মনে চাহে ধনি হাতে করে নিবারণ ॥’

পাশা খেলায় আলিঙ্গন পণ ক'রে চম্ভাবলী যখন পরাজিতা হলো, তখন শ্রীকৃষ্ণ তাকে আলিঙ্গন করতে উচ্ছত হলেন। তাতে চম্ভাবলী কুটিল নয়নে তাঁর দিকে চেয়ে, হাত নেড়ে তাঁকে নিবারণিত করবার চেষ্টা করলো। কিন্তু মনে-মনে সে আলিঙ্গন কামনাই করছিল।

এখানে মাধব কর্তৃক পরাজিতা হয়েও, কুটিল নেত্রে তাঁর দিকে দৃষ্টিপাত করায় বাহ্যতঃ বাম্যগন্ধ এবং হাত নেড়ে নিবারণিত করবার চেষ্টায় দাক্ষিণ্য লক্ষণ প্রকাশিত হলো। ৭৫।

ললিত

যে মানে মধু-স্নেহ ও কোটিল্য স্বতন্ত্রভাবে হৃদয়ঙ্গম করা যায়, তাকে ললিত মান বলে। বাচিক এবং মানসিক কোটিল্যের নর্ম বিশেষকেও ললিত বলে। ৭৬।

কোটিল্য-ললিত

যথা—শ্রীমদ্ভাগবত দশমে

রাসাস্তুর্ধানের পর শ্রীকৃষ্ণকে দেখে, মানময়ী শ্রীরাধার যে অবস্থা হয়েছিল, তার বর্ণনা ক'রে শুকদেব বললেন—রাজন! কোন এক গোপী প্রণয়-কোপাবেশে বিবশা হয়ে, অকুটি ক'রে শ্রীকৃষ্ণের দিকে চেয়ে, ওষ্ঠ দংশন করতে লাগলেন। অকুটি-কটাক্ষের জন্ম পরাভব যেন তাড়না করতে লাগলো।

শ্রীরাধার সূহৃৎ সকলের স্নেহও মধুস্নেহ। সেই স্নেহ থেকে উৎপন্ন অকুটি-কটাক্ষ বা কোটিল্য 'ললিত' মধ্যে পরিগণিত। নর্ম ললিত আরো সুন্দর।

যথা বা—

মঙ্গলার সখী তার কোন বাঙ্কবীকে বললে—

সখি! শ্রীকৃষ্ণ রাধাকে বলেছিলেন—মাধবি! তোমার সখী এই

মঙ্গলা মদনোন্মত্তা হয়ে পথের মাঝখানে আমায় স্থয়ং আলিঙ্গন দিয়েছিলেন।

এই কথা শুনে, মঙ্গলা কুটিলবদনা হয়ে, নিজের কিরীটহার দিয়ে শ্রীকৃষ্ণকে আঘাত করেছিল।

লজ্জাহত মঙ্গলা অধোবদনা হয়েছিল, এবং মুখখানি তির্ধক ভঙ্গীতে নামিয়ে, মান প্রকাশ ক'রে, অবতংসের দ্বারা শ্রীকৃষ্ণের অঙ্গে যত্ন আঘাত করেছিল। অশ্রুটি করেনি, তাই এই অতিসূক্ষ্ম দাক্ষিণ্যাংশ কোটিল্য-ললিত।

যথা বা—

রূপমঞ্জরী রতিমঞ্জরীকে বললে—

সখি! দীর্ঘক্ষণ ধ'রে স্পর্শস্থ অমুভব করবার জন্য শ্রীকৃষ্ণ অতি ধীরে ধীরে শ্রীরাধার চুচুকে (স্তনাগ্রে) পত্রবল্লী তিলক এঁকে দিচ্ছিলেন। বিলম্বের উদ্দেশ্য ছিল দীর্ঘকালব্যাপী স্পর্শস্থ অমুভব করা। কিন্তু তাতে শ্রীকৃষ্ণের অঙ্গুলি থেকে স্বেদ নির্গত হচ্ছিল। তাই দেখে, শ্রীমতী চঞ্চলেক্ষণা হলেন। কোপ প্রকাশ ক'রে তিনি পুলকায়িত বামকুচের ধাক্কা দিয়ে কেশবকে দূরে সরিয়ে দিলেন। এতে মান প্রকাশিত হলো। কিন্তু অশ্রুটি বা অশ্রু কোনরকম কুটিলতা না থাকায়, যথেষ্ট দাক্ষিণ্যও প্রকাশিত হলো। কুচক্ষেপের দ্বারা যতখানি কোপ প্রকাশিত হলো, তার চেয়ে অধিক প্রকাশিত হলো আদর। সেইজন্য এক্ষেত্রে স্নাত-স্নেহের চেয়ে মধু-স্নেহের লক্ষণই বেশী প্রকাশ পেল।

নর্থ ললিত

যথা—দামকেলিকোমুদীভে

‘মিছা না কহিবে তোমার রসনা সেহ বড় পুণ্যবতী।

কুলবতী সতীর অধর পানেতে সদাই ঘাহার রতি ॥

তোমার যে কর সে বড় হৃন্দর কেন বা করিবে বল।

‘নীবিয় বন্ধন দেখিয়া যে কর সদা করে টলমল ॥’

শ্রীকৃষ্ণের প্রতি নর্মবাক্য প্রয়োগ ক'রে ললিতা বললেন—হে অঘরিণু! তোমায় মিথ্যাবাদী আর বলি কেমন ক'রে? তোমার রসনা কি মিথ্যা বলতে পারে! সে যে সহস্র সাধ্বী রমণীর অধর-মুখা পান ক'রে পবিত্র হয়েছে। আর, তোমার ওই হাতদুটিই বা কেমন ক'রে বলপ্রকাশ করবে? ওই হাত এমন দয়ালু যে, সুন্দরীদের নীবিবন্ধন দেখলেই, অসহিষ্ণু হয়ে বন্ধন মোচন করবার জন্য সর্বদাই টলমল করে। ৭৭।

এখানে নর্মবাক্য ও কৌতুকচ্ছলে শ্রীকৃষ্ণের প্রতি অভিযোগ প্রকাশ করা হলো। পরিহাসচ্ছলে 'মান' প্রকাশিত হলেও, তা মধুস্নেহসিক্ত ও ললিত। ললিতা কৌশলে বিপরীত লক্ষণ দ্বারা শ্রীকৃষ্ণের মিথ্যাবাদিত্ব ও নির্দয়তা ঘোষণা করলেন।

প্রণয়

মান যদি বিশ্রান্ত ধারণ করে এবং প্রেম ও দৃঢ় বিশ্বাসের উপর প্রতিষ্ঠিত হয়, তা'হলে প্রণয় সূচিত হয়। মান যখন নায়িকাকে সম্ভ্রমরহিতা করে, তখন সেই ভাববন্ধনকে প্রণয় বলে। অর্থাৎ যেখানে প্রণয় থাকে, সেখানে মান উদ্ভিত হ'লে নায়িকা বিশ্রান্ত ধারণ করে। বিশ্রান্ত বলতে বুঝায়, সম্ভ্রমবোধের শিথিলতা, কেলিকলহ ও যথেষ্ট বিহার। এক্ষেত্রে নায়িকার মনে এই বিশ্বাস দৃঢ় হয় যে, নায়কের মন-প্রাণ-বুদ্ধি-দেহ ও পরিচ্ছদ ইত্যাদির সঙ্গে তার নিজের মন-প্রাণ-বুদ্ধি-দেহ ও পরিচ্ছদাদির কোন প্রভেদ নাই। উভয়ের সম্পর্ক নিঃসঙ্কেচ হয়ে ওঠে।

যথা--

কুঞ্জভবনে শ্রীকৃষ্ণের পাশে লীলারতা শ্রীরাধাকে উপবিষ্টা দেখে এসে, তাঁর অবস্থা বর্ণনা ক'রে রূপমঞ্জরী সখীকে বললে :

'হৃদয় কয় কুচোপরি, তাঁর স্বর্কে গ্রীবা ধরি কুটিল কুটিল নয়ন।

প্রমোদাঙ্গ নেত্রে বয় কৃষ্ণ অঙ্গে লিঙ্গয় পীতবাসে করয়ে মার্জ্জন ॥'

এই উদাহরণে অক্ষুটির নিমিত্ত অসহিষ্ণুতা বা মান প্রকাশ পাচ্ছে। অক্ষ থেকে চিত্তব্রত ও শ্রীকৃষ্ণের বস্ত্রে সেই অক্ষ মোহার জন্ত নায়িকার নিঃসঙ্কোচ ভাব বা নিঃসন্দেহতা প্রকাশ পাচ্ছে। ৭৮।

প্রণয়ের স্বরূপ হলো বিশ্রান্ত। বিদগ্ধগণের মতে ওই বিশ্রান্ত আবার দু'প্রকার। যথা, মৈত্র্য ও সখ্য।

মৈত্র্য

ভাবজ্ঞ ব্যক্তিগণ বিনয়ান্বিত বিশ্রান্তকে মৈত্র্য বলেন।

যথা—

স্বাধীনভর্তৃকা চন্দ্রাবলীকে তার কোন কিস্করী বলেছিল :
'তোমার যে শ্রীচরণ নাহি কর সঙ্কোচন তাহাতে নৃপুং পরাইব।
যাহার শব্দ শুনি লজ্জা পাবে মরালিনী বিপক্ষ কামিনী লাজ পাব ॥'

অপর উদাহরণ শ্রীমদ্ভাগবত দশমে—

কোন গোপিনী তার অঞ্জলিবদ্ধ করতলে শ্রীকৃষ্ণের হাতুটি চেপে ধরলেন। আবার কোন গোপিনী শ্রীকৃষ্ণের চন্দনচর্চিত বাহুটিকে নিয়ে নিজের স্বন্ধে ধারণ করলেন।

এই প্রকার আচরণের দ্বারা শ্রীকৃষ্ণের প্রতি নায়িকাদের মৈত্র্য এবং দৃঢ় বিশ্বাস প্রকাশ পায়। এখানে নায়কের সঙ্গে নায়িকার আচরণ সন্তোষজনিত হওয়ায় মিত্রতা সৃষ্টি হয়ে উঠেছে।

এই উদাহরণগুলিতে স্পষ্ট প্রণয় ও কৃষ্ণ-স্পর্শ-জনিত চিত্তব্রত সূচিত হয়েছে। প্রণয় নিবিড় না হলে, করতল মধ্যে নায়কের করপল্লব চেপে ধরা বা তাঁর বাহুটি স্বন্ধে তুলে নেওয়া ইত্যাদি নিঃসঙ্কোচ আচরণ নায়িকার পক্ষে সম্ভব হয় না।

সখ্য

সাক্ষস্ অর্থাৎ সন্তোষ বা ভয় থেকে মুক্ত যে প্রণয়-বিশ্বাস তার নাম সখ্য। এই সখ্য প্রায় নিজের বশুতার মতোই। ৭৯।

যথা—

বিশাখা! শ্রীরাধাকে জিজ্ঞেস করেছিল—সখি! কোথুকভরে শ্রীকৃষ্ণের স্বন্ধে নিজের বাহুলতাছুটি রেখে, মাথাটি নত ক’রে তাঁর কানেকানে কি রহস্যবর্তা বলছিলে? । ৮০।

যথা বা—বিষ্ণুপুরাণে

শ্রীকৃষ্ণের প্রতি সত্যভামার উক্তি :

তুমি বলো—‘সত্যভামা আমার প্রিয়া।’ সে কি সত্য?

‘হৃদি তব সত্যবাণী পারিজাত তরু আনি মোর গৃহে কর আরোপণ।

তবে জানি মোর প্রতি তোমার অধিক প্রীতি, এইবারে জানি তোমার

মন ॥’ ৮১।

অপর উদাহরণ :

চন্দ্রমুখীর কোন সখী তার বান্ধবীকে বলেছিল—আমার সখী চন্দ্রমুখী শ্রীকৃষ্ণের বুকে আপন মনোহর বক্ষোবন্ধ-কোরকছুটি রেখে, কুঙ্কম দিয়ে তাঁর কপালে পত্রাকুর তিলক আঁকতে লাগলেন।

অথবা—শ্রীমদ্ভাগবত দশমে

‘গোপী সঙ্গে রাস করি অন্তর্ধান হৈল হরি গোপী লয়া করিল গমন।

গোপী কহে অহে হরি আমি ত চলিতে নারি লহ মোরে যেথা তোমার

মন ॥’

শ্রীকৃষ্ণ কোন এক গোপাঙ্গনাকে একদিন একাকিনী গভীর অরণ্যে নিয়ে গেলে, সেই গোপাঙ্গনা নিজেকে সকলের চেয়ে সৌভাগ্যবতী মনে করেছিল। তাই সে গৌরবদৃষ্টা হয়ে বলেছিল—হে কেশব! তোমার যেখানে ইচ্ছা আমায় নিয়ে চলো, কিন্তু আমি যে আর চলতে পারছি না।

এই উদাহরণগুলিতে সখ্য-বিশ্বাস হেতু নায়িকার দৃষ্টা ভাব, এবং সেইজন্য তার মান পরিলক্ষিত হয়। ৮২।

স্নেহ-প্রণয়-মান

স্নেহ থেকে প্রণয় উৎপন্ন হয়ে, কোন কোন ক্ষেত্রে মানের উদ্ভব হয়। কোথাও বা স্নেহ থেকে মান উৎপন্ন হয়ে, প্রণয়ে পরিণত হয়। সুতরাং প্রণয় ও মান—এই দুটির ভিতর পরস্পরের কার্যকারণ সম্পর্ক আছে। সেই জগৎ পৃথক্ রূপে এগুলির উদাহরণ উল্লিখিত হয়েছে।

তা ছাড়া, উদাত্ত এবং ললিত—এই দুটি ক্রমের সঙ্গে মৈত্র্য এবং সখ্যের সূসজ্জতি আছে। তার জগৎ সূমৈত্র্য ও সুসখ্য সম্পর্কে স্বতন্ত্রভাবে বলা হলো।

সূমৈত্র্য

প্রাতঃকালে চন্দ্রাবলী প্রসঙ্গে তার কোন সখী অশ্রু এক সখীকে বললে—সুন্দরি! মধুরিপু যখন সখীদের সামনে রজনীর সন্তোগ-রহস্যের কথা বলতে উদ্বৃত্ত হলেন, তখন মৃদুলা চন্দ্রাবলী অশ্রু করিতে লাগলেন ও নিজের করপল্লব দিয়ে শ্রীকৃষ্ণের মুখ আবৃত করলেন। সঙ্কোচভরে তিনি অবনতমুখী হলেন।

সুসখ্য

যথা—

বৃন্দা নান্দীমুখীকে বললেন—

‘একবার করি অধরচূষন খেলাপণ নিরমাণ।

জিনিয়া নাগর রাধার অধর ছবার করিল পান ॥

তাহা দেখি রাধা কুটিল নয়নে চাহয়ে নাগর পানে।

ভূজলতা দিয়া অমনি বাঁধিল ঘোষ করি যেন মনে ॥’

এই উদাহরণে অধিক দাক্ষিণ্য প্রকাশিত হলো বলে, এটিকে ক্রীমতীর স্নতস্নেহাংশরূপে গণ্য করা যায়।

মধু-স্নেহবতী শ্রীরাধার সুসখ্য

যথা—

শ্রীকৃষ্ণ যখন সখীদের সম্মুখে তাঁর পীত উত্তরীয় পরিত্যাগ ক'রে বন্ধ উন্মুক্ত করলেন, অর্থাৎ বৃকে নখরাঘাতের নূতন চিহ্নগুলি সখীদের সামনে খুলে দেখালেন, তখন ভ্রুকুটি ক'রে কম্পিতবদনা গান্ধার্বিকা কাঁচুলিবিমুক্ত রোমাঙ্কিত কুচদ্বয়ের দ্বারা শ্রীকৃষ্ণের বন্ধ আবৃত করলেন। ৮৩।

শ্রীমতী হাত দিয়ে শ্রীকৃষ্ণের বৃক আবৃত করবার চেষ্টা করলেন না, পাছে আবার তাঁর বৃকে নখের আঘাত লাগে। এখানে নায়িকার অতিশয় সুসখ্য প্রকাশ পাচ্ছে। তবে ভ্রুকুটি এবং কম্পিত অধর ইত্যাদি বিপরীত লক্ষণায় তাঁর মান ও অমুয়া পরিলক্ষিত হলো।

রাগ

প্রণয়ের উৎকর্ষ-হেতু যেখানে চিত্তে অতিদুঃখও সুখরূপে অনুভূত হয়, তাহার নাম রাগ।

যথা—

ললিতা সখীদের বললেন :

‘সূর্যের কিরণে তপ্ত সূর্য্যকান্তমণি যত, তাথে অজিত ক্ষুরধার।

তাহাতে দাঁড়াঞা রাধা না জানে মনের বাধা দেখে কৃষ্ণ সৌন্দর্য্য অপার ॥

দেখ রাধা-প্রেমের মাধুরী।

ইন্দীবর সূর্য্যপরি যেমন চরণ ধরি অচঞ্চল রহিল সুন্দরী।’

প্রথর সূর্য্যকিরণে উদ্ভপ্ত বন্ধুরও অতিদুর্গম গিরিতটে তীক্ষ্ণধার করাল শিলাখণ্ডগুলির উপর দাঁড়িয়ে শ্রীরাধা কৃষ্ণের সৌন্দর্য্য দর্শনে অপার আনন্দ ও সুখ অনুভব করছেন। এই দুর্গম গিরিতটে দুঃখপ্রদ উদ্ভপ্ত ধারাল শিলাখণ্ডগুলিতে যেন পদ্মফুল বিছানো আছে। শ্রীমতী কোন দুঃখই অনুভব করছেন না। পরন্তু এত দুঃখও যেন তাঁর সুখানুভূতিতে পর্যবসিত হচ্ছে। ৮৪।

কৃষ্ণকে পাবার সম্ভাবনা যখন থাকে না, তখন কৃষ্ণ-সঙ্গের আভাস বা তাঁর সঙ্গজনিত অপবাদের হুঃখও সুখপ্রদ হয়। যে কলঙ্কের কথা শুনে হুঃখ পাবার কথা, তা শুনেও মনে আনন্দ সঞ্চারিত হয়। ৮৫।

রাগভেদ

রাগ দ্বিবিধ—নীলিমা ও রক্তিমা। ৮৬।

নীলিমা

নীলিমা রাগকে আবার দু'ভাগে ভাগ করা যায়। যথা, নীলী ও শ্যামা। নীলবৃক্ষ (Indigo) এবং শ্যামলতা (Green Creeper) এই দুটি বস্তুর রাগের বা বর্ণের সঙ্গে তুলনায় রাগকে যথাক্রমে নীলা ও শ্যামা রাগ বলে। ৮৭।

নীলীরাগ । ৮।

যে রাগের ক্ষয়ের সম্ভাবনা নাই এবং যা বাইরে খুব বেশী প্রকাশ পায় না, এবং সংলগ্নভাবে আবৃত করে, বিদগ্ধগণ তাকে নীলী রাগ বলেন।

ধৌত বস্ত্রে নীল দিলে, নীল নিজেকে ততখানি প্রকাশ করে না, যতখানি তৎসংলগ্ন বস্ত্রের শুভ্রভাবে আবৃত করে। বস্ত্রের শুভ্রতাব নীলের দ্বারা আবৃত হয় এবং নীলের নীলত্ব শুভ্রবাসে সমাহিত (absorbed) হয়। ফলে এই দুটি রাগের স্বতন্ত্র সত্তা আর প্রকট থাকে না। 'দৌহার অক্ষয় রাগ প্রকাশ নাই তার।'

এই রাগ চন্দ্রাবলী ও কৃষ্ণের মধ্যে পরিলক্ষিত হয়। ৮৯।

যথা—

ঐকৃষ্ণের প্রতি ভক্তার উক্তি :

‘বিশদ আশয়ে তুমি প্রতারণা গুণ বলি পুনঃ মানে।

চন্দ্রাবলী সনে তোমায় পীরিতি লখীরাও নাহি জানে ॥’ ৯০ ॥

শ্যামা রাগ

ভীরুতার জন্ম যা অল্প প্রকাশিত, এবং যার জন্ম চিরকাল ধরে সাধ্য-সাধনা করতে হয়, তাই শ্যামা রাগ। ৯১।

যথা—

কলহাস্তরিতা ভদ্রার প্রতি তার সখীর উক্তি :

‘পূর্বে কুঞ্জের অন্তরে অল্পমাত্র অন্ধকারে না যাইতে কৃষ্ণের নিকটে।
সেই তুমি কুঞ্জঘরে অতিথোর অন্ধকারে তারে খুঁজি পড়িছ সঙ্কটে ॥’

ভীরুতার জন্ম আগে তুমি দিনের বেলায় কুঞ্জভবনের অল্প অন্ধকারেও শ্রীকৃষ্ণের নিকট যেতে চাইতে না, চকিতা হ’তে। আর এখন, সেই তুমি রজনীর গভীর অন্ধকারে অধিকতর অন্ধকারময় তমালবনে বিপন্ন হয়ে শ্রীকৃষ্ণকে খুঁজে বেড়াচ্ছ। শ্রীকৃষ্ণের দ্বারা প্রতারিত হওয়ার দুঃখ এবং ভীরুতার জন্ম গভীর অন্ধকারে ঘুরে বেড়ানোর কষ্ট তোমার সুখানুভূতিতে পরিণত হয়েছে। ৯২।

রক্তিম

কুসুম বা কুসুম ফুলের এবং মঞ্জিষ্ঠালতার যে রঙ, তার সঙ্গে তুলনীয় রাগকে রক্তিম বা রক্তিম রাগ বলে। ৯৩।

কুসুম রাগ

‘কুসুম রাগ যেই চিত্তে লাগয়ে তুরিত।

অন্যরাগ দ্ব্যতি ব্যঞ্জে শোভে যথোচিত ॥’ ৯৪ ॥

কুসুম পুষ্পের রঙ স্বভাবতঃ স্থায়ী নয়। কিন্তু অশ্রু জিনিসের সঙ্গে একত্র সিদ্ধ করলে সে রঙ স্থায়ী হয়। মঞ্জিষ্ঠালতার রঙ স্বভাবতঃ স্থায়ী। শ্রীমতী মঞ্জিষ্ঠারাগিনী। তাই তাঁর সঙ্গে অনিষ্ট-ভাবে মিশে শ্যামলা প্রভৃতি যুগ্মস্বরীদের কুসুমরাগ স্থায়ীভাব ধারণ করে। শ্রীমতীর মঞ্জিষ্ঠা রাগের দ্ব্যতি তাদের মধ্যে প্রতিকলিত হয়।

যথা—

শ্রীকৃষ্ণের প্রতি শ্যামলার কোন অমিতার্থী দূতীর উক্তি :

‘তোমার অবর্ণাবধি ভূজঙ্গ দেখয়ে যদি তারে তুয়া ভূজ বলি মানে ।
নানাভাব পরচার এমন স্বভাব তার চিত্তধৈর্য ছাড়ে উন্মাদনে ।
তোমার সাক্ষাতে দেখি মৃদিয়াছে দুই অঁধি, যে দশা হৈল সাক্ষাৎকার ।
কিয়ে অমুরাগিণী কিছা হল বিরাগিণী, বুঝিতে আমার হল ভার ॥’ ৯৫ ॥

এই অনির্বচনীয় দশা দেখে প্রতীয়মান হয় যে, শ্রীরাধার বা তাঁর সঙ্গিনীদের সঙ্গে মিশে শ্যামলার কৌসুম্বরাগ স্থায়ী রাগে পরিণত হয়েছে । ৯৬ ।

মাজিষ্ঠ রাগ

যে রাগ কিছুতেই নষ্ট হয় না, অথ কিছুর জন্মও অপেক্ষা করে না, সর্বদাই আপন কাস্তির দ্বারা বুদ্ধিশীল হয়, তাকেই মাজিষ্ঠ রাগ বলে । যেমন—শ্রীরাধা ও শ্রীকৃষ্ণের পারম্পরিক রাগ ।

মাজিষ্ঠার রঙ যেমন জলে ধুয়ে ওঠে না, মাজিষ্ঠ রাগও তেমনি সঞ্চারিভাবের দ্বারা কখনো নষ্ট হয় না । এই রাগ স্বতঃসিদ্ধ শ্যামা রাগের মতো অনন্তসাপেক্ষ এবং আপনা-আপনি বৃদ্ধি পায় । মাজিষ্ঠ রাগ কুসুম্বরোগের মতো পারিমিত নয় । অমুরাগ লক্ষণে এ রাগ অথ কোন রাগের সঙ্গে মেশে না । ৯৭ ।

যথা—

শ্রীকৃষ্ণের রাগলক্ষণ সম্পর্কে পৌর্নমাসীর উক্তি :

‘উপাধি রহিত জন্ম কখন নহে ত ক্ষীণ অতিভয়েও রস বরিষণ ।
কণে বাড়ে বহুতর অতি চমৎকৃতিকর রাধাকৃষ্ণের ভাব সর্বোত্তম ॥’

রাধাকৃষ্ণের এই প্রেমামুগ্ধ উৎসব নিরুপম । উপাধি ছাড়াও উৎপন্ন হয় । কোন বিধি-নিষেধ, গুরুজনের ভয়, বা কষ্ট উপস্থিত হ’লে রসের অধিক উৎপত্তি ও সমৃদ্ধি হয় । সেইখানেই এই প্রেমের চমৎকারিষ । ৯৮ ।

পূর্বে যে সব ভাবের কথা বলা হয়েছে, তার মধ্যে চন্দ্রাবলী এবং রুক্মিণী প্রভৃতি নায়িকাদের ভাব হলো স্বতস্নেহ, উদাস, মৈত্র্য, সুমৈত্র্য ও নীলিমা রাগ। শ্রীরাধার ভাব হলো—মধুস্নেহ, ললিত, সখ্য, সুমৈত্র্য, নীলিমা, সুসখ্য এবং রক্তিমা প্রভৃতি। সত্যভামার মধ্যেও এই লক্ষণগুলি আছে। এসব ছাড়াও, ব্রজসুন্দরীদের মধুরাখ্য স্থায়ীভাব ও ব্যভিচারিভাব প্রভৃতি বিবিধ ভেদ এবং স্বপক্ষ, সুহৃৎপক্ষ তটস্থ ও প্রতিপক্ষ প্রভৃতি প্রকারভেদ আছে। ৯৯—১০১।

অনুরাগ

যতবার প্রিয়কে দেখে, ততবার যেন মনে হয় নতুন। যতবার অনুভব করে, ততবারই মনে জাগে অনাস্বাদিত অনুভূতি। এই অবস্থার নাম অনুরাগ। ১০২।

নায়কের মাধুর্য বা মধুরিমা মুহুমূহু অনুভূত হলেও, সেই মধুরিমাকে আবার অনুভব করবার অতিশয় তৃষ্ণাকেও অনুরাগ বলে।

যথা—

ললিতাকে শ্রীরাধা বললেন—সখি ! শ্রীকৃষ্ণকে বারবার দেখেছি, তবুও যেন মনে হয়, পূর্বে কখনো এমন অপূর্ব মাধুর্য দেখিনি। কি বলবো, যে-কোন একটী অঙ্গে যে শোভা, আমার নয়ন তার অনুমাত্র আনন্দ দান করতে পারে না। দেখেও মনে হয়, দেখা হলো না। ১০৩।

যথা বা—

শ্রীরাধা বললেন—এই শ্রীকৃষ্ণ কে, সখি ! যঁার ওই ছ’ অক্ষর নাম শুনলে আমার ধৈর্যচ্যুতি ঘটে ?

ললিতা বললেন—একি বলছো রাগাঙ্কে ! তুমি তো সর্বদাই তাঁর হৃদয়ে ক্রীড়া করো।

শ্রীরাধা বললেন—সখি ! হেসো না।

সুমে ললিতা বললেন—কিন্তু হে বিমোহিতে! এইমাত্র যে আমরা তাঁর হাতে তোমায় তুলে দিয়েছিলাম।

শ্রীরাধা উত্তরে বললেন—তা সত্যি। কিন্তু আমার মনে হচ্ছে যে, জন্মের মধ্যে যেন আজই প্রথম দেখলাম ওই বিদ্যুৎ-সদৃশ প্রাণেশ্বরকে। ১০৪।

পরম্পর বশীভাব ও প্রেমবৈচিত্র্য

এই অনুরাগে নায়ক ও নায়িকা পরম্পরের বশীভূত হয়, উভয়ের বশীভাব স্পষ্ট হয়, এবং অনেক সময় নায়িকার অবশীভাব হয়, অর্থাৎ লজ্জাসরম ইত্যাদি থাকে না। অপ্রাণিক্রমে জন্মগ্রহণ করবার আকাঙ্ক্ষা হয় এবং বিপ্রলস্তে শ্রীকৃষ্ণের স্মৃতি হয়, অর্থাৎ নায়িকাকে প্রতারণা ও প্রবঞ্চনা করা এবং তার সঙ্গে কলহ ও বিচ্ছেদ ইত্যাদি ঘটানোর অনুভাব হয়। ১০৫।

বশীভাব

যথা—

শ্রীকৃষ্ণের প্রতি কুন্দলতার উক্তি :

‘রাধা গোবিন্দের প্রেম যেন জঘনদ হেম পরম্পর বাড়িবারে চায়।

কৃষ্ণমন কুঞ্জর রাইক প্রেম নিগড় সদাবন্ধ আছেয়ে তাহায় ॥

কৃষ্ণপ্রেমের অপূর্ব মাধুরী।

বাহার প্রেমের গুণে রাধার মনোহরিণে বান্ধিয়াছে নিজবশ করি ॥’

প্রেমবৈচিত্র্য

প্রেমবৈচিত্র্যে বিপ্রলস্তভাব পরে বর্ণিত হবে। ১০৬।

অপ্রাণীভে জন্ম-লালসা

যথা—দানকেনিকৌমুদীভে

ললিতাকে শ্রীরাধা বলেছিলেন :

‘সাগরে যাইয়া কামনা করিব বেগু হব এইবার।

জিভুবন মাঝে যতেক জনম বেগু সে সকল সার ॥

যে তপ করিয়া মুরলী হয়েছে সদা রহে শ্রাম করে।

অধরের স্খা বড়ই মধুর মনোস্থখে পান করে ॥’ ১০৭ ॥

বিপ্রলভে ক্ষুতি

যথা—

মধুরাগামী কোন পাশ্বেকে সম্বোধন ক'রে ললিতা বলেছিলেন :
হে পথিক ! তুমি মধুরায় গিয়ে মাথুরানাথকে উচ্চকণ্ঠে এই কথা
বলো যে, কোন ব্রজসুন্দরী তোমায় জানিয়েছে—হে কৃষ্ণ ! তুমি
রাজধানীতে গিয়ে থাকতে চাও, স্বচ্ছন্দে থাকো । কিন্তু চারিদিকে
ক্ষুতিশীল হয়ে কেন আমার দুঃখিনী প্রিয়সখীকে বারবার এমন
ক'রে দুঃখ দিচ্ছ ! ১০৮ ।

ভাব

অনুরাগ যদি আপনা-আপনি সংবেদনযোগ্য বা উন্মুখতা প্রাপ্ত
হয়ে প্রকাশ পায়, তা'হলে তাকে ভাব বলে । ১০৯ ।

যথা—

বৃন্দা শ্রীকৃষ্ণকে বললেন :

‘জ্যো রাধাকৃষ্ণ মন খেদে করি বিলেপন ভেদভ্রম দূর করি দিল ।

ব্রজাণ্ড হর্যোর মাঝ শৃঙ্গার চিত্রকরাজ নবরাগ হিঙ্গুল তাখে দিল ॥

বিরচিল বড়ই অদ্ভুত ।

তাখে চিত্র কৈল যেই পরম মোহন সেই তাহা নহে কাহার বিদিত ॥’

রাধা ও কৃষ্ণ পরস্পরের চিত্র যেন জুতু অর্থাৎ লাক্ষা । প্রেমের
উত্তাপে অবীভূত হয়ে দুটি চিত্র একসঙ্গে মিলিত হলো । দুটি হৃদয়ের
মধ্যে ভেদভ্রম দূরীভূত হলো । অবগের দ্বারা স্নেহময় এবং একীভূত
হয়ে মিলিত হওয়ায়, প্রণয় সূচিত হলো । জুতুর হিঙ্গুলবর্ণের দ্বারা
উভয়-চিত্রের মহাভাব অর্থাৎ অনুরাগের উৎকর্ষ সংবেদিত হয় । ১১০ ।

মহাভাব

উল্লিখিত ওই ভাব শ্রীকৃষ্ণের মহিবীদের মধ্যে তত সুলভ নয় ।
কেবলমাত্র কৃষ্ণপ্রিয়া ব্রজসুন্দরীদের পক্ষেই সম্ভব । এই ভাবকে
মহাভাব বলে । ১১১ ।

এই মহাভাবই শ্রেষ্ঠভাব এবং অমৃততুল্য সমৃদ্ধিতে চিত্তকে পরিপূর্ণ করে। চিত্ত নিজস্ব রূপ প্রাপ্ত হয়। ১১২।

বিদগ্ধগণ এই ভাবকে রূঢ় এবং অধিরূঢ় এই দুই শ্রেণীতে ভাগ করেছেন। ১১৩।

রূঢ়ভাব

যে মহাভাবে প্রণয়ের সাঙ্খিক মনোভাবগুলি (স্তম্ভ, শ্বেদ, রোমাঞ্চ, স্বরভঙ্গ, বেপথু, বৈবর্ণ্য, অঙ্ক, প্রলয় বা মূছা প্রভৃতি লক্ষণযুক্ত ভাব) উদ্দীপ্ত হয়, তাকে রূঢ়ভাব বলে। ১১৪—১১৫।

রূঢ়ভাবের অনুরূপভাব

রূঢ়ভাবের অনুরূপভাবে নায়িকা একটি নিমেষও ধৈর্য রাখতে পারে না। সে অবস্থা দেখে, নিকটস্থ জনের মনেও ক্লেভ উপস্থিত হয়। অতিঅল্পকালকে কল্পকাল ব'লে মনে হয়। এ অবস্থায় নায়কের সুখেও নায়িকার মনে দুঃখের শঙ্কা জাগে।

‘একক্ষণ কালন্তে যদি না দেখে নয়নে।

অতি অল্পক্ষণ কল্পকাল করি মানি ॥

এই সব অনুরূপ রূঢ়ভাবে হয়।

যোগ বিয়োগ উচিত করিএ নির্ণয় ॥’ ১১৬ ॥

নিমেষের অসহিষ্ণুতা

যথা—

অনেকদিন পরে গোপীগণ শ্রীকৃষ্ণকে দেখে অভীষ্টলাভের আনন্দে উৎফুল্ল হয়ে উঠলো। অপলক দৃষ্টিতে চেয়ে তারা বলতে লাগলো, হায় বিধাতা! তুমি নয়নে পল্লব দিলে কেন? চোখের পাতা না থাকলে যে প্রিয়তমকে অনিমেষ দৃষ্টিতে দেখতে পেতাম।

যোগিগণের নিকট হৃদয় শ্রীকৃষ্ণকে তারা নয়নপথে হৃদয়ে আলিঙ্গন করে, ভাবে গদগদ হয়ে উঠলো। ১১৭।

নিপ্রয়োজনবোধে প্রতিটি অমুভাবের পৃথক্ পৃথক্ উদাহরণ দেওয়া হলো না। ১১৮-১২২।

অধিক্রুত ভাব

যাতে রূঢ়ভাবোক্ত অমুভাবগুলি থেকে সাংখ্যিকভাবসমূহ কোন বিশিষ্ট দশা প্রাপ্ত হয়, তাকে অধিক্রুতভাব বলে। ১২৩।

যথা—

মহাদেব পার্বতীকে বললেন :

‘ত্রিভুবনের ষত সুখ আর ষত আছে দুখ সবে যদি একত্র মিলয়।
রাধার সুখদুঃখসিদ্ধু তার যে একটিবিন্দু তাহার তুলনা নাহি হয় ॥’

লোকাতীত কোটিকোটি ব্রহ্মাণ্ডের ভূত ভবিষ্যৎ ও বর্তমানের সব সুখদুঃখ যদি একত্র করা হয়, তবুও শ্রীরাধার প্রেমোৎপন্ন মিলন ও বিরহের বিন্দুমাত্র সুখদুঃখের সঙ্গে তার তুলনা হয় না। শ্রীরাধার সুখদুঃখসিদ্ধুর তুলনায় সে যেন একটি বিন্দুর চেয়েও কম। ১২৪।

অধিক্রুতভাবের মোদন ও মাদন—এই দুই প্রকারভেদ হয়।

মোদন ভাব

যে অধিক্রুত ভাবে রাধাকৃষ্ণের সাংখ্যিক ভাবগুলির উদয় হয়, তার নাম মোদন। ১২৫।

যথা—ললিতমাধবে

‘রাধাকৃষ্ণের উল্লাস কল্পতরু পরকাশ তাহে কলকণ্ঠনাদ জিনি।
সুস্তশোভা অতিশয় শোভিত অঙ্কুর হয় বৈদজল মৃত্তাকল জিনি ॥
অতি শোভে সেই তরুণবর।

অশ্রুজল মধু পড়ে কাঁপয়ে বিভ্রম ভরে তার মূল বড় দৃঢ়তর ॥’ ১২৬ ॥

যে অধিক্রুত অমুভাবে কাস্তাগণের সঙ্গে শ্রীকৃষ্ণের প্রণয়ে বিকোভ-ভয় সঞ্চারিত হয় এবং প্রেমসম্পাদে মহীয়সী কাস্তাগণের প্রেমাধিক্য ব্যক্ত হয়, তার নাম মোদন। ১২৭।

এই মোদন শ্রীরাধার যুথৈ সম্ভব হয়, সর্বত্র হয় না। মোদনই হ্লাদিনী শক্তির প্রিয়তর শ্রেষ্ঠ বিলাস। ১২৮।

কাস্তাগণের ক্লেভকারিতা

যথা—

কুরুক্ষেত্র যাত্রাকালে ব্রজদেবীগণের সঙ্গে শ্রীকৃষ্ণের যে মিলন হয়েছিল, তার বর্ণনা শুনে রুক্মিণী প্রভৃতি মহিষীগণ চমৎকৃত হয়েছিলেন। তাঁদের অন্তরে ব্রজদেবীগণকে দেখবার অভিলাষ হলেও তাঁরা আপন-আপন গৃহে নির্জনে অবস্থান করছিলেন। শ্রীরাধার ‘মোদন’ ভাব উদিত হয়েছিল। কিন্তু রুক্মিণীর অতিশয় ক্লেভ দেখে, তাঁর কোন এক সখী অশ্রুসখীকে বলেছিল—শ্রীরাধার প্রেমতরঙ্গে শ্রীকৃষ্ণরূপ সাগর অবরুদ্ধ হয়েছে। শ্রীকৃষ্ণের প্রেমের চেয়ে শ্রীরাধার প্রেমের আধিক্যই অনেক বেশী উল্লেখযোগ্য ও গরীয়ান্।

ভদ্রা দেবীর বাণী শুদ্ধ হলো। কালিন্দীর বাষ্পমোচন হতে লাগলো। নর্মদায়িনী সত্যভামার ইতস্তত ভ্রমণ আরম্ভ হলো। গান্ধীর্যশালিনী রুক্মিণী দেবী বিবর্ণা হলেন। তাঁদের ক্লেভের অন্ত রইল না।

শ্রীমতীর মোদন ভাবের কিঞ্চিৎ উপশম হলে, মহিষীরা কথঞ্চিৎ সুস্থ হলেন। শ্রীরাধার স্তব ক’রে তাঁরা তাঁকে প্রণাম করলেন। তারপর আপন-আপন গৃহে ফিরে গেলেন। কিন্তু শ্রীরাধা তাঁদের লক্ষ্যও করেন নি। তিনি আপন-ভাবে বিভোরা হয়ে ছিলেন। ১২৯।

প্রেমোরুসম্পাদিতী বৃন্দাভিশয়িত্ব

যথা—

রুক্মিণী দেবীর সখীর উক্তি :

দেখ, শ্রীরাধার অমুরাগ সমুদ্রে যে তরঙ্গ উখিত হচ্ছে, তার অদ্বয়ভাব মহেশ্বরের অঙ্কুশিতা পার্বতীকে, নারায়ণের বক্ষস্থিতা

লক্ষ্মীকে এবং শ্রীকৃষ্ণের মনোভঞ্জন নলিনী সত্যভামা ও প্রাণসখী চন্দ্রাবলীকে দূরে ক্ষেপণ ক'রে শ্রীকৃষ্ণকে রুদ্ধ করেছে।

‘যে ভবানী শিবগায়ে অর্ধঅঙ্গ হয়ে রয়ে নারায়ণের বক্ষে লক্ষ্মী রয়ে।

সত্যভামা বড় প্রিয়া চন্দ্রাবলী অতিশয়া তথাপি রাধার তুল্য নহে॥’

মোহন ভাব

বিল্লেশদশাতে মোদন ভাব মোহন নামে কথিত হয়। এই মোহন ভাবে বিরহ-বিবশতার জগ্ন নাট্যকার সাংখ্যিক ভাবগুলি আরো সূষ্ঠুভাবে দীপ্তি পায়। ১৩০।

বধা—

বৃন্দাবন হতে উদ্ধব যখন মথুরায় ফিরে গেলেন, শ্রীকৃষ্ণ তাঁকে বৃন্দাবনের বার্তা জিজ্ঞেস করলে তিনি বললেন :

শ্রীরাধার তনু বিকম্পিত হচ্ছে, স্বরভঙ্গ হয়েছে, চোখের জলে যমুনা বয়ে যাচ্ছে, নয়ন বাষ্পাকুল এবং অঙ্গসকল জড়সড়। তোমার বিরহে চম্পকবরণী শ্রীরাধা পাণ্ডুর হয়ে শ্বেতবর্ণ ধারণ করেছেন। তাতেও যেন শ্রীমতীর এক আশ্চর্য রূপ বিকশিত হয়েছে।

শ্রীমতীর এই মোহনভাবে সাংখ্যিকভাবগুলি অতি সুন্দররূপে প্রকাশিত হয়েছে। ১৩১।

মোহনের অনুভাব

এই মোহনভাবে কাস্তার দ্বারা আলিঙ্গিত হয়ে শ্রীকৃষ্ণের মোহ, শ্রীকৃষ্ণকে সূখী করবার জগ্ন কাস্তার অসহ দুঃখ স্বীকার, মরণপণ ক'রে শ্রীকৃষ্ণের সঙ্গতৃষ্ণা এবং দিব্যোন্মাদাদি নানা অনুভাব হয়। একমাত্র বৃন্দাবনেস্বরীতেই এই মোহনভাব পরিপূর্ণরূপে প্রকাশ পায়। সঞ্চারি মোহতেও এই ভাব বিলক্ষণ প্রকাশ পায়। ১৩২।

কাস্তা-আলিঙ্গিত শ্রীকৃষ্ণের মুহূর্ত

পদ্মাবলীতে কবি উমাগতি ধরের উক্তি :

যথা—

‘দ্বারকার রত্নঘরে বসিয়াছে বহুবরে রুক্ষিণী করিয়া আলিঙ্গন ।
রাধাকৃষ্ণে রাধা সঙ্গে স্মরয়ি সে সব রঙ্গে অমনি হইল মূরছন ॥’

রাজপ্রাসাদে রুক্ষিণী দেবীর দ্বারা আলিঙ্গিত হয়ে শ্রীকৃষ্ণের অঙ্গ
পুলকে রোমাঞ্চিত হচ্ছিল, এমন সময় যমুনাতীরের কুঞ্জে শ্রীরাধার
কেলি-পরিমল স্মৃতিপথে উদ্ভিত হওয়ায়, শ্রীকৃষ্ণের মূর্ছার উপস্থিত
হলো । মাধবের এই প্রেম বিশ্বকে রক্ষা করেন । ১৩৩ ।

নিম্প্রয়োজনবোধে মূর্ছার অগ্ন্যাগ্ন উদাহরণগুলি এখানে দেওয়া
হলো না ১৩৪-১৩৬ ।

মৃত্যুশ্বীকার ক’রে শ্রীকৃষ্ণের সঙ্গভঙ্গা

যথা—

ললিতার প্রতিশ্রীরাধার উক্তি :

‘তহু হোক বিনাশন তার যত ভূতগণ মহাভূতে কক্কক প্রবেশ ।
বিধির চরণ ধরি বহুত বিনয় করি তাথে এই যাচিয়ে বিশেষ ॥
যাথে স্নান করে হরি আমার অঙ্গের বারি সেই সরোবরে রহ যায়া ।
কৃষ্ণ মুখ দেখে যাথে হেন সেই মুকুরেতে মোর তেজ রহ লয় হয় ॥
কৃষ্ণের যে অঙ্গন তাথে রহ শূণ্যগণ ক্ষিতি রহ গোবিন্দের পথে
কৃষ্ণের যে বীজন মোর অঙ্গপবন চিরকাল লীন রহ তাথে ॥’

দিব্যোন্মাদ

যে অনির্বচনীয় বৃত্তিবিশেষ এই মোহন ভাবে বিভ্রম সৃষ্টি ক’রে
বিচিত্র দশার উদ্ভব করে, তাকে দিব্যোন্মাদ বলে । এই দিব্যোন্মাদে
উদ্ঘূর্ণ ও চিত্রজগৎ প্রভৃতি অবস্থাভেদ ঘটে ।

উদ্ঘূর্ণ

‘অঙ্গের বিবশতা হরে নানা চেষ্টা হয় ।

উদ্ঘূর্ণা বলিয়া তারে কবিগণ কয় ॥’

বিবশতার নানা চেষ্টার বিলক্ষণ প্রকাশকে উদ্ঘূর্ণা বলে । ১৩৭ ।

এ অবস্থায় নায়িকা বিরহের আতিশয্যে উদ্ভ্রান্ত হয়ে ওঠে।
বিরহ উদ্ভ্রমে নানা দশা উপস্থিত হয়।

যথা—

শ্রীকৃষ্ণকে উদ্ধব বললেন : হে কেশব ! তোমার বিরহে ব্যথিতা
শ্রীরাধার কোন্ দশাই বা না হলো ! তিনি উদ্ভ্রান্ত হয়ে কখনো
বাসকসজ্জায় কুঞ্জগৃহে শয্যা রচনা করছেন। কখনো খণ্ডিতাভাব
অবলম্বন ক’রে অতিশয় কোপবশতঃ নীল মেঘকে তর্জন করছেন।
কখনো বা অভিসারিকা হয়ে নিবিড় অন্ধকারে একাকিনী ভ্রমণ
করছেন। ১৩৮।

ললিতমাধবের তৃতীয় অঙ্কে, শ্রীকৃষ্ণের মথুরা গমনের পর,
শ্রীরাধার এই উদযুর্নাভাব বিশেষভাবে বাণত হয়েছে। ১৩৯।

চিত্রজল

প্রিয়তমের স্নহদের সঙ্গে যদি বিরহিণী নায়িকার দেখা হয়, তা
হলে গুঢ়-রোষবশে নায়িকা যে অজস্র কথা বলে, তাকে চিত্রজল
বলে। এইভাবে নানা কথা বলার পর, পরিশেষে নায়িকার মনে
তীব্র উৎকর্ষার সৃষ্টি হয়।—‘এসব কথা কেন অশ্লের কাছে বললাম !’

এই চিত্রজলের আঙ্গিক দশ রকমের। প্রজল, পরিজল, বিজল,
উজ্জল, সংজল, অবজল, অভিজল, প্রতিজল ও সূজল।

এই দশবিধ চিত্রজল শ্রীমদ্ভাগবত দশমস্কন্ধের ‘ভ্রমর গীতে’
বিশেষভাবে বর্ণিত হয়েছে। ১৭০

প্রজল

অমুয়া, ঈর্ষা, ও মদযুক্ত অবজ্ঞা প্রকাশের সঙ্গে প্রিয়তমের
অকৌশলের কথা অনর্গল বলে যাওয়ার নাম প্রজল। ১৪১।

যথা বা—

শ্রীকৃষ্ণ মথুরায় অবস্থান কালে একদিন তাঁর পরম স্নহদ্ উদ্ধব
বুন্দাবনে এসে উপস্থিত হলেন। তাঁকে শ্রীকৃষ্ণ প্রেরিত বার্তাবহ

মনে ক'রে, গোপাঙ্গনারা নির্জনে নিয়ে গিয়ে, পরম সমাদরের সঙ্গে আতিথেয়তা করলেন। উদ্ধবকে দেখে শ্রীমতীর মনে হঠাৎ গুট অসুয়া, ঈর্ষা, গর্ব, অনাদর ও পরিহাসপূর্ণ দিব্যোন্মাদভাব উদ্ভিত হলো। উদ্ধব তাঁকে প্রণাম করতে গেলে, তিনি চরণকমলের সৌরভে আকৃষ্ট ভ্রমর কল্লনা ক'রে, উদ্ধবকে নানা প্রজ্ঞা বাক্য শোনাতে লাগলেন। সে বাক্যে অসুয়া, মথুরাস্থ সপত্নীগণের প্রতি ঈর্ষা, গর্বযুক্ত অবজ্ঞা ও শ্রীকৃষ্ণের অকৌশলের কথা উদ্গীরিত হলো।

পরিকল্প

প্রভুর নির্দয়তা, শঠতা এবং চাপল্যদোষ প্রতিপন্ন ক'রে যাতে নিজের বিচক্ষণতার পরিচয় দেওয়া হয়, তাকে পরিকল্প বলে। ১৪২।

যথা—শ্রীমদ্ভাগবত দশমে

‘অধরের সূধা যেই পরম মোহন সেই আমাদিকে করাইল পান।
ভৃঙ্গ যেন ছাড়ে ফুল করিতে মন ব্যাকুল হরি কৈল মথুরা পয়ান ॥
নির্দয় সে বহুপতি চপল কুটিল অতি, ভাবিতে অদ্ভুত নাগে মোরে।
তার এই কিবা গুণ হরিল লক্ষ্মীর মন, আসি পুনঃ পদসেবা করে ॥’

অধরসূধা পান করাইয়া শ্রীকৃষ্ণের সছসত্ত্ব বৃন্দাবন ত্যাগ করায় শঠতা ও নির্দয়তা প্রকাশ পায়। তাঁর চপলতা এবং লক্ষ্মীর বা কমলার সরলতার কথা বলায়, নিজের বিচক্ষণতা সূচিত হয়।

বিজ্ঞান

গুটমানের অন্তরালে যেখানে সুস্পষ্ট অসুয়া প্রকাশ পায় এবং শ্রীকৃষ্ণের প্রতি কটাক্ষোক্তি করা হয়, তাকে বিজ্ঞান বলে। ১৪৩।

যথা—শ্রীমদ্ভাগবত দশমে

‘হে দে হে নির্বুজি ভৃঙ্গ ছাড়হ গানের রঙ্গ আমরা কেবল বনবাসী।
অয়ায় বহুসভা বাও কৃষ্ণপ্রিয়া গুণ গাও সেখা গেলে পাবে সুখরাশি ॥’

হে ভ্রমর! তুমি গোপীগণের মাঝখানে বারবার গান গাইছ কেন? এখানে গান গেয়ে কিছু মিলবে না। আমরা গৃহহীন,

শ্রীকৃষ্ণ আমাদের পরিত্যাগ করেছেন। তোমার উপর আমাদের কোন কোপ নাই। তাই উপদেশ দিচ্ছি, কামযুদ্ধে যাদের কাছে তিনি পরাজিত হয়েছেন, যত্নপূরে গিয়ে সেই কৃষ্ণপ্রিয়াদের গুণগান করো। শ্রীকৃষ্ণ তাদের বক্ষোরোগের উপশম করেছেন। সুতরাং তারা অবশ্যই তোমার অভীষ্ট পূরণ করবে।

এখানে মানগর্ভ অসূয়া এবং শ্রীকৃষ্ণের প্রতি নায়িকার উপহাসাত্মক কটাক্ষ প্রকাশ পায়। তৃতীয় ব্যক্তির কাছে নায়িকার এই ধরনের উক্তিকে বিজ্ঞ বল।

উজ্জল

যাতে গর্ব ও সঁর্ব্বার সঙ্গে শ্রীকৃষ্ণের কাঠিন্যের কথা উল্লিখিত হয়, এবং সেই অসূয়ার সঙ্গে সর্বদাই আক্ষেপ থাকে, অর্থাৎ গুণে দোষারোপ করা হয়, তাকে উজ্জল বলে। ১৪৪।

যথা—

‘স্বর্গভূমি রসাতল তাথে যে নারী সকল কেহ তোমার সুদুর্লভ নয়।
যে তোমার কপট হাস বঁাকা ভুরুর বিলাস যাথে পদ্মা পদদাসী হয় ॥’

সংজ্ঞা

পায়ে ধরে অহুনয় করতে চায়, কিছুতেই নিরস্ত করা যায় না, এমন ব্যক্তির কাছে আক্ষেপের সঙ্গে প্রিয়তমেব অকৃতজ্ঞতার কথা বলাকে সংজ্ঞা বলে। এ অবস্থায় প্রিয়তমাও আক্ষেপে ভেঙে পড়েন। ১৪৫।

যথা—

‘পদ ছাড় ভূত তুমি, তোমারে জানি যে আমি, তুমি বহু জান অহুনয়।
তোহে দেখি দূতবরে মুকুন্দ পাঠাল তোরে এ ত তোমার উপযুক্ত নয় ॥
ওহে ভূত, দেখ আমাদের অপমান।
যার লাগি সব ছাড়ি, ছাড়ি গেল হেন হরি, তার সনে কিসের সন্ধান ॥’

এই উদাহরণের প্রথমাংশে সোল্লুঠ আক্ষেপ এবং শেষাংশে শ্রীকৃষ্ণের অকৃতজ্ঞতা, নির্দয়তা, নায়িকাত্রোহিতা, ও প্রেমশূন্যতা প্রকাশ পায়।

বিরহিণী শ্রীরাধা পাদপতিত দূতকে বললেন—দৌত্যকর্মে তুমি পটু, পটুবাণ্য প্রয়োগে বিলক্ষণ চতুর। মুকুন্দের হয়ে তুমি অল্পনয় জানিয়ে দৌত্য করতে এসেছ। কিন্তু একথা বলো না যে, মুকুন্দের অপরাধ নাই। তাঁর জন্ম ইহলোক পরলোক সব ত্যাগ করেছি। কিন্তু তিনি এমন অব্যবস্থিতচিত্ত যে, অনায়াসে আমাদের বিসর্জন দিলেন। তাঁর সন্ধান রাখা কি আমাদের উচিত?

শ্রীমতীর এই উক্তিতে আক্ষেপ, এবং দয়িতের অকৃতজ্ঞতা স্পষ্টই প্রকাশ পায়। ১৪৬।

অবজ্ঞা

শ্রীকৃষ্ণের কাঠিন্য, কামিষ এবং ধূর্ততার জন্ম নায়িকার চিন্তে ভয় ও ঈর্ষার সঞ্চার হয়, এবং সেইজন্ম সে দয়িতকে আসক্তির অযোগ্য বলে বর্ণনা করে। ১৪৭

যথা—শ্রীমদ্ভাগবত দশমে

‘পূর্ব জন্মে রাম হঞা বালি কপি বিনাশিয়া যেহ কৈল ব্যাধের আচার।
সূৰ্পনখার নাসাকৰ্ণ তাহা কৈল ছিন্ন ভিন্ন বড়ই নির্দয় মন তার ॥
পুনশ্চ বামন হয়। বলির সৰ্ব্বস্ব লয়া পুনঃ তারে করিল বন্ধন।
হেন কৃষ্ণবর্ণ বে তার সখ্য চাহে কে, তত্ব তারে নাহি ছাড়ে মন ॥’ ১৪৮ ॥

অভিজ্ঞান

যিনি পক্ষিগণকেও খেদাঙ্কিত করেছেন অর্থাৎ যার জন্ম বৃন্দাবনের পশুপক্ষীরাও বেদনার্ত, তাঁকে ত্যাগ করাই উচিত : ভক্তিসহ এইরূপ অজ্ঞতাপ প্রকাশ করাকে অভিজ্ঞান বলে। ১৪৯।

যথা—

হে মধুকর ! শ্রীকৃষ্ণের সঙ্গে শ্রীতিস্থাপন ক'রে আমরা যে দুঃখিনী হবো, তাতে আর বিচিত্র কি ! তাঁর লীলার কথা শুনে, সমস্ত জীবজগৎ আজ খেদাশ্রিত ও দুঃখিত । বিহঙ্গেরা যেমন কুলায় ত্যাগ ক'রে দিক্‌দিগন্তে ঘুরে প্রাণযাত্রা নির্বাহ করে, আমরাও তেমনি গৃহ ও আত্মীয়স্বজন পরিত্যাগ ক'রে, 'হা কৃষ্ণ !' ব'লে আক্ষেপ ক'রে বনে বনে ঘুরে, কোন রকমে প্রাণধারণ করে আছি । এ হেন কৃষ্ণকে ত্যাগ করাই উচিত ।

ভঙ্গিসহ এই প্রকার উক্তি করাকে অভিজ্ঞ বলে । ১৫০ ।

আজ্ঞা

খেদ ও নৈরাশ্যহেতু শ্রীকৃষ্ণের কুটিলতা ও নির্মমতার কথা, অর্থাৎ তিনি দুঃখ দেন এইকথা, উল্লেখ ক'রে নায়িকা ভঙ্গির সঙ্গে যে আক্ষেপ-উক্তি করে, তাকে আজ্ঞা বলে । ১৫১ ।

যথা—

'আমরা মুগ্ধা নারী তার কথায় শ্রদ্ধা করি বাঙ্কা গেহু যেমন হরিণী ।

তাহার পাইহু ফল দুঃখে তহু টলমল জর-জর এসব কামিনী ॥

তন আমার মন্ত্রণা বচন ।

অন্ত কথা কহ মুখে শুনি মনে পাই সুখে, না করিহ কৃষ্ণের বর্ণন ॥'

প্রতিজ্ঞা

শ্রীকৃষ্ণ সর্বদাই হৃদয়ভাবে অর্থাৎ প্রেয়সীর সঙ্গে মিলিত হয়ে অবস্থান করছেন । সে অবস্থা ত্যাগ করা তাঁর পক্ষে কঠিন । সুতরাং আমরা তাঁকে পেতে পারি না ।

দূতের প্রতি যথায়থ সম্মান দেখিয়ে, নায়িকা এই প্রকারের যে সব উক্তি করেন, তাকে প্রতিজ্ঞা বলে । ১৫২ ।

যথা—

হে মাননীয় দূত ! তুমি আমার প্রিয়তমের সখা । এখানে তিনি তোমায় পাঠিয়েছেন । তুমি কি বর চাও বলো ? বলো, তোমার কোন্ অমুরোধ রক্ষা করতে হবে ? হে সৌম্য ! তুমি কেন আমাদের সেখানে নিয়ে যেতে চাও ! তুমি অতিশয় বুদ্ধিমান । তুমি তো জানো, তিনি সতত শ্রীবধূকে হৃদয়ে ধারণ করে আছেন । সেখানে গিয়ে, ব্রজাঙ্গনাদের পক্ষে তাঁর সঙ্গলাভ সম্ভব হবে না ।

সুজয়

গাঙ্গীর্থ, সরলতা, দৈন্ত্য ও চাপল্যের সঙ্গে উৎকণ্ঠিতভাবে শ্রীকৃষ্ণের কুশলবার্তা জিজ্ঞেস করাকে সুজয় বলে । ১৫৩ ।

যথা—শ্রীমদ্ভাগবত দশমে

‘অথাই বিনয় করি মথুরাতে আছে হরি পিতৃগৃহে স্বরে কি কখন ।
গোপগণে পড়ে মনে এই দিব্য বৃন্দাবনে মনে পড়ে যত কেলিগণ ॥
মোরা তাঁর দাসীগণ কভু করেন স্মরণ কিছু কথা কহেন কখন ।
তার সেই ভূজবন্দ যাহাতে অগুরু গন্ধ পুনঃ কিয় পাব পরশন ॥’

দূতের নিকট শ্রীমতী প্রশ্ন করলেন :

আর্যপুত্র কি এখন মথুরাতেই আছেন ? পিতৃগৃহের কথা কি তাঁর কখনো মনে হয় না ? তাঁর গোপবন্ধুদের কথা কি কখনো স্মরণ হয় না ! এই কিস্করীদের কথা কি তিনি কখনো বলেন না ! তাঁর অগুরুগন্ধচর্চিত বাহুহুটি কি আর কখনো আমাদের মস্তকে স্থাপন করবেন না ? আমরা কি তাঁর স্পর্শ আর কখনো পাবো না !

শ্রীমতীর প্রথম প্রশ্নে সরলতা, দ্বিতীয় প্রশ্নে গাঙ্গীর্থ, তৃতীয় প্রশ্নে দৈন্ত্য এবং চতুর্থ প্রশ্নে চপলতা ও উৎকণ্ঠা প্রকাশ পায় । ১৫৪ ।

উল্লিখিত উদাহরণে মোহনের অনুভাব ও দিব্যান্বাদ অবস্থাপ্তি সুস্পষ্টভাবে বাণিত হয়েছে ।

মাদন

হ্লাদিনীর সার (Essence of Pleasure Force) প্রেম। এই প্রেম যদি রতি-আদি মহাভাব-উদগমে উল্লাসশীল হয়ে ওঠে, তা হলে তাকে মাদন বলা যায়। এই মাদন (Ecstasy) পরাৎপর অর্থাৎ মোহনাতি ভাব অপেক্ষা উৎকৃষ্ট, এবং এই মাদনভাব সর্বদা শ্রীরাধাতেই বিরাজিত হয়। অন্তত এ ভাবের উদয় হয় না। ১৫৫।

যথা—

পৌর্ণমাসী নান্দীমুখীকে বললেন, দেবি! এই ভাব সৃষ্টির আদি থেকে অক্ষয়। এ ভাব হৃদয়রূপ চন্দ্রকান্তমণিকে দ্রবীভূত করে এবং পূর্ণ হয়েও বক্রভাব ধারণ করে; আপন কাস্তিতে ভয়রূপ অঙ্ককার দূর করে। সমস্ত জগতের হর্ষস্বরূপ এই ভাব সায়ংকালে নবনব সম্পদে শোভা বিস্তার করে। রাধাকৃষ্ণের এই মাদনভাব অদ্বৈত। তাকে প্রণাম করি। তার স্তব করি। ১৫৬।

এই মাদনরস ঈর্ষার অযোগ্যপাত্রের প্রবল ঈর্ষা সঞ্চারিত করে এবং সর্বদা সন্তোষে তার গন্ধমাত্র-আধার অর্থাৎ শ্রীকৃষ্ণ-সম্পর্কিত গন্ধের যে-কোন আধারের স্তুতি করায়। ১৫৭।

যথা—দানকেলিকৌমুদীতে

ঈর্ষার অযোগ্য বস্তু বনমালা দেখে শ্রীরাধা ঈর্ষা প্রকাশ ক'রে বললেন :

‘শুদ্ধ ব্রজনারীবৃন্দ নাহি জানে ভালমন্দ সুচরিত সরল অন্তর।

অহে কৃষ্ণের বনমালা তাহাদিগে করি হেলা তুমি মিছা হেব কেন কর ॥

এই শুদ্ধ ব্রজনারী তারে তৃণতুল্য করি সদা রহ গোবিন্দের অঙ্গে।

আপাদমস্তক লয়া কৃষ্ণঅঙ্গ আলিঙ্গিয়া হৃদয়ে বিহার কর যজ্ঞে ॥’

হে বনমালা! আমরা শুদ্ধহৃদয়া ব্রজনারী, তোমায় কখনও ঈর্ষা করি না। কিন্তু তুমি বিদ্বেশপরবশ হয়ে আমাদের প্রতি এমন ভাঙ্ছিল্য প্রকাশ করছো কেন? শ্রীকৃষ্ণের শিখা থেকে চরণ

পর্যন্ত আলিঙ্গন ক'রে, তুমি তাঁর বিশাল হৃদয়ে বিহার করছো।

সম্ভোগে তদগন্ধ বা কৃষ্ণসম্বন্ধীয় গন্ধমাত্রের আধারের স্তুতি :

‘পুলিন্দী রমণীগণ রমা তাদের জীবন যারা কৃষ্ণচরণকুঙ্কুম।

তুণে লগ্ন তাহা পাঞা আপনা হৃদয়ে লঞা সদাই কোতুকী হয় মন ॥’

দয়িতার স্তনের কুঙ্কুম রাত্রিকালে শ্রীকৃষ্ণের পাদপদ্মে অমূলিণ্ড হয়েছিল। বনস্থলী পরিভ্রমণহেতু সেই কুঙ্কুম তুণদলে লগ্ন হয়েছে। সেই তুণদল থেকে কুঙ্কুম নিয়ে শবররমণীরা আপন-আপন আননে ও কুচদ্বয়ে লেপন ক'রে অনঙ্গদাহ প্রশমিত করছে।

তুণদলের সৌভাগ্য এবং শবররমণীদের প্রেমের পরাকাষ্ঠা নায়িকার মনে ঈর্ষার সঞ্চার করেছে। তুণদল শ্রীকৃষ্ণের চরণকুঙ্কুমে রঞ্জিত হয়েছে। আর শবররমণীদের প্রেম এত নিবিড় যে, তুণলগ্ন চরণকুঙ্কুমের স্পর্শে তাদের অনঙ্গদাহ প্রশমিত হচ্ছে। ১৫৮।

যথা বা—

শ্রীরাধা ললিতাকে বললেন—প্রিয় সখি! এই কোমলা মালতী পূর্বজন্মে না-জানি কি কঠোর তপস্যা করেছিল। আহা! তাই সে ব্রজরাজনন্দন শ্রীকৃষ্ণের মতো শ্যামকান্তি এই তমালতরুকে আলিঙ্গন করেছে। ১৫৯।

এখানে, তমালতরু ও মালতীলতা উভয়েই শ্রীরাধার ঈর্ষার অযোগ্য পাত্র, তবুও এই উক্তি তে শ্রীমতীর মনে ঈর্ষা সঞ্চারের আভাস পাওয়া যায়।

সম্ভোগকালে অর্থাৎ নায়ক ও নায়িকার মধ্যে যখন সংযোগ সংস্থাপিত হয় তখন নিবিড় আনন্দে এক বিচিত্র মাদনরসের উদ্ভব হয়। নিত্যলীলায় এই মাদনের বিলাপ সহস্রপ্রকারে বিরাজ করে। ক্রণেক্রণে উৎপন্ন মাদনোচ্ছ্বাসে মুহুমূর্ত্ত আলিঙ্গন ও চুম্বন ইত্যাদি ক্রিয়ার দ্বারা মাদনের কারকতা অমুভূত হয় ও স্পষ্ট প্রকাশ পায়। ১৬০।

মদনের সুন্দর গতি ও কার্যকলাপ রোধ করবার সাধ্য স্বয়ং মদনেরও নাই। এমন কি, মুনিগণও এর কারকতা সঠিক নির্ণয় করতে পারেন নি।

স্বাধীনতা—উপসংহার

প্রথমে রাগ উৎপন্ন হয়ে অনুরাগে পরিণত হয়। সে অবস্থা থেকে সত্ত্বর স্নেহের উৎপত্তি হয়। তারপর মান, প্রণয় ইত্যাদির সঞ্চার হয়ে থাকে। অবশ্য স্ত্রীরাধা প্রভৃতি নায়িকার ক্ষেত্রে পূর্বরাগ থেকেই রাগলক্ষণের আবির্ভাব হয়েছে; মানপ্রণয়াদির অভাবে তা ব্যাহত হয়নি। ১৬১।

কৃষ্ণপ্রেমে ব্রজদেবীগণের যে-সব শ্রেষ্ঠভাব ক্ষুরিত হয়েছে, তা তর্কের অতীত। সেইহেতু তার বিস্তৃত বিবরণ দেওয়া হলো না।

সাধারণী রতিতে ধূমায়িতভাব, সমঞ্জসা ও সমর্থারতিতে জলিত ভাব এবং স্নেহ, মান, প্রণয়, রাগ ও অনুরাগ প্রভৃতিতে দীপ্তভাবের বৈশিষ্ট্য থাকে। আর রূঢ়ভাবে উদ্দীপ্তভাব এবং মোদনাদিভাবে সুদীপ্তভাব শোভা পায় বা বিद्यমান থাকে। ১৬২।

রতি-বিপর্যয়

সাধারণী, সমঞ্জসা ও সমর্থারতিতে উল্লিখিত ভাবগুলি প্রায়ই বজায় থাকে, তবে দেশকাল ও পাত্রভেদে তার কিছুকিছু ব্যতিক্রম হয়। পাত্রগণের শ্রেষ্ঠ, মধ্য ও কনিষ্ঠ ইত্যাদি ভাবভেদে রতি-বিপর্যয় ঘটে। কেবলমাত্র রতিতে দীপ্তভাব হয়, কারণ দীপ্তভাব সর্বাপেক্ষা কনিষ্ঠ। কিন্তু স্নেহাদিতে জলিত ভাব ইত্যাদি বিद्यমান থাকে। ১৬৩।

রতিসীমা

আত্মা অর্থাৎ সাধারণী রতি প্রেম পর্যন্ত পৌঁছায়। সমঞ্জসার অন্তসীমা অনুরাগ পর্যন্ত। আর সমর্থারতির অন্তসীমা মহাত্তাব পর্যন্ত।

সাধারণী রতি প্রেম ও সন্তোগের সীমা অতিক্রম করে না।
 ক্লিন্নী প্রভৃতি মহিষীগণের রতি তার চেয়ে অনেক বেশী ব্যাপ্ত এবং
 প্রেম, স্নেহ, মান, প্রণয়, রাগ, অমুরাগ প্রভৃতি স্থায়ীভাব প্রাপ্ত হয়।
 কিন্তু সমর্থ রতিতে সকল ভাবই স্থায়ী। ১৬৪।

নর-বয়স্কদের রতি অমুরাগের অন্তসীমা পর্যন্ত অবস্থিত হয়।
 কিন্তু শুবল প্রভৃতি সখাদের যে রতি, তা ভাবের অন্তিম সীমা পর্যন্ত
 স্থায়ী হয়। ১৬৫।

ইতি স্থায়ীভাববিবৃতি।

শৃঙ্গারভেদ । ১।

বিপ্রলম্ব এবং সন্তোগভেদে উজ্জল রস দু'প্রকার হয় । ২।

বিপ্রলম্ব

নায়ক ও নায়িকার অযুক্ত অর্থাৎ বিচ্ছিন্ন এবং যুক্ত বা মিলিত অবস্থায় পরস্পরের অভিমত, আলিঙ্গন ও চুম্বন ইত্যাদির অভাব ঘটলে যে-ভাব প্রকটিত হয়, তাকে বিপ্রলম্ব বলে। এই বিপ্রলম্ব সন্তোগের পুষ্টিকারক অর্থাৎ স্থায়ীভাবে মাধুর্য বৃদ্ধি করে।

দীর্ঘামুরক্তয়োর্নোঃ রসমায়মহেতুতঃ

ভাবো যদা রতির্গাম প্রকর্ষমধিগচ্ছতি ।

নাভিগচ্ছতি চাভীষ্টং বিপ্রলম্বন্তুহুচ্যতে ॥

অতিশয় অমুরক্ত যুবক ও যুবতীর মধ্যে যখন সমান সুযোগের অভাবহেতু ভাব উৎকর্ষ লাভ করে, কিন্তু অভীষ্টসিদ্ধি হয় না, তখন তাকে বিপ্রলম্ব বলা হয়। এই বিপ্রলম্ব সন্তোগের উন্নতি ও পুষ্টি কারক। ৩।

বিপ্রলম্ব ব্যতীত সন্তোগের পুষ্টি সাধিত হয় না। বিপ্রলম্বে ঈপ্সিতকে লাভ করবার আকাঙ্ক্ষা ও তার জন্ম চিন্তের আবেগ গভীর থেকে গভীরতর হয়, ফলে অন্তরে অমুরাগের রঙ ধরে। একবার রঞ্জিত বসনকে পুনরায় রঞ্জন করলে যেমন তার রাগবৃদ্ধি হয়, তেমনি বিপ্রলম্বে রঞ্জিত অন্তর সন্তোগরসে নিমজ্জিত হলে তার রাগ বহুগুণ বিবর্ধিত হয়।

পূর্বরাগ, মান, প্রেমবৈচিত্র্য এবং প্রবাস ভেদে বিপ্রলম্ব চার রকমের হয়। ৪।

পূর্বরাগ

মিলিত হওয়ার পূর্বে দর্শন এবং শ্রবণাদি থেকে যে রতি উৎপন্ন হয়ে নায়ক ও নায়িকার চিত্তকে উন্মোচিত করে, এবং বিভাবাদির সংমিশ্রণে অর্থাৎ আলম্বন ও উদ্দীপন সম্পর্কে জড়িত হয়ে আস্বাদময় হয়ে ওঠে, প্রোজ্ঞগণ তাকে পূর্বরাগ বলেন।

দর্শন

সাক্ষাৎ, চিত্রপট এবং স্বপ্নাদিতে নায়ককে দেখার নাম দর্শন। এইভাবে নায়কও নায়িকাকে দর্শন করতে পারেন।

সূত্রাং দর্শন তিন প্রকার হতে পারে। সাক্ষাৎ, চিত্রপট এবং স্বপ্নদর্শন।

সাক্ষাৎ দর্শন

যথা—পড়াবলীতে

বিশাখার প্রতি শ্রীরাধার উক্তি :

‘বিকশিত ইন্দীবরদলনিন্দিত তরুচি জগত মাতায়।

কাঁচা কাঞ্চন জিনি অতি সুন্দর পীতবাস পহিরল তায় ॥

সখি হে, ফিরি দেখ এ হেন রঙ্গ।

বুক মাঝে হার কোন বরনাগর মঝু মনে দেওল অনঙ্গ।’ ৫।

এখানে নায়কের সাক্ষাৎ দর্শন নায়িকার মনে পূর্বরাগ সঞ্চার করেছে।

চিত্রপট দর্শন

যথা—বিদগ্ধমাধবে

শ্রীকৃষ্ণের উদ্দেশে শ্রীরাধা :

‘পুনঃ পুনঃ পরিজনগণ মঝু বোলল চিত্রক দরশন লাগি।

যব ধরি পথমাঝে দেখহু নাগর মঝু মনে লাগল আগি ॥

মুগধিনী নাগরী কাছে এত জানব দেখি হহু আনন্দে ভোর।

কো জানে অমৃতজলধি মাঝে বাড়ব এ তহু দ্বাহন মোর ॥’

পূর্বে আশ্রয়-স্বজনের কথায় তোমার চিত্রকলকঙ্কিত মূর্তি দেখেছিলাম। শিশিরের মতো স্নিগ্ধ তোমার চোখছুটি ও দিব্যকিশোর তনু আমায় মুগ্ধ করেছিল। আমরা সরলচিত্তা নারী তাই বুঝতে পারিনি যে, ওই স্নিগ্ধতার অন্তরালে নিবিড় বাড়বানলের জ্বালা আছে। ৬।

এখানে চিত্রকলকে নায়ককে দেখে, নায়িকার চিত্তে পূর্বরাগ ও রতি-উত্তাপের সঞ্চার হয়েছে।

স্বপ্নদর্শন

সাক্ষাৎ দর্শন ও চিত্রদর্শন থেকে যেমন পূর্বরাগের সঞ্চার হয়, তেমনি স্বপ্নদর্শন থেকেও পূর্বরাগ সঞ্চারিত হতে পারে। শুধু পূর্বরাগ কেন, স্বপ্নদর্শনে নায়ক বা নায়িকার রতিসম্ভোগ পর্যন্ত হওয়াও অসম্ভাবিক নয়।

যথা—

স্বপ্ন দেখে চন্দ্রাবলী পদ্মাকে বলেছিল—সখি! আজ এক আশ্চর্য স্বপ্ন দেখলাম। প্রথমে দেখলাম, একটি শ্যামবর্ণ জলশালিনী নদী। তারপর ওই নদীর তীরে দেখলাম একটি মাধবীকুঞ্জ। সেই কুঞ্জে ভ্রমরেরা গুঞ্জন করেছে। কুঞ্জের মাঝখানে একটি গৃহ। সেই কুঞ্জগৃহে তিমিরবরণ এক কাস্ত পীতবাস পরিধান ক'রে বিরাজ করছেন। তিনি যেন চন্দ্রাবলীকে পান করবার জন্য উৎসুক হয়ে অশ্রুবিমর্জন করছেন।

শ্রবণ

বন্দী বা স্তুতিকার, দূতী ও সখী প্রভৃতির মুখে শুনে বা গান শুনে নায়ক সম্পর্কে নায়িকার চিত্তে পূর্বরাগের সূচনা হতে পারে।

বন্দীর মুখে শ্রবণ

যথা—

লক্ষ্মণাকে তার সখী বললে, তোমার স্বয়ম্বর সভায় বন্দিবর যখন স্তুতিপাঠ ক'রে বললেন যে, শ্রীকৃষ্ণ মগধরাজ জরাসন্ধকে যুদ্ধে পরাজিত করেছেন, তখন তোমার তনু কেমন পুলকিত হয়েছিল বল তো !

দূতীমুখে শ্রবণ

যথা—

বৃন্দা শ্রীকৃষ্ণকে বললেন, হে মুকুন্দ ! তোমার দূতী হয়ে যখন তারার নিকট গিয়ে তোমার রূপের বর্ণনা করলাম, তার অঙ্গ পুলকিত ও নয়ন আনত হলো। আরো কিছু শুনবার জন্য উৎসুক হয়ে সে প্রশ্ন করতে উদ্বৃত্ত হলো। কিন্তু তার মুখে কথা ফুটলো না। কণ্ঠস্বর গদগদ হলো।

সখীমুখে শ্রবণ

যথা—

বিশাখা শ্রীকৃষ্ণকে বললেন।

‘মোর সহচরী তোমার এরূপ শুনিয়া বচনে মোর।

সেদিন অবধি তনু অতিকীর্ণ ভাবিয়া না পাই ওর ॥’

সেই উন্মাদ চকোরীলোচনা সখী যেদিন আমার মুখে তোমার কথা শুনেছেন, সেই দিন থেকে শরৎকালের নদীর মতো দিন দিন তাঁর তনু ক্ষীণ হচ্ছে।

গীতশ্রবণে

যথা—

লক্ষ্মণা তার সখীকে বললে, হে সখি ! আমার পিতা বৃহৎ সেনের সভায় দেবর্ষি নারদ সজ্জল নয়নে বীণা বাজিয়ে শ্রীকৃষ্ণের গুণগান করছিলেন। তাই শুনে আমার নয়ন অশ্রুসিক্ত হয়ে উঠেছিল।

রতি উৎপত্তির হেতুস্বরূপ যে সব অভিযোগের কথা পূর্বে বলা হয়েছে, তাতে বিপ্রলম্ব স্থলে পূর্বরাগের সূচনাই যথোচিত ভাবে প্রকটিত হয়ে থাকে। ৭।

পূর্বরাগ প্রথমে মাধবের অর্থাৎ নায়কেরই সঞ্চারিত হয়। বয়ঃসন্ধির পর যৌবন-সমাগমের সঙ্গে সঙ্গে নারী ও পুরুষ উভয়ের মনেই পরস্পরের সন্ধানে উৎসুক হয়। চিত্তের এই প্রথম চাঞ্চল্য বা ঔৎসুক্যকে (the first disturbance of equilibrium of the mind)। ভাব বলে। এই ভাব থেকেই পূর্বরাগের সূচনা হয়।

‘নিবিকারাত্মকে চিত্তে ভাবঃ প্রথম বিক্রিয়া।’

—কৌস্তভ অলংকার।

এই ভাব পুরুষ ও নারী উভয়ের মনেই সমভাবে সঞ্চারিত হয়। কিন্তু নারী স্বভাবতঃ লজ্জাবতী ও ধৈর্যশীলা। সেই জন্য পুরুষের পূর্বরাগ যত সহজে প্রকটিত হয়, নারীর তা হয় না। তবে যেহেতু নারী স্বভাবকোমলা, এবং সুকুমার অনুভূতি ও রাগে তাদের অধিক চারুতা থাকে, সেইহেতু পূর্বরাগ-প্রসঙ্গে মৃগাক্ষীদের কথাই প্রথম বলা হয়েছে। ৮।

‘আদৌ রাগঃ স্ত্রিয়োবাচাঃ পশ্চাৎ পুংসন্তদঙ্গিতৈরিতি।’

—সাহিত্য দর্পণ।

প্রকৃতি-ধর্মানুযায়ী নারীর প্রেমের আধিক্য ও আত্যন্তিকতার সঙ্গে পুরুষের প্রেমের তুলনা হয় না। রস ভক্তকে আশ্রয় করেই প্রকট হয়। ভক্ত যেমন ভগবানে অমুরক্ত হওয়ার পর ভক্তের প্রতি ভগবানের ‘রাগ’ বা অমুরাগ সঞ্চারিত হয়, তেমনি নারী অমুরাগিণী হওয়ার পর পুরুষের অমুরাগ তার প্রতি প্রকট হয়। পুরুষের চেয়ে নারীর আত্মনিবেদনের শক্তি ও নিষ্ঠা অনেক বেশী। সেই সঙ্গে চারুতার আধিক্য বর্তমান থাকে বলে, নারীর বা নায়িকার পূর্বরাগাদি রস-অধিক সূষ্ঠ ও প্রকাশমান। নায়িকার রাগে মাধুর্য

বেশী। নায়িকার স্বভাবগত লজ্জা যেমন পূর্বরাগ প্রকাশের পথে বাধা সৃষ্টি করে, তেমনি আবার একথাও অত্যন্ত সত্য যে, প্রেম সঞ্চারিত হলে, নায়িকার বা নারীর লজ্জা প্রভৃতির বালাই আর থাকে না। কৃষ্ণ-প্রেমে ব্রজদেবীগণের স্থান ভক্তের অধিক, সেই জন্য তাঁদের পূর্বরাগ প্রথমেই প্রকটিত হয়েছে।

সঞ্চারিভাব

পূর্বরাগাদি রতি বিষয়ে যে সব সঞ্চারিভাবের উদয় হয়, তার মধ্যে ব্যাধি, শঙ্কা, অসুয়া, শ্রম, ক্লম, নির্বেদ, ঔৎসুক্য, দৈন্ত্য, চিন্তা, নিদ্রা, প্রবোধ, বিষাদ, জড়তা, উন্মাদ, মোহ ও মৃত্যু প্রভৃতি উল্লেখযোগ্য।

ওই রতি প্রৌঢ়, সমঞ্জস এবং সাধারণ—এই তিন প্রকার হয়।

প্রৌঢ়

সমর্থ রতির স্বরূপকে প্রৌঢ় বলে।

দশ দশা

প্রৌঢ় পূর্বরাগে লালসা থেকে মরণ পর্যন্ত দশটি দশার উদ্ভব হয়। সঞ্চারিভাবে আরো অনেক রকম উৎকট অবস্থার উদ্ভব হয়। কিন্তু প্রাচীন পণ্ডিতেরা সংক্ষেপে ওই দশ দশার কথাই বলেছেন। তাঁদের মতে ওই দশ অবস্থার বা দশার লক্ষণ হলো—লালসা, উদ্বেগ, জাগৰ্শা, তানব, জড়তা, ব্যগ্রতা, ব্যাধি, উন্মাদ, মোহ ও মৃত্যু।

পূর্বরাগের প্রৌঢ় হেতু সব দশাগুলিই প্রৌঢ় হয়। ৯।

লালসা। ১০

অভীষ্টলিপ্সায় গাঢ়গৃধ্রতা অর্থাৎ অভীষ্টলাভের জন্য মনে যে প্রবল আকাঙ্ক্ষা হয়, তাকে লালসা বলে। এই লালসায় ঔৎসুক্য, চপলতা, ঘূর্ণা ও শ্বাস প্রভৃতি লক্ষণ প্রকাশ পায়। ১১।

যথা—

শ্রীরাধাকে ললিতা বললেন :

‘পুনঃ পুনঃ কেন সদন ছাড়িয়া বাহির হইছ তুমি ।

অমনি তুরিতে প্রবেশিলে ঘর বুঝিতে না পারি আমি ॥

গুরুজন ভয়ে নিঃশ্বাস ছাড়িয়া অমনি বসিছ কেনে ।

চঞ্চল নয়নে কেন বা চাহিছ যমুনা কুঞ্জ পানে ॥’

হে কিশোরি ! তুমি ঘটায় শতবার কেন গৃহ থেকে বার হয়ে ব্রজসীমায় যাচ্ছ ও আবার ফিরে আসছো ? গুরুজনের ভয়ে কেন অমন ঘনঘন নিঃশ্বাস ফেলে কদম্ববনের দিকে চাইছো ? । ১২ ।

লালসার পরিপাক অবস্থা

যথা বা—বিদগ্ধমাধবে

বিশাখা শ্রীকৃষ্ণকে বললেন—হে মাধব ! দূর থেকে যদি প্রসঙ্গতঃ তোমার নামের একটি অক্ষরও শ্রীমতীর কানে প্রবেশ করে, তা হলে সেই মদিরেক্ষণা উন্মাদের মত হন । তাঁর সর্বাস্ত্র কম্পিত হয় । হায়, কি বলবো ! নবজলধর নয়নগোচর হলে, দুটি বাজলতা প্রসারিত করে তিনি আলিঙ্গন করতে উদ্ভূত হন । তাঁর চিত্ত উৎসুক হয়ে ওঠে । তিনি বলেন—হে সখি ! আমায় ছুটো ডানা এনে দাও, আমি উড়ে গিয়ে আমার প্রিয়তমকে আলিঙ্গন করি ।

উদ্বেগ

মনের চঞ্চলতার নাম উদ্বেগ । উদ্বেগে দীর্ঘনিঃশ্বাস, স্তব্ধতা, চিন্তা অশ্রু, বিবর্ণতা ও ঘর্ম প্রভৃতি লক্ষণ প্রকাশ পায় । ১৩ ।

যথা—বিদগ্ধমাধবে

শ্রীরাধার অবস্থা দেখে, বিশাখা তাঁর মনের কথা জানবার জন্ত জিজ্ঞেস করেছিল—সখি ! কিসের চিন্তায় তোমার ধৈর্য নষ্ট হলো ? ঘামে তোমার অরুণাভ তাম্রবর্ণের শাড়ি ভিজ়ে উঠেছে । বেপথুমানা হয়ে তনুস্থিরতা হারিয়ে ফেলেছ । সারা দেহ ধরধর করে কাঁপছে ।

হে চম্পকগৌরি! বলো কিসের এই উদ্বেগ তোমার? যথার্থ বলো। আপন-জনের কাছে মনের কথা গোপন করতে নাই। তাতে ভালো হয় না।

জাগর্যা

নিদ্রাহীনতাকে জাগর্যা বলে। জাগর্যায় শোষ ও রোগাদি উৎপন্ন হয়। জড়তা (stupor) আসে, দেহ বিগুহ ও শীর্ণ হয়। মন অশান্ত হয়ে ওঠে। ১৪।

যথা—

বিনিদ্র রজনীতে শ্রীরাধার অবস্থা দেখে, বিশাখার চিত্ত ব্যথিত হয়ে উঠলো। সে ভাবছিল, অমৃতপুরে গুরুজনেরা আছেন। সেখানে সে কেমন ক'রে শ্রীকৃষ্ণকে আনবে! আর অমৃতপুরচারিণী শ্রীমতীকেই বা কেমন ক'রে শ্রীকৃষ্ণের নিকট নিয়ে যাবে!—এই চিন্তায় বিশাখার অন্তর বিষাদে ভরে উঠলো।

বিশাখাকে সম্বোধন ক'রে শ্রীমতী বললেন—প্রিয়বান্ধবী, নিদ্রা নামে এক সখী একবার এসে ক্ষণকালের জগ্ম স্বর্ণোজ্জল পীতবাসধারী, এক শ্যামবর্ণ পুরুষকে আমার নয়ন সম্মুখে উপস্থিত করেছিল। তারপর সেই যে রুপ্ত হয়ে সে নিদ্রা চলে গেল, আর একটি বারের জগ্মও ফিরে এলো না। এখন আর ভেবে কোনো লাভ নাই সখি; কিসে সেই নিদ্রা আবার আসবে, তার চেষ্টা করো। সে ছাড়া সেই স্বপন-চোরকে আর কেউ আনতে পারবে না।

তানব

তনু-ক্লমতার নাম তানব। এতে দুর্বলতা এবং অস্থিরতা বা ইতস্তত ভ্রমণাদি উৎপন্ন হয়। ১৫।

যথা—

বিশাখাকে তার সখী বললে—

‘হাতের বলয়চয় খসি হাত শূন্য হয়, তাহে অমঙ্গল আশঙ্কিয়া।

বলয়েরে আবরিতে পুইছা পরিল হাতে, সেহ পড়ে বাহির হইয়া।’

মুরলীধ্বনি শুনে তোমার তম্বু কৃষ্ণ-চতুর্দশীর চাঁদের মতো ক্লান হয়েছে। হাতের বলয় খসে পড়ছে। নিরাভরণ হাত নারীর পক্ষে অকল্যাণকর ব'লে, পৈছা অথবা অঙ্গুরীয় ধারণ করেছিলে। কিন্তু হায়, তাও যে স্থলিত হয়ে পড়ছে।

কোন-কোন পণ্ডিতের মতে তানবের স্থলে বিলাপ উল্লিখিত হয়েছে।

যথা—

শ্রীরাধা বিলাপ ক'রে বললেন—সখীগণ! এই যমুনার কূলে নবনীপ-তরুন্মূলে শ্রীকৃষ্ণ তাঁর সখাদের সঙ্গে বিহার করতে করতে মত্তা করছিলেন। লতামণ্ডপের অন্তরালে লুকিয়ে থেকে, আমি ব্যগ্রচিত্তে তন্ময় হয়ে তাই দেখাচ্লাম। কিন্তু হায়, কি বলবো! পোড়া বিধি আমায় দাবানলে নিষ্ক্ষেপ করলো। মদন জ্বালায় আমি জ্বলেপুড়ে মরলাম।

জড়িমা

যাতে ভালোমন্দ-জ্ঞান লোপ পায়, প্রশ্ন করলে কোন উত্তর পাওয়া যায় না, চোখে কিছু দেখে না, কানে কিছু শোনে না, সেই অবস্থার নাম জড়িমা। ১৬।

এই জড়িমাস্থলে অকস্মাৎ হুঙ্কার, স্তব্ধতা, শ্বাস ও ভ্রম প্রভৃতি জন্মায়। ১৭।

যথা—

কোন সখী পালিকে জিজ্ঞেস করেছিল—হে পদ্মমুখি! অকারণ কেন হুঙ্কার দিচ্ছ, প্রিয় সখীদের আলাপ শুনছো না, ত্রস্ত হয়ে মুহূর্মুহ দীর্ঘশ্বাস ত্যাগ করছো? আমার আশঙ্কা হচ্ছে, নিশ্চয়ই মধুর মুরলীধ্বনি তোমার কর্ণে প্রবেশ করেছে।

বৈয়গ্র্য বা ব্যগ্রতা

ভাবের গভীরতা বা অতলস্পর্শতার জন্ত যে চিন্তাবিক্ষোভ এবং তার জন্ত অসহিষ্ণুতা সঞ্চারিত হয়, তাকে বৈয়গ্র্য বা ব্যগ্রতা বলে। এই ব্যগ্রতায় বিবেক-বৈরাগ্য, খেদ ও অশ্রুয়া প্রভৃতির উদ্ভব হয়।

যথা—বিদগ্ধমাধবে

নান্দীমুখী পৌর্ণমাসীকে বললে—দেবি, আশ্চর্য! মুনিগণ বিষয়চিন্তা ত্যাগ ক'রে যে কৃষ্ণে চিন্তা সমর্পণ করেন, এই বালা শ্রীরাধা কি না সেই কৃষ্ণ থেকে মন প্রত্যাহার ক'রে বিষয়কর্মে অর্থাৎ গৃহকর্মে চিন্তা অভিনিবিষ্ট করছেন! হৃদয়ে তাঁর ক্ষুতির কণামাত্র ধারণ করবার জন্ত যোগিগণ উৎকণ্ঠিত হয়ে ওঠেন। কিন্তু এই মুখী সেই শ্রীকৃষ্ণের হৃদয় থেকে নিজে সন্নিবেশিত হয়ে নেবার আকাঙ্ক্ষা করছেন।

ব্যাধি

অভীষ্টকে না পেয়ে, দেহে যে পাণ্ডুতা ও উত্তাপ প্রভৃতি সঞ্চারিত হয়, অর্থাৎ মুখচোখ ফেকাশে ও জ্বরভাবের উৎপত্তি হয়, তাকে ব্যাধি বলে। এই ব্যাধিতে নায়িকার কখনো শীত কষ্ট, কখনো মনে স্পৃহা জাগে, কখনো বা মোহ, দীর্ঘশ্বাস, পতন প্রভৃতি লক্ষণ দেখা দেয়। ১৮।

যথা—

ভজার সখী শ্রীকৃষ্ণকে বললে, হে মুরারি! তুমি দাবানল দমন করেছিলে; এই কথা শুনে, আমার সখী ভজা মদন-দাবানলে প্রজ্জ্বলিত হয়ে, তোমায় হৃদয়ে ধারণ করেছিল। কিন্তু তাতে ওই অনলের উপশম না হয়ে, সে আগুন দ্বিগুণ জ্বলে উঠেছিল। সেই ব্যথায় তার দেহ ভস্মের মতো পাণ্ডুর হয়েছিল।

উন্মাদ

সব সময় সব অবস্থায় তন্ময়তার জগত সর্ববস্তুতে আন্তি ঘটে। যেটা যা, তাকে তাই ব'লে মনে হয় না, অতীবস্তু ব'লে ভ্রম হয়। এই অবস্থাকে উন্মাদ বলা হয়। নায়িকার এই উন্মাদ-দশায় ইষ্টের প্রতি দ্বেষ, দীর্ঘাশাস ও নিমেষে-নিমেষে বিরহ ইত্যাদি উপস্থিত হয়। ১৯।

যথা—বিদগ্ধমাধবে

শ্রীরাধা তাঁর সখীদের বললেন :

‘পটমাঝে মরকত স্তম্ভর নাগরে যব ধরি দেখল হাম।

কুটিল দুগন্ধল মঝু পর দেওল মনোমাঝে বিতরল কাম ॥

তব ধরি আগনি শশী সম লাগই শশী ভেল আশুনি সমান।

কাতর অন্তর জরজর হোয়ল ছটফট করই পরাণ ॥’

চিত্রপটে শ্রীকৃষ্ণকে দেখে, শ্রীমতীর উন্মাদ অবস্থা উপস্থিত হলো। মনে হলো, চিত্রপট হতে বেরিয়ে ওই শিখিপুচ্ছধারী নবযুবা মরকতকাস্তি বিস্তার করে, বৃহহাসির সঙ্গে শ্রীমতীর দিকে ক্র-নিষ্ক্ষেপ করছেন। শ্রীমতীর চিত্ত উন্মাদিত হলো। হায়, জ্যোৎস্না-পুলকিত সুস্নিগ্ধ চন্দ্রিমাও যেন তাঁর উপর অগ্নিবর্ষণ করতে লাগলো!

মোহ

যাতে চিত্তের নিষ্ক্রিয়তা বা বিপরীত গতি হয়, তাকে মোহ বলে। এই মোহ উপস্থিত হ'লে, নায়িকার নিশ্চলতা ও পতন ইত্যাদি ঘটে। ২০।

যথা—

শ্রীকৃষ্ণের প্রতি রাধার প্রেম নিবেদন ক'রে বিশাখা বললে—
হে কৃষ্ণ! তোমার চিন্তায় মোহগ্রস্তা হয়ে, শ্রীমতী নিশ্চল হয়ে ভ্রপতিতা হয়েছিলেন। তাঁর নাকে নিঃশ্বাস পড়ছিল না। চোখদুটি উর্ধ্বে উঠে স্থির হয়েছিল। তাই দেখে, জটিল বলেছিল—হায়!

কেমন ক'রে বধূর এই বিপরীত গতি হলো ? আমার হাতে কিছু কৃষ্ণতিল এনে দাও, আমি অপামার্জন করি—ওর ভূত ছাড়াই। কৃষ্ণতিল ছড়িয়ে মন্ত্র পড়লে সব অমঙ্গল দূর হবে।

জটিল। কৃষ্ণতিলের কথা বলতে, যে-ই কৃষ্ণ এই ছুটি অক্ষর কানে গেল, অমনি শ্রীমতীর দেহে কম্পন উপস্থিত হলো। হে অচ্যুত ! আমার সখী তোমাকেই এর হেতু ব'লে অবধারণ করেছেন। তুমিই তাঁর এই অবস্থার মূল কারণ।

মৃত্যু

যা যা করা দরকার তা সব ক'রেও যদি প্রতিকার না হয়, দূতীকে পাঠিয়ে নিজের প্রেম পীড়ার কথা জানিয়েও যদি কাস্তুর সমাগম না হয়, তা হলে কন্দর্প-বাণের পীড়নে নায়িকা অনেক সময় মরণের উত্তম করে। এই অবস্থায় সে তার প্রিয় বস্তুগুলি সখীদের বিলিয়ে দেয়, মধুপগুঞ্জন, মৃচ্ছমন্দপবন, জ্যোৎস্না, কদম্ব ইত্যাদিকে অতিনিবিড় ভাবে অনুভব করে।

মৃথা—

পৌর্ণমাসীকে শ্রীরাধার বৃত্তাস্ত জানিয়ে, বৃন্দা বললেন : রাধা তাঁর স্বহস্তরোপিত মুকুলিত মল্লীলতাকে আলিঙ্গন ক'রে, নিজের হীরকখচিত মণিহার ললিতাকে দিলেন এবং মধুপগুঞ্জিত কদম্ববনে প্রবেশ ক'রে মূর্ছিতা হয়ে পড়লেন। কৃষ্ণনাম সঞ্জীবনী দিয়ে সখীরা তাঁকে সঞ্জীবিতা ক'রে রেখেছেন।

মৃথা বা—বিদগ্ধমাধবে

শ্রীকৃষ্ণের উপেক্ষায় মর্মান্বিতা হয়ে শ্রীমতী কালীয়হৃদে জীবন বিসর্জন দিতে উত্তত হলে, বিশাখা রোদন করতে লাগলেন। তাই দেখে শ্রীরাধা চোখের জল মুছে, বিশাখাকে বললেন—সখি ! শ্রীকৃষ্ণ যদি আমার প্রতি অকরণ হন, তা হলে তোমার অপরাধ কি ? বৃথা

রোদন ক'রো না। এই একটিমাত্র পরম উপকার তুমি আমার ক'রো—সেই হবে উৎকৃষ্ট চরমকাজ। দেখো, আমার এই তমুলতা যেন বৃন্দাবনের ওই তমালশাখায় লীন হয়ে চিরকাল অবিচলিত থাকে। ২১।

উদাহরণ পদ—

‘না পোড়াইও রাধা অঙ্গ, না ফেলিও জলে।

মরিলে তুলিয়া রেখো, তমালের ডালে ॥

আমি তমাল বড় ভালবাসি,

আমার কৃষ্ণ কালো—তমাল কালো,

তাই তো তমাল ভালবাসি।’

শ্রীরাধার এই প্রকার উক্তির তাৎপর্য এই যে, শ্রীকৃষ্ণকে আলিঙ্গন করবার যে প্রবল আকাঙ্ক্ষা তাঁর অন্তরে চিরজাগ্রত হয়ে আছে, সেই আকাঙ্ক্ষা যদি দুর্ভাগ্যবশতঃ সফল না হয়, তা হলে কৃষ্ণশ্যাম ওই তমালতরকে আলিঙ্গন ক’রে তাঁর কামনা পূর্ণ হবে। এখানে মাদন রসের সঙ্গে মোদন রস সমন্বিত হয়েছে।

সমঞ্জস

যা সমঞ্জস রতির স্বরূপ, তাকে সমঞ্জস বলে। এই সমঞ্জসে অভিলাষ, চিন্তা, শ্রুতি, গুণকীর্তন, উদ্বেগ, বিলাপযুক্ত উন্মাদ, ব্যাধি এবং জড়তা প্রভৃতি ধীরে ধীরে উৎপন্ন হয়।

সমঞ্জস রতি সঙ্গমের পূর্বে আবির্ভূত হয় এবং বিভাবাদির মিলনে, অর্থাৎ আলস্বন এবং সেই আলস্বনকে আশ্রয় ক’রে যে উদ্দীপন সঞ্চারিত হয় তারই সমন্বয়ে, সমঞ্জস নামক পূর্বরাগ রস সঞ্চারিত করে।

অভিলাষ

প্রিয়সঙ্গলিম্পা বা প্রিয়ব্যক্তির সঙ্গ-লালসা থেকে অন্তরে যে চেষ্টা সঞ্চারিত হয়, তাকে অভিলাষ বলে। এই অভিলাষের দ্বারা নায়িকার বেশভূষার উৎকর্ষসাধন ও মনোগত রাগের বিকাশ হয়।

যথা—

সত্যভামাকে তার কোন সখী বললে :

‘সত্যভামা তোরে কই সুভদ্রার সঙ্গে সই ছলে যাও দেবকীর দর।

বসন ভূষণ গায় নিতি নিতি যায় তাই কিছু আছে মনের ভিতর ॥’

সুভদ্রার সঙ্গে তোমার সখ্য আছে, তাই ব’লে তুমি রোজ রোজ দেবকীর গৃহে যাচ্ছ। কিন্তু তা হ’লে তোমার মণ্ডন ও প্রসাধনে এত যত্নবতী হওয়ার কি প্রয়োজন? আজ দেখে শুনে এই কথাই স্পষ্ট মনে হচ্ছে যে, তোমার অন্তরে নিশ্চয়ই কোন গুঢ়ভাব আছে।

চিন্তা।

অভীষ্টপ্ৰাপ্তির উপায় অনুধাবন করাকে চিন্তা বলে। অর্থাৎ কি উপায়ে অভীষ্টলাভ হবে তার উদ্ভাবনের জন্ত যে ধ্যান, তাই চিন্তা। এই চিন্তায় বিছানায় শুয়ে বারবার এ-দিক ও-দিক ফেরা, ঘনঘন নিঃশ্বাস ফেলা, এবং দেখবার কিছু না থাকলেও পুনঃপুনঃ দৃষ্টি নিক্ষেপ করা ইত্যাদি লক্ষণ প্রকাশ পায়। ২২।

যথা—

চিন্তাক্রিষ্টা রুষ্ণিগীর অবস্থা দেখে, তার প্রতিবেশিনী বললে—হে কমলমুখি, ঘনঘন নিঃশ্বাসে তোমার গুষ্ঠবিশ্ব ম্লান হচ্ছে, দেহবৃষ্টি কুশ হয়েছে, চোখের কাজল ধুয়ে অশ্রুধারা বইছে, বারবার শয্যা গ্রহণ করছো, কেন? কাল তোমার বিয়ে আর আজ এমন বিকল হওয়া কি সাজে!

স্মৃতি

পূর্বে অনুভূত প্রিয়বস্তু বা প্রিয়জনের রূপ, গুণ, বেশ প্রভৃতি বিষয় সম্পর্কে চিন্তা করা, অথবা সেগুলি মনে উদ্ভিত হওয়াকে স্মৃতি বলে। এই স্মৃতিতে কম্প, অঙ্গের বিবর্ণতা, নয়নে বাষ্পসঞ্চার ও দীর্ঘশ্বাস প্রভৃতি লক্ষণ প্রকাশিত হয়।

যথা—

সত্যভামাকে তার কোন সখী বললে—হে সাত্রাজ্জিতি ! তোমার নয়নকমলদ্বিটি অশ্রুপ্লুত হয়েছে। রথচক্রসদৃশ কুচদ্বয় কম্পিত হচ্ছে। বাহুমণালদ্বিটি শ্লথ হয়েছে। তাই মনে হয়, তোমার হৃদয়-সরোবরে কৃষ্ণরূপ হস্তী বিহার করছেন।

হাতী তড়াগে নেমে যদি জলকেলি করে, তা হলে উৎক্ষেপিত জলরাশিতে যেমন পদ্মগুলি জলপূর্ণ হয় এবং তড়াগ ও তটভূমি আন্দোলিত হয়, তেমনি শ্রীকৃষ্ণের স্মৃতি চিন্তা-সরোবরে কেলিরত হওয়ায় সত্যভামার কুচদ্বয় কম্পিত হচ্ছে, বাহুমণাল শিথিল হয়েছে ও নয়নপদ্মদ্বিটি জলপূর্ণ হয়েছে।

গুণকীর্তন

সৌন্দর্যাদি গুণের বর্ণনায় শ্লাঘা প্রকাশ করাকে গুণকীর্তন বলে। দয়িতের গুণকীর্তনে কম্প, রোমাঞ্চ ও কণ্ঠ গদগদ হয়। ২৩।

যথা—

কন্সিগী পত্র লিখে বললেন—হে কৃষ্ণ ! তোমার রূপসম্পদের মধু পান করবার জন্য তৃষিতা হয়ে যুবতীরা ইতস্তত ঘুরে বেড়াচ্ছে। সে মধু পান করলে যে তাদের কি অবস্থা হতো, তা বলতে পারি না। তুমি নিজেই সে রূপমাধুর্য্য দর্পণে দেখে রোমাঙ্কিত হয়েছিলে। সে রূপের মধুর গন্ধ লাভ করা দূরে থাক, তার কথা ভাবতেই আমার ধৈর্য্যচ্যুতি ঘটছে। আমার চিন্তভূজ স্থির থাকছে না। ২৪।

প্রৌঢ় রতিতে উদ্বেগ প্রভৃতি ছয়টি মানসিক অবস্থার কথা পূর্বে উল্লিখিত হয়েছে। সমঞ্জস রতির ক্ষেত্রেও সেই ছয়টি মানসিক অবস্থার উদ্ভব হয়। *

* উদ্বেগ, বিলাপ, উদ্গাদ, ব্যাধি, জড়তা ও মূতি বা মরণেচ্ছা

সাধারণ

সাধারণপ্রায় রতিকে সাধারণ বলা হয়। এতে বিলাপ পর্যন্ত ষোলটি ভাবের কথা বলা হয়েছে। এই ষোলটি ভাব অতি কোমল (delicate)। সেইজন্য এগুলির বিস্তৃত আলোচনা বর্জিত হয়েছে। বিলাপাস্ত ছয়টি দশার বিষয় উল্লিখিত ও আলোচিত হয়েছে। এই ছয়টি দশা হলো—অভিলাষ, চিন্তা, স্মৃতি, গুণকীর্তন, উদ্বেগ ও বিলাপ। ২৫।

অভিলাষ

যথা—শ্রীমদ্ভাগবত প্রথমস্কন্ধে

শ্রীকৃষ্ণকে দেখে, কোরব পুরজীগণের অন্তরে বাসনা জেগে উঠেছিল। শ্রীকৃষ্ণকে কামনা ক'রে তাঁরা বলেছিলেন :

‘কত তপ করি তারা হয়েছিল নারী, যাহাদের পতি এই সুন্দর মুরারি।’

যদিও ওই স্ত্রীষে স্বাধীনতা ও গুচিতা নাই, কেন না তাঁরা সকলে ধর্মসম্মত পত্নী নন, অর্থাৎ যথারীতি যজ্ঞাদি অনুষ্ঠান সম্পন্ন ক'রে ওই পতি-পত্নী সম্পর্ক স্থাপিত হয়নি। তবুও ওই সব নারী সেই স্ত্রীষকে শ্রুশোভিত ক'রে আছেন। তাঁদের গৃহ থেকে এই পদ্মলোচন পতি কোনো সময়ের জন্ত বাইরে যান না, উপরন্তু পারিজাত প্রভৃতি নানা সুন্দর ও প্রিয়বস্তু আহরণ ক'রে তাঁদের উপহার দিয়ে সর্বদাই হৃদয়ের আনন্দ বর্ধন করেন।

যাঁরা অতিধীর ব্যক্তি, অর্থাৎ অতিকোমল কামতন্ত্র চিন্তাদিতে যাঁদের চিন্ত কখনও চঞ্চল হয় না, তাঁরা অস্থান্য ভাবগুলির উদাহরণ ও বিশ্লেষণ (analysis) করবেন।

পূর্বরাগে শ্রীকৃষ্ণ তাঁর বয়স্কদের হাতে নায়িকাগণের নিকট কামলেখ ও মালা প্রভৃতি পাঠিয়েছেন।

কামলেখ

যে লেখা নিজের প্রেম প্রকাশ করে, তাকে কামলেখ বলে।
নায়িকার নিকট নায়কের বা নায়কের নিকট নায়িকার পত্র-মাধ্যমে
যে কামেচ্ছা-প্রকাশ (self proposal), তারই নাম কামলেখ।

কামলেখ দু-রকমের হয়—নিরক্ষর ও সাক্ষর। একটি সাংকেতিক
ছাপন, অপরটি লিপি।

নিরক্ষর কামলেখ

সুরক্ত কোন নব পল্লবে নখচিহ্নিত অর্ধচন্দ্রে, যাতে কোনো বর্ণ বা
অক্ষর লিখিত থাকে না, তাকে নিরক্ষর কামলেখ বলে।

যথা—

বিশাখা তার সখীর হাতে একখানি কামলেখ পাঠিয়েছিল
শ্রীকৃষ্ণের কাছে। শ্রীকৃষ্ণ সেই কামলেখ হৃদয়ে ধারণ ক'রে সুবলকে
বললেন—

বিশাখা তার নখাশ্র দিয়ে এই কিশলয়-শিখরে একটি অর্ধচন্দ্রে
অঙ্কিত করে পাঠিয়েছে। এটী যেন কন্দর্পের অর্ধচন্দ্রে বাণ! না
জানি কেমন ক'রে হঠাৎ এই পত্র কন্দর্পবাণ হয়ে আমার হৃদয়ে
প্রবেশ করেছে! ২৬।

সাক্ষর কামলেখ

যেখানে গাধাময়ী লিপি অর্থাৎ ভাষায় লিখিত পত্র প্রেরিত হয়,
সেখানে সেই লিপিকে সাক্ষর বা অক্ষর-সম্বিত কামলেখ বলা
হয়। ২৭।

যথা—জগন্নাথবল্লভ নাটকে

শশিমুখার হস্তে প্রেরিত শ্রীরাধার কামলেখ :

হে-কৃষ্ণ! তুমি দীর্ঘকাল ধরে আমার হৃদয়কে বিদ্ধ করছো।
অপযশ হচ্ছে মদনের! কিন্তু আমি তো মদনকে কোথাও দেখতে
পাই না। চারিদিকে শুধু তোমাকেই দেখছি। ২৮।

কামলেখ রচনায় হিজুলত্রব কিংবা কস্তুরী মসীক্ৰপে ব্যবহৃত হয়। বৃহৎ পুষ্পদল-পত্র কুক্ষ্মে মুদ্রিত ক'রে, তাকে পদ্মনালের তন্তু দিয়ে জড়িয়ে বাঁধা হয়, যাতে লিপিখানি গোপন থাকে।

মাণ্য অর্পণ

যথা—

শ্রীকৃষ্ণ প্রেরিত মালাটি শ্রীরাধাকে দিয়ে বৃন্দা বলেছিলেন—
সখি! শ্রীকৃষ্ণ তাঁর নিজের শিল্পকৌশলের পরাকাষ্ঠা দেখিয়ে এই
মালা গেঁথে তোমার জন্তু পাঠিয়েছেন।

এই কথা শুনে, কমলাঙ্গিনী শ্রীরাধার অঙ্গ থেকে স্বেদবারি
নির্গত হতে লাগলো। মনে হলো, সেই স্বেদবিন্দুচ্ছলে যেন
শ্রীমতীর কুলধর্ম, শঙ্কা, ধৈর্য—সবকিছুই নিঃশেষে বেরিয়ে গেল।

কোনকোন পণ্ডিতের মতে পূর্বরাগের প্রথমে হয় নয়নপ্রীতি,
তারপর চিন্তা। চিন্তার পরে জাগে আসক্তি লিপ্সা অর্থাৎ সঙ্গকামনা
বা আসক্তি। আসক্তির পর মনে সঙ্কল্পের উদয় হয়। তারপর হয়
নিজ্রাচ্ছেদ—চোখের ঘুম চলে যায়। তারপরে দেখা দেয় তনুক্ষীণতা
বা কৃশতা; কৃশতার পরে বিষয়নিবৃত্তি, এবং তারপর লজ্জানান্দ।
লজ্জানান্দের পর উন্মাদ। তারপরে মূর্ছা, এবং মূর্ছার পরে মৃতি
বা আপন মৃত্যুকামনা।

দর্শনে নয়নপ্রীতির সঞ্চার বা 'ভালো-লাগা' থেকে সূচনা হয়
পূর্বরাগের। তারপর চিন্তা থেকে মৃতি পর্যন্ত দশটি স্মরদশা বা
কামদশা নায়িকার জীবনে পরপর ঘটে। ২৯।

এইরূপে শ্রীকৃষ্ণের পূর্বরাগেও ক্রমপর্যায়ে ওই দশটি স্মরদশার
উদ্ভব হয়। তার নিদর্শন :

যথা—

বৃন্দা! শ্রীরাধাকে বললেন :

‘বংশীক ছোড়ি চিত অতি আকুল নাগর ফিরই গহনে ।
বনমালা গলে নাহি পহিরহি আকুল কুণ্ডল নাহি লয় অবণে ॥
তুয়া ভুরু ভুজঙ্গিনী তাহে অবদংশল জারল কালীয়দমনে ।
সহচর ছোড়ি কুঞ্জমাঝে রহতহি চাহই চঞ্চল নয়নে ॥’

সখি ! তোমার ভ্রুজঙ্গিনী শ্রীকৃষ্ণের চিন্ত-পবন পান করায়
তিনি বংশীনাদের পরিমল-উল্লাস বিস্মৃত হয়েছেন। বিবিধ কুসুম
চয়ন ক’রে আর কুণ্ডল ও বনমালা রচনা করছেন না। সহচরগণের
চাক্ৰচরিত্রে আর তাঁর কোনো আকর্ষণ নাই। সে সব বিষয়ে আর
কোনো তৃষ্ণা তাঁর নাই। তিনি সবকিছুই ত্যাগ করেছেন। ৩০।

ইতি পূর্বরাগপ্রকরণ।

মান

পরস্পরের প্রতি অনুরক্ত এবং একত্র অবস্থিত দম্পতির বা নায়ক-নায়িকার বাঞ্ছিত আলিঙ্গন ও বীক্ষণাদি অর্থাৎ পরস্পরের মুখপানে চাওয়া ইত্যাদি কার্যে যে মনোভাব বাধা দেয় বা নিরোধ করে, তাকে মান বলে।

এই মানে নির্বেদ বা বৈরাগ্য, শঙ্কা, অমর্ষ বা ক্রোধ, চপলতা, গর্ব, অসূয়া, অবহিতা বা ভাবগোপন, ঘ্রানি এবং চিন্তা প্রভৃতি সঞ্চারিতাব হয়। ৩১।

প্রণয়ই মানের উত্তম ক্ষেত্র অর্থাৎ যুবক-যুবতী বা নায়ক-নায়িকার ভাববন্ধন যখন প্রণয়ের পর্যায়ে উপনীত হয়, তখনই মানের প্রকৃষ্ট স্মৃতি হয়। এই মান সহেতু ও নিহেতু ভেদে দু'প্রকার। ৩২।

‘জনিত্বা প্রণয়ঃ স্নেহাৎ কুত্রচিৎ মানতাংব্রজেৎ।

স্নেহান্মানঃ কচিদ্ভূত্বা প্রণয়ত্মথাপ্নুতে।’

স্নেহ থেকে প্রণয় উৎপন্ন হয়ে কোথাও মান সঞ্চারিত হয়, কখনো বা স্নেহ থেকে মানের উৎপত্তি হয়ে প্রণয় উদ্ভূত হয়। এই ক্ষণেই মানবিষয়ে প্রণয়কেই শ্রেষ্ঠ ক্ষেত্র বলা হয়েছে।

সহেতু মান

যেখানে মানের কোন হেতু বা কারণ থাকে, তাকে সহেতু মান বলে। সাধারণতঃ মানের কারণ ঈর্ষা। মনে ঈর্ষা হলেই মানের উদয় হয়। প্রিয়জনের মুখে বিপক্ষের গুণকীর্তন বা বৈশিষ্ট্যের কথা শুনলে প্রণয়মুখ্য যে ভাবের উদয় হয়, তাই থেকে নায়িকার ঈর্ষামান উদ্ভূত হয়। ৩৩।

স্নেহ ব্যতীত ভয় হয় না। স্নেহ থাকলেই নায়ক বা নায়িকার মনে ভয় হয় যে, এই বুঝি হারালাম! এই বুঝি ব্যথা দিলাম!

আর প্রণয় ব্যতীতও ঈর্ষা হয় না। প্রণয়ে ভাববন্ধনের দৃঢ়তা সম্পর্কে নায়ক-নায়িকার মনে স্থির বিশ্বাস থাকে। তাই অপর পক্ষীয়ের গুণকীর্তন শুনে মনে ঈর্ষার আগুন জ্বলে ওঠে। সে ঈর্ষা প্রকাশে মনে কোনো ভয় থাকে না, সেই জন্য এই প্রকার মান উভয়েরই প্রেম-প্রকাশক হয়। ৩৪।

নায়ক যখন কোন অপরাধ করে, নায়িকার প্রতি তার ভয় হয়। আবার নায়কের অপরাধের জন্য নায়িকার মনে ঈর্ষা উৎপন্ন হয়। এই দুই কারণে নায়ক ও নায়িকার মনে মানরূপ রসের সঞ্চার হয়। এখানে ভয়ের কারণ স্নেহ এবং ঈর্ষার কারণ প্রণয়। নায়কের সঙ্গে সখ্য স্থাপিত না হ'লে নায়িকার মনে ঈর্ষা জন্মাতে পারে না। আবার নায়িকাসম্পর্কে নায়কের চিন্তে আত্মভাব বা 'স্নেহ' না থাকলে, নায়কের মনেও ভয় হয় না।

অতএব হরিবংশে

সত্যভামার রোষাধিত ভাব দেখে, স্নেহহেতু যত্নন্দন ভয়েভয়ে ধীরপদক্ষেপে তার গৃহে প্রবেশ করলেন। সত্যভামা ছিল রূপযৌবন সম্পন্না, তাই নিজের সৌভাগ্যে সে সর্বদাই গর্বিতা থাকতো। সে যখন সখীর মুখে শুনলো যে, ঋত্বিগী শ্রীকৃষ্ণের কাছে পারিজাত পুষ্প পেয়েছে, ঈর্ষায় তার অন্তর জ্বলে উঠলো। প্রবল অভিমান হলো সত্যভামার মনে।

শ্রীকৃষ্ণনিষ্ঠ সুখের জন্য সত্যভামা সৌভাগ্যবতী। সেই সৌভাগ্যের সঙ্গে অতুলনীয় রূপের সমন্বয় তাকে গর্বিতা করেছে। সেই গর্বের জন্যই তার অত অভিমান। সত্যভামা মধুস্নেহবতী। তাই স্নেহসজ্জাত মান তার বেশী।

যে নায়িকার হৃদয়ে সুসখ্য বিরাজ করে, বিপক্ষের উৎকর্ষ-কীর্তন তার সহ্য হয় না। সত্যভামা ব্যতীত অন্য নায়িকার অন্তরে

সুসংখ্যের অভাব ব'লে, রুস্তমীকে পারিজাত পুষ্পদানের কথা শুনে তাদের মান উৎপন্ন হয়নি।

বিপক্ষবৈশিষ্ট্য তিন প্রকার। যথা—শ্রুত, অনুমিত ও দৃষ্ট; অর্থাৎ শ্রবণ, অনুমিতি ও দর্শন থেকে উৎপন্ন।

শ্রবণ

প্রিয়সখী ও শুক প্রভৃতির মুখে শোনা কথা হলো শ্রবণ।

সখীমুখে শ্রবণ

যথা—

বৃন্দা অভিমানিনী মনোরমাকে বললেন—হে শশিমুখি ! সখীর মুখে মিথ্যাবার্তা শুনে, তুমি তোমার প্রণয়াস্পদের উপর অনুরাগ বৃথা শিথিল করো না। হে দেবি। প্রসন্না হও, মনের গ্লানি দূর করো। ওদিকে তোমার মুখ না দেখে, প্রিয়তম আজ বনে ব'সে বিশীর্ণ হচ্ছেন। ৩৫।

‘মিছামিছি কেন কঠিন সখীর বচনে করেছ মান।

আমি ভাল জানি আন যুবতীর নিকটে না যায় শ্রাম ॥’

শুকমুখে শ্রবণ

যথা—

অভিমানিনী শ্রামলার প্রতি চাটুবাচ্য প্রয়োগ ক’রে ত্রীকৃষ্ণ বললেন :

‘কলহ-নিপুণা কোন সহচরী পড়াল এহেন শুকে।

চন্দ্রাবলী সঙ্গে আমার বিহার পড়িছে আপন মুখে ॥

রাই তুমি না করিহ মান।

শুকের বচন সকলি বিফল তুমি সে আমার প্রাণ ॥’

অনুমিতি

ভোগাঙ্কদর্শন, গোত্রস্বলন অর্থাৎ এক ব্যক্তিকে অণ্ড ব্যক্তি ব’লে ডাকতে শুনে, কিংবা স্বপ্ন দেখে, অনুমিতি (Inference) হতে পারে। এই পর্যায়ে ভাগ করলে, অনুমিতি তিন প্রকার হয়।

ভোগাঙ্ক

বিপক্ষ অথবা প্রিয়জনের অঙ্গে যে রতিচিহ্ন দেখা যায়, তাকে ভোগাঙ্ক বলে। ৩৬।

বিপক্ষগাত্রে ভোগাঙ্ক দর্শন

যথা—

খণ্ডিত চন্দ্রাবলীর কুঞ্জে শ্রীকৃষ্ণকে দেখে, পদ্মা রোষযুক্ত হয়ে বললে—হে ধূর্ত ! তোমার আর চাটুবাণ্ডো প্রয়োজন নাই। যথেষ্ট হয়েছে, এই পর্যন্তই ভালো। চন্দ্রাবলী খিন্ন-নয়না হয়ে ঘুমাচ্ছে ঘুমাক। তুমি আর ক্ষণকালও এখানে থেকে না। প্রাঙ্গণ থেকে চলে যাও। বৃদ্ধা ক্রুদ্ধা হয়ে আছেন। ললিতার ললাটে (বিপক্ষ রমণীর) তুমি যে মকরীচিত্র অঙ্কিত করেছ, তাতেই সব বুঝেছি। তার সেই চিত্রিত ললাটই তোমার সব চাতুরি উদ্ঘাটন করে দিয়েছে।

প্রিয়গাত্রে ভোগাঙ্ক দর্শন

যথা—বিদম্বমাধবে

খণ্ডি হা শ্রীরাধা অনুনয়কারী শ্রীকৃষ্ণকে বলেছিলেন :

হে কেশব ! অমন নির্নিমেষ দৃষ্টিতে আমার পথপানে চেয়েছিলে, তাই পুষ্পরেণু পড়ে তোমার চোখছুটি লাল হয়েছে। আর বনের শীতল বাতাস লেগে তোমার বিশ্বাধর ব্রণিত হয়েছে, হিমেল বাতাসে ঠোঁটছুটি ফেটে ক্ষতবিক্ষত হয়েছে। হে দেব ! সঙ্কোচ পরিত্যাগ করো। বিনয়-বচনে আর প্রয়োজন নাই। আমি দৈবকর্তৃক বিড়ম্বিতা, বিধাতা আমার অদৃষ্টে হুঃখ লিখেছেন। তুমি কি করবে ! থাক, আর তোমার দিকে চেয়ে দেখবো না।

শ্রীমতী বিপরীত লক্ষণা দ্বারা এই কথাই দয়িতকে বুঝিয়ে দিলেন যে, তাঁর আর বুঝতে কিছু বাকী নাই। অন্তরমণী-সম্ভোগে নিশাযাপনের জন্তু নয়নদুটি রক্তবর্ণ ধারণ করেছে, বিশ্বাধর দম্ভের আঘাতে ক্ষতবিক্ষত হয়েছে।

এক্ষেত্রে নায়িকার মানই স্বাভাবিক। প্রিয়গাত্রে অপর নায়িকার ভোগাঙ্ক দর্শন থেকে এই মানের উৎপত্তি হচ্ছে।

গোত্রস্থলন

ভুল ক'রে একজনকে অশুভনের নাম ধরে ডাকা, বা কোন নায়িকাকে তার বিপক্ষ-নায়িকার সংজ্ঞায় আহ্বান করা প্রভৃতিকে গোত্রস্থলন বলে। এই গোত্রস্থলন নায়িকার পক্ষে অত্যন্ত ঈর্ষার কারণ হয়, এবং মরণ অপেক্ষাও অধিক দুঃখপ্রদ হয়।

যথা—বিষমঙ্গলে

রাধামোহনমন্দির থেকে বেরিয়ে, শ্রীকৃষ্ণ চন্দ্রাবলীর নিকট গেলেন। অশ্রুমনস্কতাহেতু ভুলবশতঃ হঠাৎ তাকে সম্বোধন ক'রে জিজ্ঞেস করলেন—‘রাধে! তোমার কুশল তো?’

তার মুখে এই কথা শুনে, চন্দ্রাবলী বললে—‘ওহে কংস! তোমার সংবাদ মঙ্গলময় তো?’

কৃষ্ণ বললেন—‘অয়ি বিমুগ্ধহৃদয়ে! এখানে কংসকে তুমি কোথায় দেখলে?’

উত্তরে চন্দ্রাবলী বললে—‘তুমিই বা রাধাকে কোথায় দেখলে?’

এই কথা শুনে, লজ্জাবনতমুখে শ্রীকৃষ্ণ হাসতে লাগলেন।

সেই হাস্তময় মাধব তোমাদের রক্ষা করুন। প্রেমময় মাধবের এই সলজ্জ হাসি অপূর্ব ও অতুলনীয়। ৩৭।

এখানে গোত্রস্থলনহেতু নায়িকার ঈর্ষা-উক্তির মাধুরী প্রদর্শিত হলো। এবার তার সখীদের উক্তির উদাহরণ দেওয়া হচ্ছে।

যথা বা—

চন্দ্রাবলীর সভায় সঙ্গীত-লহরীতে মুগ্ধ হয়ে, রসাস্বাদ প্রসঙ্গে কি বলতে গিয়ে হঠাৎ শ্রীকৃষ্ণ ভ্রমক্রমে চন্দ্রাবলীকে ‘বোড়নীতার’ ব'লে সম্বোধন ক'রে ফেললেন। তাই শুনে, চন্দ্রাবলীর সখী পদ্মা রোষভরে ব'লে উঠলো—অহ! হে কিতব, শঠ, তোমার সামনে

বিমলহ্যতি চন্দ্রাবলী বিরাজ করছেন। তুমি এখানে ষোড়শীতারার অর্থাৎ রাধাকে কোথায় দেখলে? তোমার বর্ণ তিমিরের মতো মলিন। অন্ধকার রজনী তারাকেই চেনে। কিন্তু চাঁদ উঠলে যে অন্ধকার বিলীন হয়ে যায়। যাও—যাও, এখান থেকে তাড়াতাড়ি চলে যাও। ব্রজের অরুণমণ্ডলা আমার এই সহচরী ক্রোধহ্যতি প্রকাশ করবার আগেই এখান থেকে প্রস্থান করো।

এখানে গোত্রস্থলনের জন্তু পদ্মার মান উপস্থিত হয়েছে এবং চন্দ্রাবলীরও প্রচণ্ড মান আশংসিত হচ্ছে। ৩৮।

স্বপ্নদর্শন

শ্রীকৃষ্ণ বা বিদূষক যদি স্বপ্ন দর্শন ক'রে, স্বপ্নায়িত অবস্থায় এক নায়িকার উপস্থিতিতে বিপক্ষ-নায়িকা সম্পর্কে কোন উক্তি করেন, তা শুনে মানের উৎপত্তি হয়। তাকে স্বপ্নদর্শনজনিত মান বলে।

শ্রীকৃষ্ণের স্বপ্নদর্শন

যথা—

বৃন্দা কুন্দবল্লীকে বললেন :

‘চন্দ্রাবলীর কাছে হরি আছয়ে শয়ন করি তাথে স্বপ্নে এই কথা কয়।

রাই মোর অন্তরে রাই মোর বাহিরে রাই মোর অগ্রে পৃষ্ঠে রয় ॥

চন্দ্রাবলী তাহা শুনি আপন লঘুতা মানি কৃষ্ণপ্রতি বিরচিল। মান।

সখীকে না কহে কথা হৃদয়ে বাড়িল ব্যথা ক্রোধে জলে আগুন সমান ॥’

রাধে! তুমি আমার হৃদয়ে-বাহিরে আছো, এই কথা স্বপ্নঘোরে শ্রীকৃষ্ণের মুখে উচ্চারিত হওয়ায়, শ্রীরাধার প্রতি তাঁর প্রেমের আতশয্য প্রকাশ পেল। তাতে চন্দ্রাবলীর প্রচণ্ড মান স্বাভাবিক।

বিদূষকের স্বপ্ন

যথা—

শৈব্যা তার সখীকে বললে—সখি! মধুমজল চন্দ্রাবলীর গৃহে ঘুমিয়ে ছিল। ঘুমন্ত অবস্থায় স্বপ্নে সে বললে, ‘মাধবি। তুমি কোন

চিন্তা করো না। শ্রীকৃষ্ণ নানাচাঁটুবাণ্যে পদ্মার সখী চন্দ্রাবলীকে প্রবঞ্চনা করেছেন।' তাই বলছি, তুমি স্বরায় শ্রীরাধাকে কৃষ্ণের কাছে অভিসারে পাঠাও।

আশ্চর্য দেখ, বিদুষকের মুখে এই কথা শুনে চন্দ্রাবলী অভিমানে জ্বলতে লাগলো।

দর্শন

যথা—

পদ্মা অল্পনয় ক'রে শ্রীকৃষ্ণকে বললে, হে শঠচূড়ামণি! তুমি মিথ্যা কথা বলো না। গিরিকন্দরে আমার সখী চন্দ্রাবলীকে একাকিনী রেখে, ছলনা ক'রে তুমি সম্ভ্রম দেখিয়ে পালিয়ে এসেছ। পরে দূর থেকে ক্ষুদ্র ঘটিকার শব্দ শুনে, আতঙ্কিত হয়ে, চন্দ্রাবলী বাইরে এসে দেখে—যমুনাপুলিনে শ্রীরাধার সঙ্গে তুমি বিহার করছো। সেই থেকে চন্দ্রাবলী অভিমানে জ্বলে মরছে। ৩৯।

যথা বা—

চন্দ্রাবলী দূর থেকে ললিতাকে দেখে, ব্যথিত অন্তরে পদ্মাকে বললে—সহচরী! উৎকণ্ঠিত হয়ে আজ সকালে গুঞ্জামালা গেঁথে শ্রীকৃষ্ণের গলায় পরিয়ে দিয়েছিলাম। কিন্তু হায়! সকালেই দেখলাম যে, সেই মালা ললিতার বক্ষে দোলে। আগুনের মত উজ্জল বর্ণের সেই গুঞ্জাবলী আমার হৃদয়কে দগ্ধ করছে।

নির্হেতু মান

অকারণ অথবা দুইয়ের কারণাভাসহেতু নায়ক ও নায়িকার যে প্রণয় উদ্ভূত হয়, এবং সেই প্রণয়নিবন্ধন যে মানের উদ্ভব হয়, তাকে নির্হেতু মান বলে। ৪০।

পশ্চিৎগণ প্রণয়ের পরিণামকে আত্মমান বা সহেতু মান বলেন, আর প্রণয়ের বিলাসজনিত বৈভবকে দ্বিতীয় মান অর্থাৎ নির্হেতু মান ব'লে থাকেন। প্রণয় থাকলেই মানের উৎপত্তি হয়, এবং কোন

কারণ না-থাকা সত্ত্বেও যে মান উদ্ভিত হয়, তাকে বিদগ্ধজনেরা প্রণয় মান ব'লে কীর্তন করেছেন। ৪১।

তাই কথিত আছে যে, সর্পের গতি যেমন বক্র, প্রণয়ের গতিও তেমনি স্বভাব-কুটিল। কারণ থাক বা না থাক, যুবক-যুবতীর প্রণয়ে মানের উদয় হয়। এই মানে ভাব-সংগোপন, অর্থাৎ মনের কথা খুলে না বলা, বা মুখভার ক'রে থাকা, ইত্যাদি যে-সব ভাব উদ্ভিত হয়, সে-গুলিকে ব্যভিচারিভাব ব'লে জানতে হবে। ৪২।

শ্রীকৃষ্ণের নিহেঁতু মান

শ্রীকৃষ্ণের সহেতু মান সম্ভব নয়। তবুও তাঁর মান উদ্ভিত হলো, নির্দেশিত স্থানে অভিসারে আসতে ব্রজসুন্দরীর বিলম্ব হয়েছে ব'লে। এটা কারণাভাস জনিত মান।

যথা—

কোন ব্রজসুন্দরী বললেন—হে কৃষ্ণ! তুমি কথা না বলো, অন্ততঃ একবার স্মিতদৃষ্টিতে আমার দিকে চাও! আমার কোন অপরাধ নাই। কৌশলে পতিকে বঞ্চনা ক'রে আসতে এই জ্যোৎস্না-ময়ী রাত্রির অর্ধেক অতীত হলো। তারপর আমি জ্যোৎস্নাভি-সারের উপযোগী গুপ্তবেশে সজ্জিত হয়ে দ্রুতপদে আসছিলাম। অনেক দূর এগিয়ে আসার পর হঠাৎ নিবিড় মেঘে চাঁদ ঢেকে গেল। বনপথ অন্ধকার হলো। সেই জন্যই আমার আসতে আরো দেরী হয়েছে।

যথা বা—

শ্রীরাধা শ্যামলাকে বললেন :

‘বনফুল চয়নে বিলম্ব করি পহুঁছি শ্যাম নিকটে হাম গেল।
মুখে হেরি নাগর বাত নাহি বোলল কেবল অধোমুখ ভেল ॥
হাম ফুলঅঞ্জলি পদতলে দেয়লু তাহে ভুরু কুটিল বিলাস।
পুরুষকি মান স্খতির নাহি হোয়ই বদনে প্রকাশল হাস ॥’

পথে ভালো-ভালো বনফুল চয়ন করতে আমার বিলম্ব হলো।
গিয়ে দেখি, মুরারি মান ক'রে বসে আছেন। কথা বলছেন না।
চরণে পুষ্পাঞ্জলি দিলাম। মুখে তাঁর মুহূহাসি ফুটে উঠলো।
পুরুষের মান কতক্ষণ থাকে !

কৃষ্ণপ্রিয়ার কারণাভাবজনিত মান

যথা—উদ্ধবসম্বোধে (১)

শ্রীকৃষ্ণকে বন থেকে গোষ্ঠে যেতে দেখে, শ্রীরাধার মান উপস্থিত
হলো। তাই দেখে, শ্যামলা বললে—সখি ! কেন তুমি অকারণ মান
করছো ? গোষ্ঠ-অঙ্গন থেকে শ্রীকৃষ্ণ তোমার দেহলী-বেদিকার
দিকে মুহূর্মুহ উৎকণ্ঠিত দৃষ্টি নিক্ষেপ করেছেন। তুমি বুঝা মান ক'রে
কেন গবাক্ষপথে চেয়ে থেকে অন্তর বেদনার্ত করছো ! । ৪৩।

এখানে শ্রীরাধার মানের কোনো কারণ নাই, তবুও তাঁর মান
হলো—এই ভেবে যে, শ্রীকৃষ্ণ কেন তাঁর জন্ত বনে আরো কিছুক্ষণ
অপেক্ষা করলেন না !

কৃষ্ণপ্রিয়ার কারণাভাবজনিত মান, যথা—

(২) শ্রীরাধাকে মানিনী দেখে শ্রীকৃষ্ণ বললেন :

কেন তুমি অকারণ কুপিতা হয়ে মৌনব্রত অবলম্বন করেছ ?
আমি তো কোন অপরাধ করিনি।

'তোমার বচনে কুসুম চয়ন করিতে গেলাম আমি।

কোন দোষ নাই কেন মিছা রাই মানিনী হয়্যছ তুমি ॥

অনেক যতনে গহন কাননে আনিলাম মল্লিকা ফুলে।

ভূষণ করিয়া তোমারে পরাব কিবা সাজে শ্রুতিমূলে ॥ ' ৪৪ ॥

যুগপৎ মাম

মানের কারণ না থাকলেও, নায়ক ও নায়িকা উভয়েরই একসঙ্গে
মানের উদয় হতে পারে।

যথা—

যুগপৎ মানগ্রস্ত শ্রীরাধা ও শ্রীকৃষ্ণকে বৃন্দা বললেন :

‘কেন হে নাগর মুখ নামাইয়া বসিয়া রয়েছে তুমি।

কেন কেন রাই তোমার বদনে বচন নাহিক শুনি ॥

বুঝিলাম মনে তোমরা দুজনে প্রেমেতে করেছ মান।

পুনঃ রতি রসে এখনি ভুলিবে, দুহঁ সে দৌহার প্রাণ ॥’

শ্রীরাধাকে উদ্দেশ্য ক’রে বললেন—জানি জানি হে বিরসবদনে !

এমন কোন অনির্বচনীয় অভ্যাস আছে, যার জন্ত ক্রীড়াকলহে উভয়ের এই মান ভঙ্গ হলো না। ৪৫।

এককালীন কারণাভাসজনিত মান সম্ভব নয়। সেই জন্ত উপশমের সহিত কারণাভাবজনিত মানের উদাহরণ দেওয়া হয়েছে।

যথা বা—

শ্রীকৃষ্ণ নির্জনে বিশাখাকে লীলাকৌতুকচ্ছলে বললেন—সখি !
আমরা দুজনে যমুনাতীরের কুঞ্জগৃহে ছিলাম। থাকতে থাকতে
হঠাৎ দুজনে দুজনকে আর দেখতে পেলাম না। তার জন্ত মিথ্যা
যে মান উপস্থিত হলো, তাতে আমরা দুজনেই ক্লান্ত হচ্ছিলাম।
তারপর, আমি যখন একটি দাড়িস্থ ফল হাতে নিলাম, শ্রীরাধার
মুখে হাসির রেখা ফুটে উঠলো। তখন আমি পরিহাস করতে করতে
তার প্রফুল্ল অঙ্গ আলিঙ্গন করলাম। ৪৬।

নিহেঁতুক মান আপনা-আপনিই উপশমিত হয়, এবং নায়ক
নায়িকাকে হৃদয়ে গ্রহণ করলে, মানময়ী নায়িকার মুখে আপনিই
হাসি ফুটে ওঠে।

এর শেষসীমা অশ্রুপাত পর্যন্ত। হাসতে গিয়েও নায়িকার
চোখে জল আসে।

যথা—

শ্রীকৃষ্ণ রাধিকাকে বললেন, হে রাধে ! তোমার রোষ যদি
বেশীই হয়ে থাকে, তাহলে গণ্ডদেশ এমন প্রফুল্ল হলো কেমন ক’রে !

এই নর্মবাক্যে শ্রীমতীর মুখে হাসির রেখা ফুটে উঠলো। তখন নন্দনন্দন তাঁর প্রিয়তমাকে চুম্বন করলেন।

হেতুজনিত মান সাম, ভেদ, ক্রিয়া, দান, নতি এবং উপেক্ষা প্রভৃতি রসান্তরের দ্বারা উপশমিত হয়। এই মান-উপশমের চিহ্ন বাষ্পমোচন অর্থাৎ চোখের জল মোছা ও হাসি ইত্যাদি।

সাম

প্রিয়বাক্যের রচনাকে সাম বলে। অর্থাৎ মিষ্ট কথায় নায়িকাকে তুষ্ট করে সন্ধি স্থাপন করা।

যথা—

মানিনী শ্রীরাধাকে তুষ্ট করবার জন্য শ্রীকৃষ্ণ বললেন—হে সুন্দরি! যথার্থই আমার গুরুতর অপরাধ হয়েছে, তাই তুমি মান করেছ। তোমার অটল স্নেহই যে আমার একমাত্র আশ্রয়।

শ্রীকৃষ্ণের মুখে এই কথা শুনেই শ্রীমতী নতমুখে অশ্রুমোচন করতে লাগলেন। সেই অবিরল অশ্রুধারা অনঙ্গ-উৎসবের রঙ্গ-মঙ্গলঘট কুচদ্বয়কে জলপূর্ণ করতে লাগলো।

ভেদ

ভঙ্গিদ্বারা নিজেই নিজের মাহাত্ম্য প্রকাশ করা, এবং সখীদের দিয়ে নায়িকাকে তিরস্কার করানো, এই দুই পদ্ধতিতে ভেদ দ্বিবিধ হয়। ৪৭।

ভঙ্গিদ্বারা নিজের মাহাত্ম্য প্রকাশ। ৪৮।

যথা—বিদগ্ধমাধবে

কৌশলে নায়িকার মাহাত্ম্য বর্ণনা ক'রেও তার মানের উপশম করা হয়। নায়িকার এই ধরনের মাহাত্ম্য বর্ণনায় নায়কের মাহাত্ম্যও প্রকারান্তরে প্রকাশিত হয়।

মানিনী শ্রীরাধার রূপবর্ণনা ক'রে শ্রীকৃষ্ণ বললেন—হে মানিনি! তোমার লোচনদুটি চঞ্চল মীনের মতো সুন্দর, উৎকৃষ্ট কঠোর স্তন

তোমারই উপযুক্ত, তোমার ক্রোড়দেশ অতিশয় দীপ্তিশালী, তোমার এই অধর মহানন্দ-সম্বৰ্ধক, মধ্যদেশ অতিক্রীণ—ত্রিবলী বন্ধনযুক্ত, মুখরুচি অতুলনীয় সুন্দর। হে প্রিয়তমে! তুমি এত শোভার আধার হয়েও মনে কেন মানের কলুষ রেখেছ?

পক্ষান্তরে, হে মানিনি! আমি শ্রীকৃষ্ণ, ব্রহ্মাদি দেবগণের বন্দিত হয়েও তোমার স্তুতি করছি। তুমি গোপস্বতী, এর চেয়ে অধিক সৌভাগ্য আর তোমার কি হতে পারে? অতএব সুন্দরি, তুমি মান পরিত্যাগ করো।

এখানে প্রিয়-উক্তির দ্বারা সামের উদাহরণ হলো। তাবার নায়কের স্বীয় বাগ্‌ভঙ্গির দ্বারা ভেদ কীর্তিত হচ্ছে। ৪৯।

যথা বা—

মানিনি শ্রীরাধাকে শ্রীকৃষ্ণ বললেন, হে রাধে! আমি সর্বতোভাবে স্নিগ্ধ হলেও তুমি যখন আমার উপর রুষ্টি হচ্ছে, তখন দোষ তোমার নয়, এ দোষ আমারই। কেন না, দশমদশাপ্রাপ্তা দেববালাগণকে উপেক্ষা করে যখন তোমার ভজনা করেছি, তখন তার ফল আমায় ভোগ করতেই হবে। হে সুমুখি! তুমি ব্রজযুবতী, কেবল প্রেমপীড়িত যৌবনের সেবাই করছো। তাই তুমি কেবল তোমার প্রেমপীড়াই অনুভব করো।

অর্থাৎ, আমার কথা ভাবছো না।

‘স্বর-তরুণীগণ মুখে কত যাচল ব্রজনারী কত চারি পাশে।

সো সব ছোড়ি তোহে হাম সেবহু তুয়া সঙ্গম-রস আশে ॥’

সখার দ্বারা উপালম্ব প্রয়োগ

যথা—

সখীগণ তিরস্কার করে মানিনি ভজাকে বললে, হে সুন্দরি! যিনি শঙ্খচূড় বধ করে সকলের অভয়বিধান করেছেন, তাঁর তুল্য প্রিয়তম নাই। তাঁকে উপেক্ষা করা উচিত নয়। অলঙ্কিতে শ্রীকৃষ্ণ সখীদের দ্বারা এইভাবে ভজার প্রতি উপালম্ব (তিরস্কার) প্রয়োগ করলে,

ভজার নেত্র হতে অশ্রুবিন্দু পতিত হয়ে নাসাগ্রে গজমুক্তার মতো শোভা পেতে লাগলো।

দান

কোন ছলে নায়িকাকে ভূষণাদি উপহার দেওয়াকে দান বলে।

যথা—

শ্রীকৃষ্ণ পদ্মাকে বললেন—পদ্মে ! কামনামে আমার এক প্রিয় বন্ধু আছেন। তুমি যে আমার প্রেয়সী, এই কথা শুনে তিনি এই হার দিয়েছেন তোমার বক্ষে অর্পণ করবার জন্য, যাতে এই হার সঙ্গম-উৎসব প্রাপ্ত হয়।

এই ব'লে দৃহাতে হারটি তুলে ধরে শ্রীকৃষ্ণ পদ্মার গলায় পরাতে উত্তত হলেন। মান-উপশমহেতু পদ্মার মুখে হাসির রেখা ফুটে উঠলো। তাই দেখে, শ্রীকৃষ্ণ তার গণ্ডে চুষন অঙ্কিত করলেন।

নতি

কেবলমাত্র দৈন্ত অবলম্বন ক'রে প্রিয়ার পদপ্রাপ্তে নত হওয়া বা পায়েরপড়াকে নতি বলে।

যথা—

বৃন্দা কুলবল্লীকে বললেন—সখি ! কন্দর্পগণের কাস্তব্বরূপ শ্রীকৃষ্ণ, অপরূপরূপময় মাধব, তাঁর ময়ূরপুচ্ছরচিত চূড়া ভূমিতে লুটিয়ে শ্রীরাধার চরণে প্রণাম করলেন। শ্রীরাধার নয়নমেঘ হতে অবিরল বাষ্পরাশি বর্ষিত হতে লাগলো। তাতেই শ্রীমতীর মানরূপ গ্রীষ্মের অবসান হলো।

উদাহরণ : ‘দেহি পদপল্লবমুদারং’—জয়দেব।

উপেক্ষা

সামাদির দ্বারা যদি মানের উপশম না হয়, তা হলে নায়িকার প্রতি নায়ক যে অবজ্ঞা বা তুষীভাব অবলম্বন করেন, তাকে উপেক্ষা বলে। ৫০।

যথা।

বুন্দা বিশাখার সখীদের বললেন, সুন্দরীগণ ! একে এই প্রিয়তম ব্রজরাজতনয়, তাতে আবার তিমি বীরশ্রেষ্ঠ, এবং তার উপর কন্দর্পকোটিবিজয়ী তাঁর রূপ ! দেখ, এহেন শ্রীকৃষ্ণের প্রতি রাধা কি রুক্ষভাব ধারণ করেছেন। এখন ইনি নির্ভূরমনে দূরে সরে যাচ্ছেন। এ উপেক্ষায় কল্যাণ হবে না। এরূপ ক্ষেত্রে আর কি যুক্তি থাকতে পারে ?

নায়ক যখন দৃঢ়চিত্তে উপেক্ষা প্রকাশ করেন, তখন নায়িকার মান আর থাকে না। সুমেক্ষসম মান প্রচণ্ড আঘাতে ভেঙে পড়ে।

শ্রীকৃষ্ণ সুবলকে বললেন, সখা ! মুহুমূর্ছ নতিদ্বারাও যখন মানের উপশম হলো না, ছুঁনিবার হয়ে রইলো, তখন আমি অবিলম্বে মৌনব্রত অবলম্বন করলাম। তাতে পদ্মার নয়নছুটি বাষ্প বিকীরণ করতে লাগলো। পদ্মা অবশ্য বললে যে, চোখে তার পুষ্প পরাগ পড়েছে, তাই চোখে জল ঝরছে।

অথবা—

উপাসনা পরিত্যাগ করে অম্বার্থসূচক বাক্যপ্রয়োগের দ্বারা যুগাক্ষীদের প্রসন্নতা উৎপাদন করাকেও পণ্ডিতগণ উপেক্ষা বলে থাকেন।

যথা—

শ্রীকৃষ্ণ চন্দ্রাবলীকে বললেন—হে সুন্দরি ! তোমার খন্ডিলে যে নবমালতী ও বামকর্ণে মল্লীপুষ্প দেখছি, তা আমার চেনা। কিন্তু দক্ষিণ কর্ণে যে পুষ্পটি শোভা পাচ্ছে, সেটি তো আমি চিনি না। দেখি, গন্ধ শুঁকে বুঝতে পারি কিনা ! আত্মাণের জন্ত শ্রীকৃষ্ণ নাসাপুট উদ্বৃত্ত করতেই চন্দ্রাবলীর গণ্ডস্থল পুলকিত হয়ে উঠলো। হাসিমুখে শ্রীকৃষ্ণ চুম্বন করলেন।

রসাস্তর

আকস্মিক ভীতিসঞ্চারাদির দ্বারা রসাস্তরের সৃষ্টি হয়। এই রসাস্তর ছ'রকমের হয়, যাদৃচ্ছিক ও বুদ্ধিপূর্বক।

যাদৃচ্ছিক

অকস্মাৎ যে-ভয় উপস্থিত হয়, তাকে যাদৃচ্ছিক বলে।

যথা—

গুরুতর উপায় অবলম্বন ক'রেও শ্রীকৃষ্ণ ভদ্রার মানভঙ্গ করতে পারলেন না। কিন্তু দেখ, হঠাৎ মেঘের গর্জন শুনে, ভদ্রা ভীতা হয়ে ছ' হাতে শ্রীকৃষ্ণের গলা জড়িয়ে ধরলো।

এখানে আকস্মিক ভয়ে রসাস্তর সৃষ্টি হওয়ায় ভদ্রার মানের উপশম হলো।

বুদ্ধিপূর্বক

প্রত্যুৎপন্নমতিত্ব বা সপ্রতিভ বুদ্ধির দ্বারা কাস্ত মানভঙ্গনের যে উপায় অবলম্বন করেন, তাতে রসাস্তর সৃষ্টি হয়। এই রসাস্তরে মান অপনোদিত হয়। ৫১।

যথা—

বৃন্দা পৌর্ণমাসীকে বললেন, দেবি! মানিনী শ্রীরাধার সম্মুখে শ্রীকৃষ্ণ কিছুক্ষণ তুষণীভাব অবলম্বন ক'রে থেকে, লোচন সঙ্কুচিত ক'রে, ত্রাস ও ব্যথার অমুভূতি জানিয়ে, ছল ক'রে বললেন—হঠাৎ আমার হাতে কি একটা বিষাক্ত পঞ্চমুখকীট দংশন করলো।

এই কথা শুনে, শ্রীরাধা তৎক্ষণাৎ ব্যাকুল হয়ে উঠলেন—কি কি হলো, কি কি হলো!

গাঙ্ধার্বিকা উৎকণ্ঠিতা হয়ে নিকটে আসতেই, শ্রীকৃষ্ণ স্থিতমুখে তাঁকে চুম্বন করলেন। ৫২।

অকস্মিক উপায় ছাড়াও, দেশকালবলে মুরলীধবনের দ্বারা
ব্রজসুন্দরীদের মান উপশমিত হয়। ৫৩।

দেশবলে মানোপশমন

যথা—

ভদ্রাকে বৃন্দা বললেন :

‘কুসুমিত কুঞ্জে ভ্রমরগণ গুঞ্জরু বৃন্দাবন বনমাঝ ।

মৃদুমৃদু হাসি নীপতরু মূলহি বৈঠল নাগররাজ ॥

চন্দ্রাবলী তব ছোড়ল মান ।

নাগর দরশ পরশরসলাসে সখীমুখে দেওল নয়ান ॥’

বৃন্দাবনের চারিদিকে ভ্রমরগুঞ্জন ও বনেবনে পুষ্পবিকাশ এবং
সেই সঙ্গে কদম্বমূলে হাস্যবদন প্রিয়তমকে দেখে, চন্দ্রাবলীর নিহেঁতু
মান স্থলিত হলো। তিনি সতৃষ্ণ নয়নে সখীর মুখপানে চাইতে
লাগলেন, অর্থাৎ সখি ! আমি এখন কি করি বলো ?

কালবলে মানোপশমন

যথা—

শ্রীকৃষ্ণকে বৃন্দা বললেন :

‘এ হেন শরৎকালে চন্দ্রছটা ঝলমলে যমুনার তীর শোভা করে ।

তনিয়া সখীর বাণী মান ছাড়ি দিল ধনি অভিসার করিল সত্বরে ॥’

শ্রীরাধা মানিনী হয়ে একান্তে বসেছিলেন। কিন্তু দূতীর মুখে
যখনই তিনি শুনলেন যে, শরতের মধুরমূর্তি সুধাকর সুস্নিগ্ধ
জ্যোৎস্নারশিতে যমুনাতটবর্তী কাননভূমি সুশীতল করেছে, তাঁর
মান নিমেষে দূরে গেল। প্রসন্না হয়ে তিনি অভিসারে উত্ততা
হলেন।

মুরলীধবনিতে মানোপশমন

যথা—

মানিনী শ্রীরাধাকে কোন এক সখী বললে—দেবি ! তুমি মান
পরিত্যাগ করলে না। তা না করো, আমার কিছু বলবার নাই।

কিন্তু দেখো, শেষে একটি ফুৎকারে ওই মান হু গোলে, শ্রীকৃষ্ণের বেণুই বিজয়ী হবে।

যথা বা—

মানিনী শ্রীরাধা শ্রীকৃষ্ণের মুরলীধ্বনি শুনে ললিতাকে বললেন :
‘মান নাহি জানি আমি, মানের উপাধ্যায় তুমি, তোমার বচনে কৈহু মান।
ঐ দেখ বনমাঝে কাহ্নর মুরলী বাজে, সত্বরে আচ্ছাদ মোর কান ॥’

নির্হেতু মান ত্রিবিধ

মানের তারতম্যহেতু নির্হেতু মান ত্রিবিধ হয়। যথা—লঘু, মধ্য ও মহিষ্ঠ বা জ্যেষ্ঠ। ৫৪।

যে মান অতি অগ্নায়াসে স্নানসাধ্য হয়, তার নাম লঘুমান। যা যত্নে সাধ্য হয়, তার নাম মধ্যমান। আর মঙ্গলজনক উপায়ের দ্বারাও যা দুঃসাধ্য, তার নাম মহিষ্ঠ বা দুর্জয়মান। ৫৫।

মানহেতু ব্রজমুন্দরীগণ রোষবশে শ্রীকৃষ্ণের প্রতি যে সব উক্তি ক’রে থাকেন, তার উদাহরণ : বাম, দুর্লালশেখর অর্থাৎ কপটচূড়ামণি, কিতবেন্দ্র অর্থাৎ খলশ্রেষ্ঠ, মহাদুর্ভ, কঠোর, নিলজ্জ, অতিদুর্ললিত, গোপীভুজঙ্গ, রতহিণ্ডক অর্থাৎ নারীচোর, গোপিকাধর্মবিধ্বংসী, গোপসাধ্বাবিভ্রম্বক, কামুকেশ, ঘোরতিমির, শ্রামাত্মা বা কালো বরণ, অম্বরতস্কর বা বস্ত্রহারী, গোবর্ধনতটারণ্যতস্কর বা বৃন্দাবনের বনচোর ইত্যাদি। ৫৬।

ইতি মানপ্রকরণ

প্রেম-বৈচিত্র্য

প্রেমের উৎকর্ষহেতু প্রিয়তমের কাছে থেকেও মনে যে বিচ্ছেদ-ভয় জাগে, তাকে প্রেম-বৈচিত্র্য বলে । ৫৭ ।

যথা—

পৌর্ণমাসীকে বৃন্দা বললেন :

‘কাহ্নক কোড়ে বৈঠি ধনি কহতহি কাঁহা গেও নাগর রাজ ।

কি মঝু দোবে ছোড়ল বরনাগর ইহ বলি পড়ু ক্ষিতি মাঝ ।

এ সখি, কাহ্ন দেহ মুঝে আনি ।

এঁহন রাইক বচনে হরি বিন্মিত বদনে লাগাওল পানি ॥’ ৫৮ ॥

এটি নিহেঁতু প্রেমবৈচিত্র্য । কারণভাসজনিত গোণ প্রেম বৈচিত্র্যের উদাহরণ—

যথা বা—বিদগ্ধমাধবে

বিহ্বলচিত্তা শ্রীরাধা সম্মুখস্থ শ্রীকৃষ্ণকে দেখেও দেখতে পেলেন না । তাই বিলাপের সঙ্গে বললেন—হয় কোন গুরুতর কাজে, না হয় আমার কোন বৈশিষ্ট্য দেখে, পদ্মলোচন শ্রীকৃষ্ণ এই বনে আমায় একাকিনী ফেলে কোথায় চলে গেলেন ! পাশে এমন কোন প্রাণয়িনী নাই, যার দ্বারা তাঁকে আহ্বান করি । আমিই বা আর কেন এখানে নিভূতে বসে থাকবো ! । ৫৯ ।

‘অনুরাগের পরমোৎকর্ষ যেই জন পায় ।

নিজ কোলে পতি তিলে তিলেকে হারায় ॥’

অনুরাগ কোন-কোন স্থলে বিলাসপ্রাপ্ত হয়ে, নায়িকার এমন অবস্থা সৃষ্টি করে যে, সে পার্শ্বস্থিত প্রিয়তমকেও পলেপলে হারিয়ে ফেলে, খুঁজে পায় না ।—কই ! তুমি কোথায় গেলে ? কোথায় গেল আমার প্রিয়তম ?—কই তুমি !—ইত্যাদি বিলাপের সঙ্গে উৎকণ্ঠিত দৃষ্টিতে এ-পাশ ও-পাশে খুঁজে বেড়ায় ।

নায়িকার এই প্রেম-বৈচিত্র্যের সুন্দর উদাহরণ বোপদেব কৃত মুক্তাকল গ্রন্থে পট্টমহিষীদের গীতবিভ্রম প্রসঙ্গে বর্ণিত হয়েছে ।

ইতি প্রেমবৈচিত্র্য প্রকরণ ॥

প্রবাস

যে সব যুবক-যুবতী বা নায়ক ও নায়িকা পূর্বে মিলিত হয়েছে, তাদের মধ্যে যদি দেশান্তরজনিত ব্যবধান ঘটে, পণ্ডিতগণ তাকে প্রবাস বলেন। বিপ্রলম্ভকেও প্রবাসরূপে উল্লেখ করা হয়েছে। কেন না, বিপ্রলম্ভেও বেশ, গ্রাম, বন ও স্থানান্তরের ব্যবধান ঘটে। প্রবাসে হর্ষ গর্ভ মস্ততা ও লজ্জা বর্জন করে, শৃঙ্খারযোগ্য ব্যভিচারী ভাবগুলির উদ্ভব হয়।

প্রবাসভেদ

এই প্রবাস ছরকমের হয়—বুদ্ধিপূর্বক ও অবুদ্ধিপূর্বক।

বুদ্ধিপূর্বপ্রবাস

কার্যানুরোধে স্থানান্তরে যাওয়াকে বুদ্ধিপূর্বক প্রবাস বলে। ভক্তগণের প্রীতিসম্পাদন বা প্রীণনাদি শ্রীকৃষ্ণের কার্যরূপে কথিত হয়েছে।

বুদ্ধিপূর্বপ্রবাস দ্বিবিধ

কিঞ্চিদূর গমন এবং সুদূর গমন ভেদে বুদ্ধিপূর্বক প্রবাস দু'রকমের।

কিঞ্চিদূর প্রবাস—আজ

কোন দূতী গোষ্ঠে গিয়ে গোচারণরত শ্রীকৃষ্ণকে বললে, আজ প্রীরাধা সুরভীগণের পথ চেয়ে অধীর অপেক্ষায় শুধু কৃষ্ণ-কৃষ্ণ করছেন। মুরলীধ্বনির দিকে কাণ পেতে, তোমার প্রতি চিত্ত অভিনিবেশ করেছেন। তোমার আগমন প্রতীক্ষায় প্রীমতী উদ্গ্রীব হয়ে উঠেছেন।

মথা—

‘সুরভিকুলপথিবিহিতনয়না তব নিজনামবলীকৃতরসনা ।
মাধব তব বিরহে বিধুবদনা রাধা খিণ্তি মনসিজ বেদনা ॥
মুরলীনিদাশ শ্রুতিপটুবিষয়া তব মুখকমলে বিনিহিতহৃদয়া ।
শ্রীশ শচীনন্দন কবি পণ্ডিতঃ হরিমিহ জনয়তু বহুতর মুদিতং ॥’

সুদূর প্রবাস—দ্বিতীয়

যথা—

ভাবী, ভবন ও ভূত ভেদে সুদূর প্রবাস তিন প্রকার হয়। এই তিনটিই বুদ্ধিপূর্বপ্রবাস।

বুদ্ধিপূর্বক সুদূরপ্রবাস—ভাবী

যথা—উজ্জবসন্দেশে

কোন ব্রজদেবী ভয়, খেদ ও মনোবেদনা প্রকাশ ক'রে সখীকে বললে—বালা! ব্রজরাজের আদেশে দ্বারপাল গোকুলে ঘোষণা করছে যে, কাল প্রভাতে শ্রীকৃষ্ণ মথুরায় যাবেন। আমার ডান চোখ নাচছে। সে তো অমঙ্গল সূচক! তাই আমার মন চঞ্চল হয়েছে। হায়! ভাগ্যে কি ঘটবে, কে জানে!। ৬১।

বুদ্ধিপূর্বক সুদূরপ্রবাস—ভবন

যথা—ললিতমাধবে

শ্যামলার উক্তি :

উদয়গিরির সামুদ্রেশে সূর্যের লাল আভা প্রতিফলিত হয়েছে। রথে আরোহণ ক'রে গান্ধীতনয় অকুর যাত্রাকালীন নান্দীপাঠ করছেন। সেই নান্দীপাঠ শেষ হওয়ার আগে, হে হৃদয়! তুমি বিদীর্ণ হও। নইলে, ভূখননকারী দ্রুতগামী অশ্বখুরের শব্দে তুমি আর্তনাদ করবে।

বুদ্ধিপূর্বক সুদূরপ্রবাস—ভূত

যথা—উজ্জবসন্দেশে

শ্রীরাধা বিশাখাকে বললেন—হে সহচরি! স্বেচ্ছায় মুরারি দূরে আছেন, সে লোকাভীত বিপদের দুর্দিন অর্থাৎ সাধ্যের অতীত হুঃখ আমায় তত পীড়া দিচ্ছে না। কিন্তু প্রাণরক্ষার জন্য যে আশা হৃদয়ে ধারণ করেছিলাম, তা এখন তীব্র বাড়বানল হয়ে আমার হৃদয়কে দগ্ধ করছে—আমায় অসহ পীড়া দিচ্ছে।

এই বুদ্ধিপূর্বক ভূত সুন্দর প্রবাসে শ্রীকৃষ্ণ ও তাঁর প্রেয়সীরা প্রেমের বশবর্তী হয়ে পরস্পর সংবাদ প্রেরণ করেন।

যথা—উজ্জবসম্বাদে

মথুরা থেকে শ্রীকৃষ্ণ উদ্ধবের দ্বারা শৈব্যাকে সংবাদ পাঠালেন :

‘বিরহের দাহন চক্ষু করি নিমীলন কথোদিন সহিয়া রহিবে।

বন্ধুগণের স্মৃতি করি যাব আমি ব্রজপুরী তবে মোর সঙ্গম পাইবে ॥’ ৬২ ॥

তথা—পদ্মাবলীতে

ব্রজদেবীদের প্রেরিত সংবাদ পেয়ে, শ্রীকৃষ্ণের যে অহুভাব হয়েছিল, দ্বারকা থেকে পৌর্ণমাসী তার বর্ণনা করলেন।

যথা—

ব্রজদেবীগণ শুকপক্ষীর মুখে দ্বারকায় সংবাদ পাঠিয়ে বললেন, হে কৃষ্ণ! যমুনাপুলিন, সাক্ষ্য বায়ুহিল্লোল এবং রম্য চন্দ্রকিরণ চিন্তে সম্ভাপ সৃষ্টি করছে, চিন্ত হরণ করছে না। শুকমুখে ব্রজদেবীদের এই কথা শুনে, দ্বারকার অন্তঃপুরে থেকেও শ্রীকৃষ্ণের দীর্ঘনিঃশ্বাস পড়লো। তাতে রুদ্রিণী প্রভৃতি মহিষীদের গর্ব চূর্ণ হলো।

অবুদ্ধিপূর্বপ্রবাস

পরতন্ত্র বা পরাধীনতার জন্ম যে প্রবাস, তার নাম অবুদ্ধিপূর্ব প্রবাস। এই পারতন্ত্র্য দিব্য ও অদিব্য ইত্যাদি অনেক রকম হয়। ৬৩।

যথা—ললিতমাধবে

শঙ্খচূড় শ্রীরাধাকে হরণ করে নিয়ে গেলে, শ্রীকৃষ্ণ বিলাপ করেছিলেন—হে সুন্দরি! আমি শত শত মনোবাসনায় ব্যগ্র হয়ে এই শারদ-পূর্ণমা নিশীথে বৃন্দাবনের পুষ্পসুরভিত বনবীথিকায় এসেছিলাম। কিন্তু হায়! আমার দুর্ভাগ্যবশতঃ কপট শঙ্খচূড় এসে ভোমায় হরণ করে নিয়ে গেল।

এই প্রবাস নামক বিপ্রলম্বে চিন্তা, জাগর বা নিজাহীনতা, উদ্বেগ, তানব বা তনুক্ষীণতা, মলিনতা, প্রলাপ, উন্মাদ, ব্যাধি, মোহ এবং মৃতি—এই দশ দশা ঘটে।

চিন্তা

অক্রুরের সঙ্গে রথে আরোহণ করে শ্রীকৃষ্ণ যখন বৃন্দাবন থেকে মথুরায় চলে গেলেন, শ্রীরাধা চিন্তা-সাগরে নিমজ্জিতা হলেন। বিরহে তাঁর অন্তর নিরন্তর ঘূর্ণিত হতে লাগলো।

‘যখন গোকুল ছাড়ি হরি গেল। মধুপুরী অক্রুর লইয়া গেল তারে ॥
সেইদিন হৈতে রাধা মনেতে বিরহ বাধা ডুবিল চিন্তার সাগরে ॥’

যথা বা—হংসদূতে

অক্রুর সাথে আরোহিয়া রথে গেল যবে প্রাণনাথ,
কুসুম সমান গোপিনী পরাণে হইল বজাঘাত।
সেই বিরহ সাগরতলে ডুবলো সারা পরাণমন।
ঘূর্ণিঘন ব্যাধির চাপে অশ্রু বারে অনুরূপ ॥

জাগর

যথা—পত্নীবলীতে

বিরহিণী শ্রীরাধা বিশাখাকে বললেন—সখি! যে সব নারী স্বপ্নে তাদের প্রিয়তমকে দেখে, তারা ধন্য। কিন্তু শ্রীকৃষ্ণ চলে যাওয়ার পর থেকে আমার চোখে যে ঘুম নাই। নিজাও বৈরী হয়ে আমায় ত্যাগ করে গেল। সে আর আমার চোখে এলো না, আমি স্বপ্নই বা দেখবো কেমন করে!। ৬৪।

উদ্বেগ

যথা—হংসদূতে

কৃষ্ণবিরহিণী রাই ললিতাকে বললেন—হে সখি! আমার মন যে জলে-পুড়ে গেল। হায়! আমি কি করবো! আমি এই হৃৎ

সাগরের পারাপার দেখছি না। তোমার পায়ে পড়ি, আমায় বলো, কি উপায়ে আমি ঋণকালের জন্তুও ধৈর্য ধারণ করতে পারি।

তানব

যথা—

উদ্ধব বৃন্দাবন থেকে মথুরায় এলেন। শ্রীকৃষ্ণ তাঁকে রাধা ও বিশাখার কথা জিজ্ঞেস করলে, তিনি বললেন—হে যত্নপতি ! তোমার বিরহে শ্রীরাধার মুখপদ্ম স্নান হয়েছে। তাঁর অন্তর নিরানন্দ ও বিষাদম্লান ; অনাহারে দিন যাপন ক’রে, কুচক্ষু শিথিল হয়েছে ; বিরহ-উত্তাপে নিদাঘের ক্ষুদ্র নদীর মতো তনু ক্ষীণ ও শুষ্ক হয়েছে।

মলিনতা

যথা—

শ্রীকৃষ্ণের নিকট উদ্ধবের বিবৃতি :

‘শিশিরের পদ্মজিনি রাধার বদনখানি চক্ষু যেন শারদ উৎপল।

বন্ধুক মলিনতর তার তুল্য ছ’অধর তনু নাহি করে বলমল।’

তোমার অসহ বিরহবিপত্তিতে বিশাখার তনুও মলিন হয়েছে। সূর্যোত্তাপে বিগুষ্ক শরৎকালীন কুমুদপুষ্পের মতো নয়নদুটি নিষ্প্রভ হয়েছে। বিশাখার দশা আর কি বর্ণনা করবো !

প্রলাপ

যথা—মলিনতমাধবে

শ্রীকৃষ্ণবিহনে সারা বৃন্দাবন যেন শূন্যতায় পর্যাসিত হয়েছে। সব ওলট-পালট হয়ে গেল। কোথাও আর কিছু নাই। বিরহিণী রাধা তাই বিলাপ করছেন—সখি ! কোথায় সেই নন্দকুলচন্দ্র ! কোথায় গেল সেই শিখিপুচ্ছধারী ? সেই মোহনমস্তুরলীলধনিকারী শ্রীকৃষ্ণ কোথায় ? কোথায় সেই ইন্দ্রনীলমণিহাতি শ্যাম ? সেই নৃত্যরস-উত্তাল রাসবিহারী আজ কোথায় ? আমার জীবন রক্ষার

পরমৌষধিনিধি, তোমাদের সেই পরমসুস্থ শ্রীকৃষ্ণ কোথায় গেলেন ?
হায় ! হা বিধি, তোমায় ধিক্ ।

ব্যাধি

সখা—ললিতমাধবে

শ্রীমতীর অন্তর যেন ব্যাধিত হয়ে উঠলো । তিনি আর পারছেন না সেই বিরহ সহিতে । বিরহিণী শ্রীরাধা ললিতাকে বললেন—
সখি ! গোকুলপতির বিচ্ছেদ-জ্বর যে পুটপাক স্বর্ণের চেয়েও বেশী
উত্তাপদায়ক, গরলের চেয়েও বেশী জ্বালাময়, বজ্রের চেয়েও বেশী
দুঃসহ, হৃদয়ে বিদ্ধ শেলের চেয়েও কষ্টদায়ক, কঠিন বিষুচিকা রোগের
চেয়েও তীব্র । এই নিদারুণ বিশ্লেষজ্বর আমার মর্মভেদ করছে ।

উদ্ভাদ

বৃন্দাবন থেকে শ্রীরাধার সংবাদ বহন করে এনে উদ্ধব শ্রীকৃষ্ণকে
বললেন—হে মুরারি ! তোমার বিরহে শ্রীরাধা কখনো অকারণ
হাসতে হাসতে গৃহের ভিতর ইতস্তত যুরে বেড়াচ্ছেন, কখনো বা
চেতন ও অচেতন বস্তুকে সমজ্ঞান ক'রে, তোমার সংবাদ জিজ্ঞেস
করছেন । হে সখা, বেশী আর কি বলবো ! তোমার বিষম বিরহে
খেদোক্তি করতে করতে উদ্ভাস্তচিত্ত হয়ে শ্রীমতী ভুলুণ্ঠিতা হচ্ছেন ।

সখা বা—

কোন সখী শ্রীরাধার উদ্ভাদভাব দেখে, অশ্রু এক সখীকে বললে—
মাধবের বিচ্ছেদে আজ শ্রীমতী অকারণ অট্টহাস্ত করছেন । কখনো
উৎকণ্ঠিতা হয়ে অকস্মাৎ চমকে উঠে চীৎকার করছেন । কখনো
বা ডুকরে ডুকরে কেঁদে উঠছেন । কেউ তাঁকে যুক্তি দিয়ে বোঝাতে
পারছে না । মাধবের বিচ্ছেদে তাঁর হৃদয়াবেগ তীব্র হয়ে উঠেছে ।

মোহ বা মুর্ছা

কথা—

বিরহিণী রাধার অবস্থা দেখে, ললিতা মথুরায় শ্রীকৃষ্ণের নিকট পত্র লিখলেন :

‘শুভ্র করে দৈত্যার্ণব দূর করে চিন্তা সব উন্মাদে করে করয়ে স্থগিত ।

মুর্ছা হয় সহচরী রোধয়ে নয়নবারি কণে কণে হারায় সম্বিত ॥’

বিরহে শ্রীমতী দৈত্যের সাগরে ডুবেছেন ; নিরাভরণা, মলিনবেশা ভিখারিণীর মতো হয়েছেন । মুখে কথা নাই । চিন্তাশক্তিও লুপ্ত হয়েছে । উন্মাদ অবস্থাও বিলুপ্ত হয়েছে । চোখের জল শুকিয়ে গিয়েছে । হে কংসারি, সেই পদ্মের মতো সুন্দরী শ্রীরাধার আজ নিদারুণ কৃষ্ণবিরহে একমাত্র সহচরী হয়েছে মুর্ছা ।

মুতি বা মৃত্যু

শ্রীকৃষ্ণ যখন মথুরায় অবস্থান করছিলেন, তখন বিরহিণী শ্রীরাধার অবস্থা দেখে, সখীরা অত্যন্ত ব্যাকুল হয়ে উঠেছিল । যমুনাগুলিনে একটি গুব্রহংসকে দেখে, তারা তাকে দূতরূপে মথুরায় পাঠাবার সংকল্প করলো । ললিতা সেই হংসকে সম্বোধন করে বললেন—হে মরাল ! তুমি দূত হয়ে আকাশপথে দ্রুত মথুরায় যাও । শ্রীকৃষ্ণের কাছে গিয়ে শ্রীমতীর দশা বর্ণনা করে বলো, তাঁর আজ দশম দশা উপস্থিত হয়েছে । কৃষ্ণবিরহে তিনি মরতে বসেছেন ।

বলো, হে রাসক্ৰীড়ারসিক !

‘ছাড়ি পতি নিজজন লইল তোমার শরণ সার কৈল তোমার চরণ ।

তুমি প্রেম ভঙ্গ করে ছাড়িয়া আইলে তারে বড়ই চঞ্চল তুয়া মন ।

রাধায় দিক্ রহ তাখে অজ্ঞাবধি নাসিকাতে তুলা ধরি করি পরীক্ষণ ।

ঘড় ঘড় করে গলা দ্ববৎ চলয়ে তুলা সেই দশা না যায় বর্ণন ॥’

হায় ! পূর্বে তুমি এই শ্রীরাধার প্রতি কতই নবনব প্রণয়লহরী সঞ্চারিত করেছিলে। কিন্তু আজ তুমি আর তার কোন অপেক্ষা রাখো না। তার সম্পর্কে নির্বিকার হয়েছ। খিৎ তার জীবনে, যে আজো তার নিঃশ্বাসবায়ু বইছে।

প্রবাসজাত বিপ্রলম্বে শ্রীমতীর যেমন দশম দশা উপস্থিত হয়, ত্রীকৃষ্ণেরও তেমনই সময়-সময় ওই সব দশা অনুভূত হয়। উপলক্ষণাধারা তার একটি উদাহরণ দেওয়া হলো। ৬৫।

যথা—

ললিতার পত্র পেয়ে উদ্ধব মথুরা থেকে প্রত্যুত্তরে জানানলেন যে, ত্রীকৃষ্ণও রাধা-বিরহে সময়ে সময়ে অত্যন্ত কাতর হচ্ছেন। রত্নশোভিত ক্রীড়াগৃহে ছুৎকফেননিভ শয্যায় পালঙ্কে শুয়েও তিনি শাস্তি পাচ্ছেন না। তাঁর স্মৃতিপটে জেগে উঠছে গিরিগৃহার শিলাতটে শ্রীরাধার সঙ্গে রতিবিলাসের কথা।

‘শয্যা পয়ঃফেন জিনি তাথে বসি যদুমণি রাজ্ঞার সঙ্গেতে বিহরে।

বনে রাধার ক্রীড়াগণ যেই হয় স্মরণ তেই মুচ্ছা হয়ে ভূমে পড়ে ॥’

প্রৌঢ়, মধ্য ও মন্দ প্রভৃতি প্রেমভেদে এবং মধুস্নেহ, স্নতস্নেহ ও মার্জিষ্ঠ প্রভৃতি ভাবগুলির মতো দশাও নানা প্রকার হয়। কিন্তু বাহুল্যবোধে সেগুলির বিস্তৃত বিবরণ দেওয়া হলো না।

প্রেমভেদে অনুভাবের লক্ষণানুযায়ী উক্ত দশাগুলি সাধারণতঃ ষটে। অসাধারণ যে দশাগুলির উদ্ভব হতে পারে, বাহুল্যবোধে সেগুলি উল্লিখিত হলো না। ৬৬।

রতির তারতম্য বিশেষে যে সব মোহনভাব হয়, অর্থাৎ মোদনের বিরহ অবস্থাগত অধিরূঢ় ভাবের অসাধারণ দশাগুলি উদ্ভূত হয়, শ্রীরাধা সম্পর্কে সেই দশাগুলির কথা পূর্বেই উল্লেখ করা হয়েছে। ৬৭।

এ ছাড়াও, বিপ্রলম্ব অবস্থায় যে দিব্যোন্মাদ দশা হয়, তাতে অনেক সময় মানসিক বিবর্ত (Psychic Transformation) প্রভৃতি দশার উদ্ভব হয়। উজ্জলনীলমণিতে এইগুলির বিশেষ উদাহরণ দেওয়া হয় নি। কিন্তু বিজ্ঞাপতি প্রভৃতি কবিগণ তার উদাহরণ দিয়ে লিখেছেন :

‘অক্ষুণ্ণ মাধব মাধব সোড়ারিতে সুন্দরী ভেলি মাধাই।

ও নিজভাব স্বভাব হি বিছুরল আপন গুণ লুবধায় ॥’

বিপ্রলম্ব অবস্থায় অক্ষুণ্ণ মাধবের কথা ভাবতে ভাবতে সুন্দরী যেন নিজেই মাধবত্ব প্রাপ্ত হলেন। কখনো ছুটি হাত তুলে আনমনে বেণুবাদনের ভঙ্গি করেন। কখনো বা ময়ূরপুচ্ছ কুড়িয়ে নিয়ে মাধায় মোহনচূড়া বাঁধেন।

এতস্তিন্ন বিপ্রলম্ব প্রসঙ্গে কোনকোন পণ্ডিত করুণরসের বর্ণনা করেছেন। কিন্তু উজ্জলনীলমণিতে প্রবাস-প্রসঙ্গে সে বিষয় বিস্তৃত আলোচনা করা হয়েছে ব’লে, বিপ্রলম্ব প্রসঙ্গে আর সেগুলি পৃথক্ ভাবে আলোচিত হলো না। ৬৮।

ইতি বিপ্রলম্বভেদ ॥

সংযোগ-বিয়োগ স্থিতি

The States of Union and Separation

প্রেমে যদিও মিলনই মুখ্য, তবুও মিলনের পূর্বে ও পরে যে অবস্থাগুলি থাকে, তাকে অস্বীকার করা চলে না। পূর্বরাগ, মান, প্রেমবৈচিত্র্য ও প্রবাস ইত্যাদি বিপ্রলম্ব অবস্থাগুলি প্রেমের অপরিহার্য আনুষঙ্গিক। প্রেমের সংযোগ-বিষয়ে অর্থাৎ নায়ক-নায়িকার মিলনবিষয়ে পূর্বরাগের সঞ্চার হয় আগে, তারপর আসে সংযোগস্পৃহা। যদিও এই পূর্বরাগ ও সংযোগস্পৃহাকে সম্পূর্ণ পৃথকভাবে দেখা সম্ভব নয়। কেন না, নায়ক বা নায়িকার যখন একজনের অপরকে বা উভয়ের উভয়কে ভালো লাগে, তখন সেই ভালো-লাগার সঙ্গেসঙ্গেই অলক্ষ্যে সংযোগলিপ্সা অন্তরে জাগে। বস্তুতঃ মিলনের পূর্বে বাঞ্ছিত ও বাঞ্ছিতার এই সংযোগলিপ্সার নামই পূর্বরাগ। কিন্তু এই মানসিক স্থিতিকে ততক্ষণই পূর্বরাগ বলা যাবে, যতক্ষণ উভয়ের মধ্যে সংযোগ স্থাপিত না হয়। মিলনের পূর্বমূহূর্ত পর্যন্ত নায়ক-নায়িকার এই অবস্থাকে বিয়োগস্থিতি অর্থাৎ অযুক্ত অবস্থান বলা চলে।

অঙ্ককার না থাকলে যেমন আলোকের অমুভূতি বা অমুমিতি হতে পারে না, বিয়োগস্থিতি না থাকলেও তেমন সংযোগস্থিতিকে উপলব্ধি করা যায় না।

শ্রীকৃষ্ণের লীলাবিশেষকে প্রকটিত করবার উদ্দেশ্যে ব্রজশূন্দরীদের বিরহ-অবস্থার বর্ণনা করা হয়েছে।

বৃন্দাবনে সর্বদাই রাসলীলা ইত্যাদি দ্বারা শ্রীকৃষ্ণ ব্রজাঙ্গনাদের সঙ্গে বিহার করেছেন। তাঁর সেই বৃন্দাবন-লীলায় কখনো বিরহের অবসর ছিল না। কেবলমাত্র প্রকটলীলায় একদা তিনি অক্রুরের অনুরোধে বৃন্দাবন ছেড়ে মথুরায় গিয়েছিলেন। কিন্তু নিত্যলীলায় বস্তুতঃ তিনি সর্বদাই বৃন্দাবনে বিরাজমান। ১।

যথা—পদ্মপুরাণ পাতালখণ্ডে

‘গোগোপগোপিকা সঙ্গে যত্র ক্রীড়তি কংসহেতি ।’

অর্থাৎ গো, গোপ ও গোপাঙ্গনাদের সঙ্গে সেখানে কংসারি আজও ক্রীড়া ‘করছেন’। কদাচ সে ক্রীড়ার অবসান ঘটেনি। বৃন্দাবনে নিত্য বিজ্ঞমান সে লীলা। ২।

‘কংসহা নিত্যক্রীড়া করে বৃন্দাবনে ।

অতএব জানিল নাহি ছাড়ে বৃন্দাবনে ॥’

যেখানে নিত্যক্রীড়া বিজ্ঞমান, সেখানে বিয়োগ বা বিচ্ছেদের প্রশ্ন থাকতে পারে না। সুতরাং রাধাকৃষ্ণের প্রেমলীলায় বিচ্ছেদ ও বিরহ ইত্যাদি অনিত্য। যেখানে শ্রীকৃষ্ণ সেখানেই গোপীপ্রেম। এই প্রেমের কোনো বিরতি নাই, বিরাম নাই, বিচ্ছেদ নাই, বিরহ নাই, অবসান নাই।

কিন্তু কালিন্দীর কূলে, পুষ্পিত কদম্ববনে, শ্রীকৃষ্ণ ও ব্রজাঙ্গনা-দের যে প্রেমলীলা, সে শুধু বৈকুণ্ঠের সম্পদ নয়। এই পূর্বরাগ, অনুরাগ, প্রেম, মান, বিরহ, অভিসার, মিলন, যা রূপায়িত হয়েছে বৃন্দাবনের প্রেমলীলায়, তারই অফুরন্ত ধারা প্রবাহিত হয়েছে জীবলোকে—বিশ্বব্যাপী আনন্দস্রোতে। এই প্রেম ও স্নেহের ভাব-বন্ধন পৃথিবীর পথে মৃত্যুক্লিন্ন জীবনকে অমৃতময় করে তুলেছে। শ্রীকৃষ্ণ ও ব্রজাঙ্গনারা নিখিল বিশ্বের সেই অগণিত নরনারীর প্রতীক্। শ্রীকৃষ্ণ ও ব্রজাঙ্গনাদের অপার্থিব প্রেমের যে মাধুর্যরস, সেই মাধুর্যরসই বিমুক্ত করে রেখেছে বিশ্ব-আত্মাকে। দাস্ত্য, সখা বাৎসল্য ও মাধুর্য, এই চারটি পর্যায়ে প্রেমপ্রবাহকে বিশ্লেষণ করা হয়েছে সত্য। কিন্তু ওই মাধুর্যরসকেই শ্রেষ্ঠ রস বলে অভিহিত করা হয়েছে। কেন না, মাধুর্যরসের আনন্দ পৃথিবীর সকল আনন্দের সীমাকে অতিক্রম করে জীবকে ব্রহ্মস্বাদের স্বরূপ আশ্বাদন করায়। তথ্যগতভাবে শ্রীকৃষ্ণের এই বৃন্দাবন-লীলা বিচ্ছেদ ও

বিয়োগহীন হলেও, যুবক-যুবতীর ভাববন্ধনে পূর্বরাগ, মান, প্রেম-বৈচিত্র্য ও প্রবাস প্রভৃতি বিশ্রলভে বিয়োগ স্থিতি আছে। বিয়োগ এবং বিরহ আছে বলেই মিলন এত মধুর। বিয়োগস্থিতিই সংযোগ স্থিতিকে মধুরতর করে তুলেছে। আবার সংযোগকালের প্রকট মাধুর্যই মাধুরবিরহতাপের মহাউৎকণ্ঠাজনিত মহাভাব ও মাদন ভাবের মাধুর্য প্রকাশে সহায়তা করেছে।

ইতি বিয়োগ-সংযোগ-স্থিতিবিস্তৃতি

সম্ভোগ । ৩।

নায়ক ও নায়িকার পারস্পরিক দর্শন এবং আলিঙ্গনাদির অল্পকূল পরিবেশ সংঘটিত হ'লে, চিন্তে যে উল্লাসের উদ্ভব হয়, তারই আরোহণাবেগে (ascending ecstasy) অর্থাৎ উল্লাসের ক্রমবর্ধমান উৎকর্ষকে সম্ভোগ বলে।

মনীষিগণ এই সম্ভোগকে মুখ্য এবং গোণভেদে দুটিভাগে বিভক্ত করেছেন। ৪।

যুবক-যুবতীর অল্পরাগ সঞ্চারিত হওয়ার পর, যখন দু'জনে দু'জনকে দেখবার এবং আলিঙ্গন প্রভৃতিদ্বারা রতিরসাস্বাদনের সুযোগ পায়, তখন তাদের চিন্তে এক অনির্বচনীয় উল্লাস বা আনন্দ উদ্বেলিত হয়ে ওঠে। এই উল্লাসভাব যদি কোন বাধা না পায়, এবং উত্তরোত্তর বৃদ্ধিমান্ হয়ে চরমোৎকর্ষে উপনীত হয়, তাহলে নায়ক-নায়িকার রতিরসাস্বাদনের সম্ভোগ হয়।

মুখ্য সম্ভোগ

জাগ্রত অবস্থায় দর্শন ও আলিঙ্গনাদির আরোহমান উল্লাস-ভাবে মুখ্য সম্ভোগ বলে। এই সম্ভোগ চতুর্বিধ। পূর্বরাগ থেকে মান ও প্রবাস পর্যন্ত ক্রমপর্যায়ভেদে এই মুখ্য সম্ভোগ চার রকমের। যথা সংক্ষিপ্ত, সঙ্কীর্ণ, সম্পন্ন ও সমৃদ্ধিমান্। ৫।

সংক্ষিপ্ত

সাধারণতঃ পূর্বরাগের পর প্রথম যে মিলনের সুযোগ ঘটে, তাতে নায়ক-নায়িকার সংক্ষিপ্ত সম্ভোগ হয়। লজ্জা ও ভয়ের জন্ম যুবক-যুবতী এই সম্ভোগে অল্পমাত্র উপচার বা ভোগাঙ্গ ব্যবহার করে থাকে। লজ্জা ও ভয় ছাড়াও, এই প্রাথমিক মিলনে নায়ক এবং নায়িকার যথেষ্ট অসহিষ্ণুতা থাকে। সেই জন্ম সম্ভোগ সংক্ষিপ্ত হয়। ৬।

নায়কের সংক্ষিপ্ত সন্তোষ । ৭ ।

যথা—সপ্তমতী গ্রন্থে

নান্দীমুখী ত্রীরাধার সখীদের বললে—সখীবৃন্দ ! ত্রীকৃষ্ণের যে হস্ত গিরিগোবর্ধন ধারণ করেছিল, প্রথম সমাগমে সেই বলশালী হস্তও ত্রীরাধার স্তনস্পর্শে কম্পিত হলো । অনভ্যস্ততাজনিত ভয়, সঙ্কোচ ও লজ্জায় গিরিগোবর্ধনধারী ত্রীকৃষ্ণের অমিত বলশালী হস্তও ত্রীরাধার অঙ্গস্পর্শ করতে গিয়ে কেঁপে উঠলো । সুতরাং রতি সন্তোষের উপচার ও উপকরণগুলির সংক্ষিপ্ত ব্যবহার হলো ।

ত্রীকৃষ্ণ যে হস্তে অবলীলাক্রমে গিরিগোবর্ধন ধারণ করেছিলেন, সেই হস্তে তোমাদের রক্ষা করুন । জন্মাবধি তিনি কখনো স্ত্রীসন্তোষ করেন নি, তাই তিনি জানতেন না যে, এই সন্তোষ কেমন । উপরন্তু ত্রীমতী পরোঢ়া ; পরকীয়াস্বপ্রত্যয়ে তাঁর সঙ্কোচ ও ভীতি সঞ্চারিত হওয়াই স্বাভাবিক । ৮ ।

নায়িকাকর্তৃক সংক্ষিপ্ত সন্তোষ

যথা—

ত্রীরাধা ত্রীকৃষ্ণের সঙ্গে নবসঙ্গমে প্রবৃত্ত হলে, ত্রীকৃষ্ণ যখন চুম্বনোত্তম হলেন, ত্রীমতী বজ্রাঙ্কলে মুখ ঢাকলেন । আলিঙ্গনে উত্তম হলে, অঙ্গলতা কুটিল হলো অর্থাৎ সঙ্কোচভরে বক্রতা ধারণ করলো । ত্রীমতী লজ্জায় ভুয়ে পড়লেন ; রতিলীলাপ্রসঙ্গিত কথায় অব্যক্ত অনুরাগে নির্বাকু রইলেন । তবুও কোন বাধা না দিয়ে, মুহূর্ত্তদনের আনন্দবিধান করলেন । ৯ ।

‘রসের পদবী নাগর कहয়ে রাই না উত্তর করে ।

নূতন সঙ্গমে রসের সাগরে ভাসাল নাগর বরে ।’

সংকীর্ণ সন্তোষ

সন্তোষকালে যদি মনে পড়ে যে, নায়ক বিপক্ষের গুণকীর্তন করেছিলেন এবং তাকে, অর্থাৎ সন্তোষরতা নায়িকাকে, বকনা

করেছিলেন, তাহলে আলিঙ্গন ও চুম্বনাদির উপকরণ সংকীর্ণ হয়ে আসে ; নায়িকা উদারভাবে দয়িতকে রতিপূজার উপচারগুলি তুলে দিতে পারে না। এ ক্ষেত্রে সম্ভোগ সংকীর্ণ হয়। তপ্ত ইক্ষু চর্বন করলে যেমন মিষ্টরস ও উত্তাপ দুই একসঙ্গে অনুভূত হয়, তেমনি সংকীর্ণসম্ভোগে নায়িকার চিত্তের উত্তাপ এবং রতিরসের মধুরতা একসঙ্গে আত্মাদিত হয়। ১০।

যথা—

পৌর্ণমাসী একদিন শ্রীরাধাকে অভিসারে পাঠিয়ে, লতামণ্ডপের অন্তরাল থেকে শ্রীমতীর চিত্ত-উত্তাপযুক্ত মধুর কেলিমাধুর্য দেখে বলেছিলেন—

কংসরিপুর সঙ্গে সম্ভোগরতা শ্রীরাধার এই অমুয়াযুক্ত অমৃতময় জল্পনা, মাৎসর্য, মানের উপশম, রম্য কটাক্ষ এবং প্রস্ফুরিত পরম সুন্দর মুখইন্দুশোভিত অনঙ্গক্রীড়াসকল জয়যুক্ত হোক। ১১।

যথা বা—

‘মুখবিধু চুম্বনে রাই কহই পুনঃ জাহ চক্রাবলী গেহ।

নিবিড় আলিঙ্গনে মান ভরমে তহি ধীরে ধীরে কুঞ্চই দেহ ॥’

গার্গী নান্দীমুখাকে বললে—সখি! মানের উপশম হলেও শ্রীরাধার মুখকমল একটু বক্র হয়েই রইল, বিশেষ প্রসন্ন হলো না। নয়নের দৃষ্টি কুঞ্চিত হয়ে, ধীরেধীরে ঈর্ষাই প্রকাশ করতে লাগলো। যাক্যও অমুয়ায় মলিন হলো। যদিও শ্রীরাধার মধুর আকৃতি মানের পরিচয় দিল, তবুও শ্রীকৃষ্ণকে তিনি সুখী করলেন। ১২।

সম্পন্ন সম্ভোগ

প্রবাস থেকে ফিরে এসে কাস্ত দয়িতার সঙ্গে মিলিত হ’লে সম্পন্নসম্ভোগ হয়। নায়ক নায়িকার এই সঙ্গম আগতি ও প্রাহুর্ভাব ভেদে দু’প্রকার।

আগতি

লৌকিক ব্যবহারের দ্বারা নায়ক এসে মিলিত হলে, তাকে বলে আগতি ; অর্থাৎ যেখানে স্বাভাবিক নিয়মে নায়ক ফিরে আসেন, কোন চেষ্টা বা আকস্মিক আবির্ভাবের কারণ থাকে না।

যথা—উদ্ধবসঙ্গেশে

শ্রীকৃষ্ণ বন থেকে গোষ্ঠে ফিরে আসছেন, এই কথা শ্রীরাধাকে জানিয়ে, বিশাখা বললে—হে রাধে ! বল্লবীগণের চিত্তহারী গুঞ্জামালা শোভিত মুকুন্দ তোমার সঙ্গে মিলিত হওয়ার জগু হাসিমুখে এসেছেন। তাঁর বিরহে তুমি সারাদিন ক্লান্ত হয়ে আছো। হে মূহূলে, গুরুজনের ভয়ে আর মন্দাক্ষী হয়ে থেকো না। গৃহ ছেড়ে কুঞ্জ দেউলে এসো। এখনই তোমার মনোবাঞ্ছা পূর্ণ হবে।

‘ছাড়ি গুরুজন লাজ এসো গো অঙ্গনমাক বিরহেতে হয়্যছ দুঃখিনী।
বন হৈতে শ্যামরায় আসিয়া মিলিল তায় বাহ্যাপূর্ণ হইবে এখনি।’

প্রাতুর্ভাব

প্রেমবিহ্বলা বিরহিণী নায়িকার সম্মুখে নায়কের অকস্মাৎ আবির্ভাবের নাম প্রাতুর্ভাব।

যথা—শ্রীমন্তাগবত দশমে

রাস বিপ্রলম্বের পর হঠাৎ শ্রীকৃষ্ণের প্রাতুর্ভাবে গোপিনীদের যে অবস্থা হয়েছিল, তার বর্ণনা করে শুকদেব বললেন—হে রাজন্ ! গোপীগণের রোদন শুনে, শ্রীকৃষ্ণ পীতবাস পরিধান ক’রে মালা ও অলঙ্কারে ভূষিত হয়ে, অকস্মাৎ হাসিমুখে তাদের সামনে এসে এমন ভাবে উপস্থিত হলেন যে, দেখে মনে হলো, যেন সাক্ষাৎ মন্থথেরও মন্থথ। তাঁর সেই রূপ দেখে, কামদেবের চিত্তও মোহিত হয়।

এখানে গোপাঙ্গনাদের সম্পন্ন-সন্তোগ সাধিত হয়।

কোন কোন পণ্ডিতের মতে, দেশান্তর থেকে এসে যদি হঠাৎ

নায়ক তাঁর প্রিয়তমার সম্মুখে উপস্থিত হন, তাহলে তাকেও প্রাহুর্ভাব বলে।

যথা বা—হংসদূতে

প্রোষিতভর্তৃকা শ্রীরাধা ললিতাকে বললেন—সখি! স্বপ্ন-সম্ভোগের কথা দূরে থাক। বাস্তব সম্ভোগের কথা যা বলছি, তাই শোনো। মনের বিভ্রম-বুদ্ধিতে অবিশ্বাস ক'রো না। তোমার ব্যস্ত সেই গোবর্ধন হঠাৎ অসময়ে বনে এসে, কৌতুকভরে যে কামকলহের পাণ্ডিত্য দেখালেন, তা অতুলনীয়। প্রাহুর্ভাব-সম্ভোগের সঙ্গে স্বপ্ন-সম্ভোগের তুলনা হয় না। ১৩।

পরিণত প্রেমে বা রূঢ়ভাবে বিপ্রলম্বের পর যে সম্ভোগ হয়, তাতে পরিপূর্ণ আনন্দ ও পরমসুখ সঞ্চারিত হয়। এ অবস্থায় বিরহ ঘটলে, সে বিরহের পীড়া দ্বিগুণ হয়। কিন্তু যদি অহুরাগের জন্ত নায়কের স্মৃতি ও প্রাহুর্ভাব হয়, তাহলে সুখোৎসবে নায়িকার সর্ব-অভীষ্ট পূর্ণ হয়। ১৪।

বিপ্রলম্বের পর এই প্রাহুর্ভাবে যদি সম্ভোগ সম্পন্ন না হতেই আবার বিরহ ঘটে, তা হলে নায়িকার চিন্তে অসহ জ্বালায় সৃষ্টি হয়। অমৃতরাশির আশ্বাদন করতে গিয়ে জীবনপাত্র গরলে পূর্ণ হয়ে ওঠে।

পদ উদাহরণ :

‘অমিয় সাগরে সিনান করিতে সকলি গরল ভেল।’

সমুজ্জ্বল্য সম্ভোগ। ১৫।

পরাদীনতার জন্ত যদি নায়ক ও নায়িকা পরস্পরের নিকট হতে বিচ্ছিন্ন হয় এবং তাদের দেখা সাক্ষাৎ দুর্লভ হয়ে ওঠে, সে ক্ষেত্রে অতিরিক্ত সম্ভোগ বা পারস্পরিক উপভোগের সুযোগ উপস্থিত হলে, সমুজ্জ্বল্য সম্ভোগ হয়। ১৬।

যথা—ললিতমাধবে

শ্রীরাধা নববৃন্দাকে বললেন—যাঁর দর্শন আশায় বিরহ-অনলে দগ্ধ হয়েও এই দেহ ধারণ করে ছিলাম, অস্তুঃকরণউৎপাটনকারী নিদারুণ মনঃপীড়ারূপ অতিবৃষ্টি সহ করেছি, কালিন্দীতটে কুটীর বিবরে ক্রীড়াভিসারে সেই জীবিতবন্ধুর ইন্দুবদন পুনরায় বারবার আশ্বাদন করলাম। ১৭।

যথা বা—ললিতমাধবে

সব সময় যাঁর দর্শন পাওয়া অসম্ভব, সেই শ্রীরাধাকে দীর্ঘ প্রবাসের পর কাছে পেয়ে, শ্রীকৃষ্ণ আনন্দিত হৃদয়ে বললেন—প্রিয়ে। তুমি নিখিললোকলক্ষ্মী। আমি তোমার চিহ্ন খুঁজতে এসে, সাক্ষাৎ তোমায় পেলাম। এ যেন কল্পনাতীত সৌভাগ্য! পৃথিবীতে যে চণকমুষ্টি খুঁজে বেড়াচ্ছে, সে যদি হঠাৎ কনকবৃষ্টি লাভ করে, তার যে অবস্থা হয়, তোমায় পেয়ে আমার সেই অবস্থা হয়েছে। ১৮।

এখানে দীর্ঘ প্রবাসের পর শ্রীরাধার দর্শনলাভে শ্রীকৃষ্ণ পরম সম্পদ লাভের সৌভাগ্য জ্ঞাপন করছেন। এক্ষেত্রে নায়ক ও নায়িকার মিলনে যে সম্ভোগ রস আশ্বাদিত হলো, তাকে সমৃদ্ধিমান সম্ভোগ বলে।

পূর্বে যে চতুর্বিধ সম্ভোগের কথা বলা হলো, সেগুলির প্রত্যেকটি আবার ‘প্রচ্ছন্ন’ ও ‘প্রকাশ’ ভেদে দ্বিবিধ। এই বিশ্লেষণমূলক ভেদগুলি রসোল্লাসকর নয় ব’লে, সেগুলির বিস্তৃত বিবরণ উল্লিখিত হয় নি।

ইতি।মধুরসগরিপাক-বিবেক ॥

গৌণ সন্তোগ

প্রহর ও প্রকাশ ভেদে সন্তোগের দ্বিবিধ বিশ্লেষণ অতি-উল্লাসকর ময় বলে, সে সম্পর্কে বিস্তৃত আলোচনা করা হলো না। কিন্তু গৌণ সন্তোগের বিষয় বিশেষ ভাবে উল্লেখযোগ্য। ১।

স্বপ্নে শ্রীকৃষ্ণকে বা নায়ককে পেয়ে, নায়িকা যে সন্তোগ-রস আন্বাদন করেন, তাকে গৌণ সন্তোগ বা স্বপ্ন-সন্তোগ বলে। সামান্য ও বিশেষ ভেদে স্বপ্ন দু'রকমের হয়। যা সামান্য, তা পূর্বে 'ব্যভিচারিভাবে' আলোচিত হয়েছে। আর যে স্বপ্নে জাগ্রত অবস্থার স্থায়ী হৃদয়ের মিলন হয়, তাকে বিশেষ স্বপ্ন বলে। এই বিশেষ স্বপ্নে জাগর্যা বা জাগ্রত অবস্থার সঙ্গে কোন প্রভেদ থাকে না। এ এক মহা-অদ্ভুত অবস্থা। এই জাগর্যা-নির্বিশেষ স্বপ্নে নায়ক-নায়িকা অনেক সময় রতিসন্তোগের পরিপূর্ণ রসান্বাদন করে। ভাব ও উৎকণ্ঠাময় স্বপ্নবিশেষ পূর্বের মতো চার রকমের হয়, যথা—সংক্ষিপ্ত, সংকীর্ণ, সম্পন্ন ও সমৃদ্ধিমান।

স্বপ্নে সংক্ষিপ্ত-সন্তোগ

যথা—

স্বপ্নে শ্রীকৃষ্ণের সঙ্গলাভ ক'রে, পূর্বরাগবতী শ্রীরাধা বিশাখাকে বললেন :

‘হৃন্দর কালিন্দীতীরে গোবিন্দ বিহার করে নবান্ধোদজিনি তনুখানি ।

মাথায় বিনোদচূড়া তাহে গুঞ্জা ছড়াছড়া সে বড় রসিক শিরোমণি ॥

নিকটে আসিয়া মোরে বদনচূষন করে সভয় নয়নে পুনঃ চায় ।

আমি থাকি শয়নে এই ঘেঁষি স্বপনে এ বড় আমার হল দায় ॥’

প্রিয়সখি ! স্বপ্নে সেই বিদম্বুচূড়ামণি বলীয়ান্ নবযুব। অল্পদিন আমার মুখচূষন করলেন। মুহূর্তে আমার তনুমন অপূর্ব সন্তোগরসে আশ্রুত হলো। ২।

স্বপ্নে সংকীর্ণ-সন্তোষ

শ্রীমতীর কোন মুখা সখী বললে—প্রিয়সখি! তুমি ক্লান্ধা হয়ে না। আমার কিছুমাত্র দোষ নাই। আমি অসময়ে মানের উপশম করি নি। হে স্নুমুখি! তোমার সেই মূর্ত নাগর স্বপ্নে আমায় দেখা দিয়ে, আমার উপর রসবৃষ্টি করেছিলেন। তাতেই আমার অন্তরব্যাপী মানের আগুন আপনা-আপনি উপশমিত হলো। ৩।

স্বপ্নে সম্পন্ন বা সম্পূর্ণ সন্তোষ

যথা—হংসদূতে

মাথুর বিরহে কাতরা শ্রীরাধা ললিতাকে বললেন : সখি !

‘আমারে ছাড়িয়া হরি গেল যদি মধুপুরি কিবা ক্ষতি আছেয়ে আমার ।

যাহ তুমি কোন পুরি স্থখেতে রহিও হরি আমার মরণ মাত্র সার ॥

তুমি গেলে মধুপুরি আমি আছি দুখে মরি তুমি পুনঃ আসিয়া স্বপনে ।

সবলে রমণ করি যাহ পুনঃ মধুপুরি এত জালা সহিব কেমনে ॥’

সেই নিষ্ঠুরচূড়ামণি আমায় ত্যাগ ক’রে মথুরায় গিয়েছেন। সেখানে তিনি স্বচ্ছন্দে থাকুন, কিন্তু আমার মরণ ছাড়া কোনো গতি নাই। কেন না, স্বপ্নে তিনি বৃন্দাবনে এসে বলপূর্বক আমায় রমণ করছেন। এ আমি সহিব কেমন করে? কোন্ স্ত্রী এটা সহিতে পারে! ৪।

স্বপ্নে স্ফুটমান্ সন্তোষ

যথা—ললিতমাধবে

শ্রীরাধা নববৃন্দাকে বললেন—

‘আজিকার স্বপন শুনলো সুন্দরী নাগর আসিয়াছিল ।

আদর করিয়া আমার নিকটে কত রস বিরচিল ॥

স্বপনে দাক্ষণ অক্রুর না ছাড়ে রথ লয়া এলো তাই ।

দেখিয়া পরাণে কাঁপিয়া মরি যে কত করি হায় হায় ॥’

সখি! স্বপ্নে গোবিন্দ আমার নয়নের অঙ্গনভূমিতে এসেছিলেন।

কিন্তু হায়! রাজপুরুষ অন্ধুর এসে তাঁকে রথে আরোহণ করিলে
আবার মধুরায় নিরে গেলেন। ৫।

নায়ক ও নায়িকা দুজনেরই একরকম স্বপ্ন-সম্ভোগ হতে পারে,
যেমন অনিরুদ্ধ ও উষার এককালীন অবাধে স্বপ্ন সম্পন্ন হয়েছিল।
নায়ক-নায়িকাদ্বয়ের স্বপ্ন কখনো কখনো এককালীন-সত্য হয়। ধারা
প্রণয়সিদ্ধ তাঁদের এই পরম অদ্ভুত স্বপ্নের ফল জাগ্রত অবস্থাতেও
দেখা যায়। ৬।

প্রেমের পঞ্চম অবস্থায় উপনীতা গোপাঙ্গনাদের স্বপ্ন সম্ভব হয়
না। তাদের রজোগুণবৃত্তিজাত জুস্তগমাত্র হয়। ৭।

কৃষ্ণভাবের বিলাস অতি মনোহর; আশ্চর্য স্বপ্নবিস্তারের দ্বারা
শ্রীকৃষ্ণের সঙ্গে অতিনিবিড় সঙ্গম সংঘটিত করে। ৮।

উল্লিখিত সংক্ষিপ্ত, সংকীর্ণ, সম্পন্ন ও সমৃদ্ধিমান স্বপ্নসম্ভোগের
বিষয় আলোচনা করলে দেখা যায় যে, এইসব স্বপ্নে স্পষ্টতঃ
সম্ভোগরতির অমুভব-দশা উপস্থিত হয়। ৯।

অমুভব-দশা বলতে সন্দর্শন, জল্পনা, স্পর্শ, পথরোধ, রাস,
বৃন্দাবনক্রীড়া, যমুনায় জলকেলি, নৌ-খেলা (Rowing), লীলাচৌর্য
(বাঁশী বা বসন ইত্যাদি চুরি ক'রে লুকিয়ে রাখা), কপট নিজ্রা,
লুকোচুরি, বস্ত্রাকর্ষণ, চুষন, আলিঙ্গন ইত্যাদি বুঝায়।

সন্দর্শন

যথা—ললিতমাধবে

শ্রীরাধা কুন্দলতাকে বললেন—হে চঞ্চলাক্ষি! যতক্ষণ শ্রীকৃষ্ণের
দোহল্যামান-মকরকুণ্ডলশোভিত গণ্ডস্থল ও মুখপদ্ম তুমি সন্দর্শন না
করো, ততক্ষণই তোমার মনে গুরুজন ও কুলমর্যাদার ভয় থাকে।
একবার দেখলে, মনে আর কোন ভয় বা লোকলজ্জা থাকে না।

‘তাবত গুরু ভয় তাবত কুলে মন বয় তাবত হয় ধর্মের আচার। -

বাবত কুণ্ডলধারী পরম মোহন হয় নাহি হয় নয়নগোচর।’

জঙ্গল

যথা—

পরম্পরের গোষ্ঠী অর্থাৎ বান্ধবজনের সঙ্গে রক্ত আলাপ বা টুক্ কেটে কথা বলা, এবং বিতথোক্তি বা মিথ্যা বাদানুবাদ ও কথোপকথন ইত্যাদিকে জল্প বা জল্পনা বলে। ১০।

পরম্পর গোষ্ঠী

যথা—দানকেলিকৌমুদীতে

দানঘাটে শ্রীকৃষ্ণ শ্রীমতীর পথরোধ করলে, শ্রীমতী বললেন—
কুলস্ত্রীদের ধর্ষণ করলে, রাজা কখনই ক্ষমা করবেন না। তান
শাস্তি দেবেন।

উত্তরে শ্রীকৃষ্ণ বললেন—ভুজঙ্গ যদি দাঁত দিয়ে ওই সব স্ত্রীদের
দংশন করে, তাহলে ভাল হয়। এখানে ভুজঙ্গ অর্থে কামসর্প। ১১।

শ্রীকৃষ্ণ আবার বললেন—রাধে! তুমি মঙ্গলমূর্তি, নব
চন্দ্রকলার মতো তোমার ললাটফলক। কৃষ্ণবর্ণ পদ্মবিশিষ্ট সুন্দর
চোখদুটি তোমার অভিনব সম্পদ। মনোহর তার বিলাসদৃষ্টি।
শিবের মতো তোমার ওই উজ্জ্বল নেত্রাঞ্চলে কন্দর্পও বিদগ্ধ হচ্ছেন।
তোমার বক্ষে আমায় স্থান দাও। আমায় ভোগী পুরুষশ্রেষ্ঠ বলে
স্বীকার করো। ১২।

বিতথোক্তি জল্প

যথা—দানকেলিকৌমুদীতে

শ্রীকৃষ্ণ শ্রীরাধা এবং অশ্বাশ্ব গোপাজ্ঞানাদের বললেন :

‘এই গিরিগোবর্ধনে কতদিন নারীগণে হয়ে নিলাম বসনভূষণ।

নারীসব নয় হল বৃক্ষপত্র পহিরল উপকার কৈল লতাগণ ॥’

দানঘাটে শ্রীকৃষ্ণ শ্রীমতী ও অশ্বাশ্ব গোপাজ্ঞানাদের ভয় দেখিয়ে
বললেন—শ্রোবর্ধনপর্বতে আমি হরিগনয়নাদের বসনভূষণ কেড়ে
নিয়ে, তাদের জৈনধর্মে দীক্ষা দিয়েছিলাম, অর্থাৎ দ্বিগত্বরী

করেছিলাম। তখন তারা দীনচিন্তা হয়ে, কাকুতিমিনতি করেছিল। গাছের পাতা ও লতা দিয়ে অগ্নি আচ্ছাদন ক'রে লজ্জা নিবারণ করেছিল। ১৩।

একথা শুনে, শ্রীমতী ও গোপাঙ্গনারা স্বভাবতই বাদানুবাদ করেছিলেন। কেন না, শ্রীকৃষ্ণ এই উক্তিদ্বারা তাঁদের প্রকারান্তরে এই ভয়ই দেখিয়েছিলেন যে, দরকার হলে আবার তিনি তাঁদের বিবস্ত্রা করবেন।

স্পর্শ

যথা—

কোন এক লঘু-প্রখরা যুথেশ্বরী কোন অধিকমৃদ্বী সখীর সঙ্গে রসিকতা ক'রে বলেছিল—সখি! তুমি আর শপথ করো না। ভুজঙ্গরাজ শ্রীকৃষ্ণ তোমায় ভুজভুজঙ্গের দ্বারা স্পর্শ করেছিলেন। তুমি সেই স্পর্শে অতিশয় দূষিতা হয়েছ। হে কপটিনি! তাই তোমার অনুপম তনু কম্পিত হয়ে ঘর্মাক্ত হয়েছে। দেখ, সর্বাত্মক রোমাঞ্চিত হয়েছে। ১৪।

বস্ত্ররোধন বা পথরোধ

যথা—বিদগ্ধমাধবে

শ্রীরাধা যাচ্ছিলেন সূর্যপূজা করতে। গিরিপথে যেতে, হঠাৎ শ্রীকৃষ্ণ এসে তাঁর পথরোধ করে দাঁড়ালেন।

শ্রীমতী বললেন—আমি সূর্যপূজা করতে যাচ্ছি। আমার পথ ছাড়ো।

শ্রীকৃষ্ণ বললেন—রাধে! এপথে এসো না। এপথে চারিদিকে পর্বতশৃঙ্গ স্কুটশিলায় আচ্ছন্ন, শ্যামল বেতস-বন ও বাঁশবনে সান্নিধ্যের পরিপূর্ণ। এই পথে সামনের ওই উজ্জ্বল পর্বত অতিক্রম ক'রে তুমি কেমন ক'রে যাবে! তার চেয়ে, যমুনাতীরের পথে চলে।

রাসক্রীড়া

যথা—

বিমানচারিণী কোন দেবী অশ্রু এক দেবীকে বললেন :

‘কৃষ্ণ জিনিবধন তড়িৎ যেন গোপীগণ তড়িতের মাঝে জলধর ।

তড়িৎ মেঘের মাঝে সমসখা হয়ে সাজে রাসলীলা বড় মনোহর ॥’

রাসলীলায় গোপাঙ্গনাদের সঙ্গে নৃত্য করতে করতে শ্রীকৃষ্ণ গোপাঙ্গনার স্কন্ধে হাত রেখে ইতস্তত ভ্রমণ করছেন। বিদ্যুৎ-সমা উজ্জ্বলা গোপবধূর পাশে নবজলধরশ্যাম শ্রীকৃষ্ণকে দেখে যেন মেঘ ও বিদ্যুতের সমন্বয় বলে মনে হয়। দেখ, সখীরা শ্রীকৃষ্ণের করান্বজ ধারণ ক’রে তাঁর সঙ্গে নৃত্য করছে।

বৃন্দাবন-লীলা

যথা—

শ্রীকৃষ্ণ শ্রীরাধাকে বললেন :

‘হৃলপদ্ম বিকশিত তাথে ভ্রমরের গীত স্ততি করে তোমার চরণে ।

কুন্দফুল রাশিরাশি তোমার চরণে আসি দণ্ডবৎ করে দস্তগণে ॥

তোমার অধর দেখি বিষফল হল দুখী চেয়ে দেখ রম্য বৃন্দাবনে ।’

প্রিয়ে। ওই দেখ, তোমার বশীভূত বৃন্দাটবী বিলাসময় হয়ে উঠেছে। পুষ্প-পত্রে উল্লসিত হয়ে, সারা বৃন্দাবন যেন তোমার আনন্দবিলাসের লীলাভূমি হয়ে উঠেছে।

‘রাধিকারে সঙ্গে লয়া হরি বেড়ায় ধোখাইয়া ।

বিহরয়ে বড় সুখী মনে । ১৫ ।’

যমুনায় জলকেলি

যথা—

যমুনায় শ্রীকৃষ্ণ রাধিকা ও গোপাঙ্গনাদের সঙ্গে জলকেলি করছিলেন। বিশাখা শ্রীকৃষ্ণকে বললে—তোমার সঙ্গে শ্রীরাধার জলকেলি-যুদ্ধে শ্রীরাধার দ্বারা উৎসিক্ত জলরাশিতে তোমার

গলার মালা ছিঁড়ে পড়েছে, কপালের তিলক ধুয়েমুছে গিয়েছে, মুখচন্দ্র বক্ষস্থ কৌস্তভমণিতে প্রতিবিম্বিত হচ্ছে, এবং তোমার চিকুর বন্ধনমুক্ত হয়েছে। তুমি চকিত হয়ে না, আমার সখী কখনই তোমার মতো প্রিয়জনকে পীড়া দেবেন না।

এখানে জলকেলিতে শ্রীরাধার নিকট শ্রীকৃষ্ণের পরাজয় স্মৃতিত হচ্ছে। তিনি যেন বিপর্যস্ত হয়ে পড়েছেন।

যথা বা—পদ্মাবলীতে

যেমন চক্রবাক্দম্পতির দিবসে মিলন এবং রাত্রে বিচ্ছেদ ঘটে, তেমনি জলক্রীড়াকালে শ্রীকৃষ্ণের লীলাচঞ্চল করতলের দ্বারা শ্রীরাধার মুখচন্দ্রমা কখনো মুক্ত, কখনো বা আচ্ছাদিত হচ্ছে; অর্থাৎ আলো ও আঁধারে যেমন চখা-চখির মিলন ও বিরহ ঘটে, তেমনি বিমুক্তি ও আচ্ছাদনে শ্রীরাধার মুখচন্দ্রের সঙ্গে শ্রীকৃষ্ণের নয়নচকোরের মিলন ও বিচ্ছেদ ঘটছে। এই অপরূপ জলক্রীড়া-কৌতুকী শ্রীকৃষ্ণ জগৎকে রক্ষা করুন।

নৌখেলা বা নৌকাবিহার

যথা—

শ্রীরাধা শ্রীকৃষ্ণকে বললেন—হে মাধব। তুমি বলছো, যমুনায় তরঙ্গ নাই, নৌকাখানিও নূতন; তোমার কথা সত্য। কিন্তু এইটাই সবচেয়ে আশঙ্কার কথা যে, তুমি ভাল নাবিক হলেও অতিচঞ্চল। স্রুতরাং ভয় হয়, হয়তো মাঝনদীতে নৌকা ডুবিয়ে দেবে।

লীলাচৌর্য

বংশী, বস্ত্র ও পুষ্পাদি হরণকে লীলাচৌর্য বলে। কখনো কখনো নায়িকা নায়কের অনবধানতার অবসরে তাঁর কোন জিনিস চুরি করে লুকিয়ে রাখেন। কখনো বা নায়ক নায়িকার কোন দ্রব্য অপহরণ করে লুকিয়ে রাখেন।

বংশীচৌধ

যথা—পদ্মাবলীতে

সখীগণের উক্তি :

‘চরণ নুপুর ছাড়ি গেলা রাধা ধীরধীরি না করিয়া কঙ্কণনিষ্কণ ।
নিজায় আছিল হরি নিল বংশী চুরি করি হাসি হাসি করিল গমন ॥’

বজ্রচৌধ

যথা—

শ্রীকৃষ্ণের ভীতিসঞ্চার উদ্দেশ্যে বিবজ্রা গোপীগণের উক্তি :

‘তরুপত্র বজ্র করি যাও এক সহচরী আনহ বজ্রের বৃদ্ধাগণ ।

এই বজ্রবাটপাড়ে আসি যেন গালি পাড়ে, স্তখে মোরা করিব দর্শন ॥’

যমুনার জলে দাঁড়িয়ে বিবজ্রা গোপিনীরা বললে—কুমারীগণ শ্রীকৃষ্ণ যদি বসন ফিরিয়ে না দেন, তোমাদের মধ্যে কেউ একজন বৃক্ষপত্রে অঙ্গ আচ্ছাদন ক’রে গিয়ে, বৃদ্ধাদের ডেকে আনো। তাঁরা এসে, এই উমাত্রত-পরায়ণা কুমারীদের লাঞ্ছনাকারী শ্রীকৃষ্ণকে তিরস্কার করুন ; আমরা মনের আনন্দে দেখি।

পুষ্পচৌধ

যথা—

শ্রীরাধা একাকিনী শ্রীকৃষ্ণের পুষ্পোচ্ছানে পুষ্পচয়ন করছিলেন। তাঁকে ধরবার ইচ্ছা ক’রে শ্রীকৃষ্ণ বললেন—অগ্নি মৃগনয়না। তুমি প্রতিদিন গোপনে এই উচ্ছান থেকে পুষ্পমঞ্জরী অপহরণ করো। হে তঙ্করি। সৌভাগ্যক্রমে অনেককাল পরে আজ তুমি ধরা পড়েছ। কাজেই আর প্রোড়ি করো না, বেশী প্রবীণতা দেখাবার চেষ্টা করো না। চৌধ-অপরাধের শাস্তি গ্রহণের জন্য ওই গুহারূপ কারাগৃহে প্রবেশ করো।

ঘাট বা ঘাট

যথা—দানকেলিকৌমুদীতে

দানঘাটে শ্রীকৃষ্ণ ললিতা ও অশ্বাশ্ব সখীদের বললেন—তোমরা ঘাটোয়ালকে ঘাটের শুষ্ক না দিয়ে, তাকে অবজ্ঞা ক'রে তার সঙ্গে বিবাদ করছো। আমার মনে হয়, তোমরা ওই গিরিতটের বিষম ছুর্গে ঘাটরাজের সঙ্গে রণ করতে চাও। ১৬।

‘আমি ত ঘাটের রাজা না করি তাহার পূজা বিবাদে চঞ্চল কৈলে মন।
বুঝি গিরিকুঞ্জবনে ঘাটের রাজার সনে তোমরা করিবে মহারণ ॥’

কুঞ্জাদি লীনতা

যথা—বিদগ্ধমাধবে

কুঞ্জমধ্যে লুকিয়ে থাকা বা লতাগুল্লের অস্তরালে নাগিকার আত্মগোপন ক'রে থাকাকে কুঞ্জাদিলীনতা বলে।

শ্রীরাধা কুঞ্জমধ্যে লুকিয়ে ছিলেন। তাঁকে খুঁজতে খুঁজতে শ্রীকৃষ্ণ বনের ভিতর প্রবেশ ক'রে বললেন—আমার মনে হয়, শশিমুখী নিবিড় ক্রীড়ামোদের জন্ত এই অশোকবনের অস্তরালে কোথাও লুকিয়ে আছেন। নইলে পুষ্পামোদী এই অশোকবৃক্ষ ঘিরে ভ্রমরেরা স্তবগুঞ্জন করবে কেন? তাঁর চরণের স্পর্শ পেয়ে নিশ্চয়ই অশোকবনে পুষ্পসমাগম হয়েছে।

সুন্দরীদের চরণস্পর্শে অশোকবৃক্ষে পুষ্পসমাগম হয়। তাই অশোকবনে দোহদ উৎসবের অনুষ্ঠান ক'রে, রমণীগণ অশোকবৃক্ষে চরণাঘাত করেন।

এখানে অশোকবৃক্ষ ঘিরে অলিকুলের স্তবগুঞ্জন শুনে, শ্রীকৃষ্ণ পূর্বাঙ্কে সেখানে শ্রীরাধার চরণ স্পর্শ অনুমান করছেন।

মধুপান

সখা—

বৃন্দা পৌর্ণমাসীকে বললেন—দেবি। মধুপাত্রে শ্রীকৃষ্ণের মধুর মুখচন্দ্র প্রতিবিম্বিত হয়েছে। শ্রীরাধা নির্নিমেষ দৃষ্টিতে সেই প্রতিবিম্বের দিকে চেয়ে আছেন। শ্রীকৃষ্ণ বারবার অমুরোধ করা সত্ত্বেও তিনি মধু পান করছেন না।

‘কৃষ্ণের বদনচন্দ্র মধুপাত্রে প্রতিবিম্ব দেখে রাধা স্থস্থির নয়নে।

যাচয়ে নাগররায় তবু মধু নাহি খায় রৈন চেয়ে প্রতিবিম্ব পানে ॥’

মধুপাত্রে নায়কের মুখচ্ছবি প্রতিবিম্বিত হয়েছে। চুমুক দিয়ে সেই পাত্র থেকে মধুপান করবার জন্ত অমুরোধ করা সত্ত্বেও, নায়িকা মধুপান না ক’রে সেই মুখপানে চেয়ে আছেন। দয়িতের মুখ-চন্দ্র-প্রতিবিম্বিত মধুপাত্রে অধরস্পর্শের অমুরোধ অতিমধুর রতি নিবেদন জ্ঞাপন করে।

বধুবেশ ধারণ

সখা—উদ্ধবসঙ্ক্ষেপে

শ্রীরাধার সঙ্গে বিশাখার যে আলাপ হয়েছিল, উদ্ধব তার মাধুর্য অনুভব করেছিলেন। তাঁকে সেই রস পুনরায় আন্বাদন করাবার জন্ত শ্রীকৃষ্ণ বললেন—সখা। শ্রীরাধা মান করেছিলেন। কোন রকমেই তাঁর মানভঞ্জন করা যায়নি। সেইজন্ত আমি নারীবেশ ধারণ ক’রে তাঁর কাছে গিয়েছিলাম। শ্রীরাধা আমায় দেখে বিশাখাকে জিজ্ঞেস করেছিলেন—সখি। এই শ্যামবর্ণা নারীটি কে ?

বিশাখা বলেছিলেন—উনি একটি গোপকন্যা।

শ্রীরাধা জিজ্ঞেস করেছিলেন—কিন্তু এখানে এসেছেন কেন ?

বিশাখা উত্তর দিয়েছিলেন—তোমার সঙ্গে বন্ধুত্ব করবার জন্ত এসেছেন। উনি তোমার বয়স্কা হবার জন্তই জন্মেছেন। ওঁকে বারংবার আলিঙ্গন করো।

এই কথা শুনে, ত্রীরাধা আলিঙ্গনে প্রস্তুত হয়ে যখন জানতে পারলেন যে, আমিই বহুবেশ ধারণ করেছি, মানিনী লজ্জিতা হলেন।

কপট নিজা

যথা—কর্ণামৃত

ব্রজবালার সঙ্গে রমণ করবার উদ্দেশ্যে ত্রীকৃষ্ণ নিজার ভান করে এই লীলা করে থাকেন। নিজেকে অল্প-অল্প সংবৃত করে রাখেন। তাঁর মুখে যুহুহাসির রেখা ফুটে ওঠে। তাঁকে নিদ্রিত দেখে, গোপাঙ্গনারা অবশ্যে প্রেমের লীলাবাক্য আলোচনা করেন; তাঁদের তনু রোমাঞ্চিত হয়। ত্রীকৃষ্ণ মিথ্যা নিজায় মুদিত নয়নে থেকে, কান পেতে তাঁদের সেই জল্পনাবাক্যের রসোপলব্ধি করেন। ত্রীকৃষ্ণের সেই মুদিতনেত্র শয়ানমূর্তির আমরা উপাসনা করি। ১৭।

‘দেখসিরা হরি কপট করিয়া শয়ন করিয়া রয়।

মুখে যুহুহাসি ছাপিয়া রাখয়ে তনু প্রকাশিত হয় ॥’

দ্যুতক্রৌড়া বা পাশা-খেলা

যথা—

বৃন্দা কুন্দলতাকে বললেন :

‘রাইকাহ পাশা খেলে সখীগণ গুটি চালে পণ কৈল অধরচূষন।

কখন জিতয়ে হরি কভু জিতে সুন্দরী হাততালি দেয় সখীগণ ॥’

ত্রীকৃষ্ণ পাশা-খেলায় পণ জয় ক’রে ত্রীরাধার দক্ষিণ গণ্ডে চূষন অঙ্কিত করলেন। তারপর ত্রীরাধা “বামগণ দংশ” ব’লে পাশা চাললেন। এই কথা শুনে, ত্রীকৃষ্ণ হল ক’রে বললেন—সুন্দরি! তুমি যা আঙা করলে, তা আমার শোনা উচিত। এই ব’লে তিনি ত্রীমতীর বামগণ দংশন করতেই ত্রীমতী কোণভরে ভুজলতা দিয়ে ত্রীকৃষ্ণের কণ্ঠদেশ বেঁটন করলেন। ১৮।

বজ্রাকর্ষণ বা পটাকৃষ্টি

যথা—ললিতমাধবে

কুঞ্জমধ্যে শ্রীকৃষ্ণ যখন শ্রীরাধার বক্ষোবস্ত্র অপহরণ করেছিলেন তখন শ্রীমতী লজ্জায় নিকুঞ্জের নিবিড় অন্ধকারে লুকিয়েছিলেন। শ্রীকৃষ্ণ তাঁকে খুঁজবার জন্য অন্ধকার কোণে প্রবেশ করলেন। তাঁর বক্ষস্থিত কৌমুদ্যমণি থেকে যে কিরণ বিচ্ছুরিত হচ্ছিল, তাতে অন্ধকার বিদূরিত হলো। শ্রীমতী লজ্জিতা হলেন।

‘আজি ত নিকুঞ্জঘরে রাধাবস্ত্র নিলাম হরে তাথে লুকাইল অন্ধকারে।
কৌমুদ্যমণির সার তাথে কৈল উগ্ধকার আমা দেখি রাধা লজ্জা করে।’

চুপন

যথা—

রূপমঞ্জরী তার সখীকে বললে :

‘রাইক বচন কমলবর সুন্দর চুপই নাগর রায়।
কমল বিপিনে যেন অলিবর বিহরই পুনঃপুনঃ মধু পিয়ে তার।’ ১২।

আলিঙ্গন বা আশ্রয়

যথা—

শ্রীরাধার কোন সখী অশ্রুসখীর কাছে বর্ণনা করে বললেন—
শ্রীমতী যখন শ্রীকৃষ্ণকে আলিঙ্গন করলেন, তখন যে শোভা হলো, তা বর্ণনা করি শোন। অতিশয় হর্ষে নবকুঙ্কমগোরাঙ্গী শ্রীরাধা নবঘনহ্যতি শ্রীকৃষ্ণকে আলিঙ্গন করলেন। দেখে মনে হলো, যেন স্বর্ণলতাবেষ্টিত তমালবৃক্ষের সৌন্দর্য্যও গ্লান হয়ে গেল। ২০।

মধুকৃত

যথা—

শ্রামলা পরিহাস ক’রে শ্রীরাধাকে বললে—সখি! তোমার কুচযুগল দেখে, কুচ ব’লে মনে হয় না। মনে হয়, তুমি তোমার গজেন্দ্রগমনে গজরাজকে পরাজিত ক’রে, তার কুস্তহটি হরণ ক’রে

নিয়ে আপন হৃদয়ে স্থাপন করেছ। আর এই স্তনদ্বয়ে যে ক্ষতচিহ্ন দেখছি, সে যেন নাগদমন ত্রীকৃষ্ণের নখাক্ষুণ্ণ চিহ্ন।

‘গতিতে কুঞ্জর জিনি তার কুন্ত হরে আনি রাখিয়াছ আপন হৃদয়ে।

ত্রীনাগদমনকৃত নখাক্ষুণ্ণ চিহ্ন যত প্রকাশিত হইয়া আছেয়ে ॥’

বিশ্বাধরসুধা পান

স্বথা—

দুতী ত্রীরাধাকে বললে—হে করভোরু! তুমি তোমার ওই সুধাকরবিশ্ববিনিন্দিত অনিন্দ্য মুখকমল হাত দিয়ে ঢেকো না। বরাজনে! তোমার অধররূপ রঞ্জনকুসুমের মধু কদম্ববনের ওই ভ্রমর পান করুক। ২১।

‘সুধাকরসুধা ব্যর্থকারী মুখ আচ্ছাদ না কর করে।

নাগরভ্রমর পান কর তাহা আপনার আশা পুরে ॥’

সম্প্রয়োগ

স্বথা—

কুম্ভলতার প্রতি বৃন্দার উক্তি :

‘রাধিকার কঙ্ক বেরি হস্ত প্রসারিল হরি অধরের সুধা করে পান।

রাধার হয় ভাবোলম দৌহে অতি মনোরম ক্রীড়াবিধি করয়ে নির্মাণ ॥’

ত্রীরাধাকে বাহুবন্ধনে আবদ্ধ ক’রে, কন্দর্প উৎসববিশারদ ত্রীকৃষ্ণ নিধুবনে ক্রীড়া বর্ধন করতে লাগলেন।

বিজনে সন্তোগ ছ’রকমের হয়; সম্প্রয়োগ ও লীলাবিলাস। বিদগ্ধগণের মতে, লীলাবিলাসে যে নিবিড় সন্তোগসুখ আন্বাদিত হয়, সম্প্রয়োগে তা হয় না।

স্বথা—

সখীগণ গবাক্ষপথে তাদের দৃষ্টি নিবদ্ধ ক’রে, ত্রীরাধা ও ত্রীকৃষ্ণের লীলাবিলাসদর্শনে সেই সন্তোগের রসান্বাদন করলেন :

শ্রীকৃষ্ণ যখন বলপূর্বক আলিঙ্গনে উত্তত হলেন, শ্রীরাধা তাঁর অঙ্গে নখরাঘাত করতে লাগলেন। শ্রীকৃষ্ণ তাঁর বস্ত্রাকর্ষণে প্রবৃত্ত হলে, শ্রীরাধা তাঁর হস্তস্থিত নীলপদ্মের দ্বারা শ্রীকৃষ্ণকে আঘাত করতে লাগলেন। এইভাবে শ্রীরাধা সম্প্রয়োগ-রতি অপেক্ষা লীলা-বিলাসের দ্বারা শ্রীকৃষ্ণের অধিক সুখবিধান করলেন।

‘হরি আলিঙ্গয়ে তাথে রাই করে নখাঘাতে কৃষ্ণ যেই করয়ে চূষন।

বসন কেলাঞা মায়ে হরি পুনঃ বস্ত্র ধরে রাধা করে উৎপল তাড়ন ॥

গোবিন্দ উৎপল ধরে শুক রোদন করে কপটে করয়ে কোপাভাস।

সঙ্গমের শতগুণ তাথে আনন্দিত মন রাধা সঙ্গে সদাই বিলাস ॥’

এই লীলাবিলাসে পরম্পরের যে সুখাস্বাদন হয়, সম্প্রয়োগ-সম্ভোগে সে সুখ আশ্বাদিত হয় না।

যথা বা—

নর্মকলাচ্ছলে শ্রীকৃষ্ণ শ্রীরাধাকে পরিহাস করলে, শ্রীরাধার নয়নের দৃষ্টি কুটিল হয়ে উঠলো, ভ্রু কুঞ্চিত হলো। বলপ্রকাশের কৃত্রিম প্রয়াস করলে, শ্রীরাধা কর্ণোৎপলদ্বারা তাঁকে আঘাত করতে লাগলেন। এইরূপে ব্রজাঙ্গনাদের রতিগুরু শ্রীকৃষ্ণ গান্ধর্বিকার সঙ্গে লীলাখেলা করতে লাগলেন। এই ক্রীড়া সুরতোৎসবের চেয়ে অনেক বেশী সুখের আশ্বাদ বিস্তার করতে লাগলো।

তথাঃগীতগোবিন্দে

শ্রীরাধা ও কৃষ্ণের পরম্পর সুরতারম্ভে যে আনন্দলহরী উদ্ভূত হয়, তা রসিকজনের অল্পভবেত্ত। পরম্পরের নিবিড় আলিঙ্গন জনিত পুলকাকুরসজাত লীলাখেলা, সতৃষ্ণ নয়নের দৃষ্টি, অধরসুখা পান, নর্ম-আলাপ এবং মন্থকলাযুদ্ধে আনন্দাহুভূতির জগ্ম মিলনের বিদ্ব উপস্থিত হয়েছিল। পরম অভীষ্ট লাভের তৃষ্ণায় শাস্তি বিস্মিত হলো, এবং অবশেষে সেই রস সুরস হয়ে রসোৎকর্ষ স্থাপিত হলো। সার্থক হলো শ্রীরাধাকৃষ্ণের মহামিলন।

একসমাপনে মঙ্গলাচরণ

যথা —

হে গোকুলানন্দ, হে গোবিন্দ, হে গোষ্ঠেন্দ্রকুলচন্দ্র ! হে প্রাণেশ,
হে সুন্দরোত্তম, হে নাগরশিখামণি, হে বৃন্দাবনচন্দ্র, হে গোষ্ঠ-
যুবরাজ, হে মনোহর ! ইত্যাদি নামে ব্রজদেবীগণ তাঁদের প্রিয়তমকে
এণয়সম্ভাষণ করে থাকেন । ২২ ।

‘এই মত কৃষ্ণের করে প্রিয় সম্বোধন ।

কিঞ্চিৎ দেখাল তার দিগ্‌দরশন ।

অতুল্য অপার সেই মধুররসসিদ্ধ ।

তটস্থ হইয়া তার পাইল একবিন্দু ॥’

যেমন সমুদ্রের তল নাই এবং পার নাই, তেমনি এই মধুররস
অতল ও অপার । এই অপার ও অতলস্পর্শ মধুররসে কেউ
অবগাহন করতে পারেন না । এই অন্তহীন অপার রসসমুদ্রের তট
ভূমিতে দাঁড়িয়ে শুধু সেই মধুররসকে স্পর্শ করা যায় মাত্র ।
আমিও তটস্থ হয়ে শুধু স্পর্শই করলাম । ২৩ ।

হে দেব । গহনমহাঘোষ বৃন্দাবন-সাগরোৎপন্ন উজ্জল শৃঙ্গাররস
এই উজ্জলনীলমাণ তোমার মকরকুণ্ডল-পরিসরে সেবাসমুচিত
ভজনা করুক । ২৪ ।

ইতি—সম্বোগভেদ

উজ্জলনীলমণিনামগ্রন্থ সমাপ্ত

পরিশিষ্ট

বিপ্রলভের প্রকারভেদ

পূর্বরাগ, মান, প্রেমবৈচিত্র্য ও প্রবাস

পূর্বরাগ

- ১। সাক্ষাৎ দর্শন
- ২। চিত্রপটে দর্শন
- ৩। স্বপ্নে দর্শন
- ৪। বন্দীমুখে অবগ
- ৫। দূতীমুখে অবগ
- ৬। সখীমুখে অবগ
- ৭। গুণী জনের গীতশ্রবণ
- ৮। বংশীধ্বনি শ্রবণ

প্রেমবৈচিত্র্য

- ১৭। শ্রীকৃষ্ণের প্রতি আক্ষেপ
- ১৮। নিজপ্রতি আক্ষেপ
- ১৯। সখীর প্রতি আক্ষেপ
- ২০। দূতীর প্রতি আক্ষেপ
- ২১। মুরলীর প্রতি আক্ষেপ
- ২২। বিধাতার প্রতি আক্ষেপ
- ২৩। কন্দর্পের প্রতি আক্ষেপ
- ২৪। গুরুজনের প্রতি আক্ষেপ

মান

- ৯। সখীমুখে অবগ
- ১০। স্তবমুখে অবগ
- ১১। মুরলীধ্বনি শ্রবণ
- ১২। বিপক্ষগাত্রে ভোগাক্ষ দর্শন
- ১৩। প্রিয়গাত্রে ভোগচিহ্ন দর্শন
- ১৪। গোত্রস্থলন
- ১৫। স্বপ্নে দর্শন
- ১৬। অন্তর্নায়িকার সঙ্গ দর্শন

প্রবাস

- ২৫। ভাবী
- ২৬। মথুরাগমন
- ২৭। দ্বারকাগমন
- ২৮। কালীয়দমন
- ২৯। গোচারণ
- ৩০। নন্দমোক্ষণ
- ৩১। কার্ণাভ্যুদয়
- ৩২। রাসে অস্ত্যধান

সভোগের প্রকারভেদ

সংক্ষিপ্ত, সংকীর্ণ, সম্পন্ন ও সমৃদ্ধিমান্

সংক্ষিপ্ত সভোগ	সংকীর্ণ সভোগ
৩৩। বাল্যে মিলন	৪১। মহারাস
৩৪। গোষ্ঠে গমন	৪১। জলক্রীড়া
৩৫। গোধোহন	৪৩। কুঙ্কলীলা
৩৬। অকস্মাৎ চূড়ন	৪৪। দানলীলা
৩৭। হস্তাকর্ষণ	৪৫। বংশীচুরি
৩৮। বজ্রাকর্ষণ	৪৬। নৌকাবিলাস
৩৯। বজ্ররোধ	৪৭। মধুপান
৪০। রতিভোগ	৪৮। সূর্যপূজা
সম্পন্ন সভোগ	সমৃদ্ধিমান্ সভোগ
৪৯। স্বদূর দর্শন	৫৭। স্বপ্নে মিলন
৫০। ঝুলন যাত্রা	৫৮। কুরুক্ষেত্রে
৫১। হোলী লীলা	৫৯। ভাবোন্মাস
৫২। প্রহেলিকা	৬০। ব্রজাগমন
৫৩। পাশাখেলা	৬১। বিপরীত সভোগ
৫৪। নর্তক রাস	৬২। ভোজন কৌতুক
৫৫। রসালস	৬৩। একত্র নিদ্রাবস্থা
৫৬। কপট নিদ্রা	৬৪। স্বাধীনভর্তৃকা।

রস-প্রবাহ

দুটি শাখা—বিপ্রলভ ও সন্তোষ

(ক) বিপ্রলভ চতুর্বিধ

অনুক্রমণিকা

(১) পূর্বরাগ—৮ (২) মান—৮ (৩) প্রেমবৈচিত্র্য—৮ (৪) প্রবাস—৮

শ্রবণ	সহেতু	অনুরাগ	নিকট প্রবাস
দ্বীপুখে	১ (ক) শ্রুত	আক্ষেপানুরাগ	১ গোচারণ ১
সখীমুখে	১ সখীমুখে ১	উল্লাসানুরাগ	১ নন্দমোক্ষণ ১
গুণগান	১ শুকমুখে ১		২ কালীয়দমন ১
ভাটমুখে	১ মুরলীপ্রস্তাবে ১		কার্ধাহরোধে ১
বংশীধ্বনি	১	৩ রূপানুরাগ	১ রাসে অন্তর্ধান ১

	৫ (খ) অহুমিতি	কৃষ্ণপ্রতি আক্ষেপ ১	৫
	ভোগাঙ্কচিহ্ন	নিজপ্রতি " ১	
দর্শন	প্রিয়পাত্রে ১	মুরলীপ্রতি " ১	১ ভাবী ১
স্বপ্ন দর্শন	১ বিপক্ষপাত্রে ১	সখীপ্রতি " ১	১ ভবন ১
সাক্ষাৎ দর্শন	১ বাক্য-স্থলন ১	দ্বীপ্রতি " ১	১ ভূত ১
চিত্রপট দর্শন	১	৩	৫ ৩

	৩ নিহেতু	১ রসোল্লাস	১ মোট—৮
মোট—৮	১ কারণাভাস	১ মোট—৮	
	১ অতিকারণ		

	২		
	মোট—৮		
নায়ক—ধীরোদাত্ত	নায়ক—ধীরশাস্ত	নায়ক—শঠ	
নায়িকা—খণ্ডিতা	নায়িকা—বিপ্রলঙ্কা	নায়িকা—প্রোষিতভর্তৃকা	
করণরস	করণ রস	বীভৎস রস	
শোকভাব	উৎসাহভাব	জুগুপ্সাভাব	
৪	৪	৪	

নায়ক—ধীরশাস্ত : কিঞ্চিদ্র প্রবাস

নায়িকা—বিপ্রলঙ্কা

অভূত রস

উৎসাহভাব

নিকট প্রবাস

চতুর্বিধ বিপ্রলভ—প্রত্যেক অবস্থায়

মোট—৩২ প্রকার ।

(খ) সঙ্কোচ চতুর্বিধ

অনুক্রমণিকা

(১) সংক্ষিপ্ত (২) সঙ্কীর্ণ (৩) সম্পূর্ণ (৪) সমৃদ্ধিমান্

পূর্বরাগান্তর	মানান্তর	কিঞ্চিদূর প্রবাসান্তে	সুদূর প্রবাসান্তে
বাল্যে	১ মহারাস	১ সুদূর দর্শন	স্বপ্নে মিলন
গোষ্ঠে	১ কুঞ্জলীলা	১ দোললীলা	কুঞ্জক্ষেত্র
গাভীদোহে	১ দানলীলা	১ হোলিলীলা	বাক্‌বিলাপে
চুষনে	১ নৌকাবিলাস	১ গ্রহেলী	১ ব্রজাগতে
স্পর্শনে	১ বংশীচৌধ	১ দ্যুতকীড়া	১ ভোজনকৌতুকে
বস্ত্রাকর্ষণে	১ মধুপান	১ নর্তক রাস	১ একত্র নিত্যায়
পথরোধে	১ সূর্যপূজা	১ রসালস	১ বিপরীত সঙ্কোচ
রতিভোগে	১ স্বয়ংদূতী	১ কপট নিজা	১ স্বাধীনভর্তৃকা

মোট

মোট—৮

মোট—৮

মোট

নায়ক—ধুষ্ট

নায়ক—ধীরললিত

নায়িকা—খণ্ডিতা

নায়িকা—বাসকসজ্জিতা

ভয়ানক রস

রোজ রস

ক্রোধভাব

বিশ্ময়ভাব

৪

নায়ক—দক্ষিণ

নায়ক—অহুকুল

নায়িকা—অভিসারিকা

নায়িকা—স্বাধীনভর্তৃকা

হাস্ত রস

মধুর রস

হাস্তভাব

রতিভাব

সঙ্কোচ চতুর্বিধ—প্রত্যেকটি অষ্টপ্রকারে মোট—৩২

বিপ্রলম্ব চতুর্বিধ—প্রত্যেকটি অষ্টপ্রকারে মোট—৩২

সর্বসমেত—৬৪ রস

ক্রমসংশোধন—

১ম পৃষ্ঠা,	১ম পংক্তি	‘সদানন্দ’	হলে	‘সদানন্দম্’
	১৬শ	‘আলোচনাই’	”	‘বিস্তৃত আলোচনাই’
৮১	১২শ	‘ব্যপদেশে’	”	‘ব্যপদেশে’
১২৪	১৮শ	‘নিবেদঃ’	”	‘নিবেদ’
৩৫২	২য়	‘মিথ্যা’	”	‘কপট’

